





CC
IV
24

217

1



2

BENED. F. PATRIC.

*Academicarum Con-
templationum*

In quibus PLATO explicatur,
& PERIPATETICI
refelluntur.



UNIVERSITA NAZ.
ROMA
VITTORIO EMANUELE


CID ID X C.

Rt Hon. Wm Pitt Rivers

L. de la Roche

12-32-C-1

Handwritten text in a cursive script, likely a signature or name, located at the bottom of the page.



VIRO CLARISSIMO,
SENATORI AMPLISSI-
MO, AC EQVITI SPLENDI-
dissimo, Paulo Theupo-
lo, patruo, ac alteri
parenti,

STEPHANVS THEVPOLVS
S. P. D.

N O M I N V M scien-
tiam, admirabilē quan-
dam esse sapientiam; &
in nominibus eximiam
latere virtutem, tam
miro consensu viri in
omni doctrina Principes existimarunt;
vt Priscæ illæ nationes, Aegyptij, He-
bræi, Græci, de recta nominum institu-
tione mirum in modum fuerint solli-
citæ: & ea nec nomina quidem esse cen-
suerint; quæ rerum naturam, quibus
imposita essent, apta significatione nō

æmularentur, & quasi exæquarent. A Græcis patruī dicti sunt *Παῖοι*, hoc est, diuini: eamque vocem adeò commendarunt Etrusci, ac Itali ferè omnes; vt eandem, quanuis aliunde acceptam, & peregrinam, in proprium vsū familiarissimè conuerterint; & vsque ad nostra tēpora, vt dignam æternitate, conseruauerint. Eius nominis hanc esse conuenientem rationem constat; vt moncantur nepotes, se interna quadā naturæ lege diuinitus animis nostris inserta teneri, patruos suos, vt rem diuinam colere, & venerari. Nec equidē iniuria: nam patruī sunt, veluti geminatio quædam paternæ imaginis: eiusque virtutis, quæ in progenitoribus effulget, amplificatio, ac exemplar familiare, & conspicuum rectæ nepotum institutionis, à quo in eos admirabiles quidā virtutis radij, & afflatus salutare emanant. Cū verò omnes rectè instituti nepotes id efficere teneantur; ego tamen præsertim me tibi deuinctum esse sentio: cū tu mihi, nedum sis patruus; verū insuper patruus maximè præcla-

præclarus; vniuersæ nostræ familiæ decus, & ornamentum; patruus meorum studiorum consultor, & fautor; ac demum institutionis meæ exemplar ita splendidum, vt splendidius exoptare non valeam. Vtinam mihi tātum esset virium, vt re ipsa me aliquando tali patruo nepotem non indignum præstare possem. Quod tamen ad me pertinet; omni studio, cura, ac diligētia operam dabo; vt alis ingenij mei, qualescūque illæ sint, à terra sublatus, tuos gressus eminus obseruare; teque, vt optimum itineris ducem, longè insequi possim. Cū itaque, & naturæ lege, & propensa animi mei voluntate, ad te colēdum, & suspiciendum trahar; eodem iure, me tibi studiorum quoque meorum debere rationē reddere persentio. Pro quo obeūdo munere, tempus opportunius nec exoptare quidem valuissē. Cū enim tu permultis legationibus apud varios Principes pro R. P. foelicissimè perfunctus, nuper in eodem munere apud Pontif. Maxim. summa cum omnium admiratione præclarissimè

te gesseris: vbi ad nos reuersus es; animaduerti te ab amplissimis Senatoribus, & à cunctis ciuitatis ordinibus, committere appellari, salutari, & amplecti. Quare ego, qui maximè omnium, lætitia perfusus sum; maximè quoque omnium, conspicuum aliquod insignis congratulationis signum edere debeo, cumque aliud illustrius proferre non valeam; hos Academicarum Contemplationū libros promere, tibi que dicare constitui; vt vnà cum eis te salutans, & studiorum meorum tibi rationem reddens, congratulationem meam insigniorem patefacerem; ac eorum quasi habitu indutus, me tibi gratiorem offerrem. Spero autē, multis de causis eos tibi futuros non ingratos: tum, quia sunt foetus eius animi, qui tuus est: tum præterea, quia sunt fructus ex Academicorum campis decerpti; quos semper tibi visos fuisse dulcissimos, animo nobili apprimè salutare, virisque ciuilibus mirum in modum accommodatos, frequenter verbis, & exemplis non vulgaribus
ostend.

ostendisti: tum demum; quia sunt formati, non sine consilio, & auxilio virorum in vtraque disciplina, & Platonis, & Aristotelis illustrium; Thomæ Peregrini, & Frācisii Piccolominei; quorum non solū publicis lectionibus, verū domesticis quoque sermonibus familiarissimè vsus sum; quibus etiam nihil antiquius esse perspexi, quā, vt insignem eorum in te obseruantiam aliqua ratione patefacerent. Hilaris itaque, vt præcipuus parens, hos animi mei foetus excipito: ea tamen conditione; vt eos, tanquam rudes adhuc, & informes, te recipere putes: verū fortasse eiusmodi, qui si de sapientiæ tuę radiis vitæ aliquid, & spiritus exhauserint; mox aptè conformari, & ad summum perfici, facillimè possint.

Vale.

ANTONII QVAERENGI.

rege



Illa diu Graias olim celebrata per
vrbes,
Calicolum quæ afflata Deum felici-
bus auris
Surgebat latis Platanus densissima
ramis;

Cuius odoratis dulcem sub frondibus vmbra
Illustres anime ingressæ melioribus annis
Ingenuas docti suderunt pectoris artes;
Et celi docuere viam, qua vecta per auras
Trapetibus pennis mens ardua fertur ad astra:
Postquam longa dies cæcis obducta tenebris,
Immenso monimenta virum consumpserat æuo,
Ignota tellure procul contempta manebat
Fæda situ informi, & squallentibus abdita dumis.
Cum iuuenis claro Adriaca de sanguine gentis
THEVPOLVS, antiquos plantæ sælicis honores
Diuino tacitus secum sub pectore voluens,
Cecropias inter flexit vestigia syluas;
Perspicuo qua fonte cadens placidissimus amnis
Effluit, & blando fugientis murmure lymphæ
Nunc quoque cælestes Phædri testatur amores.
Hic nemoris densi latitantem horrentibus vmbreis
Syluestrem

*Syluestrem Platanum studio, cultuq³ recenti
 Rursus in antiquum formæ transire decorem,
 Et ramis docuit felicibus ire per auras,
 Optatam æterna referens è fronde coronam.*
*SALVE magna Ducum soboles, cui nomen æuium,
 Gloria cui longos generis deducta per annos
 Ingentem peperit laudem; sed clarior effert
 Insignis dulci sapientia parta labore:
 Te vaga longinquas terrarum fama per oras
 Nilum vltra, Tanaimq³ feret: tibi patria laudes
 Persoluet, meritosq³ olim decernet honores,
 Et tua mansuris inscribet nomina fastis.*





PAULI AICARDI

Epigramma.



*Quod tam præclarè diui præcepta Platonis
Illustras, cæcas discutiens tenebras:
Quas tibi condignas grateis Academica
secta,*

*Theupole, pro tanto munere persoluat?
Vix tuus id possit dux præstare aurea fundens
Flumina, ab Elyseo si redeat nemore.
Nos equidem te mirantes, tollemus ad astra
Vsq̃ue tuum veris laudibus ingenium:
Tam breuibꝯ potuit quod tanta includere chartis,
Secula victuris innumera bilia.*

ALOYSII LOLINI

Patricij Veneti.

*Θεία πότ' ἐδ' χαλύκων ῥοδέων πόλις, ἐκ δ' ὑακίνθων
Πλέξασα πορφύρεων ἡδύπνοον σέφανον,
Ἀμβροσίῳ ἔσπεψε νόμῳ, ἐκ δ' οὐδ' ὅμα κόσμον
Δῶκ' ἀρετῆς πάσης Θεупόλιον Στέφανον.*



STEPHANI THEVPOLI

BENED. F. PATR.

VENETI,

ACADEMICARVM CONTEMPLA-

tionum Liber I.

DE DEO.

CAP. I. *Quod est operis Proœmium.*

D V o humanæ sapientiæ lumina,
 iam diu adeò refulserunt, Plato
 & Arist. vt cætera ferè omnia de-
 lituerint; ea verò indies maiora,
 splendidioraque reddita sint: &
 propterea sperandum est, eadem in posterum
 quoque diu fore illustria conseruâda. Ac sanè
 nemo vnquam extitit, nisi quis fortasse mentis
 acie penitus destitutus, qui in ea conuersus,
 non summo opere illa commendauerit, ac ad-
 miratus sit. Neque verò iniuria. Nam Plato, &
 Arist. præter id, quòd eximio valuerunt inge-
 nio, etiam accurato labore, & auxilio summo-
 rum Principum, cæterorum sapientum in-
 uenta in vsum proprium còuerterunt; eaque
 vel auxerunt, vel illustrarunt, vel ordinarunt;

adeò, vt qui eos ſectatur, non duos ſolos homines ſibi duces ſtatuat: ſed vniuerſam Barbarorum, & Græcorum priſcam ſapientiam, ac vnà illuſtrium omnium ingeniorum, quot poſt eos floruerunt, conſenſum, & approbationem. Inter eos verò, qui per Regiam hanc ſapientiæ viam progreſſi ſunt, hæc apparuit conſpicua diuerſitas; quòd nonnulli ſtudio vel Platonis, vel Ariſt. vehemèter delectati, alterum penitus neglexerunt; alij vtrunque admirati, induci non potuerunt, vt crederent eos re vera eſſe diſcordes; & præſertim, quia ex veteri Platonis Academia, tanquam ex fonte, Peripatetica ſapientia defluxit; cùm Plato Ariſtotelem, plurimos annos inſtruxerit, ac erudierit; propterea de eorum concilio ſummoperè fuerunt ſolliciti. Hos ego nunquam omni ex parte potui commendare: non primos; quoniam qui alterum eorum deſpicit, ſponte ſe vno orbare oculo videtur, ex quo in alterum plurimum virtutis manat. Præclari enim ſpiritus, ex Academia in Lyceum, & ex Lyceo in Academiam diffunduntur: adeò vt qui ad vnum eorum ſibi viam præcludit, nec alterius munere valeat cumulàtè perſungi. longè etiam minùs eos commendandos duxi, qui pro Concilio laborarunt. Hi nanque, dum ſententias varias ex diſtinctis initiis ortas in vnã redigere tentant; modò vnã, modò alteram, & frequenter vtrunque, nō ſine pernicioſa confuſione peruertere coguntur: quod
Sim-

Simplicio, & aliis frequenter contigisse, facile est animaduertere. Propterea longè satius esse duxi in vtriusque disciplina accuratè versari; ita tamen, vt primò ab Arist. methodum, ordinem, scientiarumq; gradus addiscamus; mox ita parati, ad Platonis vberriimos fontes accedamus; ex eisq; tantum hauriamus aquæ, vt Peripatetica disciplina ex se angustior, reddatur latior; ac inde quosdam, quasi salutare recipiens spiritus, per eos reddatur viuacior, fulgeat magis, ac fœliciꝝ ad superna deducat. dum verò in eorum controuersias incidimus, accuratè vtriusque vias, initia, & fundamenta perpendèda duxi; mox iudiciũ esse tradendũ, an lis sit solũ in verbis, vt nonnunqua contingit; vel potiùs sit in sententia, vt re vera est, dum de rebus potioribus apud eos est disputatio: veluti de dependentia Mundi à Deo, de Ideis, de cognitione Dei, de modo acquirendæ scientiam, & similibus: in qua quidem controuersia dum versamur, cogimur deinde, vel vni, vel alteri parti magis adhærere: & cùm vtrunque veneremur, ei adhærendum maximè est, cum quo ratio magis videbitur consentire. Sic seruandæ sunt viæ distinctæ, nō autem implicandæ, & confundendæ; sic debet confurgere opus de placitis vtriusque, non autem de inuito consensu; cùm frequenter cōspicua sit dissensio: sic deim in conuenientem vsum conuertemus inuenta vtriusque, & animum nostrum cumulatè exornabimus. Non

me latet apprimè esse arduum, in eorum dis-
fensione partem potiore eligere: dum enim
inter se duo illa præclara ingenia pugnât, ma-
nifestè indicant, in re adeò obscura versari, vt
nobis non liceat conspicuè veritatem inspec-
re. attamen exercendum est ingenium, & pro
facultate nitendum, vt per accuratam senten-
tiarum discussionem splendor aliquis verita-
tis refulgeat. Nec nos fugere debet, humanam
rationē in rebus arduis facilè labi, & frequen-
ter in deteriore partem declinare. Propter-
ea dum nitidam veritatem intueri cupimus;
post lites Philosophorum, animi vniuersam
aciem in Solem veritatis nobis munere fidei
Diuina reuelatione patefactum, conuertere
debemus: & in eo felicissimè conuiescere.
Quoniam itaque dum versamur in attinenti-
bus ad humanam sapientiam, maximi facere
debemus cū Platonem, tum Aristotelem; &
quoniam varij attinentia ad Arist. latissimè, &
eruditissimè explicarunt; consilium meum
est de Platonis doctrina verba facere, eam pro
viribus in ordinem redigere, & illustrare, ac
simul cum doctrina Peripatetica eādē com-
parare; vt inde appareat mirus cōsensus par-
tium eius inter se, sententiarum frequentia,
& splendor, quā iniuria frequenter à Peri-
pateticis culpetur, quā pios nos reddat erga
Deum, & demum quā maximè cum nostris
Thologis in multis conueniat. Magni profe-
ctò sunt mei ausus, & lōgè meis viribus impa-
res:

res: luueni tamen, qui non ambitionis spiritu elatus, non inani ostentatione ductus; sed desiderio addiscendi excitatus, magna aggreditur, plurima sunt condonanda. Ita nanque ingenium exercebo; à sapientioribus corrigi potero; & sublimioribus ingeniis occasionem præbebo, rem minùs maturè tentatam, & adumbratam potiùs, quàm explicatam, absoluerendi, ac perficiendi.

De modo cognoscendi DEVM.

CAP. II.



Etus Academia; vt olim sublimium ingeniorum frequètia, miraquè eorum ad ingenuas disciplinas conspiratione accuratè excolta, præclaros edidit fructus; ita nunc, vel ob illustrium ingeniorum inopiam, vel potiùs, ob eorundem prauam assuetudinem, lucrique cupiditatem, neglecta, inculta, sterilisque conspicitur; adeò, vt non ampliùs Augustinos, Dionysios, Aristoteles, Zenocrates, Plotinos, Iamblicos, Ammonios, similesquè sapientiæ splendores emittat. Verùm quia nos non multos, sed paucos, eosquè sapientes sectari tenemur; propterea vniuersam Academiam, quasi stadium decursurus, illustrioresquè eius sententias è tenebris in lucem, & ex otio in puluerem pro facultate reuocaturus; Platonein principem imitabor, qui in operis cuiusque initio Deum præcipit inuocandum. Et quoniam præcipua

omnium inuocationum est animi dispositio, ad munerum Dei receptionem; disponimur autem cognoscendo; iurè ab eius inquisitione ordiendum est; inquirètes enim, inueniemus; inuenientes, diligemus; & diligentes, perficiemur; ac demum ex Dei cognitione optinè iudicabimus, ex quo principio cuncta proficiantur; quo nexu cum eo ligentur; qua ratione singula suam sortem, suamq; conditionem inde recipiant. Deus, vt omnium notissimus, ita omnium ignotissimus censerì debet; notissimus ex sui natura, ignotissimus nobis; notissimus, quòd sit; ignotissimus, quid sit. Propterea, vt ab homine exactè cognosci, ita nomine exactè exprimi, definitioneque explicari minimè potest: nomen enim, & ratio, respondet essentiæ rei; quæ cum maximè lateat, vt ea quoque sint nobis obscura, necesse est. Hinc Plato in Timæo asseruit, Opificem, & Patrem mundi inuenire, per arduum esse; inuentum autem explicari vulgò non posse: quæ sententia cum de prima mente, tū præsertim de Deo vera est. Et ex Parmenide colligitur, nos de Deo, neque nomen, neque definitionem, neque scientiam, neque sensum, neque opinionem assequi valere. Hæc maximè consentiunt cum sacris literis; nā in eis legitur; Nemo vnquam vidit Deum. Et Paulus ad Timoth. Lucem inhabitat inaccessibilem, quem nullus hominum videt, nec videre potest. Et Deus ad Moysen; Nemo poterit me videre, & viuere,

Sic

Sic itaq; exactè nemo nouit Deum, nisi Deus: & iurè quidem, nā solus Deus æquatur Deo: homo verò in hac vitæ vinbra collocatus, ad-umbratè solùm valet coniecere pertinentia ad Deum; & id facit, progrediendo per opera eius, vnà cum ratione; ex quibus, vel per negationem, vel per analogiam eleuatur ad aliquā eius cognitionem; conferente præsertim interno quodam naturæ instinctu, vel potius diuino cōtactu. Negatio altiùs nos eleuat, quàm Analogia; ea præsertim nos deducit ad ipsum vnum; hæc ad ipsum bonum, & pulchrum. propterea eminentior de Deo dicitur ignorantia, quàm scientia. quòd diuina obscurè, & cū difficultate ab intellectu hominis cognoscantur, est quid cōmune omnibus separatis, quæ de re, Aristoteles conuenit cum Platone, in-quiēs in 2. Metaph. intellectum hominis perinde se habere ad ea, ac oculum nocturæ ad lumen solis. At ex sententia Platonis, hoc est proprium Dei, quòd sit collocatus supra intellectum, supraque intelligibile: nam intelligibilia, ex Platonis opinione, sunt Ideæ; Deus supra Ideas collocatur: & cū sit supra intelligibile, etiam est supra intellectum: quoniam intellectus supra se habet intelligibilia, quib. Deus antecellit. hac de re Arist. à Platone dissentit, quoniam Ideas non ponit, sed intelligibile appellat omnem substantiam separatam; adeò vt Deus, ex sententia eius, sit primum intelligibile. Colligimus itaque cum Magno

Dionysio, Deum esse Verbum, quod exprimi nequit: esse intelligibilis, intelligentiæ, nominisque vacuitatem.

De ipso VNO.

CAP. III


EX nominibus, quæ magis Deo conueniunt, sunt ipsum vnum, ipsum bonum, ipsumque pulchrum. hoc pronomen, Ipsum, frequenter significat Ideas: at dum tribuitur Deo, non Ideas, sed Idearum caput, & aliquid supra Ideas manifestat. Deus dicitur & vnum, & indiuiduum; modo opposito, principio numeri, & puncto: nam hæc dicuntur vnum, & indiuiduum, quoniam sunt infra omnem magnitudinem, & multitudinem: Deus autem est contra, quia & magnitudini, & multitudini supereminet. Deus enim cum dicatur vnū, simul est omnia, causaque est omnium sine vnitatis amissione: & cum sit vnum, multitudine non eget: sed est contra, multitudo sine vno consistere nequit. Ex his constat, quod vnitas, numerorum initium, est simulachrum valde tenue illius eminentissimæ vnitatis: eatenus enim ei dicitur similis: quatenus, vt docuit Pythagoras, vnitas numerorum initium, vim continet, & semina numerorum omnium, qui in infinitum per finitos circuitus progrediuntur. Cum Deus ipsum vnum nuncupatur, non proprie eius primi natura

tura affirmatur; sed partim negatur circa ipsum multitudo, compositio, & conuenientia cum aliis; partim declaratur cuncta ab illo fluere, perfici, seruari, vnionisque munere affici; partim demum exprimitur quædam in omnibus ingenita ad illud vnum propensio, tanquam in finem. Insuper dicitur Deus ipsum vnum; nec propterea est absurdum, vt vnitas nonnunquam à Platoniciis nuncupetur; est enim vnitas, vnitatis omnis effectrix, vt dixit Dionysius. Et quamuis vni multa opponantur, non propterea Deo aliquid opponitur. Et ratio est, quia est supra, & non infra multitudinem: cui si etiam multitudo aliqua ratione opponitur, profectò non vt contraria opponitur; sed tanquam negatio, & recessus ab eo; nam Deo nihil dicitur opponi: & hoc est mirabile, quòd ex eo, quia nihil ei verè opponitur, cuncta ei dicuntur modo aliquo opponi: nā ipse est omnia, & propterea alia à Deo dicuntur priuationes, & negationes ab eo longissimè distantes: Cuncta recipiunt naturā, & vires à principio suo: & cum vnū sit principium omnium, iurè cuncta eatenus valent, eatenus facultate sunt prædita; quatenus participant vno, & vnum seruant: est enim ipsum vnum supra omnem humanā cogitationē in infinitum efficax, potens, suauissimeque omnia ligans. Collocatur vnum supra bonum, vt boni caput: propterea non vnum ducit ad bonum, sed bonum ad vnum; & rectius dicitur cuncta

manare ab vno, quàm à bono; tendere ad vnũ, quàm ad bonũ: est tamen bonũ ratio, per quã cuncta manant ab vno, & tendunt ad vnũ. Reperitur vnũ & super ens, & in ente, & sub ente; vario tamẽ modo: nam quod est super ens, penitus est vnum; nihilq; in eo est, quod non sit vnum; à quo pēdet, quicquid est vnũ, simul atque non vnum. quod est in ente, iam est vnitate præditum, & complicatum; ita tamen, vt vnum dominetur: quod verò est sub ente, in infinitum prolabitur. Quod collocatur super ens, sincerè, absoluteque est vnum: quod est in ente, est potiùs vnitas, vel vnitates, quæ etiã Dij nuncupantur, quàm vnum: quod est sub ente, solũ est vnio. Hoc Diuinum vnum est eius eminentiæ, & simplicitatis; vt, propriè loquendo, nec à se ipso alterum, nec idem alteri, nec sibi idem, nec ab aliis alterũ, nec simile, nec dissimile, vel sibi, vel cuiquam propriè dici debeat: nam vnum antecedit identitatem, alteritatem, similitudinem, & dissimilitudinẽ; cùm id sit absolutum, hæc verò includant relationem. Pari ratione, nec sibi, nec aliis æquale, vel inæquale dici debet: siue hæc referantur ad corpora, siue ad incorporea: & præsertim, quia æquale sequitur terminum, inæquale infinitatem, quæ ipsi vno non cõueniunt. Quòd si in præcedentibus dictum est, solum Deum æquari Deo; id intelligi debet non de propriè sumptæqualitate insequente terminum; sed de æqualitate per negationẽ explicanda: quia
Deus

Deus Deum non excedit, qua æqualitate etiã infinitum æquatur infinito. Pari quoque ratione, neque iunius, neque senius, nec coæuum, vel sibi, vel aliis, hoc eminentissimum vnum censeretur debet: iminò nec dici potest ipsa identitas, sed supra hæc omnia constituitur. Arist. in 10. Metaph. cont. 6. carpit vnã cum Pythagora Platonem, quia dixerit vnum esse substantiam ex se existentem: asserit id dici non posse, quoniam ens, & vnum de omnibus prædicatur; nullum autem vniuersalium est substantia per se subsistens. Inquit insuper in 4. Metaph. cont. 3. Ens & vnum denotare idem re, distinctum sola ratione, & modo: At propter hæc nihil dicit, quod Platonis sententiam euerteret. Loquitur Plato de ipso vno, quod supra ens collocatur; Arist. verò de eo verba facit, quod est in ente, & sub ente: id vnũ, quod est supra ens, de his, quæ sunt, minimè prædicatur, sed solum eorũ dicitur esse principium. Dixit Auicenna ab vno non posse proximè, nisi vnum prouenire; sed errat: nã quod pendet ab vno, iam recedit ab vno; nil enim à se pendet, quod autem recedit ab vno, est necesse, vt multitudine participet: hoc tamè verum est, quod proximè pendet ab vno, maximè est vnitum: ideò rectè ex Philebo colligitur ab vno rerum omnium principio produci binarium; duo scilicet rerum Elementa, quæ sunt terminus, & infinitum; ex quibus mox cuncta per varios gradus componuntur.

B 3



De ipſo BONO.

CAP. III.



Pſi vni, eminentiſſimo, ac inſolubili nexu iunctum eſt Bonum, & Pulchrũ: quæ tria re idẽ ſunt, ſola ratione, noſtroque intelligendĩ modo diſtinguuntur: In quo nexu eminet Vnũ, tãquam caput omnium; mediat Bonum; ex bono Pulchrum refulget. Explicato vno, ſequitur, vt de bono agamus. Preclarum, & Illuſtre eſt ipſum bonum, cũ eius ſplendore fulgeant omnia; latiſſimum eſt eius imperiũ, cũ ſuas vires effundat per omnia, ac omnia ſibi ſubiiciat; immẽſa eſt vis eius, cũ omnia intimẽ, latenter, ac vehementiſſimẽ ad ſe trahat. De quo id primò conſiderandum occurrit, quòd apud nonnullos ex Platoniciſ ipſum bonũ dupliciter uſurpatur: primò pro vniuerſo bono, quod eſt ſupra Ideas, Idearumq; eſt origo, & ab ipſo vno ſola ratione diſtinguitur: ſecundò pro Idea boni ad mentem pertinente; in qua cũ Idearum multitu- do inueniatur, etiam cẽſent Ideas boni, & pulchri ab aliis diſtinctas inueniri. Bonũ ſimpli- citer, inquiunt, eſſe auctorem omnium, vt bonorum, ita pulchrorum. Bonum Ideale ſolũ aſſerunt eſſe principiũ quarundã conſequentium perfectionum, munere quarum res eis participant bonæ nuncupantur. Primum bonum non diſtinguunt à pulchro; boni ve-
rò l.

rò Ideam ab Idea pulchri seiunctam affirmât. Hanc sententiam ego minimè approbandam cenſeo: primò, quia bonum eſt communis natura, & fundamentum omnium Idearum; nò autem eſt forma vna ab aliis diſtincta: Insuper Ideæ ad mentem pertinentes ſolùm ſunt ſpecierum, non generum; Bonum verò non vna ſpecies eſt, ſed quoddam veluti commune genus: Prætereà quæcunque conueniunt Deo, ea ita ſe habent, vt ſint veluti fontes, & communia principia aliorum, & per omnia alia effundantur; & propterea eorum in mente diſtincta Idea non eſt ponenda; non enim vna Idea eſt principium alterius: Et propterea colligo, vnius, boni, & pulchri, ex Platonis ſententia, in prima mente non dari Ideas diſtinctas, vt dantur aliorum; ſed hanc Trinitatem eſſe fontem, & genitricem omnium Idearum, ac Ideas omnes his participare. Ideò omnes Ideæ nuncupantur vniformes, boniformes, & pulchriformes; & iure quidem: quoniam id vnum, bonum, & pulchrum, quæ in Deo indiuiduè iuncta conſiderantur; in mēte deinde in varias quaſi formas effunduntur, & distribuuntur. Propterea rectè Plotinus lib. 7. ſextæ Enneadis aſſeruit, mentem ſibi comparaffe ſpectacula boniformia, cū primū ipſam boni naturā contemplaretur; ac inſuper mētem conuerſam per actum vitalem ad bonum, fieri boniformem; & ob formam ſuam multiplicabilem, vnum boni donū in formas

plurimas deriuasse. Quòd si à Platone frequē-
ter de boni Idea fit mentio, adeò vt videatur I-
deam boni in mente distinctam ab aliis consi-
derasse: Afferendum est, Ideæ nomen apud
Platonem ad varia extendi, & non semper de-
notare Ideas inter se distinctas ad mentem
pertinentes. Accipitur nonnunquam Ideæ
nomen cum depressione; vt dum in homine
asserit duas primas Ideas inueniri ducentes
hominem nonnunquam in propria acceptio-
ne, & forma; vt dum loquitur de Ideis mentis:
aliquando verò in eminentia; vt quando bo-
ni, pulchri, & vnius asserit dari Ideas. Ipsum
itaque eminentissimè bonum, nonnunquam
dicitur Idea boni; cùm sit purum, & sincerum
bonum, initium bonorum omnium, ad quod
conuerti debemus, dum exactum bonum co-
gnoscere, imitariue cupimus: Hoc sublime bo-
num, ex Platonis, Plotini, Numeniiq̃ue sen-
tentia, non est proximus Mundi Artifex; sed
Artificis mundani Pater, Mundiq̃; finis: nam
ipsum bonum, ac bonum simpliciter, id esse
dicitur; à quo omnia, quæ verè sunt, proximè
manant; quo omnia egent; quod nullius est
egenum; ipsum sibi sufficiens; nil penitus ap-
petens; mensura omnium, atque terminus;
cuius boni tria potissimum sunt munera, vni-
tas, essentia, species: quæ tria in omnibus mo-
do aliquo inueniuntur, cùm in omnibus ipsius
boni aliquid refulgeat; ac vbi ea tria sunt vera,
ibi verè bonū reperitur. Academici iure meri-
to,

to, dum boni nomen explicant, tria ad ipsum pertinere affirmât; nempe, vt sit admirandum, amandum, atque suaue: admirandum est, quia nos excitans, diuertensque ab aliis, ad se conuertit: amandum, quia cognoscitur sub ratione boni, nati à nobis frui: suaue, quatenus eo cum incomparabili gaudio implemur. Simili ferè ratione ab Orpheo ipsum bonum nuncupatur initium, medium, & finis; via, veritas, & vita; ac insuper nedum bonum, verum etiam pulchrum. & iustum: quæ eminentissima Trinitas, tot modis refulgens, tot formis sua munera patefaciens, ipsum vnum non destruit; quinimo eius præstantiam patefacit. Eadem Trinitas illamet censerì debet cum ea, quæ à Pythagoricis rerum omnium perfectio, & mensura posita est, Hoc in loco nos fugere minimè debet, quòd dum ipsum bonum nuncupatur veritas, & vita; id intelligi debet modo causæ, nò modo formæ: nã si ad formam respicimus; ipsum bonum, vt est supra intellectum, intelligibile, & essentiam; ita est supra veritatem, & vitam: veritatis enim forma, in forma entis refulget; adeò, vt sine contradictione ipsum bonum sit, & non sit veritas, & vita: Insuper cum Trinitas, & vnum in Deo refulgeant; nò propterea est quid nouum, vt perperam contra assertores Trinitatis inuehitur Auer. 12. Metaph. 39. de quo potius putandum censeo, quòd malè intellexerit veram Christianorum de Trinitate sententiam, & per inania aduersus

eam inſtiterit; quàm quòd reiecerit fictà quorundam de Trinitate opinionem, vt multi pro Auerrois defenſione affirmāt. Auerroes enim nec Chriſtianam, & veram; nec aliam commentitiā Trinitatem Deo cōuenire cenſuit. Ipſum bonum nō ita ſe habet ad ipſum vnum, vt duo ex eis conſurgant principia rerum: eadem enim eſt vnus, & boni amplitudo, atque poteſtas: Inſuper primum principium omnium, atque finis, non actionē prorfus vlla bonum eſt; ſed ipſa eius prima, ſimpliciſque natura, quæ accommodatiſſimè imagine Solis deſignatur: propterea Sol corporeus nūcupatur ſenſibilis imago inſenſibilis Dei. Hinc triplex Sol apud Academicos conſideratur; Diuinus vnus, alter intellectualis, tertius ſenſibilis: ipſum bonum eſt Sol Diuinus, qui eſt Sol vtriuſque ſubſequentis Solis: cui ſuccedit Mens, quæ eſt Sol intellectualis, imago quædam, latens tamen, Diuini Solis: poſtremus eſt Sol corporeus, imago ſenſibilis, cū diuinitum intellectualis Solis. Inſuper vt lux Solis generat, calefacit, & perficit; ita ipſum bonum ſua ſecunditate cuncta producit; ſui deſiderio, & amore inflammat; ac demum flagrantia perficit. Prætereà, vt non recipitur lux in re terrea, ſed in perſpicua; ita bonum longè abeſt ab impuro, & terreo; vel potiùs hæc longè abſunt ab eo. Inquiunt Peripatetici ens, & bonum inter ſe conuerſi. Negant hoc Academic,

demici, & inquirunt neque ipsum bonum esse ens, neque è cōuerso; sed ipsum bonum supra ens collocari, eiusque esse principium. Lis pendet ex diuersa cum boni, tum entis acceptione, vt cōsideranti redditur notum, & infra ex mentis explicatione clariùs elucescet.

*Defenditur Plato à calumniis Peripateticorum
de IDEA BONI.*

CAP. V.



T clariùs elucescant pertinentia ad bonum, & sententia Academicorum illustrior reddatur; considerandum est, quòd Plato in 6. de R. P. inquit: Boni Idea est maxima disciplina; qua quidem & iusta, & alia si vtantur; vtilia, & conducibilia fiunt; atque hoc me dicere ferimè velle scito, & istud præterea, quòd ipsam non sufficienter cognoscimus: si verò ipsam nescimus, & sine ipsa alia quam maximè nouerimus, scito nullam ex aliis nobis vtilitatem fore; sicut neque prodesset nobis quicquam, quod sine bono possideremus. hæc Plato. Similem quoque profert sententiam in 7. de R. P. inquiens: Arbitror in ordine ipso intelligibili, boni ipsius Ideam supremam existere, vixque videri; si autem visa fuerit, asserendū eam omnibus omnium rectorum, atque bonorum causam esse; cū ipsa in loco visibili lumen creauerit, & luminis auctore; in ipso verò intelligibili regnet.

ipsa, veritatemq; & mentem protulerit; quam nosse necesse sit omnem, quicumque sana mente quicquã vel priuatim, vel publicè uest acturus. In his locis præsertim profert Plato suam de Idea boni sententiam: aduersus quam Arist. in primo de moribus acriter pugnat; nititurque ostendere Ideam boni, à Platone approbatam, esse rem inanem, Platonicis fundamentis aduersam, cum ratione pugnantem. Primò esse rem inanem, quia minimè eas præbet vtilitates, quas refert Plato: non enim ad actiones, vel effectiones dirigendas confert; cum artifices aliquid effecturi, ad Ideam boni non respiciant; sed ad bonum, vel vtile sibi proprium; præsertim cum Idea boni non sit aliquid ad actionem, sed potius ad Cõtēplationē pertinens. Insuper ostendit Ideam boni aduersari Platonicis fundamentis: quoniam Plato eorum tantum ponit Ideam, quæ sunt natura vna ad vnā scientiam pertinens, non dicta secundum prius & posterius; quæ conditiones bono non conueniunt, sed cōueniunt oppositæ; non itaque eius assignari potest Idea vna. Demum absolutè Idea boni videtur cum ratione pugnare; quia sæpè sæpius variis ostētionibus Idearum genus reiectum, & explosum est: His rationibus, quasi tormentis, nituntur Peripatetici euertere Ideam boni. At dum ad dicta in præcedentibus cōuertimur, non apprimè arduum est Platonis sentētiā ab huiusmodi iniuriis vindicare, incolumemque

conseruare: Nam Plato per Ideam boni notauit, non vniuersale aliquod per se subsistens (hoc enim vt ab Aristotele, ita à Platone minime conceditur) neque etiam denotat propriam aliquam Ideam in mente positam à cæteris distinctam; non enim ea à Platone ponitur, vt apparuit: sed indicare voluit eam eminentissimæ diuinitatis fecunditatem, initium, & finem omnium, quæ cum ipso omnium capite eadem est. Et hoc manifestè colligitur ex verbis Platonis suprà relat; dixit enim Ideam boni in loco intelligibili regnare, ac protulisse veritatem, & mentem: nam si Idea boni protulit mentem, non itaque est in ipsa mente; cum potius mēs dicatur parere Ideas conuersa in bonum, vt inquit Plotinus, quàm Ideæ mentem. Insuper, si protulit veritatē, quia veritas insequitur id, quod verè est; & verè esse conuenit Ideis, manifestè colligimus Platonem per Ideam boni non denotasse aliquam ex illis Ideis, quæ ad mentē pertinent; sed Dei eminentissimam fecunditatem: Ideo etiam asseruit hanc Ideam esse supremam in ordine intelligibili, quatenus est apud eius ordinis, & eminet omnibus. Insuper dicitur ibi regnare, quia cunctis ibi existentibus præstat. Neque est absurdū, vt Ideæ nomine hoc eminēs bonum designetur, cum sit eminentissima forma, & formarum forma: non tamen ita est Idea vna, vt representet vnā naturam ab aliis participatam, vel imitatam;

vt conuenit Ideis illis, quæ in mente cōfide-
rantur: Huiusmodi eminentissimum bonum
esse omnium finem, nemo dubitat; cognitio-
nem finis ad omnem rectam actionē esse ne-
cessariam, nemo inficiatur. Quamuis enim ab
eo, qui operatur, præsertim debeat cognosci
finis proximus; attamen finis proximus sine
postremo exactè cognosci minimè potest. Iu-
rè itaque dixit Plato, quam nosse necesse sit
omnem, quicumque sana mente quicquam;
vel priuatim, vel publicè est acturus: quæ sen-
tētia similis est illi nostrorum Theologorum,
dum inquirunt, cognitionem Dei omnium
nostrarum actionum esse ducem, & regulam.
Neq; ob id Plato asseruit pro rerum omnium
recta effectiōe esse necessariam cognitionem
illius summi boni, vt ei obiicit Arist. non enim
textori, vel fabro, vel medico pro suo obeun-
do munere id esse necessarium dixit; sed pro
publica, priuataque actione, denotans actio-
nes illas, quæ ad mores, & prudentiam perti-
nent; quæ propriè actionis nomine denotan-
tur: Demum in eo summo bono collocata
proculdubio est humana fœlicitas, vt ex cō-
sideratione fœlicitatis patebit. Ex his facilè
colliguntur Peripateticarum omnium obie-
ctionum solutiones: constat enim Ideam boni
non esse inanem, sed cumulatiissimè eos præ-
bere vsus, quos retulit Plato. Constat insuper
non aduersari fundamentis Platoniciis: quo-
niam illæ conditiones ab Aristot. cōsideratæ
sunt

nt conditiones earum, quæ propriè nuncu-
ntur nomine Ideæ, & ad mentem pertinēt;
n autem earum, quæ solū in eminentia I-
æ dicuntur; qualis est Idea boni, cui respon-
t in rebus nō species vna, sed vniuersum ge-
s bonorum. Quod ex eo patet, quia Ideæ o-
res dicuntur esse distinctis gradibus boni-
mes. Accedit, quòd quamuis in bonis per
itationem, siue participationem considere-
rdo, & diuersitas aliqua; ea tamen diuer-
as non propriè conuenit bono, vt est bonū;
l vt iunctum variis conditionibus, & natu-
rerum: veluti quamuis vna luminis sit na-
ra, attamen per varios gradus, & cum aliqua
tinctione recipitur in perspicuo. Insuper
ipso bono vnica est propriè sumpta scien-
; immò non scientia, sed intelligentia po-
s; quamuis imitationum eius, vel participat-
um variæ possint esse opiniones potius
am scientiæ: sed Arist. per sua principia non
tè valuit secernere intelligentiam à scien-
, & scientiam ab opinione: quare leuiter Pla-
nem carpit, cū potius ipse reprehensione
dignus.

De ipso PVLCHRO.

CAP. VI.

Dictum est in præcedentibus, quòd
Deus omniū Princeps, vt est ipsum
vnum, ita est ipsum bonū, & ipsum
pulchrum; quæ tria ita se habent cū
eo, vt sint de ratione Dei, immò sint ipse

Deus. Pulchrum, quo ad nostrum intelligendi modum, sub bono dicitur collocari: quoniam nil aliud est, nisi splendor boni, & veluti actus quidam, ex bono refulgens; qui actus, & in Deo, & in mente, & in aliis rerum gradibus reperitur, at modo valde diuerso: Est primò in Deo, vt idem re cum eo, vt causa aliorum: est in mente per formas à Deo pendentes, quantum in æterna Idearum serie splendet actus purus boni, per quem Ideæ omnes & boniformes, & pulchriformes nuncupantur: est demum in aliis per participationem. Deus non est pulcher, sed ipsum pulchrum: mens & pulchriformis, & verè pulchra dicitur ob formas, quarum varietate est decorata; vt etiam anima per suas internas rationes, obscuriori tamen conditione & gradu, pulchriformis dici potest: corporea demum solum per participationem obscurè, & adumbratè pulchra sunt. Quàm latè itaque extenditur bonum; tam latè micat, & effunditur pulchritudo. At rediēs ad ipsum bonum, dico: Deus, vt omnia necit, & fœlicissimè ligat, est ipsum vnum; vt procreat, fouet, & regit; & implet, est ipsum bonum; vt illustrat, gratiam infundit, excitat, & mulcet, est ipsum pulchrum. Quærunt nonnulli viri docti, & summopere dubitant, nunquid boni & pulchri vna sit Idea, vel potiùs duę distinctæ Ideæ; eis conueniant: qua de re cum multa dicant, nos ex declaratis in præcedentibus, lucidissimā explicationē colligere possumus.

inus. Primò enim statuendum est, vt boni, ita pulchri propriè sumptas Ideas in mente non dari; sed esse veluti communes quasdam facultates, & formas per omnes Ideas effusas: quæ sint, tanquam nerui, & splendores omniũ Idearum: Addendum secundò, quòd cùm, accipiendo Ideam latè, & in emitentia, detur Idea boni, & pulchri; istæ duæ Idæ re vera distinctæ non sunt, nec vna vnquam ab altera seiungitur; sed vna est fulgor alterius; & solum, quatenus vna ex altera micat, & variâ ratione pulchrum & bonum nuncupatur, quoad nostrum intelligendi modum possunt poni duæ distinctæ. Sunt itaque, & nō sunt Idea vna. Hinc euenit, quòd Plato in Hippiâ dubitauit, an pulchrum, & bonum idem sint; & potius indicauit, quòd sint idem, quàm quòd distinguantur; cùm præsertim ad præcipua respiciendo, idem esse dicantur. Eminētī perfectō ratione factum est, vt bonum, & pulchrū insolubili nexu iuncta sint; & quàm latè extenditur vnum, tam latè pateat aliud: cùm enim pulchrum id sit, quod nos excitat, allicit, & inuitat; quoniam in nostrum finem inuitari, & conuenientibus stimulis excitari debemus: iurè cum pulchro debuit esse iunctum bonū; vt per pulchrum duceremur in bonū, & per eius gradus in supremum bonum eleuāremur: Pulchrum itaque in bonum eleuat, & bonum nos necit cum vno: Hinc euenit, quòd finis postremus Amoris vnio est, vt etiā

ex conuiuio Platonis colligitur; & quò eminentior est amor, eò in eminentiorem vnionem nos eleuat. Ex eadem quoque vnus boni, & pulchri catena pendet; vt qui pulchro delectantur, pulchrum amant, pulchrum quærunt, delectentur Deo, Deumque amant, & quærant: sed euenit frequenter in hoc mundi antro, vbi solæ volitant vmbre rerum; quòd nos à verisimili, à falsa pulchri, & boni imagine delusi, pro vero falsum, pro pulchro turpe, & pro bono malum amplectimur, propterea miseri toto vitæ tempore discruciamur. Quare dum nos verè pulchrum inquiremus, nil penitus corporeæ pulchritudinis amplius inspicere debemus, quæ solùm est imago, vestigium, & vmbra, in altissimo materiæ pelago apparens: sed altiùs eleuati, ad exemplar vmbrearum, ac ad primum omnium principium conuerti tenemur; ne, dum vmbra sectamur, vel mergamur in aquam, vel, vt contigit Narcisso, in fugacem florem rationis expertem commutemur. Neque etiam existimandum est, simpliciter pulchrum proportionem aliquam rei corporeæ esse, sed initium potiùs omnium cōuenientium proportionū: & ne dum simpliciter pulchrū nō est proportio, immò neq; etiam pulchritudo corporum; sed illud potiùs, quòd in proportionē refulget. Nam corporū pulchritudo, nil aliud est, nisi actus ille, & splendor boni à corpore participati: quod ex principatu formæ, & conuenienti

inienti dispositione materiæ, non secus micat extrinsecus, ac refulget flamma luminis ex perspicua laterna: Est itaq; Deus ipsum vnũ, ipsum bonum, ipsum pulchrum: & hæ sunt cõditiones communes effusæ per omnia; quæ ab eo, tanquam à cõmuni principio, pendent: Ac insuper sunt signa primi parentis, per quæ iudicare possumus, qui sint eius legitimi filij: & qui sint spurij, ac degenerent ab eo: nam quò opera eius fuerint meliora, & pulchriora: eò magis generosa, suoq;ue parenti similia, & consequenter grata censi debent: quò verò fuerint deteriora, & deformiora; eò magis degenerare ab eo, eiq;ue minùs esse grata putandum est. Præter hæc tria, alia quoque tribuuntur Deo: quæ illi optima ratione conueniunt: nam quia, nullum eminentiæ eius æquatur nomẽ, propterea multa ei tribuimus: vt multitudine nominum, multitudinem munerum, & eminentiam dignitatis eius latiùs manifestemus: ea tamen tria præcipua sunt, ad quæ cetera modo aliquo rediguntur. Nam Iustum redigitur ad bonũ; Verum propriè conuenit menti, in qua ens recipit principium: quòd si sumatur in eminentia, ad bonum hoc quoque redigitur.

De nonnullis quæ Deo tribuuntur. CAP. VII.

INter cætera, quæ à viris sapiētibus Deo tribuuntur, etiam numeratur ratio, & consilium: quæ ei conueniunt, primò per modũ eminentiæ,

& causæ: secundò ratione nostri modi considerandi, & operandi. Nil enim ab homine rectè fieri iudicamus, nisi ratione, & consilio efficiatur: propterea, vt Deo omnem, quam excogitare valemus, perfectionem tribuamus; consilium quoque, & rationem ei tribuimus; nam per hanc, veluti vmbra, eminentiam dependentiæ rerum ab eo aliqua ex parte manifestamus. Insuper Deo tribuitur vis, & potentia rerum; per quam potest omne, quod potest; sic potens, & immensus dicitur; & sine contradictione, cùm sit infinitus, est initium, & finis omnium. In eius magnitudine per nostrum loquendi, & cõsiderandi modum, inuenitur longitudo, latitudo, & profunditas: in eius virtute reperitur dextrum, & sinistrum; in eius præstantia sursum, & deorsum; in eius essentia, & opere, anterius, & posterius: sic eius profunditas est abyssus Diuinitatis; & caligo; quam neque vis aliqua rationandi, neq; intelligendi valet attingere. Dum consideratur Deus sub ratione Dei, sub ratione vnius, & boni; quia sic est supra Ideas, & mentem; ideo nec intelligere, nec intelligi dicitur: hæc enim versantur inter mentem, & Ideas; simul tamen dicitur simplicissima lux, absolutissima certitudo, eminentissimus intuitus suimet, absque vlla distinctione intuentis, & rei, quæ perspicitur; adeò, vt intueri se nil aliud sit, nisi ipsemet. Insuper Deus, vt non est pars, ita neque totum rectè dicitur:

conuenienti tamen ratione in antiqua Theologia ipsum vniuersum nūcupatur: ab eo pendet motus cœli, nō vt ab efficiente, sed solū, vt à fine; non enim transitivus motus ab eo proximè pendere potest, ob imperfectionem, & distantiam suæ conditionis ab eo. Quod pertinet ad ea, quæ nuper dixi, in tribus Peripatetici dissentiant à Platone: Primò, quia Peripatetici Deum proximè mouere Cœlum dicunt: secundò, quia aiunt mouere, vt causam efficientem: tertio, quia virtutem immensam ei non tribuunt; quamuis de re hac variæ sint Peripateticorum sententiæ. hæ tamen sunt potiores. sed ad Platonem redeundo, Deus non rectè dicitur liber, nec sui dominus; sed rectè dicitur dominatio, suapteque natura libertas, ac simplicissimus actus, principium, & finis actuum omnium: in quo necessitas cum libertate non pugnat; sed à libertate pendet necessitas, quia enim sua libertate ita vult, ita necesse est esse. In Deo non est motus, nec verus, nec metaphoricus; cū in eo non sit alteritas; non est in eo tempus, neque est in tempore, neque in instanti; sed super vtrunque. Insuper non est in æternitate, neque est æternitas; sed supra æternitatem: æternitas enim est ipse in eodem status, & mensura quædam in rebus æternis, immobilibusque permanens; quibus præest Deus. Nam à Deo in diuinas mentes, integra manat æternitas; in animas rationales, æternitas mixta cum tempore; in Mundi

sphæras, sempiternitas temporalis; in hæc denum, quæ sphærarum motu, virtuteq; fiunt, quædam portio tēporis. Insuper in Deo, nulla est humana virtus, sed est scopus, & eminentissima ratio virtutū omnium; propterea rectius fons vniuersæ iustitiæ, & supra iustitiam dicitur collocatus, quàm iustus: & cū in eo humanæ virtutes non insint, hoc est mirabile, quòd homo per virtutē redditur similis Deo. Cuius ratio duplex est: prima; quia virtus omnis est purificatio; animus purus, & sua puritate, & receptione Diuinorum munerum, est similis Deo: altera ratio est; quia quamuis Deus per formam non sit iustus, attamen est talis per causam. & eminentiam.

Vbi sit Deus.

CAP. VIII.

Primum rerum omnium initium, vt à cæteris mensuris est liberum, ita à loco omni ex parte est solutum: nam si locum exposceret, non esset absolute primum, nec absolute principium; nam aliud supponeret. Verū, quia nos loco circumscripti, alicubi ea omnia esse iudicamus, quæ sunt; propterea, vbi sit Deus, considerandum occurrit. Si quærimus, vbi sit Deus, & consideramus esse alicubi, vt corpora, vel forme corporum sunt in loco; proculdubio Deus nullibi est. Insuper, si consideramus esse alicubi, vt anima, vel participatæ mentes; ita quoque

que nullibi est: non enim ad aliquam Mundi partem contrahitur, vt illæ. Demum, si consideramus esse alicubi, quia sit vbique: & ita sit vbique, vt omnia contineat, & à nullo contineatur; sic Deus vbique esse dicetur. ideo iure de eo canitur; Cælum, & terram ego impleo. insuper; Si ascendero in cælum, tu illic es; & si descendero ad infernum, ades. Rectè quoque de eo dicimus, quòd non propriè est vbique; sed potiùs ipse hoc ipsum est, quod à nobis appellari solet vbique: & est vbique Deus, per præsentiam, vt omnia cognoscens; per potentiam, vt omnia seruans: per essentiam, vt res nil aliud sunt, nisi eius vmbra, & imitatio. Sic Deus cunctis rebus adest, ad ea non accedens; abest, non recedens; sed res potiùs accedere ad eum, & recedere dicuntur: nam procul abesse ab eo, est non esse; vel esse minus, & obscurius. Insuper, si Deum consideramus, vt ab omnibus omni ex parte solutum; sic super Cælum collocatur. propterea Plato in Phædro locum supercœlestem miris laudibus commendandum asseruit; & Orpheus de Deo cecinit:

Cuncta fouens, atq; ipse ferens super omnia sese.

Quòd si etià præcipuum aliquè locū ei assignare volumus, id efficere possumus dupliciter: primò, respiciendo ad ea, quæ verè sunt; ideo dicimus, Deum in culmine mentis lucere: secūdò, respiciendo ad corpora; sic in Cœlo, & in excelsis habitat. de quo cecinit Homer.

*Esse solum diuis subnixum semper Olympum
Fama est, haud ventis tremefactum, haud im-
bribus vsum.*

Et in Psalmis legitur; Cælum, cæli Domi-
no; terram autem dedit filiis hominum. De-
mum non sine ratione Deus in Sole esse dici-
tur, iuxta illud; In Sole posuit tabernaculum
suum. Quod verum est; primò, quia Sol est vi-
sibilis imago eius, vt cum antiquis Theologis
dixit Plato: secundò, quia manifestissimè per
Solem, in hunc mortalem orbem suas vires ef-
fundit; quibus de rebus Arist. re vera à Plato-
ne non dissentit.

De Prouidentia.

CAP. IX.



Rincipi adeò propria est prouiden-
tia, vt sine ea nec dici Princeps, nec
esse vllò pacto valeat; & quò Prin-
ceps fuerit eminentior, eò emin-
tior ei prouidentia conuenit: Deus omnium
consensu, Princeps est eminentissimus: iurè
itaque ei prouidentia conuenit suprema, & e-
minentissima: quod etià eo confirmatur; quia
principis, ob dependètiā populorum ab eo,
mirumque cum eo nexum, maximè proprius
est amor erga populos; ex amore consurgit de
re amata cura, & sollicitudo; à Deo maximè
pendet Mundus, & nil in eo est, quod nō pen-
deat ab illo; maximè itaque diligitur, & si ma-
ximè diligitur, etiam summo opere curatur.
Id

Id ipsum nobis ostendunt opera eius: tam mirus enim Mundi est ordo, tam accurata in vniuerso est ordinis conseruatio, adeò omnia per naturam sui bonum, sui que absolutionem quærunt; vt qui de Prouidentia dubitaret, etiam ambigere posset de motu Cœli, & de lumine Solis. Quod demum confirmatur: quoniam si Deus Mundo non prouideret, humanaque non curaret; aut id facere non posset, aut nollet. Quòd non possit, dici non debet: nam principium, à quo cuncta cum eminenti cognitione manant, maxime ea curare valet; & cum homo suorum operum vel Arte, vel Natura effectorum valeat esse curator, & custos; longè magis Deus talis esse poterit. Si autem potest; asserere, quòd nolit, impium est: nam ipsum bonum, id solum vult, quod bonum est; & nulla detinetur inuidia; Cura, & Prouidentia est quid bonum, negligentia quid prauum; valet itaque Deus, & vult; & si vult, & valet, etiam necessariò prouidet: propterea diuinè in 10. de legibus enunciauit Plato; Nunquam à Deo negligeris; nec si ita paruus sis, vt in terræ profundum ingrediaris; nec si adeò sublimis fias, vt pennis eleuatus in cœlum voles. Nec iniuria quidem: nam, vt dixit Simplicius, Deus vilia hæc non contemnit, quæ producere non est dedignatus; neque est Deo difficilis gubernatio, cui est procreatio facilis. de quo rectè cecinit Orpheus:

Tu habes Mundi terminos vniuersi,

*Tibi curæ est principium, atque finis,
 Per te virescunt omnia,
 Tu sphaeram totam Cythara resonante contēperas.*
 Et Boetius.

O qui perpetua Mundum ratione gubernas.

Epicurus remouens à Diis prouidentiam, etiam naturam, & conditionem Deorum ab eis sustulit: adeò vt nomine concesserit, re verò negauerit esse Deos. Et cum negauerit Deos humana curare, pulchra est consideratio, quomodo Lucretius Epicurum sequens, valuerit in principio sui operis Deum inuocare, ab eoque auxilium petere.

*Æneadum genitrix, hominum, diuumq; voluptas,
 Alma Venus.*

Cum enim id faciat, sibi constare non videtur. Sed Epicurum dimittamus, & Lucretium, pro quo aliquid probabiliter dici posset. Peripatetici vnà cum Deo prouidentiam concedunt: sed Peripateticorum prouidentia, potius est negligentia, quam prouidentia. Non enim sine Ideis, & distincta rerum curandarum cognitione prouidentia seruari valet. Academici, vt nomine, ita re prouidentiam nouerunt, & comprobauerunt: ex quorum sententia dicimus, Prouidentiam esse Diuinam rationem eminenter in summo omnium Principe constitutam, in mente per Ideas formatam, & distributam; conuenienter pro fide media disposens: nam prouidentia ortum ducit à Deo; & in mente munere Idearum explicatur; per Dæmones,

mones, animas, & naturam, tanquam per famulos perficitur, & absoluitur. Ea, ut orditur à Deo, & descendit ad mentem, Prouidentia dicitur; ut transit ad animam, Fatum nuncupatur; cui Natura substernitur. Prouidentia est mediorum, & non pro mediis; est pro fine, & non finis; & quoniam omnia, præter Deum, sunt modo aliquo media; ideo eorum omnium est prouidentia pro acquirendo fine. Insuper, quoniam quicquid est in Deo, est finis; propterea non est in Deo prouidentia sui ipsius; sed cætera omnia per diuinam prouidentiam conuenientissimè in Deum, ut in finem communem ordinantur. Humana prouidentia exposcit prudentiam, & ratiocinationem. Diuina verò, cum eminentissima sit, indiuiduè absque vlla ratiocinatione simplicissima est. Diuinæ prouidentie omnia proculdubio subiiciuntur, sed vario modo, pro diuersitate conditionis rerum: res æternæ ad Mundi perfectionem pertinentes, per se, & primò ei subiiciuntur; res verò mortales, ex euentu, vel saltem secundariò, ut cōducunt ad specierum conseruationem. Insuper eorum, quæ in vniuerso fiunt: quædam à prouidentia, & secundum prouidentiam proficiscuntur; ut cœli motus: quædam non à prouidentia, sed secundum prouidentiam; ut quæ fiunt à viro prudenti, & probò; alia, neque à prouidentia, neque secundum prouidentiam; ut errores naturæ, & quæ fiunt à viro improbo; quæ etià

prouidentiam penitus non subterfugiunt: nã si ad vniuersum prouidentię ordinem respiciamus: nil est in vniuerso penitus ex euentu, nil penitus à casu, vel à fortuna: sed omnia sunt prouisa, atque præuisa.

*An Mundus ab æterno emanauerit à Deo,
opinionēs aliorum.*

CAP. IX.



DE Mundi ortu, & interitu variz fuerunt Philosophorum sententię: at ego, cæteris prætermisiss, solam Platonis opinionē explicaturus, assero Mūdum Idealem, siue intelligibilem esse proculdubio omni ex parte æternum: de Mundo verò corporeo, non ita constare, quid Plato senserit, num scilicet putauerit ab æterno emanasse à Deo, vel potius in aliquo temporis principio: ideo variz Academicorum sunt sententię. Proclus, Plotinus, Iamblichus, Syrianus, Simplicius, Ioannes Picus, & alij quamplurimi inquirunt Platonē putasse Mundum omni ex parte esse æternum: & Aristotelem solū ab eo dissentire in verbis, in sententiā verò conuenire. Quod si Plato in Timæo ponit Mundi generationem inquirens: Vniuersum igitur hoc cælum, siue Mundum, siue quo alio vocabulo gaudet, cognominemus: de quo primò consideremus, quod in quæstione de vniuerso antè omnia inuestigari debet: Vtrumne semper fuerit sine vllō

illo generationis principio, an genitum sit ab aliquo principio sumens exordium: id profectò cernitur, tangiturque, & corpus habet; omnia verò huiusmodi sensus mouent; quæ sensus mouët, opinione per sensus percipiuntur; hæc verò talia esse constat, vt gignantur, & genita sint; quicquid autè gignitur, ab aliqua caussa necessariò gigni asserimus. Opificem quidem, & patrem Mundi inuenire, difficile: & cum ià inueneris, prædicare, & eloqui vulgò impossibile est. Quibus verbis Plato suam de Mundi ortu profert sententiam. Proclus, & alij nuper enumerati eâ explicâtes, inquirunt, Platonem per ea verba solùm manifestasse differentiam inter corporea, & abiuncta à corpore: nam corporea, non verè sunt, sed fiunt; abiuncta verè sunt; propterea Plato tribuebat Mundo generationem; quia cernitur, tangitur, corpus habet, opinione percipitur: vel inquirunt, quòd Plato per genitum denotat dependens; vel quòd significat compositum ex initiis suis; vel demum quòd denotat Mundum esse genitum ratione generis, quia corpori nõ repugnat generatio; vt nec talpæ videre, sub ratione animalis. Confirmant viri isti præclari sententiam suam ex eo, quia Plato inquit: Bonus erat opifex, nulla vnquam aliqua de re tangitur inuidia; at opifex ab æterno est talis: quare ab æterno est Mundi opifex. Insuper addit Plato: Omnia sibi, quantum fieri poterat, simillima fieri voluit; at non esset Mundus o-

pifici similis, nisi esset æternus. Præterea declarans Plato, quomodo tempus ævo respondeat, inquit; Illius animalis, (hoc est Mundi intelligibilis) æterna natura est; quod genito operi congruere omnino non potest. Idcirco imaginem æui mobilem effingere decreuit; ac dum Cælum exornaret, fecit æternitatis in vnitatem manentis æternam quandam in numero fluentem imaginem, quam nos tempus vocamus. & post pauca; Tempus vnà cum cælo factum est; & ad exemplar cui ideo factum est, vt mundus hic illi præstantiori, quoad potest, simillimus sit; ille enim Mundus, huius exemplar, omne per æuum est; hic verò perpetuò per omne tempus fuit, sitque solus, & erit. Si itaque tempus est imago æui; & si Mundus perpetuò per omne tempus fuit, & erit; sequitur, vt omni ex parte sit æternus. Insuper, quòd Plato non loquatur de ortu Mundi in principio temporis; sed de eo, per quem dicimus semper fieri; cōfirmat Simplicius in 1. de Cælo; quoniam Plato, antequam dubitet de Mundi ortu, declarat terminos, inquiens: Principiò mihi ita distinguendum esse videtur, quid sit, quod semper est carens generatione; quid verò, quod gignitur quidem, neque est vnquam: illud intellectu per rationis indagationē percipi potest, cū semper sit idem; hoc opinione per irrationalem sensum attingi, cū gignatur, & intereat, neque verè vnquam sit. Ex quo patet Platonem non loqui
de

de ortu in principio aliquo temporis, ut genitum distinguitur ab eo, quod tali principio caret: sed ut contradistinguitur ab eo, quod semper verè est. Sic in 10. de R. P. inquit Plato: Vita hominis ad vniuersum tempus nihil est. Et sub initium 3. de legibus ait: per infinitum tempus præsuisse homines, & annos esse innumerabiles. Mitto alia, quæ cumulatissimè à Proclo afferuntur, & referuntur à Philopono in disputationibus contra Proclum. Qui sunt huius opinionis, inquit Mundum ab æterno pendere à Deo per simplicem emanationem: quæ, latè loquendo, dicitur generatio: per quam generans præcedit non tempore, sed origine, & natura: in qua significatione accipiendum censent dictum Timæi Locri: Deus animam Mundi creauit suo corpore priorem, tum potestate, tum tempore. pariter dictum Platonis in Timæo; Ille verò, tam generatione, quàm virtute, priorem, antiquioremque Animam corpore constituit: utpote, quæ obediens corpori esset imperatura. ideo inquit Porphyrius, Proclus, Plotinus: quòd tempus, & generatio, quibus Anima corpus antecedit, non est extrinsecum intervallum: sed est successio quædam in Anima, quæ in ipsa formarum discursione antecedit origine Mundi motum. Quod ex eo colligunt, quia mundus semper fit; Anima verò minimè, sed est modo aliquo. Confirmant, quia per Platonem tempus est genitum vnà

cū mundo: quare non potest Anima esse prior tempore Mundo. Auer. in 1. cœli, cōtextu 104. hoc concilium nouit, ideo inquit; Defendentes autem Platonem inquirunt, quòd similitudo generationis Mundi ex suis elementis cum generatione figurarum ex lineis, ac superficiebus, posita à Platone, significat, quòd Mundus semper fuit; & quòd non intendebat Plato per hunc sermonem, nisi quòd partes eius sunt priores natura toto; non quòd fuerit verè genitus; & si hoc intēdebat, nihil differt ab Arist. Hæc Auer. Pari ratione, cū Plato dicat Mundum esse solubilem; aiunt Mundum dici solubilem, nō quia sit verè genitus, & in se habeat principia interitus; sed quia continenter pender à Deo; adeò vt, ea dependentia remota, desineret esse; veluti dicebat Arist. in 9. metaph. 17. Si non essent substantiæ abiunctæ, nihil esset; & Auer. in 2. cap. de substantia orbis inquit; Et debes scire, quòd corpus cœleste nō eget virtute mouente in loco semper tantum; sed largiente virtutem in se, & in sua substantia, permanentiam æternam, &c. hæc dicunt, qui Aristotelem cum Platone hac de re nituntur reddere concordem.

Alia opinio de Mundi Dependētia à Deo.

CAP. XI.



Aristoteles, & cū eo Philoponus, Seuerus Atticus, Plutarchus, Alexāder, & alij quamplurimi tribuūt Platoni, quòd

quòd putauerit Mundum ita esse genitum, vt ex parte antè non fuerit semper; ac insuper esse verè mortalem, Dei tamen voluntate seruari æternum. Nec desunt, qui dicant Platonem opinionem suam desumpsisse ex Mose in Genesi: vt enim in Genesi legitur: In principio creauit Deus cœlum, & terram: ita in Timæo inquit Plato: In principio creauit Deus ignē, & terram: nam Plato cœlum ignem vocat. insuper, vt in Genesi legitur, quòd spiritus ferebatur super aquas, & spiritus nonnunquam aerem significat: ita Plato duo illa extrema per mediam aquam, & aerem ligari asseruit. quòd Plato nō putauerit Mundum fuisse semper, colligunt ex eo; quia Plato in Timæo materiam, ex qua mundus constat, ait ante mundi constitutionem fuisse non tranquillam, nec quietam: sed temerè agitatam, fluentem, ordinisq̃ue expertem. Ad hæc respiciens Arist. inquit in 1. cœli cont. 105. hæc non posse dici à Platone, explicationis gratia; vt faciunt sæpè Mathematici, qui doctrinæ gratia lineas ducunt, & arte orbes conficiunt, cœli formam præferentes: nam Plato opposita tribuebat materiæ, quæ ei simul tempore conuenire nō possunt, sed exposcunt temporis distinctionē: motus enim inordinatus, quem Plato dicebat primò conuenire materiæ, non potest esse simul tempore cū motu ordinato; ideo inquit Arist. hoc nō est idem: in designationibus enim, positis omnibus esse simul, idem accidit:

D

in horum autē demonstrationibus non idem, sed impossibile: quæ enim accipiuntur prius, & posterius, subcontraria sunt, quæ simul esse nequeunt, &c. ita quoque in 3. cœli latissimè manifestat, non potuisse elementa ante Mundi constitutionem sine ordine moueri. præterea Plato eandem cœli, & mortalium statuit materiam; asseruit mundum constare ex quatuor corporeis elementis; non censuit cœlum esse essentiam quintam: quoniam, vt ait Porphyrius, Aristoteles fuit primus, qui vnà cum Archita quintam essentiam excogitauit. quare, vt quatuor elementa, & constantia ex materia, verè gignuntur; ita mundum verè esse genitum, Plato visus est existimasse. Quod ex eo maximè cōstat; quia euasiones eorum, qui secus censent, inanes esse videntur. nam præsertim inquirunt mundum dici genitum, quia continenter fit; ad differentiam eorum, quæ verè sunt: aduersus quod instabat Alexan. referente Simplicio in 1. cœli 100. quia Plato vtitur tempore præterito, inquiriens; Ex inordinata iactatione redegit in ordinem: quod si denotare voluisset continenter fieri, solum dixisset gigni, in ordinem redigi; non absolute redactum esse, & genitum. Præterea dum dicimus aliquid continenter fieri, ea generatio iungitur cum interitu: ideo si Plato de ea loqueretur, vt tribuit Mundo ortum, ita ei tribueret interitum, quod nō fecit: nam ait mundum genitum, & seruandum fore æternum.

Neque

Neque etiam valemus dicere, quod Plato solam dependentiam, siue emanationem à primo principio denotauerit, vel solam voluerit manifestare compositionem. primò, quia inquit mundum esse genitum, quoniam ærni-
tur, tangitur, & corpus habet; at si dependen-
tiam respicimus, etiam ea, quæ nec tanguntur,
nec corpus habent, pendere à Deo dicuntur.
præterea Plato ex eo, quod Mundus est geni-
tus, infert, quod sit mortalis: at quod aliquid
sit solubile, & mortale, non colligitur ex eo,
quod continenter fiat, neque ex eo, quod pen-
deat: quoniam etiam anima dicitur à Platone
pendere, ex suisque initiis constare; cum tamē
æterna, & immortalis ab eodem frequenter
demonstretur. Cōfirmatur, quia dum dicitur
aliquid genitum, & solubile: profectò ita acci-
pitur genitum, vt opponitur solubili: at mun-
dus ex se dicitur solubilis à Platone solutione,
& interitu, qui fieret in tempore, nisi seruaretur:
quare genitum ei oppositum, debet intel-
ligi in tēpore, & verè genitum. Præterea quod
Plato sit loquutus de generatione in tempore,
nō autem de æterna emanatione, ex eo pa-
tet: quia dum mouet difficultatem, genitum
videtur opponere ei, quod semper fuerit, nam
inquit: Vtrumne semper fuerit sine vllō ge-
nerationis principio, an genitum sit ab aliquo
principio sumens exordium. Insuper, inquit,
an genitum sit: non autē quærit, an continen-
ter fiat. Insuper in Euthydemo, referēs sophis-

ma ad ostendendum, nos & semper, & omnia scire, colligit; Constat itaque, quòd puer sciebas, & quando genitus es, & quando natus; immò, & antequam nascereris, & antè Cœli, terræque ortum scisti omnia, si modò semper scis. Præterea inquit Plato in Timæo; Dies porrò, & noctes, & menses, & annos, qui ante Cælum non erant, tunc nascente Mundo nasci iussit, &c. Demum in libro de regno ait, Priscos homines ex terra fuisse ortos. Hæc potiora sunt ex illis, quæ afferri possunt ad ostendendum, quòd Plato verè asseruerit Mundum, & tempus habuisse principium, non autem fuisse semper.

Sententia propria, & dissolutio difficultatis.

CAP. XII.

Multa, & ea quidem magni ponderis sunt, quæ pro omni parte afferri possunt; adeò ut iure viri sapientes de sententia Platonis summo opere fuerint ancipites, & varij varia senserint, & lis adhuc sub iudice pendeat. Verùm, ut de re tam dubia dicam, quod sentio, ita decernendum cenfeo. Si accuratè perpendimus modum philosophandi Platonis, inueniemus primò, quòd de his, quæ pertinent ad Dei gloriam, ad hominis erga Deum pietatem, semper se certissimum manifestauit; semper attinentia ad Dei eminentiam, fœcunda oratione, plenisque (ut aiunt) faucibus extulit; ut de Prouidētia Dei,
de

de Religione, de rerum omnium à Deo dependentia, & aliis huius generis se habet. percipimus secūdò, quòd de indifferentibus, siue sint eterna, siue mortalia, semper se ancipitem manifestauit; dixit se nihil scire; affirmauit in Phædone in persona Socratis, se ob naturalium rerum considerationem vsque adeò fuisse obcecatum; vt ea etiam, quæ prius manifestè sciebat, vt ei, aliisque videbatur, in ignorationem fuerint conuersa. His animaduersis, dico, in Mundo nos duo posse considerare: primū est, quòd pendeat à Deo; alterum est, quando à Deo manauerit, num ab æterno, vel in certo, & determinato principio. primum verè manifestat conditionem, & gloriam Dei, ac in nobis pietatem parit erga illum: alterum est indifferens; quouis enim modo sese habeat, semper indicatur Gloria opificis, semper manifestatur nos omnia iudicare debere munera Dei. Propterea de primo se certum ubiq; manifestauit, de altero se ubique indicauit dubiū. Insuper consuevit Plato de attinentibus ad gloriam Dei multa ex antiquis depromere, & præsertim ex Aegyptiis: ideo in Timæo Aegyptiis, vt antiquissimis, sine ratione credendum esse ait; præsertim, cū de Diis est sermo. hanc difficultatis resolutionem colligo ex Platone in 6. de legibus asserente; Scire omnes oportet hominum generationem, vel nullum vnquam prorsus initium habuisse, neque terminum habituram; sed fuisse omnino semper, &

fore: aut si cepit, inextimabili ante nos temporis magnitudine incepisse. Sic de initio se dubium affirmat. Insuper, in 10. de Legibus inquit: Si quouis modo vniuersa simul steterint, vt plurimi talium audent dicere, quem motum potissimum primum in ipsis fieri asseremus: his quoque verbis Plato asserit, se nil audere de principio mundi decernere. Ad hæc fortè respiciens Arist. in iib. 1. Topicorum dixit, Problema de mundi æternitate esse Dialecticum: nam dialecticum est non ex opinione Arist. qui putat se æternitatem exactè demonstrasse, sed ex opinione Platonis. Cùm itaque Plato de hac re nil absolutè decreuerit: præsertim tamen ex fundamentis eius sequitur, vt sit omni ex parte æternus, cùm æterna sit materia Mundi, pariter & Anima. ideo portiores Platonici, huic parti potiùs, quàm alteri adhærent. Nec difficile est rationes soluere, quæ huic parti aduersantur. Ex his colligo re vera Aristotelem dissentire à Platone: primò, quia Arist. se de æternitate certum manifestat, Plato dubium: secundò, quia Aristot. cæli, & mortalium diuersam censet esse materiam, Plato eandem: tertio, quia Plato, si etiam concederet mundi æternitatem, attamen ei conuenire assereret causam efficientē, & poneret emanationem illam æternam, quam æternam creationem appellant: quàm minimè cenfeo cùm Arist. concedendam fore: quartò, quia cùm Plato cæli, & mortalium eandem statuatur


mate.

materiali, magis ponit mundum solubilem,
& magis indicat egere conseruante, quàm fa-
ciat Arist. Ad quæ fundamenta si respicimus,
optimè cognoscemus, quàm leuiter Sim-
plicius Arist. hac de re cum Platone
conciliet, & quàm manifestè
sententias verè distinctas
confundat.

FINIS PRIMI LIBRI.

D 4





STEPHANI THEVPOLI,
BENEDICTI F. PA-
TRITII VENETI,
ACADEMICARVM
Contemplationum,
LIBER II.

De mente, an re distinguatur à DEO.

CAP. I.

DEo, qui ipsum Vnum, Bonum, Pulchrum, Mundusq; eminentissimus nuncupatur, succedit proximè Mens, filius ipsius boni, quæ mundus intelligibilis, & Idealis dicitur: de qua magnâ apud Platonicos est controuersia, an sit re, & substantia distincta à Deo, vel ne. Qui Platonem magis cū nostris Theologis conciliare nituntur, asserūt apud Platonem id denotare Deum, mentem, & animam, quod apud nostros Theologos Diuina Trinitas; mens enim est Filius Dei. Pia profectò est horum intentio, at sententia minimè est vera. Primò, quia anima sequitur post mentem, & ab ea sola proximè pendet: Spiritus

tus sanctus ab vtraque persona spiratur. Insuper Anima multis modis composita est, & numerus se mouens à Platone dicitur; eiusque, vt cæterorum generabilium, datur propriè Idea; quæ longè distant à S. Spiritu. Præterea Ideæ, ex Academicorū sententia, conueniunt mēti nō cōueniunt Deo, non animæ: nā animæ solum rationes cōueniunt: quib. de rebus longè secus decernūt Theologi, adeò quòd dum piū nituntur reddere Platonem, cum reddunt maximè impiū; cū indicent malè sentire de Diuina essentia, & Trinitate. Propterea asserendum censeo ex sententia Platonis, Deum, mentem, & animam re, & substantia distingui; vt Plotinus, Numenius, & alij plurimi existimarunt: quod ex eo patet; quia in mente consideratur à Platonicijs compositio, multitudo, vnio, modus materiæ, aliæque multa, vt in progressu apparebit; quæ alienissima sunt à Natura Dei. Insuper inquit Plato in Philebo, mentem esse progeniem primæ causæ, & in 7. de R. P. ait ipsum bonum præcreasse mentem: Præterea, cū Plato in Epist. ij. ad Dionysium dicat; Circa omnium Regem omnia sunt, ipsius gratia omnia, ipse pulchrorum omnium causa; circa secundum secundam, tertia circa tertium; quibus verbis Diuinam Trinitatem censent nonnulli Platonem indicasse: proculdubio, si ea rectè considerantur, potius indicant Platonem putasse ea tria re, & substantia distingui, quàm secus. quoniam si

vnam eorum putasset essentiam, non asseruisset rerum varios ordines, nempe intelligibile, rationale, & sensibile, respicere ea tria illisque tribus conuenienti ratione respondere. Propterea dicendum censeo Platone[m] solùm eminens, & obscurè, per internum Diuinitatis contactum; qui, vt inquit Iamblichus, inest nobis ante omnem rationis vsum; per ænigmata & imagines ex Priscis Theologis depromptas, vmbra[m] aliquam Diuinæ Trinitatis nouisse, & indicasse; re vera tamen, eam minimè cognouisse; non enim in ipso vno Trinitatem excogitare valuit. huius eminentissimæ cognitionis, Diuinæ reuelationi, non humanæ rationi referendę sunt gratiæ. seiunxit itaque Plato animam à mente, mētem à Deo. quòd si etiam assereremus, illum non seiunxisse mentem à Deo, non propterea censendum esset ita ad Deum se habere, vt apud Theologos filius ad patrem; sed potiùs dicendum esset, quòd ita se haberet ad Deum, vt apud Theologos se habet mūdus in Dei mente prædefinitus, & prædestinatus ad immēsam Dei essentiam. His de rebus Arist. maximè dissentire à Platone, nemini debet esse dubium: Aristoteles enim in primo mobili, nec animam distinguit à prima mente, nec mentem à Deo: ego autem cum Platone de mente, vt à Deo distincta, verba faciam.

Quid

Quid sit Mens.

CAP. II.



Deo, vt ab increata luce manat mēs, tanquam lux creata, insensibilis tamen; cui in rebus sensibilibus Sol visibilis proportionē respondet. Deus est omnium centrum; mens est immobilis circulus à centro pendēs: Deus est ipsum vnum; Menti per nexum cum vno, conuenit vnio, & vnitas: Deus est super ens, & initium entis; Mens est eminentissimum ens, & omne, quod verè est; nam quod verè est, intelligibile est; huiusmodi sunt Ideæ, quæ menti conueniunt. ideo rectè dixit Plato; Circa omnium Regem omnia sunt: quod verum non esset, si Rex omnium, ens nuncuparetur. Dicitur itaque prima mens vnitas, essentia, esse, veritas, vita, intelligibile, & intellectus; quæ inter se non substantia, sed ratione distinguuntur. Vnitas, siue vnio, est participatio ipsius primi vnus, & nexus cum eo. Essentia est veluti vnitatis processio, ex qua ens confurgit; nam essentia est id, quod res est. Esse verò est ipsa existentia, quæ ex essentia confurgit: Ens est in eodem gradu cum veritate. Mens itaque est primò ens, primoque essentia; at non primò vnum, sed participatione. Essentiæ, & enti succedit Vita, quæ verè & absolutè vita est: nam cæteræ sunt vmbre quædam, & potius non vitæ, quàm vitæ. Sequuntur mox Ideæ, siue formæ entium, quæ Intelligibilia nuncupantur. Demum adest In-

tellectus, qui in se, & ad intelligibilia conuertitur; qui verè & absolutè est intellectus: nam transfertur sæpè hoc nomen ad animam rationis compotem, cui solùm per conuenientiam, & similitudinem conuenit. Hæc prima mens est ea, quæ à Platonicijs Mundi faber nūcupatur. Proptereà rectè asseruit Speusippus, ens primum esse proprium principium cæterorum entium, Mundi fabrum, ac interminabilem Diuinitatem, ab vno superiore pendentem. Ex his constat, dum gradus eorum, quæ sunt, ex sententia Platonis, vel sectatorum eius, numerare volumus; nequaquam in primo gradu collocandam esse mentem; cùm manifestissimè ab eis in secundo gradu collocetur. Quod nouit etiam Philoponus, & asseruit in 3. de anima 15. Pariter & Auer. in suis disputationibus cōtra Algaz: disp. 5. in sol. 3. dubij. Ex sentētia verò Arist. secūs se habet: nam Deum, primam mentem, primumque intelligibile in idem redigit: non enim tam exactè resoluit, nec tam accuratè distinguit principia rerum prima, vt faciunt Platonici.

De principiis, & generibus rerum.

CAP. III.



T appareat, quomodo in mente, siue in mundo intelligibili reperiatur cōpositio; primò, quæ sint interna principia, & quæ prima genera rerum, explicandum est. Principia, ex Platonis sententia,

tria sunt infinitum, terminus, & vnum : infinitum præfert materiam, terminus formam : vnum verò, quod est iam ex vtrisque permixtum ; vt in Philebo docuit Plato. Hæc initia, modo corporeo conueniunt mundo corporeo, modo verò intelligibili, mundo intelligibili : hæc sunt principia, non quidem generationis, vt transmutatio est, adeo vt sint subiectum, & duo termini transmutationis ; quemadmodum explicantur ab Arist. in 1. Phys. sed sunt initia solum intrinsicè rem constituentia. Hæc tria principia redigi possunt in duos ; quoniam id tertium, nempe vnum ex vtrisque permixtū, potius est proles ex principiis consurgens, quàm principium ; vt in Philebo manifestauit Plato ; à nonnullis tamen illustribus Platonice ponitur principium tertium ; quatenus participatio vnius, & totū, est quid distinctum, & superueniens componentibus. Arist. in 1. Phys. ait Platonē pro principiis statuisse magnum, paruum, & vnum ; per quæ Arist. denotauit infinitum, & terminum, posita à Platone, in Philebo ; nam infinitum est magnum, & paruum, vt in proprio loco apparebit ; & Plato se in Timæo declarat ; Terminus autem est id præsertim, ex quo consurgit vnū, qui terminus est Ideæ participatio, & respondet formæ posite ab Arist. adeo, vt in his re vera non sit lis inter Arist. & Platonem. Insuper Plato præter principia ponit quinque genera rerum, vt cumulatè in Sophista manifestauit ;

ea sunt Essentia, Motus, Status, Identitas, Alteritas; latissimè à Plotino in libro de generibus entis explicata. Hęc à Proclo in expositione Timæi, essendi causæ nuncupantur; quæ varia consideratione, & genera, & principia dici possunt: genera quidem, vt sub vnoquoque alia cōtinentur: principia verò, vt res constituunt: ideo varia ratione, & modo dicuntur genera, ac nuncupentur illa decem ab Archita excogitata, quæ prædicamenta nuncupantur, de his longe secùs videtur sentire Aristot. primò, quia cum Archita ponit decem genera rerum: secundò, quia in 3. physic. manifestauit motum nō esse genus, neque naturam vnā; si nō motus, neque etiam status ei oppositus; & præsertim, quia opposita ad idē genus pertinere videntur; quare etiam alteritas, & identitas minimè videntur posse duo genera constituere. Simplicius in 3. Physic. laborauit pro concordia: & re vera longè secùs accipitur nomen generis apud Platonem, quàm apud Aristotelem; cū Plato prima principia rei cōstituentia, nuncupet genera; Arist. verò neget ea esse genera, & sola ex principiis constituta genera censeat esse dicenda; ideò 12. Metaph. prædicamentorum quærit principia. Insuper Arist. solū mortalium, vt censeo, propriè assignauit genera; æternā verò similitudine tantū, & conuenientia quadam censuit ad prædicamenta redigi: Plato econtra ita genera prima rerum assignauit, vt primò conuenirent mundo

mundo intelligibili. Demum nomen motus longè secùs apud Platonem vsurpatur, quàm apud Arist. Plato enim omnem ab aliquo processione, motum appellat; Aristot. verò solum actum imperfectum. Cùm itaque ex his vocibus lis præsertim oriri videatur; attamen etiam, si sententiam intimiùs consideramus, omnino cõuenire non iudicabimus: quoniam Arist. minimè concederet hæc in anima, & in mente posse reperiri: insuper minimè diceret ea esse primos essendi modos: sed potius id tribueret actui, & potentiæ.

Quomodo in mente sint principia rerum.

CAP. IV.

Este absolutè simplex, ei soli conuenit, quod absolutè est primum, & indepèdens: propterea solus Deus absolutè simplex est; cætera omnia sunt composita, & modo sibi consentaneo vnione prædita; nam mundus intelligibilis modo intelligibili, rationalis modo rationali, sensibilis verò modo sensibili compositus est: ad eò, vt omnia, conditione sibi conueniente, sint in omnibus. Vnio, & compositio confurgit cū ex principiis, tum ex generibus; præsertim tamen ex principiis vnio, ex generibus compositio prodit, ordiens à principiis: vt ab vnitatem proximè pendet binarius; ita ab ipso vno fluunt proximè infinitum, & terminus: quæ sunt, binarius primus primi numeri rerum. Hæc duo, vt rectè Plotinus existimauit, nunquam

inueniuntur à compositione aliqua, & præsertim à prima, quæ primæ menti conuenit, separata; sed solùm ratione, & forma distinguuntur. Infinitum in prima mente est essentia, vt formabilis, & terminabilis: terminus verò eius est prima, vniuersalisque eius forma: in quibus tertio consideratur participatio vnius, & totum; quod totum, ita in ea est totum, vt modo aliquo in quauis parte sit totum. Insuper essentia, vt pendens ab vno, modo quodam est non vnum; atque vnum, vt est non vnum, sortitur infinitatem; vt est vnum, sortitur terminum. Infinitas præsertim versatur circa vitam; terminus, circa intellectum, vel intelligibilia. Demum in hoc primo ente alia consideratione reperitur infinitum, & terminus; non quidem respiciendo ad entis conditiones, sed ad conditiones intelligibilium, siue Idearum, ad quas pertinet numerus. Nā multiplicabilis natura, & quasi vltteriùs progressura conditio, ideis cōuenit, per quam infinitum eis tribuitur: quibus mox conuenit finitum, siue terminus; quatenus absolutè certus est idearum numerus, inter se formaliter differentium; finitæque sunt species rerum Diuinarum, & sensibilium. Insuper infinitum conuenit Ideis, quatenus vnaquæque Idea ad innumera indiuidua refertur, variis illam modis, temporibus, locisque participatura; cui Ideæ insimul conuenit terminus, quatenus quælibet est vna certa forma.

Quo.

*Quomodo in prima mente sint quinque
genera rerum.*

CAP. V.



Voniam mens prima est vniuersum,
& totum absolutissimum: propterea
in ea, cuncta rerum genera debēt in-
ueniri; scilicet, Essentia, Motus, Sta-
tus, Identitas, Alteritas; quæ tamen inter se so-
la ratione distinguuntur: ob quam distinctio-
nem vnum non est alterum, vnum non præ-
dicatur de altero. Vt autem appareat, quomo-
do in hoc absolutissimo ente ea inueniantur;
considerandum est, essentiam in eo esse genus
primum, circa quod cætera genera versantur;
innox in vita consideratur motus, & alteritas:
vita enim est vegetus actus ex essentia pullu-
lans, omnis vitæ, motusque principium: in in-
tellectu consideratur status, & identitas; qua-
tenus est vitalis motionis terminus, progres-
sum vitæ sistens. Insuper alia ratione in hoc
primo ente eadem genera ita considerantur.
In essentia est identitas ratione termini, & v-
niuersæ eius formæ; quæ vna, & semper eadē
est. Alteritas ei cōuenit per multiformes Ideas.
Ratione quarum etiam ei conuenit similitu-
do, quia conformes sunt, semperque in habitu
simili perseuerant: Dissimilitudo, quia ratio-
ne inter se differunt, & dissimilia faciunt. Æ-
qualitas insuper, quia semper æqualis sunt
virtutis; idemque vnius Idææ est actionis mo-

E.

dus: Inæqualitas denique; quoniam diuersarum Idearum inæquales sunt vires, & gradus; atque etiam inæqualia faciunt. Demum hoc primum ens, quatenus absolutè est, ab ipso vno sortitur Essentiam; & quatenus manando ab illo existit, Alteritatem nanciscitur; atque Motum: quatenus verò, cùm habeat esse ab illo, ad se, & ad illud conuertitur; Identitatem accipit, atq; Statum. Si hæc conferimus cum sententia Arist. inueniemus Arist. cum Platone Deum statuere absolutè simplicè: in intelligētis verò sub Deo collocatis duplicem ponere compositionem; vnā ex intellectu, & intelligibili, quatenus intelligunt aliquid supra se; alteram ex actu, & potentia non repugnantia, pendentem ex recessu à primo, quatenus eis sub ratione entis non repugnat maior perfectio: quæ duæ compositiones longè sunt diuersæ ab explicatis ex sententia Platonis. Concedunt Platonici vtrasque, at superaddunt alias; quæ partim aduersantur fundamentis Peripateticorum, partim cum eis consentiunt: aduersantur, quatenus Plato eas recipit ex emanatione mentis à Deo, ac insuper ex Ideis menti conuenientibus. Arist. nec æternam emanationem concedit; non enim ibi reperitur prouentus, & consecutio, nisi, vt intelligibile est causa intelligētis, quemadmodum in 12. Metaph. 44. inquit Auer. Pariter non admittit Ideas; consentiunt tamen, quatenus etiam Aristot. intelligentiis varia tribuit, quæ
sola

sola ratione sunt distincta.

Conditiones nonnullae primæ mentis.

CAP. VI.



Voniam solus Deus est absolutè primus, absolutè simplex, absolutè perfectio; propterea ipse solus, nedū materiæ, verū insuper modi materiæ est expers; cætera verò omnia materiam includunt, vel materiæ modum: & quò magis ab ipso bono distant, magis eam includunt. ideo Mens proxima Deo, minimè includit materiam; & ita maximè est vnū formale, vt prima materia maximè est infinitum formabile. Hæc sub bono posita, maximè expetit bonū, maximeque eo fruitur; adeò vt fruitio expeditioni æquetur. Eadem dicitur genita, & ab ipso bono, & à se: ab ipso bono, quia ab eo inanat, in quod etiam intelligendo conuertitur: à se verò, quatenus ab essentia fœcunda procedit vita, & in se intelligendo reflectitur: quatenus autem semetipsam generat; semetipsa simul, & iunior, & senior dici potest; nam respiciendo ad ordinem generationis, primò est essentia, mox vita, deinde per motum intelligendo in se reflectitur. Sic in ea prior est essentia, quàm vita; vita, quàm intellectus: Insuper prior est substantia, quàm virtus; virtus, quàm operatio; adeò vt essentia senior, quàm vita, vita, quàm intellectus dici possit. Pariter intelligibile est senius intellectu, intellectus est

senior anima. At si ad Identitatem menti conuenientem respicimus, ea est sibi ætate æqualis. Huiusmodi comparationes conueniunt quidem menti; ipsi verò vni, quia simplicissimum est, vel non conueniunt, vel nō propriè. Insuper, in omni ordine natura supereminēs, & imparticipabilis, participabilem antecedit: propterea, quamuis cetera entia à primo ente; primumq; ens ab vno proficiscatur; attamen, nec primum vnum, ab vlllo vsquam vno participabile est; nec primum ens, ab vlllo ente; nec primus intellectus, ab vlllo intellectu participari valet. Collocata autem sub primo ea sunt, quæ nata sunt participari; & cum participantur, dicuntur perficere, & cum participante iungi, & vniri. Ex hæcenus dictis constat primò, quomodo vera sit sententia Parmenidis approbata à Platone, verbo tenus reiecta ab Arist. in 1. Phys. quòd omnia sint ens vnum, res vna, essentia vna: nam ea est mens, in qua cuncta purissimè insunt. Constat insuper quomodo ex sententia Simplicij, intellectus non participatus fluat ab vno, & sub vno collocetur; intellectus participatus, sub non participato disponatur.

Alie primi Entis conditiones.

CAP. VII.



Ens prima, primumq; ens varia cōsideratione est in ipso vno, est in se, est vbiq; : primò est in ipso vno, quia ab eo pendet: mox est in se, cum sit vniuersum,

uersum, & mundus intelligibilis: vniuerso, vt vniuersum est, repugnat esse in alio: demum est vbique, quatenus cuncta ab eo producta sunt, & conseruantur. Insuper dicitur semper stare, semperque moueri: stat semper, quatenus est in seipso, & in suo eodem semper manet: mouetur verò, vt in se conuertitur, & ab ipso vno pendet, & conseruatur. Insuper est sibi met idem, atque alterum; cæteris idem, atque alterum: sibi met est idem, vt manet semper, alterum vt mouetur: cum cæteris verò comparatum, est alterum; quia quod verè est, non dicitur de his, quæ non verè sunt: est autem idem, quatenus pura alteritas non datur; cum enim omnia pendeant, seruenturque ab infinito vno; in omnibus vnitas, identitasque regnat. Præterea, quatenus hoc primum ens est idem, atque alterum, simile, atque dissimile; eatenus ratione identitatis, & similitudinis, & tangere, & tangi dicitur; ratione dissimilitudinis, nec tangere, nec tangi: cōtactus tamen, ac insuper continuatio magis propriè ei conueniunt, dū ad dependētiam, & operationem respicimus; quàm dum respicimus ad identitatem, & alteritatem. Insuper hoc primum ens, & secum, & cum aliis comparatum, æquale, & inæquale dicitur: æquatur patri vno; quia quæ in virtute, & eminentia sunt in patre vno, sunt in ente filio per formam; cui tamen insimul apprimè est inæquale: Si secum comparatur, ratione identitatis, & status, est æquale; ratione alteri-

tatis, & motus, est inæquale: Si demum confertur cum mûdo corporeo, est pariter æquale, & inæquale; & cûm sit inæquale, est insimul & maius, & minus. Æquatur primû ens mundo corporeo: quia quot Ideas in se inspicit illud, tot in mundo corporeo formas cõstituit: Est insuper maius mundo corporeo, cûm eius sit faber: est minus, ob multitudinem, & aceruum huius corporei mundi, ne dum rerum, quarum sunt Ideæ; verûm etiam earum, quarum non sunt. In hac prima mente tres considerantur operationes, tresque relationes, prima, vt in summum bonum conuertitur, idque contemplatur: secunda, vt in se conuertitur se ipsam cognoscens, & producens: postrema, vt producit inferiora. per primam operationem solûm perficitur, per mediam perficit, & perficitur; per postremam solûm perficit. per primam dicitur Saturnus contemplationi intentus, sub Cælio positus; per secundam Saturnus in se manens; per tertiam Iupiter humana distribuens, & gubernans. Ex his cõstat, quòd quamuis prima mens dicatur Sol intelligibilis; vnde manant munere Idearum per vniuersum radij simul sensibiles, & non sensibiles; attamen modo aliquo etiam Lunæ est similis, quatenus facies eius ad ipsum vnum, quasi ad Solem conuersa, magis fulget, quàm altera conuersa ad mundum corporeum.

De

CAP. VIII.

Mens non participata, omninoq; prima, omnium cōsensu, vna est: an verò post eam dentur alię non participatę mentes, nō conueniunt Platonici. Nonnulli plures enumerant: quibus assentiri videntur Proclus, & Syrianus. Alij id renuunt, & solam vnam statuunt, non participatam mentem; vt Plotinus, & Porphyrius: quorum sententiam potiore censeo; nam esse plures, nec ratio ostendit, nec vsus vllus exposcit. Mentis in anima participatę, dupliciter considerari possunt; vel in se; vel vt ab anima participatę: consideratę in se, minimè distinguuntur; sed vnitatem sunt pręditę: consideratę verò, vt ab anima sunt participatę, tot sunt, quot sunt animę; & de his vera est sententia Platonis, non inueniri mentem sine anima. Sic itaque participatę mentes, & vna, & plures sine contradictione dicuntur: Propterea modò Soli, modò Lumini dicuntur similes: cū enim Sol sit vnus, per varios radios in perspicuo receptos, modo aliquo redditur multiplex. Quomodo etiam mens participata ad non participatam se habeat, non vna est Academicorum sententia. Nonnulli censent eas minimè inter se substantia distinguui, sed solū ratione, & modo sese habendi; vt Solis lux, & radij eius. Quam sententiam minùs veram

cenſeo; quoniam expoſcit vniuerſi plenitudo, vt in potioribus rerum gradibus primò inueniatur gradus, & conditio rei eminens, ſimplex, & ſeiuncta; mox alia aliis communicata. Propterea veriore cenſeo ſententiam oppoſitam, quòd mens participata à non participata re, & ſubſtantia diſtinguatur: adeò vt mens non participata ſit, tanquam eſſentia Solis: mens participata, dum in ſe conſideratur, ſit, tanquam lux in Sole; dum verò conſideratur, vt participata, ac in anima recepta, proportionè reſpondeat radiis in perſpicuo refulgentibus. Inſuper quoniam participantium animarum conditiones variæ ſunt; ideò & magis, & minùs mente participare dicuntur; vt perſpicuum magis, & minùs purum, magis, & minùs luminis eſt capax. Ex quo conſtat, quomodo intelligi debeat dictum Platonis in decimo de Legibus, aſſerentis; Si anima intellectum diuinum acceperit, rectè cuncta Diis recta, ſœliciaque perducit; ſin verò cùm amentia iuncta fuerit, omnia his contraria facit. Mens participata, quoniam ſub nō participata collocatur, ideò ea quoque compoſita iudicari debet: adeò quòd interna illa principia, communiaque rerum genera, quæ vidimus primæ menti cōuenire, etiam conueniant participatis mentibus; cum maiori tamen diſtinctione. Inſuper vt mens nō participata, ſœlicitate fruitur; quia proximè cum ipſo bono, & vno iungitur: ita participatæ mentes, ſœlicè vitam viuunt; quia
iun-

junctæ cum prima mente, bonum, & vnum attingunt: & propterea dicuntur esse media, & nexus, per quos animæ cum primo principio fœlicissimè copulantur. Mens enim animam format, terminat, eleuat, & cum primo principio coniungit. Apud Aristotelem, vt nō reperitur distinctio inter animam rationalē, & mentem; itaque neque inter non participatam, & participatam mentem. Simplicius verò cūm hæc etiam tribuat Aristoteli, longissimè ab eius sententia recedit.

De Aeternitate, & æuo.

C A P. IX.

DEus, cūm sit principium eminentissimū, & supra ens; nec semper ens, nec mensura præditus, propriè dici potest. Mens verò, quæ Deo subiicitur, & est ens primum; rectè semper ens, & æternitas nuncupatur. Deus itaque est supra æternitatem, in mente primò refulget æternitas, cui in rebus mobilibus respōdet tempus. Vt autem hæc clariùs explicentur; de æternitate, & æuo, ex Academicorum sententia, aliquid dicamus: qua de re Theologi, Platonici, & Peripatetici vario modo loquuntur. Inquiunt Theologi Deo cōuenire æternitatem, Angelis æuum, quatenus sunt vitæ immortales, corporibus tempus: ita tamen, vt cœlo cōueniat non æternitas, sed sempiternitas quædam; quia semper seruandum est; mortalibus

verò propriè tempus, & propriè mensurari tempore; qua de re multa apud D. Thomam, & alios legi possunt. Describitur æternitas à Boetio in 5. de consolatione prosa sexta, quòd sit interminabilis vitæ, tota simul, & perfectæ possessio. A Plotino verò in lib. de æternitate & tempore; quòd sit vita infinita, tota simul; nam in æternitate nulla consideratur successio, sed omnia in ea præsentia sunt; præsentia dico, per momentum æternitatis, vniuersam aliorum latitudinem indiuiduè includens; adeò, vt simul sit quid indiuiduum, & immensa extensio. caret æternum potentia, vt non sit; propterea soli creatori conuenit. *Æuum*, dicitur inensurare creaturas; quatenus, nec mori, nec mutationi sunt obnoxie, vt Angelos. Tempus demū mensurat motum, & res mortales. Ita loquuntur scholastici Theologi. Platonici inter æuum, & æternitatem non ponūt distinctionem; nisi quatenus æternitas est nomen abstractum, dispositionem significans; æuum verò concretum denotans id, quod est æternum: *αἰών* enim significat *ἀεί οὖν*, hoc est, qđ semper est; semper esse ei conuenit, cui verè, & absolutè continet esse; huiusmodi est Mens; Mēti cōuenit itaq; æternitas, & æuū: Deus est supra æuū, & æternitatē. Sic Plato in *Timæo* inquit, æuo, quod cōuenit primę mēti, tanquā *Ideæ*, respondere in mūdo corporeo tēpus, vt imaginē eius. & quoniā Mens est duplex, vna nō participata, altera participata; ideo duplex est

est æternitas, & æuū; vnū nō participatū, conueniens primæ mēti; alterū participatum, cōueniēs subsequētib. mētib. Hæc itaq; est differentia inter Theologos, & Platonicos. Theologi Deo tribuunt æternitatē; Platonici illū ponūt supra æternitatē: Theologi distinguūt æternitatē ab æuo, quod nō faciunt Platonici; vt patet latissimè ex Plotino in libro de æternitate, & tēpore; & ex Platone in Timæo, dū æuū ponit Ideam tēporis. Ratio primæ differentiæ est: quia Theologi mēte primā nō seiungunt à Deo; ideo Deo esse absolutè, & vitā eminentissimam tribuunt, & consequenter æternitatem: Platonici verō seiungunt. Ratio secundæ differentiæ est: quia cū Platonici tribuant semper esse, & æternitatem rei pendenti à primo principio, iam æternitas coincidit cum æuo; & præsertim id faciūt respiciendo ad etymologiam, & proprietatem vocis: ad quam respexit Plotinus in lib. de æternitate cap. 5. Menti succedit Anima, & præsertim ea Mundi: quæ, vt eleuata, & complicata cū mente, dicitur complicata cum æuo, & æternitate: & dicitur particeps æternitatis, & æui: considerata verò quo ad propriam suam naturam, & conditionem; quia seipsam mouet, & est origo transeuntis motus; ideo dicitur esse initium temporis. Quod tempus est duplex: vel primum; vel pendens à primo: vt etiam duplex est motus; vnus primus, & est ille, quo anima seipsam mouet; alter est pendens à pri-

mo, & est ille, qui in corporibus recipitur. Animæ conuenit primus motus, & primū tempus: corporibus verò conuenit tempus secundum, & motus secundus. Secundus motus, secundumque tempus, quo ad eorum vniuersitatem, conueniunt cœlo; quo verò ad partes, conueniunt rebus mortalibus. Primum tempus, primusque motus, propriè conueniunt animæ rationali; cæteris inferioribus animæ gradibus solūm cōuenit portio, & vmbra primi temporis: vt etiam potiùs vmbra animæ, quàm veræ animæ dici merentur.

Aristotelis sententia, eiusq; cum Platonica collatio.

CAP. X.



Aristoteles, quia mentem à Deo nō secernit; ideo Deo conuenire æternitatem, & esse æternitatem affirmat: in quo cum Theologis conuenit, & dissentit à Platone. Insuper æternitatem ab æuo non distinxit: cōsiderauit enim æuum denotare esse semper, vt in primo cœli 100. cont. affirmauit; in quo conuenit cum Platone, dissentit à Theologis: & hoc constat præsertim ex 12. Metaphysic. cont. 39. vbi Deo asseruit conuenire æuum, & esse æuum. Ex his constat longè recedere à sententia Aristotelis, & Platonis illos, qui ex eorum opinione æternitatem supra æuum, & ab æuo distinctam ponunt: nam Aristoteles, & Plato idem significare

care eas voces existimant: Aristoteles tamen latius sumpsit nomen æui, quàm Plato: quoniam Plato magis propriè accipiens æuum, soli menti conuenire asseruit; Aristot. verò latius nomen æui vsurpans, considerauit æuum denotare esse semper. Et quoniam esse semper, duobus modis intelligi potest: vel absolute, vel cum contractione; absolute, vt Deus, & intelligentiæ semper sunt; cum contractione, vt mortalia dicuntur esse semper, hoc est per vniuersum suæ vitæ cursum; vt dicimus Alexandrum semper fuisse fortunatum, Socratem semper fuisse probum: ex his sequitur, duplex dari æuum, vnum in parte, alterum absolute. *Æuum* in parte, quod etiam ætas nūcupatur, conuenit singulis mortalibus; vt Alexander toto æuo, hoc est toto suæ vitæ cursu fuit fortunatus. *Æuum* absolutum est duplex; vel cū tempore iunctum, quod cælo, & mundo conuenit; de quo Arist. 2. cæli cont. 17. dixit, Dei opus est æternitas; vel supra tempus collocatū: & hoc est duplex; vel cum depēdētia, & conuenit intelligētiis sub Deo positis; vel sine dependentia, & conuenit Deo. Ita hæc explicanda sunt ex sententia Aristotelis, in quibus solum in modo loquendi differt à Platone; quatenus latius accipit nomen æui, & magis cum tempore illud permiscet, quàm faciat Plato, qui in sola mente æuum considerauit. Insuper etiam inter se distinguuntur; quia Plato æuum dixit proportionē respondere Ideis, & Ideam

illud nuncupauit, cuius tempus esset imago; quo loquendi modo Aristoteles minimè vtitur. Ac vt clariùs hoc pateat, aduertendum, quòd Æternitas, siue Æuum non est Idea, sed Ideis conueniens; non est aliquid ex quinque generibus, sed cunctis commune: & quamuis conueniat cunctis; attamen cum vnitatem, statum & identitate maximè est còiunctum. Insuper, quamuis æuum non sit Idea, attamen dicitur radix temporis, & cum Idea conueniens; quatenus tempus eius est imago, & ab eo fluit: de quo cecinit Boetius:

Qui tempus ab æuo

Ire iubes, stabilisq; manens das cuncta moueri.

De gradibus Entis.

CAP. XI.



Quoniam Mens prima absolutè, & verè est ens; & cum sit verè ens, dicitur æuum; nam verè ens, & semper ens, idè est, vt inquit Plotinus: propterea si ad ens respicimus, & gradus eorum, quæ sunt in vniuerso, numeramus; quinque præsertim, tanquàm capita, adinueniemus. Nam primum est id, quod est supra ens, & initium est entis: sub quo mēs reperitur, vel participata, vel ne, quæ est ens simpliciter, ens vnum: in tertio gradu est anima, in qua ens cū non ente est complicatum; magis tamen esse, quàm non esse dicitur, adeò vt esse quoddam obscu.

obscurū dici possit: in quarto gradu sunt corpora, & corporea, vt natura, & imitationes Idearum; quæ non verè entia sunt, & magis sunt non entia, quàm entia: postrema est materia, quæ infra ens, & verè non ens nuncupatur, & iure quidem: nam essentia, & esse ad formas pertinet; infra quas materia, & potentia collocatur. Insuper ea, quæ supra animam cogitantur, semper quidem sunt, nunquā fiunt; anima est, & fit semper; corporea semper fiūt, nunquam sunt; materia ne dum esse, immò nec fieri potest. Vt multi sunt gradus entis, ita etiam multi sunt gradus non entis. Nam primum datur non ens, quia est supra ens, & præstantius ente, ex quo non ente omnia fiunt: secundò non ens pro alteritate: tertio pro non vero ente, qualia sunt corpora: quarto pro verè non ente, quod rerum est materia; demum pro nihilo infra materiam collocato. Ex his colligo, quòd cū ab Aristot. materia dicatur per se ens, à Platone verè non ens; non propterea verè dissentiant; sed lis est in verbis, pendens ex varia entis, vel nō entis acceptione. Colligo insuper, quòd leuiter Arist. in primo Phys. 79. Platonem carpit, quia materiam dixerit non ens, & Parmenidis sententiam commendauerit. Colligo tertio, quòd cū Arist. in prædicamēto substantiæ dixerit, indiuidua esse substantias primas; Plato verò eas, nedum substantias neget esse primas, immò nec verè esse affirmet; non propterea verè dissentiant.

quoniam inter diuersa apud eos est comparatio: comparat Arist. indiuidua cum vniuersalibus per intellectum abiunctis: cōparat Plato corporea cū his, quæ ex sui natura sunt à corpore, & à materia soluta. Lis solū est in hoc: quia Plato rerum in materia existentium ponit Ideas in prima mēte, quas renuit Arist. Insuper cū Plato dicat corporea semper fieri, nunquam verò esse; Aristot. in 4. Metaphys. disputet contra hanc sententiam, manifestans hæc corporea etiā manere saltē in quali, & in forma, quāuis mutētur in quāto, & in 8. Phys. reiiciat eorum sententiā, qui corporea esse in continuo motu asseriebant; non propterea in sententia dissentiunt: quia Plato solū manifestare voluit corporea continenter pendere ab incorporeis, quod etiam asseruit Aristot. 9. Metaphys. 17. inquit; Si non darentur substantiæ separatæ, nihil esset. Insuper manifestare voluit, quòd ea, quæ conueniunt rebus abiunctis; sine diuisione, & extensione eis conueniunt: quæ verò competunt rebus corporeis, cum extensione, & successione sunt complicata. Ex quo demum patet, quòd quamuis substantiæ corporeæ nunquam esse, & semper fieri dicantur: non propterea ab Arist. hæc sententia euertitur, dū in prædicamento substantiæ inquit, proprium esse substantiæ, cū vna numero sit, capacein esse contrariorum.

FINIS LIBRI SECVNDI.

STE.



STEPHANI THEVPOLI,

BENEDICTI F. P. A-

TRITII VENETI,

ACADEMICARVM

Contemplationum,

LIBER TERTIVS.

DE IDEIS.

An Ideæ sint.

CAP. I.



DILATA Academicorum eò accuratiùs consideranda sunt, quò sunt de rebus maioris virtutis, & frequentius à Peripateticorum principe damnantur, & reijciuntur: eminētissimæ virtutis sunt Ideæ, & frequenter ab Aristot. variis argumentis reijciuntur: propterea iurè accuratè sunt perpendendæ: vbi enim inter Aristotelem, & Platonem est controuersia: difficile est veritatem conspiciere. De Ideis primò considerandum occurrit, an sint. Academici eas apprimè necessarias ostendunt: Peripatetici easdem parvipendunt, & negligunt: sed leues proculdu-

bio sunt Peripateticorum instantiæ, firmissi-
ma sunt fundamenta Platonis à nostris Theo-
logis magna ex parte commendata: Propter-
eà Platoni assentiendum cēseo. Nam si ad de-
pendentiam mundi ab opifice conuertimur,
inueniemus, non posse primam mentē mūdī
iurē nuncupari parentē & artificē; nisi ordinis
mūdī, & cōtentorū in eo, in se primò cōtineat
Ideas. dicimus artificem temerē, & à casu ope-
rari; dum cōficiendi operis rationem, rectam-
que rationem non possideat; quòd primus o-
pifex temerē, & à casu mundum producat, ne-
mo compos mentis asserere audet; Ideas itaq;
in se continet: & præsertim, quia suo esse facit
omnia; non autem suo esse omnia faceret, nisi
in suo esse omnia essent. Insūper si considera-
bimus opificis mundi cognitionem, id ipsum
confitebimur: nam de ratione mentis est, vt
cognoscat, & operetur cum cognitione: mens
prima, cū sola absolutē sit mens, sola absolu-
tē omnia cognoscit, & per cognitionem ope-
ratur: Asserere, quòd solūm cognoscat in emi-
nentia, & non distinctē, vt aiunt Peripateticis,
est idem, ac si diceremus, pictorem formare ca-
nem, cognoscendo cœlum; vel artificem pro-
ducere ferrum, cognoscendo aurum: quod in-
nimē dicendum est. Prætereà si attinentia ad
propriè sumptā prouidentiam consideramus,
percipiē⁹ necessitatē Idearū. Nā primi prin-
cipis maximē, ppria est prouidētia: non serua-
tur prouidētia exquisita, exacta, & distincta, si-
ne

ne exacta & distincta cognitione rerū curādarū: nec huiusmodi cognitio distincta in prima mente sine Ideis seruari potest: debent itaque dari Idæe. Quæ etiam lucidissimè refulgent, dūm consideramus in principio ordinis debere ordinem refulgere, in mundo intelligibili debere sensibilia contineri; ante formas impuras, & fluentes, debere sinceram, & stabilem formam inueniri: sine quibus, nec mundi nexus, nec partium eius ascensus, & descensus, nec rerū simplex natura rectè seruari potest. Inter ea etiam, quæ apud nos versantur, Ideas nobis confirmant certa semina rerum, ex distinctis rationibus, Ideisque proficiscentia; & ea præsertim, quæ ad nostram scientiam, & ad diuersitatem nostræ cognitionis, nempe intelligentiæ, & opinionis pertinent; in quibus explicandis accuratissimè versantur Academici. Colligamus itaque dari Ideas, & à Philosopho rectè sentiente concedendas esse.

Inuentores Idearum.

CAP. II.



Ensent nonnulli Platonem fuisse Idearum inuentorem; propterea ab auctore eis nomen tribuentes, Ideas Platonicas appellant: at qui ita sentiunt, Platoni, & veritati aduersantur. Platoni primò, quoniam in Sophista inuentū Idearū non suum affirmat, sed virorum, qui sapientia & pietate præstiterunt; & pro inuisibili essentia pugnarunt; & iurè sapientia, & pietate præ-

stiterunt: quoniam sine Ideis, nec pietas erga Deum, nec sapientia ritè seruari potest. Insuper etiam aduersantur veritati: quoniam alij, ante Platonem plurima de Ideis enunciarunt. Afferit Diogenes Laertius, Platonem sumpsisse Ideas ab Epicharmo discipulo Pythagoræ. At nec Epicharmus fuit inuentor earum; quia Pythagoras, & alij ante eum nouerunt Ideas: & si à discipulis Pythagoræ Plato eas desumpsit, cur non potiùs eas didicit à Philolao præceptore suo, & Pythagoræ discipulo? Pythagoras præsertim Ideas, more sibi consueto, per numeros designauit: ante Pythagoram Orpheus Ideas nouit, & dixit: Iupiter, Idea omnium: ante Orpheû ter maximus Mercurius & in Pimandro, & in Asclepio Ideas manifestissimè designauit: & mundum illum spherû ab Empedocle celebratum, nil aliud fuisse putandum est, nisi mundum Idealem: adeò, vt vnà cùm sapientia ortam fuisse notitiam Idearû afferere valeamus. Quod Diuus Augustinus affirmavit, qui in 7. de Ciuitate Dei, cap. 28. ex sententia Marci Varronis affirmat, Ideam Minervæ nomine à Poetis fuisse designatâ: dum aiunt, ex Iouis capite fuisse ortam: quasi Idea & sapientia in idem veniant, & simul orta dicantur. Ac insuper idem August. quæst. 46. præclare enunciauit, aut nullos ante Platonē extitisse sapiētes, aut Ideas cognouisse: Siquidem tanta vis in Ideis posita est. vt, eis non intellectis, sapiens quis esse nō possit; in qua eadem

dem quæst. afferit; Quis religiosus, aut vera præditus religione, tales Ideas negabit, aut eas non profitebitur? Sed, vt altius quoque eleuamur, fateamur Ideas nō esse humanum inuētum, sed Dei benignitate fuisse hominibus reuelatas, Nam Diuinus legislator Moyse in Genesi eas in parte expressit, dum dixit: Hic est liber generationis cœli, & terræ; quando creata sunt die, quo fecit Deus cœlum, & terram; & omne virgultum agri, antequam oriretur in terra: omnemque herbam agri, priusquam germinaret, &c. Virgultum antecedens germina terræ, Ideæ sunt in Dei mēte, vt probabiliter suspicatus est Philon Iudæus. Lucidiùs tamen easdem designauit Propheta inquiens; Deus fecit hominē ad imaginem suā: non enim dixit, fecit hominem imaginem, sed ad imaginem suam; quia primò est Deus, secundò Idea hominis, tanquam Imago Dei; ad imaginem autem Dei dicitur factus homo. Pariter Ideas includi Diuus Augustinus asseruit in illis verbis Euangel. Diui Ioann. Quod factum est, in ipso vita erat, &c. vt cumulatè manifestauit Genesis lib. 5. cap. 15. Colligamus itaque, vnā cum diuina, & vera sapientia certam esse notitiam Idearum.

Quid sint Ideæ.

CAP. III.



Ideæ, omnium consensione, species, & formæ sunt, vt nomen ipsum manifestat; sed quales sint huiusmodi

formæ, & vbi sint, non constat. Existimant nonnulli, eas esse puras formas rerum natura constantium, seiunctas à corporibus, per se, ac diuisim seorsum à Diuina mente subsistentes: & hanc censent fuisse opinionem Platonis: & id nituntur confirmare per nonnulla verba à Plat. in Parmenide, & in Timæo prolata: ideò & D. Thom. & Magnus Albertus, & Trapezūtius, & alij hanc asserunt fuisse Platonis sententiam, ab Aristotele accuratissimè reiectam: cuius opinionis etiam mentionem fecit Philoponus in primum Poster. Sed hæc opinio, vt longè abest à vero, ita etiam à recta Platonis sententia: nam manifestissimè Plato in 7. de R. P. ait Ideam boni regnare in mundo intelligibili. In Timæo affirmat Mundi opificem imitatum fuisse sempiternum exemplum, opificis autem exemplum in mente eius reperitur. Insuper mundum sensibilem affirmat esse vnū omnia continentem, quia ad vnus similitudinem sit formatus: id autem vnū, ad cuius similitudinē est formatus, & omnia continet, proculdubio est mundus Idealis in prima mente refulgēs. Sed superuacaneū est hac in re pluribus immorari, cum omnes potiores Platonis sectatores in hoc conueniant, quòd Ideæ non seorsum à diuina mente, sed in mente diuina sint collocatæ: quæ si nonnunquam à Platone dicuntur formæ puræ, & separatæ: non denotatur tunc, eas esse separatas à diuina mente, sed à rebus corporeis, & materiatis. Nil enim
absur-

absurdus dici, vel excogitari potest, quàm quòd dentur piscium, ferarū, & similiarum puræ, & per se subsistentes essentiæ: formæ enim à materia seiunctæ intelligunt; ipse leo, vt ipse leo est, non valet intelligere; alioquin ipse leo non esset. Cùm itaq; Ideæ sint in diuina mente; non est putandum, quòd in ea sint vt accidentia in subiecto, vel vt forma in alia forma, vel vt pars formæ iuncta cū aliis partibus; sed sunt ipsamet essentia mentis, vt cætera repræsentans, vt nata imitari, vt cætera omnia tanquam causa includens. Et quamuis re, & substantia, nec inter se, nec à mente seiungantur; distinguuntur tamen ratione, & inter se formaliter; adeò, vt vna verè negetur de altera: non enim ipse homo est ipse leo, neque opifex ea ratione equū producit qua hominē. Theologi duo Idearum genera in diuina mentē cōsiderarunt, duplicemque statuerunt Idealem mundum. Primò enim consideratur diuina essentia, quæ cū sit immensa, innumera offert diuinæ menti; & hoc est verè, & absolutè vniuersum. Mox consideratur diuina mens, quæ æterna sua voluntate dicitur prædestinare, & prædefinire ea, quæ ad extra sunt producenda: & hic est mundus intelligibilis prædestinatus, ac prædefinitus: qui non est vniuersum absolutè, sed vniuersum est, in ordine ad ea, quæ produci debēt. Mundus, & Ideæ primi ordinis, primæque considerationis, antecedunt voluntatem diuinæ mentis: quæ verò sunt se-

cundi ordinis, subsequuntur voluntatem. Ex
Platonis sententia hoc duplex Idearum genus
non ponitur: nisi dicamus primum genus cō-
siderari eminentissimè in Deo, alterum cum
formali distinctione in mente, quæ magis pro-
priè Ideæ nuncupantur: quas definiens dico:
Idea est exemplar æternum rerū natura pro-
ducibilem, in diuina mente collocatum, per
quod cuncta à primo opifice prodeuntia ei
offeruntur, & producuntur ad extra. Ab Alci-
non breuius definebatur, quòd esset exēplar
æternum eorum, quæ secundum naturā fiunt:
quæ definitio, ex relatione Procli, fuit primò
tradita à Zenocrate. Sed ea, quæ à me tradi-
tur, cum latius explicat naturam, & utilitatē
Idearum. Iurè Idea dicitur exemplar: nam ea
tribus modis considerari potest: primò consi-
deratur in se, & est essentia; secundò conside-
ratur cum relatione ad diuinam mentem, &
est eius intelligibile, siue intellectio; tertio re-
ferri potest ad mundum sensibilem, & nuncu-
patur exemplar. Et quoniam hæc considera-
tio est nobis familiarior, & notior, ideò pro
genere in definitione accipitur. Insuper in de-
finitione additur, æternum, vt secernatur à
cæteris artificum exēplaribus: quæ non pro-
priè, sed similitudine tantum dicuntur nomi-
nunquam Ideæ: & cum dicatur æternum, de-
notatur esse aliquid proprium, & verum: nam
quod verè est, æternum est, vt rectè dicebat
Plotinus. Additur, secundum naturam produ-
cibi-

cibulum: vt manifestetur, quorum Ideæ sint qua de re infra agam. Additur, in diuina mente: quia, quamuis in vniuersa mentium latitudine locum habeant Ideæ: attamen propriè, & primò menti non participatæ conueniunt: aliis secundariò, & per primam. Denum explicantur duo præcipua munera Idearum: quorum primum est, vt sint intelligibilia primæ mentis, eiusque cognitio: Aliud est externa productio, à quibus duobus muneribus reliqua omnia proficiscuntur, vel cum eis iunguntur.

Cui conueniant Ideæ.

CAP. IV.



Quoniam Idea est pura essentia, & forma, quæ verè intelligibile esse dicitur: propterea in mente, cuius munus est intelligere, debet reperiri: & iurè quidem: nam mens, quæ eminentissima est, non cum receptione, & perpeffione: quæ diminutionem præseferunt, intelligere debet: sed per essetiam propriam, & per sui in semetipsam conuersionem: adeò, vt in abiunctis idò sit intelligens, & intelligibile. In vniuersa latitudine mentium inueniuntur Ideæ, seruantes nomen, & conditiones Idearum: hæc tamen est differentia, quòd Ideæ in prima mente dicuntur non participatæ, in aliis participatæ: nam participantur ab anima, sine qua huiusmodi mentes non reperiuntur. Insuper, Ideæ

in prima mente solùm pendent à Deo; in subsequentibus verò pendent à mente prima, & ab Ideis in ea existentibus. Deinum in prima mente Ideæ minùs sunt inter se distinctæ, in aliis distinguuntur magis, ob nexum earum cum anima. Diffunduntur Ideæ à prima mente in alias, vt à Sole radij in alias stellas: ac etiã vt à Sole per radios effunditur vis illustrandi, calefaciendi, cæteraque gignendi, quæ à Sole per lumen fieri dicuntur; ita à non participata mente per Ideas effunditur vis, & facultas in aliarum mentium Ideas consimilia produciendi. Et cum in singulis mētibus insint Ideæ omnes, in singulis etiam inuenietur mundus intelligibilis; adeò, quòd tot intelligibiles mūdi ex Ideis consurgunt, quot sunt mentes. Extra terminos mētis, nō ampliùs propriè sumpta Idea locū habet; sed dum à mente descendimus ad animam, Ideæ in rationes commutantur: nam verè anima est ea, quæ rationis est compos, quæ rationum munere ratiocinatur: & ea, quæ mens simul, & indiuiduè apprehendit; anima cognoscit cum distinctione, & progressu ex vno in aliud; cum tamen anima redditur compos mentis, ad Ideas consurgit: & cum eis nequitur, & coniungitur. Sub anima collocatur natura: & quia natura pendet ab anima; ideò in natura reperiuntur vestigia rationum, quæ semina nuncupantur, per quæ proximè gignuntur corporea, materiam includentia: in qua deum materia ea, quæ ex
seini-

seminibus gignuntur, Ideisque proportionē respondent, nuncupantur imitationes, participationes, proximi materiæ termini, ac demum vmbrae Idearū. Et quoniam nos in hoc quasi terræ antro sumus collocati, in quo solæ volitant vmbrae rerum; cū ea, quæ verè sunt, non cōspiciamus, has vmbas magnificimus, hæc verè entia existimamus. Quòd si nobis fœlici sorte contingat, vt munere Philosophiæ caput animæ supra has tenebras eleuemus; tunc has quasi laruas despicientes, eam solam verè vitam iudicabimus, quæ à crasso hoc corpore soluta est; tunc cum Propheta exultantes clamabimus; Dies vnus in atriis tuis Domine, plusquam mille aliorum anni.

*Quomodo in mente se habeant, & con-
surgant Ideæ.*

CAP. V.



IN ordine vniuersi finis est ipsum vnum, quod supremū est; sub quo fine causa efficiens collocatur. Et quoniam exemplar dirigit artificē ad finem; propterea Idea mediare dicitur inter finem, & opificem; est eminentior opifice, humilior fine; & conuenienter dici potest sapientia opificis, recta quæ ratio eius, per quam efficit opus suo fini congruens. Consideratur opifex in primo signo, vt essentia est: mox consideratur, vt cuncta intelligens, & producere volens; in quo secundo signo cōsurgunt Ideæ.

Hoc denotauit Plotinus Enneade sexta lib. 7. inquiring; Mens sibi comparauit spectacula boniformia, cum primum contemplata est ipsam boni naturam: influxit nanque in mentem ipsum bonum, non omnino, sicut ibi erat; sed sicut ipsa mens accipit. Ex quo constat, ad quod genus causæ redigatur Idea: nam ea absolute forma est, cum sit pura, & eminens essentia rei; at in ordine, & modo operandi, ad causam efficientem redigitur: est enim sapientia artificis, cuius umbra est recta ratio humanarum artium, per quam artifices diriguntur; non autem ita est rerum forma, ut proximè eas formet, & constituat. Hinc patet inanes esse plurimas Arist. contra Ideas rationes; velut dum inquit, non dari hominem sine his carnibus, & ossibus; insuper, dum asserit, si vna omnium esset Idea, omnes essent vnus homo; & aliæ similes: quæ omnes omni carent vi aduersus propriam Idearum assumptionem, ut ex se constat. Insuper ex dictis conspicuum est, cur à Platoniciis Idea redigatur; non ad concausas, qualis est materia, & forma; sed ad causas. Nam causæ illæ dicuntur, quæ absolutæ, liberæ, & dominæ sunt; qualis est finis, & efficiens; inter quas mediare Ideam ostensum est. Demum patet ex Platonis sententia, ob Ideas genera causarum non reddi plura, quam quatuor; ut perperam multi ex sectatoribus Aristotelis tribuunt Platoni. Nam, ut recte in 13. Metaph. dixit Syrianus, Idea varia considera-
tione

zione est causa in triplici genere: ut forma, ut finis, & ut efficiens: præsertim tamen efficiens est, si respicimus ad rationem, & modum, per quem opus à causa pendet; ad quem respicere debemus, dum numeramus genera causarum. Cõstat itaque Ideam præsertim ad causam efficientem redigi; quæ causa efficiens à Platone sola, & absolute causa nuncupatur, ut in Philebo manifestavit; nec propterea ab Arist. dissentit, nisi in modo loquendi. Ut verò appareat, quomodo in prima mente consurgant Idæ; considerandum est, quòd natura primi entis, quatenus proximè ab ipso vno pendet, eatenus unitatibus, quasi seminibus fecunda Ideas parit; easque deinceps numeris maioribus, minoribusve componit: nam quod proximè ab vno pendet, necesse est, ut sit prima sui origine multiplex; alioquin non recederet ab vno: nõ tamen ita est multiplex, ut in eo vnum etiam nõ refulgeat: nam ibi reperitur, & vnum ante Ideas, ex quo consurgunt numeri Ideas constituentes; & vnũ post Ideas ex unitatibus consurgens; adeò ut Idea quælibet, sit quid vnum, multitudinis necessariò particeps. Et propterea Idæ omnes, & vniformes, & boniformes, & demum pulchriiformes esse dicuntur. Nec horũ dantur in mente propriè Idæ, cum sint communia initia, & vires omnium Idearum, effusæ per omnes, quarum postrema est pulchritudo; quæ est splendor boni per Ideas effusi; Ideo in eo intelligibili

mundo duo considerantur termini, vnitas, & pulchritudo: Vnitas est terminus supremus, tanquam caput subsequendum: Pulchritudo est terminus postremus, tanquam fulgor mediorum postremò confurgens.

Conuenientia, & Differentia Idearum.

CAP. VI.



Voniam in mente & vnum, & multitudo, identitas, ac alteritas inveniuntur; propterea etiam Ideæ inter se cōueniunt, & distinguuntur: Conueniunt primò, ratione initij, à quo pendet; omnes enim fluunt ab vno: conueniunt secundò, ratione mentis; omnes enim in mente reperiuntur: conueniunt tertio, ratione finis, & vsuum, quos præbent; omnes enim cōsimiles præbent vsus: quartò cōueniunt Ideæ, quia à sola mente exactè apprehenduntur; ab anima verò solùm eatenus attinguntur, quatenus mente participat, & cum ea iungitur: Demum conueniunt, quoniam quælibet Idea est essentia viua, intelligentia, intelligibilis, verè ens, forma, & actus virtute imitabili præditus. Cùm autē Idea omnis sit imitabilis, dum exactè imitatur, rectèque sine impedimento in materia exprimitur, pulchritudo confurgit; dum contrà, deformitas: nam pulchritudo in corporibus, est exacta Ideæ imitatio, ac similitudo, adeò, vt, subtracta materia, ad Ideā eleuemur, Ex quo constat, veram pulchritudinem

dinem non sensu, sed mente cognosci; & vmbra pulchritudinis esse natam nos eleuare à sensu ad mentem: materiam verò esse originem deformitatis. Dum dicimus Ideas communicari, vel participari; non est putandum corporeo modo id fieri, & per partes, & cum diminutione; sed modo incorporeo: non secus ac à sensibili sua actio communicatur sensibus, & à luce lumen perspicuo. Distinguuntur Ideæ inter se, non sola nostra cogitatione; sed ex natura rei, & formaliter: quod ex eo maximè patet; quoniam ordo graduum, & participationum inde pendentium, non ex casu, fortuitoque concursu; sed ex originalium formarum distinctione pendet. In mente ita distinguuntur Ideæ inter se, vt in semine vis formandi caput à virtute formandi manum; & in anima ratio intelligendi leonem à ratione intelligendi ceruum. In prima tamen mente non secus sunt simul Ideæ diuersæ, ac in Sole sint simul diuersi radij, in cetro circuli variæ lineæ. Et quemadmodum lineæ, & radij; quò magis distant à centro, vel à Sole; magis quoque distant inter se: ita sensim magis distinguuntur Ideæ, quò longius à mente recedunt; adeò vt demum in materia etiam magnitudine, & loco inter se distinguantur. Arist. in 12. Metaph. ob ordinem vniuersi, etiam in Duce, & Principe ordinem considerauit: at ordo Peripateticus est ordo eminentiæ, hic verò formalis.

Quorum non sint Ideæ.

CAP. VII.



Voniam nil superuacaneum est in vniuerso, & præsertim in mundo intelligibili; ac multorum inutiles prorsus essent Ideæ: propterea non omnium, sed eorum tantum, quibus conueniunt, in diuina mente reperiuntur Ideæ. Primò, in ea non inest Idea suimet; tum quia nõ se producit; tum insuper, quia non simul eidem in eodem duo conueniunt modi, quibus sit. Dicitur tamen prima Mens, Idea omnium, vt cecinit Orpheus: & aliqua ratione dicitur Idea participatæ mentis, animæ rationalis, & naturæ; quatenus hæc omnia sunt quoddam vniuersum, vmbra, & imitatio primæ mentis, & mundi intelligibilis eius. Insuper ea, quæ nata sunt effici, vel per naturam, vel per artem efficiuntur: Si per artem, dubium est, an eorū sint Ideæ. Plato in 10. de R.P. etiam horum Ideas videtur ponere, cū dicat, differens de Ideis; Deum vnicum constituisse lectum, & propterea vnius rei vnicam esse Ideam. Nec sat est, si dicas de lecto fuisse loquutum gratia exēpli; vt pateret, ita se habere de rebus physicis. Nam pariter eius sententia fuisset conspicua, si de homine, vel de leone eam protulisset. Propterea dicamus, eorum, quæ arte constant, partim esse, partim non esse Ideas: non esse quidem; quatenus ea proximè à mente non fiunt: esse verò, quatenus constantia arte, sunt

sunt imitationes eorum, quæ natura constant: Ars enim imitatur naturam; & propterea cum dentur Ideæ eorū, quæ natura constant, in virtute etiam dantur Ideæ constantium arte. Insuper, ut docet Plotinus in lib. de Ideis cap. II. Artificiosa pendent à rationibus, numeris, & mensuris animæ rationalis; cuius cum detur Idea, etiam in ea in virtute continentur Ideæ arte constantium; propriè itaque horum non est Idea, modo tamen aliquo etiam eorum est. Insuper ea, quæ natura producantur, vel sunt accidentia, vel substantiæ. Aristot. tribuit Platoni in primo Metaph. 29. quod accidentium non posuerit Ideas: quod tamen absolute verum non est: nam multorum, quæ apud nos accidentia sunt, in prima mente, ex Platonis sententia, reperiuntur Ideæ; ut Syrianus in 12. Metaph. Plotinus in lib. de Ideis cap. 10. aliique insignes Platonici manifestarunt. Non tamen omnium accidentiū sunt Ideæ: ut proprietatum Ideæ non sunt, veluti risibilitatis, & similium: ratio est, quoniam huiusmodi proprietates pendent ab Idea eius, cuius sunt proprietates; namque dans formam, dicitur tradere etiam ea, quæ per naturam sequuntur formam. Pari ratione multorum accidentium non sunt Ideæ, quoniam rediguntur ad Ideas substantiæ, cui conveniunt, & à qua pendent: ut caliditatis ad Ideam ignis; secundæ autem qualitates ex primis consurgunt. At quorundam accidentium, & præsertim eorum, quæ

præcipua sunt, hominem perficiunt, nec ex hominis generatione confurgunt, datur Ideæ: vt sapientiæ, iustitiæ, temperatiæ, & similibus: Vt in Phædro manifestauit Plato, dum asseruit; animas sursum ductas conspiceret ipsam iustitiam, ipsam temperantiam, ipsam scientiam; horum tamen Ideæ in diuina mente accidentia non sunt. Neq; esset à Platoniciis fundamentis alienum asserere, nō ita dari Ideam sapientiæ, & virtutū in Diuina mente, vt dantur Ideæ aliarum rerum; nam Idea sapientiæ est ipsamet sapientia diuinæ mentis, quæ est sapientia, vt est Idea omnium. In sapientia, ex sententia Platonis, eminenter continetur prudentia; quæ prudentia, ex eiusdem sententia, est virtus omnis, Sic itaque modo quodam, at non ita, vt aliorum, in Diuina mēte reperitur Idea sapientiæ, & virtutum. Relatorum quoque in Dei mente, vt ait Alcinous, non sunt Ideæ, qua de re est dubitatio; quoniā frequenter fit mentio Ideæ æqualitatis, Ideæ similitudinis; vt exactè æquale, & simile denotetur: Propterea Aristot. in 13. Metaph. cap. 4. obiicit Platoni, quòd horum ponat Ideas, cum tamē horum nec quidem vnū genus sit. Syrianus, qui librum illum propterea exposuit, vt Platonis sententiam de Ideis à calumniis Aristot. vindicaret, inquit, duplicem esse relationem; vnā, quæ non sit substantia; alterā, quæ substantia sit: prima diuinæ menti non conuenit; altera conuenit, ne dum ex sententia Plato-

Platonis, verum etiam ex sententia Aristotelis. Sic asserit similitudinis, æqualitatis, diuersitatis dari Ideas: quoniam res per alicuius Ideæ participationem similes, & æquales constituuntur. Sed, vt clarius dubitatio è medio tollatur, dicamus relatorum non esse Ideam, quatenus in relatione consistunt; sed eorum esse Ideam ratione alicuius absoluti, quo innituntur, & in quo posita sunt. Addamus insuper de æqualitate, diuersitate, & similitudine loquendo, non propriè eorum esse Ideam; sed redigi ad ea, quæ genera rerum dicta sunt, nempe ad identitatem, & alteritatem. Secus itaque horum dantur Ideæ, quàm aliorum, quibus magis propriè conueniunt. Substantiarum itaque præsertim sunt Ideæ. Verum substantiæ adhuc sunt duplices, intelligibiles, & sensibiles: de intelligibilibus, vt de mentibus sub prima collocatis, est dubitatio, vtrum earum sint Ideæ. Numenius, Cronius, & Amelius, id affirmant; Porphyrius id negat: & proculdubio Porphyrij sententia magis est approbanda; quoniam substantiæ intelligibiles in se habent rerum Ideas, non autem valent habere Ideas sui. Insuper materia dicitur sinus informis, natus Ideis participare; at non recipiuntur in materia substantiæ intelligibiles; sed prima & suprema omnium formarum, quæ in materia modo aliquo recipiuntur, anima est; ideo primò animæ, mox aliarum corporatarum formarum Ideæ sunt. Non itaque mentium

sunt Ideæ; sed solùm similitudine quadam dicere possumus mentem primam esse Ideam subsequen-
tium; quatenus mentium omnium caput, & princeps, & veluti exemplar, ea est.

*Utrum mathematicarum formarum
dentur Ideæ.*

CAP. VIII.



Effertur hoc in loco nobis occasio pulchræ considerationis: & est, v-
trum mathematicarum formarum
siue ad Arithmeticum, siue ad Geo-
metram pertinentium, dentur Ideæ, vel ne. Et
iurè de his ambigere cogimur: quoniam ex v-
na parte apparet, eorum non dari Ideas, cùm
Ideæ sint substantiæ, hæc autem sunt vilia ac-
cidentia. Confirmatur; quoniam Arist. in 1. de
moribus cap. 7. asseruit Platone in non posu-
isse Ideam numerorum, quia in numeris repe-
ritur ordo, & prius ac posterius: cùm autem
numeri principatum obtineant inter consi-
derata à mathematico, & Arithmetica ma-
thematicarum primam constituent; si eorum
non dantur Ideæ, longè minùs erunt aliorum;
cùm Ideæ sint formæ quædam primæ, eorum
præsertim, quæ apud nos prima sunt. Ex ad-
uerso Proclus inter Platonicos nemini secun-
dus, in primum Euclidis manifestè asserit, ra-
tionibusque confirmat, rerum mathematica-
rum dari Ideas; & iurè quidem: nisi enim da-
retur Idea recti, Idea circuli, Idea lineæ; hæc
nullibi

nullibi inuenirentur, & euanescerent mathematicæ scientiæ; cū in materia nec rectum sine obliquitate, nec circulus exactè rotūdus, nec linea sine latitudine inueniatur. Propterea dicebat Plato, dum Mathematicus, gratia exempli, ducit lineam in puluere, non de ea ostensiones format; sed de illa, quæ in animæ essentia est inserta, & in virtutem imaginandi imaginem promit. Simplicius in tertium de anima frequenter indicat mathematicorū dari Ideas; & à rationalibus Ideis in animæ essentia insertis, inquit exprimi in phantasmia vestigia, & imagines earum; præcedente tamen excitatione ab externis sensibilibus facta. Insuper inquit communes has vulgò mathematicas nuncupatas, re vera scientias non esse, vt etiam affirmavit Plato in calce sexti de R. P. Et ratio est, quoniam minimè ad rationales Ideas eleuantur, sed solū in illis imaginibus versantur. Et quamuis illæ imagines in phantasmia ab anima rationali expressæ sint, non autem ex sensibilibus externis depromptæ; attamen mathematicæ nuncupantur scientiæ ex abstractione, quasi sint de rebus per animā à sensibilibus corporibus abiunctis; quoniam illæ imagines sunt similes formis in materia existentibus, adeò vt ex illis depromptæ esse videantur. Quæ itaque communi voce mathematicæ dicuntur, & in dictis imaginibus versantur; nec sciētiae sunt, nec philosophiæ pars, minò nec re vera mathematicæ. Si quis autē

sunt Ideæ; sed solum similitudine quadam dicere possumus mentem primam esse Ideam subsequen-
tium; quatenus mentium omnium caput, & princeps, & veluti exemplar, ea est.

*Utrum mathematicarum formarum
dentur Ideæ.*

CAP. VIII.



Dffertur hoc in loco nobis occasio pulchræ considerationis: & est, v-
trum mathematicarum formarum
siue ad Arithmeticum, siue ad Geo-
metram pertinentium, dentur Ideæ, vel ne. Et
iurè de his ambigere cogimur: quoniam ex v-
na parte apparet, eorum non dari Ideas, cum
Ideæ sint substantiæ, hæc autem sunt vilia ac-
cidentia. Confirmatur; quoniam Arist. in 1. de
moribus cap. 7. asseruit Platonein non posuis-
se Ideam numerorum, quia in numeris repe-
ritur ordo, & prius ac posterius: cum autem
numeri principatum obtineant inter consi-
derata à mathematico, & Arithmetica ma-
thematicarum primam constituent; si eorum
non dantur Ideæ, longè minùs erunt aliorum;
cum Ideæ sint formæ quædam primæ, eorum
præsertim, quæ apud nos prima sunt. Ex ad-
uerso Proclus inter Platonicos nemini secun-
dus, in primum Euclidis manifestè asserit, ra-
tionibusque confirmat, rerum mathematica-
rum dari Ideas; & iurè quidem; nisi enim da-
retur Idea recti, Idea circuli, Idea lineæ; hæc
nullibi

nullibi inuenirentur, & euanescerent mathematicæ scientiæ; cùm in materia nec rectum sine obliquitate, nec circulus exactè rotundus, nec linea sine latitudine inueniatur. Propter eà dicebat Plato, dum Mathematicus, gratia exempli, ducit lineam in puluere, non de ea ostensiones format; sed de illa, quæ in animæ essentia est inserta, & in virtutem imaginandi imaginem promit. Simplicius in tertium de anima frequenter indicat mathematicorū dari Ideas; & à rationalibus Ideis in animæ essentia insertis, inquit exprimi in phantasmata vestigia, & imagines earum; præcedente tamen excitatione ab externis sensibilibus facta. Insuper inquit communes has vulgò mathematicas nuncupatas, re vera scientias non esse, vt etiam affirmavit Plato in calce sexti de R. P. Et ratio est, quoniam minimè ad rationales Ideas eleuantur, sed solùm in illis imaginibus versantur. Et quamuis illæ imagines in phantasmata ab anima rationali expressæ sint, non autem ex sensibilibus externis depromptæ; at tamen mathematicæ nuncupantur scientiæ ex abstractione, quasi sint de rebus per animam à sensibilibus corporibus abiunctis; quoniam illæ imagines sunt similes formis in materia existentibus, adeò vt ex illis depromptæ esse videantur. Quæ itaque communi voce mathematicæ dicuntur, & in dictis imaginibus versantur; nec sciētix sunt, nec philosophiæ pars, immò nec re vera mathematicæ. Si quis autē

imaginibus non cōtentus, ad rationales Ideas ascenderit, quod Pythagoræ contigit; is verè mathematicus censendus erit, & eius mathematica re vera erit sciētia, & pars philosophiæ: quod indicauit Plato in sexto de R. P. inquit, mathematica iuncta cū suis principiis scibilia esse. De his cumulatè Simplicius loquitur in tertium de anima in comment. 11. & 34. Affirmant itaque potiores Platonici, immò ipsemet Plato, mathematicorum dari Ideas, quæ substantiæ sint, & principia imaginum, in quibus versantur vulgares mathematici. Ex aduerso tamen eas non dari, prius indicauimus. Propterea res est satis dubia, & à nemine hætenus cumulatè explicata. Nitar tamē ego ex Platoniciis regulis, & principiis cōspicuā resolutionē elicere. Afferō itaq; ex Platonis sentētia, ea quæ tribuūtur his formarū vmbreis in materia existentib. respondere Ideis, vt principiis earū. Afferit frequēter Plato, & ante Platonem affirmauit Pythagoras, Physica resolui in Geometrica, tanquā in principia; & Geometrica in Arithmetica; adeò vt numeri sint prima principia omniū: quæ cū proferātur de reb. in materia existētibus, longè prius de earū Ideis esse vera putandū est. Et quoniā Physicarū formarū ppriè sunt Ideæ, ideo cogimur fateri mathematicorū nō propriè Ideas esse; sed quæ eorū cōmuniter nuncupātur Ideæ, esse initia potiūs earū Idearū, quæ ppriè Ideæ nūcupantur. Hoc autem, quod dixi, esse verum, ex eo maxime patet;

patet; quia Ideas omnes esse numeros, & ex sibi conuenientibus vnitatibus cōfurgere, cū Pythagoras, tum Plato affirmant. Dicimus tamen mathematicorum dari Ideas, quatenus intelligibiles illi numeri sunt principia, conditio, natura, & terminus omnium Idearum; & propterea valent Ideæ imagines mathematicorum in phantasiam expromere. Ideo rectè dicimus omnia certis constare numeris. Patet itaque, quid sit dicendum de numerorū Ideis. Loquendo verò de geometricis figuris, & magnitudinibus, assero pariter earum propriæ sumptas Ideas non dari; conuenire tamen eis Ideas duplici ratione: primò, quia in numeros resoluuntur, & eorum essentia numeri sunt: Idea autem ad essentiam pertinet: ideo Aristoteles in 3. de Anima cont. 11. loquens de essentia recti, dixit ex sententia Platonis, & Pythagoræ: Sit nāque dualitas. Insuper latius, & lucidiùs in septimo Metaphysic. 38. manifestat ex sententia Platonis numeros esse essentiam linearum, cæterarumq; magnitudinum. Præterea huiusmodi magnitudinibus conueniunt latè sumptæ Ideæ, ratione infiniti, & termini, quæ sunt communia principia Idearum; munere quorum valet anima consimiles imagines expromere in phantasiam. Patet itaque, quomodo in mathematicorum sint, & non sint Ideæ; nam ita sunt, vt potiùs principia Idearū, quàm Ideæ nuncupari mereantur: ideo à Platone in calce sexti de R. P. nomine principij

fuerunt designatæ. Constat insuper, quomodo eorû Ideæ accidentia non sint, sed substantiæ; quomodo etiam physica in mathematica dicantur resolui; & demum, quomodo Aristoteles non iniuria dixerit Platonem non posuisse Ideam numerorum, quia in numeris reperitur prius & posterius: non enim posuit Plato ita Ideam numerorum, vt omnium esset Idea vna, sed distinctę sunt diuersarum specierum numeri; & ita distinctę non proprię sunt Ideę, sed natura, & conditio cæterarum Idearum. Sed non leuis se nobis offert dubitatio: quia si in rebus corporeis mathematica sunt posteriora physicis, & sunt accidentia; quomodo in mûdo intelligibili, & in Ideis horum exemplaribus, se habet e contra? Ad hoc dico, in rebus corporeis posteriora esse, & accidentia; non ea, quę primò respondent Ideis mathematicorum, sed solum externas eorum vmbas: quę verò primò respondent Ideis mathematicorum, sunt substantiæ, & naturę rerum, conuenientibus numeris absolutæ; munere quarum dicimus mathematica nos ad diuina eleuare, & physica in mathematica resolui.

Quorum sint Ideę.

CAP. IX.



X hætenus dictis manifestè colligitur, Ideas proprię, & præsertim esse substantiarû sensibilium: quę cû diuidantur in materiam, formam, &

& compositum, materiæ non est Idea, cum sit exemplar diuinitatis expers, & sine informis natus participare Ideis. Insuper compositi non est Idea, quoniam compositum materiam includit; quæ materia, cum non sit pars essentiæ, etiam non potest esse pars eius, cuius est Idea. Remanet itaque, ut solius formæ sit Idea: & quoniam forma est id, quod est compositum; ideo hac ratione asserimus dari Ideam hominis, & aliorum. Cum autem Idea sit formæ, adhuc forma triplex est; vel indiuidua, vel in specie, vel in genere sumpta. Generum non sunt Idæ; quoniam Idea est quid completum, & perfectum; genera carent postrema perfectione. Indiuiduorum etiam non sunt Idæ; quoniam omnia in una natura, & una essentia conueniunt, cui respondent Idæ. Specierum itaque solum Idæ sunt, ut in 10. de R. P. exemplo lecti cumulatissimè demonstrauit Plato. Neque assentiendum est Marsilio, viro alioquin doctissimo, qui nonnunquam censuit cum Platone, singularum animarum ratione præditarum distinctas esse Ideas; adeò, ut tot sint earum Idæ, quot sunt numero animæ. Quæ sententia manifestissimè relicitur per rationem, qua usus est Plato in 10. de R. P. ad ostendendum vnius speciei vnicam esse Ideam. Cum itaque formæ in specie cõsideratæ Idea sit, huiusmodi forma adhuc duplex est; vel enim gignitur ex putri, ut vermes; vel ex semine: si ex putri, ei non conuenit Idea: nam quæ ex putri

fiunt, non primò, & per se; sed potiùs per quandam cōsecutionem fiunt, & modo quodam ex euentu; quorum Ideæ non sunt. Hinc fallitur Auer. in 12. Metaph. 18. inquit, Platonem ponentem Ideas respexisse ad eas menturas, quæ in materia putri reperiuntur; & propterea à longè conspexisse veritatem. At re vera ipse magis à longè conspexit sententiam Platonis, cùm Plato genitorum ex putri non ponat Ideam. Insuper viuentia, quæ ex semine fiunt, adhuc sunt duplicia: vel enim fiunt à simili, vt homo ab homine; vel oriuntur ex nexu animalium diuersæ speciei, vt mulus, & lycisca: illorum sunt Ideæ, horum verò minimè, cùm ex præcipua intentione agentis non fiant; lupo enim lupum generare intendit: hæc tamen formæ continentur in virtute Idearum illorum animalium, à quibus producuntur. Id ipsum est dicendum de Plantis, quæ per insertionem furculorum ex nexu plantarum diuersæ speciei constituuntur; nec non de illis, quarum vna in altera, & ex altera oritur: nam, vt inquit Syrianus in 13. Metaph. sunt hæc omnia posteriùs genita, & aduentitia, & non solius naturæ opera, nec omnino secundum suas rationes procedentis; sed veluti iniuria affectæ, & frustratæ, seu suspensæ, & laborare coactæ. Præterea partium quoque non datur Ideæ; partes enim in Idea totius indiuiduè continentur. Demum mali, priuationū, negationū, secundarum intentionum nō sunt Ideæ:

Ideę: Idea enim est forma, & verè forma; malū, & priuationes sunt non entia; secundæ intentiones, si quid veri, & firmi includunt, ex primis habent. Patet itaq; ex his, quorū non sint, & quorum sint Ideę. Non me latet Scotum, & alios nōnullos ex Scholasticis Theologis, longè plurimum in Deo ponere Ideas: at ego Platonem sum imitatus. Verūm nō levis oritur dubitatio: quia si mens per Ideas cætera cognoscit, si nō omniū in ea sūt Ideę, nō itaq; cognoscet omnia; & consequenter non omnia erunt ei curæ. Præterea, si multorum non dantur Ideę, quorum tamen homo scientiam habet, & quorū dantur definitiones; nō itaq; pro scientia, & pro definitione necessarię erunt: cuius oppositum dicit Plato & in Timæo, & in 6. de R. P. & in Epistolis. Ad hæc dicendum, quòd quemadmodū in generatione cætera omnia, quorū nō sunt Ideę, pendēt ab eis, quorū sunt Ideę: vel ad ea modo aliquo sese habent; ita de cognitione se habere putādū est: ea enim quorū nō sunt Ideę, cognoscuntur per Ideas aliorū; veluti partes cognoscūtur per Ideā totius; artificialia per Ideas naturalium, quorū sunt imitationes; vel per Ideam animæ rationalis, in cuius numeris, & rationibus, tanquā in principiis, omnia arte constantia continētur; proprietates cognoscuntur per Ideam eius, cuius sunt proprietates; cætera accidentia ex notitia Ideę rei, cui accidunt, & à qua pendent; relationes cognoscuntur per fundamenta;

malum, vt malum, est non ens, & recessus ab ente, & propterea non intelligibile; cognoscitur tamen per Ideam entis, à quo recedit; indiuidua cognoscuntur per Ideam speciei: vt enim per Ideam vnam speciei multa indiuidua gignuntur, ita etiam per Ideam vnam singula cognoscuntur. Ideò rectè dicebat Simpl. in 2. de anima oculum per vnam albedinis rationem iudicare albedines omnes. Materia demū intelligibilis non est, cū nō sit forma; cognoscitur tamen à diuina mente per id, quod in ea modus materiæ, & infinitum esse dicitur: Insuper cognoscitur per notitiam Idearum, quarum participationis est sinus, vel locus. Ideo rectè Aristoteles quoque asserit, materiam per se non esse natam intelligi.

Quos vsus præbeant Ideæ.

CAP. X.



VT præclaræ, & eminentissimæ sunt Ideæ; ita plurimas, & eximias præbent vtilitates: quæ omnes in tres gradus distribuuntur. Primus pertinet ad mentem, secundus ad ordinem rerum, postremus ad hominem. Si ad primum conuertimur, conducunt Ideæ ad mentis cognitionem, & functiones munerum eius. Mens enim in se conuersa, per Ideas cognoscit omnia; cognoscens producit; producta quæ curat, & seruat: demptis Ideis, nec de cognitione diuinæ mentis, nec de rerum ab ea dependentia,

ta, nec de prouidentia rectè sentire valemus; vt Epicuro, & Peripateticis contigit. Dum cōsideramus vtilitates pertinentes ad secundum gradum, inuenimus fatum, & leges ab Ideis duci: cū enim in natura sit constans, & certus ordo, non casu ei conueniens; debet ab ordine aliquo primo, firmo, & constanti pendere; huiusmodi est ordo Idearum in prima mente. Insuper conferunt Ideæ ad nexum rerum pendētium ab eis; ad ascensum, & descensum graduum naturæ; ac consequenter ad antipathiam, & sympathiam partium Mundi; quæ non sine illustri admiratione à nobis frequenter cōspicitur; ex qua sympathia ducit ortum Magia naturalis, apud Ægyptios, priscosque omnes sapientes summopere commendata. Præterea conferunt Ideæ ad rerum generationem: non enim semina gignerēt animalia, nisi vim formandi includerent; eam non includerent, nisi reciperent ab anima; ab anima eas recipere non possent, nisi in ea continerentur; non continerentur, nisi eas reciperet à mente inunere Idearum, mens demum ab ipso vho Idearum capite. Accedit, quòd initia rerū mortalium prima debent esse æterna, alioquin nō essent initia; non autem darentur propria rerum principia æterna, nisi darentur Ideæ. Insuper conducunt Ideæ, vt res, quæ in materia sunt vmbrae, alicubi verè sint; quæ in materia fluunt, alicubi firmæ permaneant; quæ cum corpore solū sunt sensibiles, alicubi sint in-

telligibiles; quæ cum materia earent perfecti-
one, per aliquid absoluantur, & perficiantur:
Demum si ad tertium gradum, nempe ad ho-
minem conuertimur, plurimas ex Ideis in eo
refulgere vtilitates conspiciemus: conducunt
enim ad eius scientiam, vt in proprio loco ap-
parebit; nec valeret homo intelligendo attin-
gere essentias rerum, nisi in eius anima per ra-
tiones Ideis respondentes essent insertæ; sen-
sibus enim sola externa accidentia offerun-
tur. Arist. censet per sola vniuersalia, quæ sunt
communes notiones, posse acquiri scientias.
Plato eas communes notiones non reuult,
immo necessarias iudicat pro scientia rerum;
in eis tamen non scientiam, sed opinionem po-
tius positam esse affirmat: nisi enim anima per
rationes ad Ideas eleuetur, & cum mente iun-
gatur; nec propriè scire, nec intelligere dici-
tur; sed solum rectè, vel perperam opinari. Ex
quo nexu animæ cum mente, & Ideis pendet;
quod homo contemplationi deditus, domi-
natur, & imperat corpori, ne dum suo, verum
etiam cæterorum natura constantium. De-
mum ex rationum, Idearumque serie, ortum
in homine ducit Diuinitas, & Prophetia: ad-
cò, vt mirum videri non debeat, quod dici-
tur à Plotino, intellectum contemplantis ho-
minis, quamuis videatur esse in Oriente,
tamen conspiciere posse ea, quæ sunt in Oc-
cidente; & cum sit in vno loco, mirabiliter o-
perari posse in alio plurimum distante; ac in-
super

super sua cogitatione alios mouere. Homo enim, dum verè contemplatur, iungitur cum suo principio, in eoque per animam reperitur: in quo non distant, sed eminenter iuncta sunt ea, quæ apud nos distare videntur; adeo, vt per causas ea videat, quæ aliis in effectis conspiciere vix datum est.

An Aristoteles in disputatione de Ideis, cum Platone debeat conciliari.

CAP. XI.

Simplicius, Theophrastus, Priscianus, Lydus, Boetius, Ioannes Picus, & alij nonnulli viri celebres inquit, Arist. à Platone de Ideis loquente re vera nō dissentire; sed solūm esse littem in verbis: quatenus Arist. vel disputat cōtra fatuam de Ideis sententiam, quòd Ideæ sint formæ rerum naturalium abiunctæ, & seorsum à mente per se subsistentes: vel quatenus, quas Plato censet posse dici Ideas, & eodem nomine cum participantibus designari Arist. magis ad terminorū proprietates respiciens, eodem nomine appellandas non censet; solum enim leonem nuncupat illum, qui ex carnibus, & ossibus constans, pelle, & pilis tegitur. Re vera tamen cōuenire eos affirmat; quoniam eminens cōtinentia Peripateticorū, nil aliud est, nisi Idealis mundus Academicorum. Rem hanc ita sese habere, ex eo confirmari potest; quoniam fundamētum Idearum

est mens diuina, vt omnia includens, vt omnia diuinæ mentis offerens, vt omnium principium, vt nata imitari, & participari: quæ omnia à Peripatetico conceduntur, & propterea cogitur concedere Ideas. Hinc Arist. de Ideis mentionem nonnunquam facit: nam in 2. Physic. enumerans attinentia ad formam, inquit: Forma & Idea. Ex aduerso alij eos esse discordes affirmant: & in ea discordia nonnulli tuentur partes Arist. vt Alex. Pomponatius; alij Platonis, vt Syrianus, & multi ex Platoniciis. Philoponus hac de re non sibi constat; in physicis nititur nonnunquam eos conciliare, in disputationibus contra Proclum lib. 2. ait eos conciliari non posse; adeò, vt magna hac de re sit lis. Proculdubiò summoperè falluntur, qui eos idem sentire affirmant: nulla enim alia de re accuratiùs Arist. contra Platonem differuit, quàm de Ideis; manifestauit enim eas nec dari, nec illa munera præbere posse, quæ ab eis pendere asserunt Academici; destruxit, non ponendi modum, sed absolutè positionem ipsam; manifestauit generationem, scientiam, & alia, quæ ab Ideis dicuntur prouenire, minimè per Ideas fieri, immò per Ideas non posse fieri; nullum vnquã vsum dereliquit Ideis; adeò, quòd si eas concederet, inutiles eas esse putandum esset; cum tamen in vniuerso, ex sententia eius, nil superuacaneum, nil inutile inueniatur. Asserere, quòd solùm reiiciat Ideas per se, & seorsum à mente subsistentes, non eas in diuina mente

mente positas; est ostendere, se non perpendisse rationes Aristotelis contra Ideas: illæ enim vim habent absolutè contra Ideas quouis modo consideratas: absolutè enim inquit Arist. in 1. in 7. in 13. Metaph. Ideas nec pro rerum definitione, nec pro humana scientia, vel reminiscencia, nec pro rerum generatione, vt fiant à simili, neque pro rerum principiis esse ponendas: quia longè secùs hæc omnia fiunt, quàm per Ideas fieri existimauerit Plato: & cum nullam præbeant vtilitatem, esse vaniloquia, & poeticas metaphoras affirmat. Propterea in 12. Metaph. 51. ait melius esse Deo nō videre vilia, & mortalia, quàm videre. Accedit, quòd cum Ideæ, ex præcipuorum Academicorum sententia, sint formaliter distinctæ; hanc distinctionem nunquam in prima mente concederet Aristot. qui eam esse simplicissimum actum affirmavit, expertem nedum materiæ, sed etiam modi materiæ; quem materiæ modum Academici cum Ideis permiscent, vt suprâ apparuit. Longè etiam minùs valemus dicere, quòd dissentiat in modo loquēdi; quatenus nomen hominis, & leonis solùm compositis cum materia conuenire existimauit: non autem diuinæ menti, vt natæ repræsentare, & imitari. Quoniam absolutè Arist. à mente diuina omnem distinctam producendi rationem remouet: solùm asserit esse causam communem, vniuersalem, vniuersè ad omnia concurrentem; vniuersè enim Deus per Cœ-

li motum fouet omnem generationem: quòd verò hic, qui generatur, sit homo, ille verò leo; non ex distincta diuinæ mentis Idea provenire censet; sed solùm ex eo, quia hic proximè fit ab homine, ille à leone: adeò, vt primum, & proprium principium generationis leonis, sit corporeus leo ex sententia Aristotelis, non autem Idea leonis, vt Plato existimavit. Demum, quia Aristoteles nec rerum à Deo simplicem emanationem, nec mundi productionem ponit, sed solùm conseruationem à primo principio; iurè putandum est, nullo pacto concessisse Ideas, cùm nil admitteret, quod Ideis sit consentaneum. Colligamus itaque Aristotelem per sua fundamenta, & per suæ philosophiæ initia Ideas minimè concessisse, sed solùm in diuina mente cuncta inueniri putasse in eminentia, at non per distinctas Ideas: nam hoc conuenire censuit illi causæ, quæ solùm est causa communis, & nullius aliqua ratione propria. Ideæ enim supponunt id, cui conueniunt, distincta ratione diuersorum esse principium; continentia verò in eminentia secùs se habet. At cùm ita sentiat Aristoteles, nec possit cùm Platone conciliari; nos, dimisso Aristotele, cum Platone, cum Theologis, & cum priscis mundi sapientibus Ideas statuamus, easq; magnificemus; de quibus Boetius in 3. de Consol. metro. 9. ita cecinit:

Quem

*Quem non externæ pepulerunt fingere causæ
Materiæ fluitantis opus, verum insita summi
Forma boni, lixore carens: tu cuncta superno
Ducis ab exemplo, pulchrum pulcherrimus ipse
Mundū mente gerens, similiq; in imagine formans,
Perfectasq; iubes perfectum absolvere partes.*

FINIS LIBRI

Tertij.

H 3





STEPHANI THEVPOLI,

BENEDICTI F. P. A-

TRITII VENETI,

ACADEMICARVM

Contemplationum,

LIBER QVARTVS.

DE ANIMA VNIVERSE CON-
siderata.

Quid sit Anima ex aliorum opinione.

CAP. I.

RAECLARA ea quidem sunt, quæ ad ipsum Vnum, ad Mentem, ad Ideasque pertinent; in quibus hactenus versati sumus. At quæ ad animam pertinent, præter id, quod diuina sunt; nam vsque ad animam descendit diuinitatis fulgor (vt in Epistolis ait Plato) etiam hominis sunt propria; eique adeo accommodata, vt seorsum ab animæ cognitione, inanis, & superuacanea omnis alia cognitio censi mereatur. Propterea Plato, in explicanda anima accuratissimum se præstitit; & iniuria profectò ab Aristotele in
proc-

proœmio de anima carpitur, quòd de anima differēs, de ea sola hominis verba fecerit: nam Plato omnes animæ gradus latissimè manifestauit; nouit tamen solam animam rationalem absolutè, & verè animam esse; cæteras verò vmbras, vestigia, & idola animæ. Insuper nouit, quòd qui de hominis anima agit, de omni eius gradu loqui tenetur, cùm omnes inueniantur in homine; ideò commendatione, nō reprehensione dignus est Plato. Quòd anima sit, adeò constat, vt superuacaneum sit in eius ostensione immorari. Quid ea sit, maximè latet, vt vnà cum Platone affirmat Aristoteles: ideò dicebat Plato, difficillimum esse se noscere; quia difficile est cognoscere, quid sit anima. Insuper asseribat nos cōspicere animam, tanquam marinum Glaucum, suo decore, suaque prima forma destitutam; alienis sordibus fœdatam. Propterea nonnulli eam esse corpus putarunt: at corpus corpori absolutè nō dominatur, nec principium est corporum, nec munera omnem corporum facultatem excedentia valet absoluerè; quæ omnia manifestissimè conueniunt animæ. Alij existimarūt animam esse accidens: at accidens non per se subsistit, non supra corpus collocatur, non iungitur cum mente, non iudicat, nō substantiam constituit, nō sui, & aliorum est primum initium motus; quæ omnia ab anima proficiuntur. Colligamus itaque vnà cum Platone, & Aristot. animam non corpus, sed incorpo-

ream esse; non esse accidens, sed substantiam. Verum quæ sit hæc incorporea substantia, apprimè latet. Aristot. pro ea explicanda, summo perè in secundo de Anima laborauit; & præmissis variis distinctiõnibus dixit, eam esse actum primum corporis physici instrumentarij, siue potentia viui: insuper dixit, eam esse primum principium nutriendi, sentiendi, cogitandi, loco mouendi. Hæc profectò verè de quadam anima dicuntur; at non semper ei cõueniunt; veluti dum à crasso corpore seiungitur; nec conueniunt omni animæ, vt animæ Dæmonum, cælorum, & mûdi; nec naturam, & essentiam animæ patefaciunt; sed potiùs cuius anima sit, & quid efficiat; nam hoc præsertim cognoscere expetimus, quid sit actus, & perfectio hæc, quæ in nostro corpore reperitur, & nostrarum operationum est initium; qua de re nihil exactè explicant Peripatetici.

Quid sit Anima, opinio Platonis.

CAP. II.



PLato in Phædro, & 10. de Legibus Animam esse dixit numerum se mouentem; quam definitionem sumpsit ex Philolao, Philolaus ex Pythaga. Peripatetici variis argumentis eam esse negligendam nituntur ostendere: sed quia ea definitio est obscura, ideo ab eius explicatione exordiar, vt inde appareat, inanes esse instantias omnes, quæ aduersus eam afferuntur.

Plato

Plato Pythagoram imitatus, per Mathematica iuuenibus tunc temporis familiarissima, res physicas explicare consuevit; ac per Geometrica præsertim res physicas, per Arithmetica res incorporeas declarauit: numeri enim magis conueniunt cum rebus abiunctis, magnitudines verò cum rebus corporeis. Et quoniam anima est mediæ cuiusdam conditionis, ideo per vtrunque eam explicandam esse censuit; quod optimè seruauit: nonnunquam enim eam explicauit per numerum, inquiens, esse numerum se mouentem: nonnunquam per figuram, & magnitudinem, vt in Timæo: dum in anima linearum intersectionem, & duplicem circulum considerauit. Explicans res physicas per mathematica, non censuit verè physica ex accidentibus mathematicis constare: sed vel per mathematica denotauit præcipuas illas mathematicorum rationes, & formas in præcedentibus explicatas: vel per conditiones rerum mathematicarum manifestare voluit analogia quadam conditiones rerum naturæ constantium. cum enim mathematica sint à materiæ fluxu, & inconstantia seiuncta; conditione quadam exacta, certa, exquisitaque participant, per quam maximè conferunt ad ingenij dispositionem, eleuationem, & rei latentis explicationem: & propterea, vt ad numerum pertinet, seruata analogia dicimus quinque inueniri subordinatos numeros: Diuinum, substantialem, animarium, naturalem,

& mathematicum: primus est vniformis, secundus immobilis, tertius se mouens, quartus ab alio motus, postremus imago aliorum, & externa eorum mensura. Diuinus consideratur in Deo in eminentia, vt in principio omnium: Substantialis cōuenit menti per Ideas, quæ essentia, vnitas, & ens primum dicitur: Animarius numerus, conuenit animæ per rationes: Naturalis, rebus Physicis per naturæ semina: Demum Mathematicus, qui imago est ab anima rationali in phantasiam exproptus. Anima est numerus, nō quantus, & mathematicus, sed animarius: est numerus, non quidem numerans, sed numeratus, seipsum generans, in seipsum conuersiuus: & quoniam ex numero harmonia confurgit, ideo etiam anima harmonia esse dicitur; non quidem harmonia partium corporis, neq; harmonia quantita in sono, vel in voce collocata; sed harmonia ex substantialibus suis numeris confurgens, in suis rationibus, & generibus eam constituentibus posita: ex qua, tāquam ex causa, cū partium corporis, tum motuum, vocum, & sonorum prodit harmonia, harmoniæque iudiciū: & inde confurgit voluptas, qua ob harmonias, tanquam ob res sibi familiares, afficitur anima. Ex his colligo; primò, quòd cū Plato in Phædone neget animam esse harmoniam, in Timæo eam esse harmoniam affirmet, sibi minimè aduersatur: negat esse harmoniā quantam, vel ex partibus corporis confurgen-

tem

tem: asserit esse harmoniam, altero iam explicato modo. Colligo insuper non rectè à multis culpàri Platonem, quia asseruerit animam esse vel harmoniam, vel numerum: ipsi enim respiciunt ad numerum vulgarem mathematicum, ad harmoniam quantam, & ad eam, quæ qualitas, vel accidens est: cum Plato longè altiùs eleuatus, de eminentiore harmonia verba faciat.

Qualis Numerus conueniat Animæ.

CAP. III.

SI explicare vellem numeros, proportionēs, medietatesque omnes animæ conuenientes; ac insuper eorum conditiones, analogias, & significationes; præter id quod nimium in longum protraheretur oratio, etiam rem ab aliis actam agerem. Nam Marsilius Ficinus, Proclus, Chalcidius, & alij in Academia accuratè versati cumulatissimè de re hac verba fecerunt. Propter eà ego in paucis solum, & in eis quàm breuissimè immorabor. Conuenit varia consideratione animæ multiplex numerus. Primò in ea consideratur vnio, & vnitas, vt in proprio gradu particeps est diuinæ Vnitatis; ac etiam ratione suæ totalitatis; est enim vnum quoddam totum. Et quoniam triplex consideratur totum, vnum ante partes, aliud ex partibus surgens, tertium in singulis partibus; anima singulis his modis totum est; ea est totum ante

partes, dum cōsideratur, vt diuidua in eas: est totum consurgens ex partibus, dum primò assumptis partibus cōsideramus, quomodo ex illis ea consurgat: est totum in singulis partibus, cū anima sit tota in toto, & tota in quauis parte. Insuper conuenit animæ numerus binarius; & quia est nata diuidi; & quia in ea reperitur infinitum, & terminus, identitas, & alteritas; & demum conuersio ad intelligibilia, & sensibilia. Et iurè conuenit animæ binarius, cum vnitae coniunctus: nam menti supra animam, præsertim vnitae cōuenit; corpori infra animam, solum infinitum; animæ mediæ, conuenit propriè dualitas, quasi infinitum cum vnitae coniunctum. Insuper animæ tribuitur ternarius numerus: tum ratione principij, mediij, & finis eius: tum quia in se manet, ad infera progreditur, reuertitur ad superna; insuper fluit ab vno, recedit ab eo, reflectitur in illud: tum demum, quia, vt inquit Proclus, animæ natura in tria diuisa est, in substantiam, potentiam, & actionem; insuper substantia in essentiam, harmoniam, & speciē; essentia in propriè substantiam, idem, & alterum; sic ternario numero anima gaudet, eoq; referta est. Insuper conuenit ei numerus quaternarius: quatenus in materiam est procliuus, quatuor qualitatibus, quatuor elementis, quatuorq; humoribus contemperatam; & ea quatuor præcipuis facultatibus est prædita, nutriendi, sentiendi, loco mouendi, & intel-

intelligendi. Sed vt cæteros numeros, eorum-
que cum anima conformitates prætermittam;
præsertim tribuitur animæ numerus quina-
rius & septenarius. Quinarius, quoniam & ex
quinque rerum generibus, & quinque modis
anima componitur, vt infra apparebit: insu-
per, quoniam quinquæ in anima consideran-
tur; primò, substantia eius; secundò, harmo-
nia rationum eius; tertio, species ex partium,
rationumve concordia confurgens; quartò,
virtus eius; quintò, actiones: & propterea, vt
ait Proclus, animæ consideratio in quinq; po-
tissimum capita distribui debet. Præterea, vt
anima ex diuidua, indiuiduaq; natura cõstat;
ita quinarius ex primo pari, primoque impari
componitur. Demum, vt anima in vniuerso
media est; ita quinarius in vniuerso numero,
nempe in denario, medius conspicitur. Se-
ptenarius verò numerus cõuenit animæ; quo-
niam septenarius includit vnitatem, vt copu-
lam geminæ trinitatis, ex quibus vnà cum
copula tertia confurgit trinitas; adeò, vt in
septenario ter omnis perfectio reperiatur: sic
in anima reperitur perfectio ratione princi-
pij, medij, & finis; ratione conuersionis, ad
supera, in se, & ad infera. Hinc rectè ait Pro-
clus; Numerus septenarius est numerus A-
pollini dicatus, omnis consonantiæ parens;
quoniam in vnitatem, binario, & quaternario,
ex quibus septenarius resultat, primum bis-
diapason reperitur. Hinc Plato pro animæ

compositione septem recipit numeros, in quibus omnes harmonicæ rationes comprehenduntur. Insuper etiam usque ad septimum gradum, ut aiunt Musici, omnis vocum discrepantia progreditur. Non iniuria itaque Plato utitur septenario pro compositione animæ. In numeris quoque animam componentibus conuenienti ratione omne medium reperitur: in eis est medium Geometricum, rectè legum institutioni respondens; de quo Plato in sua R. P. ait, per illud ciuitates rectè gubernari: reperitur medium Musicum, quod iustitiæ similitudo est: Demum reperitur medium Arithmeticum, quod Pacis celebre signum nuncupatur. Hac itaque ratione, & modo, cum mira significationum fecunditate, Plato ex numeris constare animam affirmauit. In qua etiam figuras considerauit, circulum scilicet, & triangulum: quoniam, ut anima prima eorum est, quæ ad corpus vergunt; ita hæ figurarum omnium, cum rectilinearum, tum curvilinearum primæ sunt. Insuper, animæ per mentem conuenit orbiculatio; per naturam propriam progressus, & rectitudo: ideo cum rotunda, tum recta figura in anima reperitur. Mitto cæteras circuli, & trianguli cum anima conuenientias: sat mihi est capita attingere; ut appareat, quales sint numeri, & figuræ, quæ in anima à Platone considerantur.

Quomo.

*Quamodo anima dicatur mouere seipsam,
& esse initium motus.*

CAP. IV.



Multipl^{ex} profectò est motus; & præt^{er}sertim quadruplex, ex sentētia Platonis, considerari potest. Primus est motus materiæ mundi, de quo loquitur Plato in Timæo inquiens: Ante mundi generationem materia fluctuabat, inconstanti, inordinatoque motu mouebatur. hic motus potius est fluxio, inconstantia, priuatioque termini, & ordinis; quàm verè motus. Alter est motus physicus corporum natura cōstantium. Tertius est motus animæ. Quartus mentis: nam mens, quauis dicatur immobilis; attamen ei conuenit motus, quatenus ex se excitatur ab esse ad agere. Præt^{er}ea menti conuenit motus, non quidem transitiuus, sed pro genere rerum sumptus, vt in præcedentibus apparuit. Anima motu animario se mouet, qui motus multiplex est: Ideo Plato in 10. de Legibus dixit, nomina motuum animæ esse, velle, considerare, consultare, opinari, lætari, dolere, metuere, odisse, diligere, & similia: adeo quòd anima, nedum se mouet, quia ex se excitatur ad trāsitiuum motum, & est initium eius in corporibus; verùm insuper, quia motibus aliis se mouet, qui metaphoricè motus nuncupantur: quibus motibus dicitur se mouere, quoniam sunt actiones immanentes, nō transeuntes. Et quemadmodum in anima v-

nitas non destruit diuisionem, nec diuisio remouet vnitatem; ita motus in ea non destruit statum, nec status motum: quoniam ratione diuersorum ei conuenit motus, & status; vt ratione diuersæ conditionis, cælum dicitur, & moueri, & esse immobile. Ex his patet rectè à Platone animam dici numerum semouentem: quæ definitio approbata à Zenocrate, ita ab eo explicabatur, quòd anima esset substantia secundum numerum vna, ex substantiis multis conflata seipsam mouens.

Sic Cicero, quod debuit Platoni tribuere, perperam tribuebat Aristoteli, dum entelechiam ab Aristotele pro genere in definitione animæ sumptam dicebat denotare perennem motum: quod, vt longè abest à sententia Aristot. ita maximè est consentaneum opinioni Platonis; verè enim anima est motus perennis ex Platonis sententia. Quòd si etiam per clariores terminos volumus Platoniam animæ definitionem latiùs explicare, dicere valeamus: Anima est substantia incorporea, à mente pendens; ex rerum principiis, & generibus conuenienti ratione, & numero ita conflata, vt ex se moueatur; & iuncta corpori sit primum initium transitiui motus.

Ita censeo ego posse latiùs breuem illam definitionem explicari.

Quæ

*Quæ à Peripateticis obijciuntur Platoni, & an
debeant conciliari.*

CAP. V.

IN multis profectò Plato, vt attinet
ad animæ naturam, & conditionē,
ab Aristot. carpitur. Primò ei obii-
citur, quòd dicat eam se mouere; cū
nihil in se agat, nil à se patiatur: Si enim idem
se moueret, plurima sequerentur absurda, ab
Arist. in 8. Physic. post cont. 40. latè explicata.
Insuper anima non potest se mouere, nec pro-
priè sumpto motu, nec eo sumpto in metapho-
ricè: non propriè sumpto; quia omne, quod
eo motu per se mouetur, est in loco, vt in-
quit Aristoteles in primo de anima. 38. anima
autem non est in loco: neque etiam se mouet
motu metaphorico, qualis est sentire, consul-
tare, & similia; quoniam, vt inquit Aristote-
les in primo de anima 65. Non anima sentit,
vel intelligit, sed homo per animam. Insuper
Plato ait non mentem, sed animam esse pri-
mum principium transitiui motus: Arist. ani-
mā à mente non seiungens ait, cœlestes mētes
mouere cœlū; & esse primū, & propriū initiū
motus cœli. Præterea carpitur ab Arist. in 2. de
anima 26. quoniam Plato absolutè animā sta-
tuit iungi cum corpore; & non explicat, quale
debeat esse id corpus, in quo ea recipitur. Insu-
per in Proœmio de anima arguitur Plato: quo-
niam agens de anima, non de ea vniuersè, sed
de sola hominis anima verba facit; relata enim

definitio, soli animæ hominis videtur conuenire. Demum motus est secundus actus, anima ab Aristot. in 2. de anima dicitur actus primus; motus est accidens, anima est substantia; iurè itaque in multis culpandus videtur Plato. Nituntur nonnulli, è quorum numero præcipuus est Simplicius, Arist. cum Platone conciliare: sed manifestissimè falluntur. Profectò de nonnullis sola est lis in verbis; at de præcipuis reuera dissentiunt, re vera inter se pugnant, quorum lis à principiis ducitur: vario enim modo de Ideis, & rationibus sentiunt; pariter de rerum generibus componētibus animam; de dependentia, & distinctione rationalis animæ à mente, de modo operandi animæ; & de primo initio motus. Propterea non sat est dicere, ut ait Simplicius, Platonem latius accipere motum, quam faciat Aristot. & non loqui de motu corporum, de quo loquitur Aristot. nam etiam eo latè sumpto motu, non propriè anima se mouet ex sentētia Arist. cum debeat semper moueri ab obiecto; immò Aristot. in 8. Physic. ait esse absurdum, ut idem sit docēs, & addiscens; & in primo de anima negauit animam sentire, vel intelligere, sed corpus per animam; & profectò hi non sunt motus corporum, & propriè sumpti. Pariter non satisfacit, quod dicitur à Simpl. in 8. Phys. 44. dū inquit animam se mouere, non ut quod simplex; sed ut includens varias rationes, per quarum aliquam sit in actu, per aliam in potentia. Hoc equi-

equidem ex sententia Plat. rectè est dictum, at cum Aristot. dici non potest: qui in anima rationes non concedit, nec censet per rationem vnā in anima excitari aliam; sed solum adaptionē vnius, esse initium adaptionis alterius. Dicamus itaque Arist. verè dissentire à Platone, & nitamur Platonem à calumniis Peripateticorum vindicare. Dum inquirunt, nil se mouere posse, ne idem respectu eiusdem sit in actu, & in potētia: dicamus, idē nō posse esse in actu, & in potentia per eandem rationem, sed per rationes distinctas id contingere posse; & præsertim loquendo de motu rei incorporeæ, qui est actio quædā sine propriè sumpta perpeffione: & hoc affirmamus necessario debere conuenire primo mouenti, vt deinde valeat esse initium motus aliorum: immò in hoc arguendus potius videtur esse Arist. qui non valuit rectè explicare, quomodo anima, cū ex se non excitetur, nec se moueat, valeat mouere corpus: nam dixit animam mouere, quia ex actu imaginationis alteratio confurgit in instrumentis motus; post quam primam alterationem moueatur corpus munere distinctionis, & nexus partium eius. Verū neque ea alteratio est necessaria, cū frequenter sine ea fiat motus; neque etiam necessaria est distinctio membrorum, cū anima moueat cælum sine vlla alteratione, moueat vehicula sine instrumentorum distinctione; sed verè solum, quia anima ex se per distinctionem rationum,

& ex sui natura excitatur, valet proximè mouere aliud. Anima se mouet, sed motu animario absque proprie sumpta actione, & perfectione: non secus ac dum dicimus ex se lucere Solem: & hic nuncupatur motus primus rei incorporeæ conueniens; ex quo confurgit motus secundus, qui corporum est. Sic non sequuntur absurda, ad quæ deducit Arist. in 8. Phys. Præterea dum Arist. inquit, omne, quod mouetur, esse in loco: id verum est de eo, quod mouetur motu secundo, & motu corporum. Dum addit, animam nec sentire, nec intelligere; sed hominem per animam. Ad hoc dico primò, animam sentire, & intelligere; nisi tanquàm totum proximè sentiens, & intelligēs; saltem tāquam primum principium; est enim anima, etiam ex sententia Arist. in 2. de anima, primū principium nutriendi, sentiendi, &c. ideo dixit in initio tertij de anima: De particula animæ, qua anima cognoscit, & sapit: & in cont. 4. de intellectu, quod omnia intelligit. Addo secundò, per fundamenta Platonis rectius nos seruare posse animam intelligere, consultare, & reliqua obire munera, quàm ex sententia Arist. Ratio est; quoniam ex opinione Platonis insunt in anima rationes rerum, per quas intelligit; quæ non insunt ex sententia Arist. & anima iuncta vehiculis sentit, mouet, & intelligit; quamuis non adsint instrumenta corporis. Præterea, si Arist. mentem non seiunxit re ab anima, & mentem posuit proximum initium

tium motus in cœlo, errauit profectò: vt enim ratiocinatio à simplici intuitu rei distinguitur: ita ratio ab Idea, & fundamētum rationis à fundamēto Ideæ sciungi debet. Et quoniam in Ideis consideratur indiuiduū sine progressionē, in ratiocinatione consideratur diuisio quædam, & progressio ex vno in aliud: ideo ratio, & non idea, anima, & non mens est proximum initium transitui motus corporum; nec datur in mundo trāsitus ex vno extremo in aliud sine conuenientibus mediis. Præter eā, dum vlteriùs dicitur, quòd Plato non determinat, quale debeat esse corpus, cum quo iungitur anima: dico hac de re potiùs Aristotelem esse culpandum, qui animam nimium posuit cum corpore complicatam, quàm Platonem. Potest seruari anima, nedum in corpore instrumentario, verùm etiā in corpore non instrumentario: iminò semper anima proximè in corpore non instrumentario tenui, & puro recipitur, & per illud iungitur aliis, quod exactiùs à Platone fuit explicatum, qui de variis animæ vehiculis sæpe loquitur, quàm ab Aristot. Et quando additur, quòd Plato de sola hominis anima loquitur: respondeo, cumulatissimè à Platone animam in nutrientem, sentientem, & ratiocinantem fuisse sæpè diuisam: exactè omnem eius partem in Timæo, in lib. de R. P. & alibi fuisse explicatam. Quòd si data definitio soli animæ hominis videtur conuenire, id cōtingit duplici de causa: primò, quo-

niam in homine omnis animæ gradus reperitur: secundò, quoniam verè, propriè, & absolutè anima ea sola est, quæ compos est rationis; reliquæ sunt umbræ, idola, & vestigia animæ. Et dum postreimò dicitur, motum esse accidens, & actum secundum: respondeo, actionem animæ, & motum secundum, qui corporum est, esse accidens, & secundum actum; at substantialem animæ numerum, qui ex se excitatur, & ratiocinatur, denotatum per numerum se mouentem, proculdubio esse substantiam, & actum primum, initium secundi; ad quem numerum se habet primus ille motus, tanquam affectio insequens naturam eius, & nobis patefaciens animæ conditionem.

De Animæ generatione.

CAP. VI.



Lato in Phædro, nedum asserit, sed etiam demonstrat animam esse ingentam; in Timæo abundè de animæ generatione verba facit; adeò, vt sibi constare non videatur. Philoponus in disputationibus contra Proclum, nititur apparentem contradictionem soluere inquiring, animam rationis compotem à mente, sola ratione distingui: ea enim, vt abiuncta, dicitur mēs; siue intellectus; vt iuncta corpori, dicitur anima: in prima consideratione est ingenta, in altera genita est cum generatione corporum. Fallitur vir hic sapiens: primò, quia, ex sententia Platonis, anima, nedum ratione, sed etiam

re,

re, distinguitur à mente: secundò, quia Plato in Timæo explicans animæ generationē, non ad coniunctionem cum corpore; sed ad naturam, & essentiam animæ respexit: vt mox apparebit: demum, quia in Phædro non métem, quam vbique statuit immobilem, sed animam se mouentem, ex eo, quia se mouet, asserit ingenitam. Platonici varia de re hac dicunt: sed, vt rem paucis perstringam, assero, apparétem contradictionem pendere ex æquiuocatione termini, generationis. Nam generatio dicitur: cùm de his, quæ solùm fiunt, & non sunt; tum de his, quæ & fiunt, & sunt: anima est, & fit; vt est, non gignitur; vt fit, gignitur; corporea, cū solùm fiunt, & non sint, solùm gigni dicuntur. Præterea, quia anima media est in yniuerso, & est primum initium motus, ac insuper pendet à méte, & Idea; ea, vt initium primum motus, non fit; sic consideratur in Phædro: at dum consideratur absolutè, vt pendet à sua Idea; quæ in Timæo dicitur Patera, in qua commixtæ sunt animæ; sic est genita. Demum, vt est semper, dicitur ingenita; vt est constituta ex primis principiis, & generibus rerum, genita est. Sed dubitatio oritur; quia si mens pendet à Deo, & ea quoque includit omnia principia rerū; cur Plato in Timæo non ita posuit mentis generationem, vt posuit eam animæ? Ad hoc respicientes nonnulli, suspicati sunt ex opinione Platonis, solum Deum esse mentem; sub Deo locari animas, quæ eius redderentur

compotes: & propterea primò anime assigna-
ri generationem, non mentis. Quæ sententia,
quamvis probabilitate non careat, attamen
ob varia apprimè dubia est: ideo, nedum à po-
terioribus, sed etiam ferè ab omnibus Platonici-
s, supra animam gradus mentium ponitur
sub Deo ordinarum. Ad dubitationem, cur
Plato earum non ponat generationem; respon-
deo, id non facere, quoniã mentes solùm sunt,
& nò fiunt: ideo Plato loquens de mundi ge-
neratione, ponit primò distinctionem inter
ea, quæ solùm sunt: & ea, quæ fieri dicuntur.
Præterea non ponit mentis generationem;
quoniam generatio ex Idea pendet, mens so-
lùm manat à Deo, non per Ideam gignitur;
nam Ideæ ad mentem pertinent, & in ea sunt;
ideo solùm ordinata sub mente, gigni dicun-
tur. Cùm anima à Platone dicatur genita, non
propriè sumpta generatio, & in tempore facta
denotatur: sed solùm indicatur æterna ema-
natio à primo opifice per eius Ideam, & præ-
sertim asserendo mundum esse æternum. Ani-
mæ non vna, sed triplex conuenit generatio:
prima est dependentia à mente per propriam
Ideam, & cõpositio eius ex primis principiis,
& generibus rerum: altera est complicatio
eius cum corpore, quæ rectiùs dicitur descen-
sus, quàm generatio: postrema est, dum à se e-
greditur, inferiores vitas generat, cum virtute
imaginandi iungitur, ac mox excitata in se
redit; in hoc enim statu consideratur & gene-
ratio

ratio progrediētis vitæ, & regeneratio suimet in reditu in seipsam; absolute tamen regeneratio animæ est eius reditus in cælum: quæ regeneratio à Plat. in lib. de Regno sub ænigmatē denotatur, dum inquit, regnante Saturno moueri cælum ab occalu in ortum, & homines nasci senes, mori pueros; hæc enim regeneratio senium animæ præsupponit, & dicitur fieri regnante Saturno, hoc est, præler-
tim munere contemplationis.

De Animæ compositione.

CAP. VII.



Vò longius ab ipso vno recedimus, eò magis labimur in multitudinē; quò magis distamus à primo simplici, eò magis in compositione versamur. Et quoniam anima in tertio gradu collocatur; iurè maior, cū distinctio, tum compositio in ea reperitur, quàm in mente: immò cū anima sit omnium media, sit nexus omnium, iurè in ea omne compositionis genus debet modo aliquo reperiri. Anima varia consideratione quinque modis dicitur composita; primò ex rerum initiis, & generibus; secundò ex numeris; tertio ex numerosis concentibus; quartò ex initiis figurarum, triangulo scilicet, & circulo; quintò ex principiis motuum. Et quoniam simile simili cognoscitur; ideò his compositionibus anima, nedum cuncta ligat, sed etiam cuncta cognoscit, essentias, nume-

ros, concentus, figuras, & motus. Quòd si Plato in Phædro compositionem ab anima videtur remouere; putandum est, illum tunc ab anima, tanquam à principio constituyente corpora, remouere eam compositionem, quæ cōuenit corporibus. Aristoteles etiam in anima nouit compositionem ex variis facultatibus; ex intellectu agente, & possibili; ex non esse, & esse. At Plato exactius animæ conditiones, & naturam explicans; ob rationes rerum, quas in anima posuit, & diuersa genera, ac principia, quæ in anima considerauit; præter compositionem ab Arist. positam, etiam alias explicare valuit. Demum, quia vnumquodque eatenus est, quatenus ipso vno participat; id eò multitudo animæ, vnionis, tanquam capitis, est particeps; eiusque compositio, ratione vnionis, est particeps simplicitatis; adeò, vt in ea, nec multitudo, vnitatem, nec compositio simplicitatem, nec motus statum destruat.

*Quòd anima sit mediæ cuiusdam naturæ,
& conditionis.*

CAP. VIII.



On iniuria prisci omnes Theologi, & cum eis admirabilis Plato, animæ mediæ cuiusdam naturæ, & conditionis esse affirmarunt: quos sectatus Plotinus, accomodatè asseruit eam in Oriente, siue in termino, & nexu æternorum, & mortalium esse collocatam. Nam si ad omnia
respi-

respicimus, quæ ad animam pertinent; in omnibus mediam animæ naturam, & conditionē inuenimus. Dum ad generationem conuertimur, ea est media inter genita, & ingenita: est genita, vt ab Idea sua pendet, vt declinat à se, vt iungitur cum corpore; & idolum sui, ac secundas in eo parit vitas: est ingenita, ratione suæ præstantioris, stabilisque portionis; quæ & intelligens, & indiuidua est. Ideo quæ sunt supra animam, solùm sunt, non fiunt; quæ infra animam, solùm fiunt, non sunt: anima verò simul & esse, & fieri dicitur. Insuper, quæ sunt supra animam, indiuidua sunt solùm, & tota simul; quæ infra animam, penitus sunt diuisibilia; anima, cum indiuisibilis in se est: tum diuisibilis, vt operatur, & in corpore recipitur. Præterea, quæ sunt supra animam, solùm intelligunt; quæ infra, sunt expertia rationis, & mentis: anima per rationes, & nexum cum Ideis, ratiocinatur, & modo aliquo intelligit. Insuper, quæ sunt supra animam, in sola æternitate degunt; quæ infra animam, in solo tempore in anima simul, & finis æternitatis, & initium temporis reperitur. Præterea, quæ sunt supra animam, penitus sunt abiuncta à corpore; quæ infra animam, corporata penitus: anima medio modo se habens, viuit abiuncta, & iuncta cū corpore; præsertim tamen cum corpore tenui, quasi medio inter corpus, & incorporeum. Insuper, quæ sunt supra animam, sunt supra motum; quæ infra animam, subiiciun-

tur motui, & agitatur ab alio: anima medians, est initium motus aliorum, & mouetur ex se. Præterea quæ sunt supra animam, in se conuerfa intelligunt; & actus primus à secundo, hoc est, intelligens ab intellectione, in eis non distinguitur: quæ sunt infra animam, solum tendunt in aliud, & semper secundus actus distinguitur à primo: anima tū in se, tum ad supera, tū ad infera cōuertitur; & actus secundus eius, partim non distinguitur à primo, vt in parte eius ingenita, & manente: partim distinguitur, vt in parte genita, & progrediente. Præterea mens non progreditur, vel à se recedit: sed solum in se manet, aut participatur: quæ sunt infra animam, solum sunt alterius: anima simul & in se manet, & à se labitur, ac progreditur in aliud. Demum mens fruitur vita simplici, semper fœlici, & vera: quæ sunt infra animam, sunt permixta cum morte, veram vitam non viuunt, fœlicitate non participant: anima media, mediam viuens vitam, fœlicitatis, & miseriæ, vitæ, & mortis est capax. Propterea Magi eam Lunæ dixere similem, cuius pars vna lucet, altera tenebricosa est: & iurè anima ita se habet, cū sit postremus diuinitatis gradus; qui proximè cum natura, & rebus corporeis complicatur. Cū itaque anima mediæ conditionis sit: iurè anceps est naturæ, & vitam omnem viuere valet, & à priscis Prothei imagine designabatur: iurè cognitu est difficilis; iurè eius operationes mediæ cuiusdā sunt condi-

conditionis, & ea frequenter nominibus extremorum designatur; nonnunquam enim mens, nonnunquam natura nuncupatur. Ita quoque conuenienti ratione in ea omne medium inuenitur, & Geometricum, & Arithmeticum, & Musicum; vt in omnibus appareat admirabilis animę conditio, & natura eius exquisitissimę media. At inquiunt Peripatetici, inter abstractum, & materiatum non dari medium; pariter inter mortale, & æternum: quomodo itaque anima inter ea mediare dicitur? Ad hoc dicendum est, inter ea non dari ita medium, vt sit aliquid, quod ratione suę substantiæ, partim pendeat, partim nõ pendeat à materia; & partim sit mortale, partim æternum: at non propterea inficiari debemus, dari medium, quod per participationem cõditionum conueniat cum extremis; immò etiam Auer. in 2. physic. 26. formam hominis mediam esse affirmat.

An omnis Anima sit immortalis.

CAP. IX.



Idetur nonnunquam Plato omnem animam, nedum hominis, verum etiam iumentorum statuere immortalem; & præsertim, dum in Phædro animam ex eo ostendit esse immortalem, quia seipsam mouet. Inquit enim; Anima omnis immortalis est: quod enim semper mouetur, immortale est; quod verò aliud mouet, ab

alioque mouetur, cum terminum habeat motus, terminum habet & vite: solum ergo, quod seipsum mouet, quia nunquam se delerit, nunquam cessat moueri; immò verò & aliis, quæcunque mouentur, fons, & principium est, vt moueantur. Principium autem sine ortu est; ex principio enim necesse est, quicquid generatur, oriri; ipsum autem ex nullo: nã si principium oriretur ex aliquo, ex principio vtique non oriretur, cum verò sit absque ortu, vt absque interitu sit, necesse est. Nam si principium interiret, neque ipsum ex alio, neque ex ipso aliud nasceretur; siquidem, ex principio omnia oriatur, oportet. Sic ergo principium motus est, quod seipsum mouet: hoc autem neque mori, neque nasci potest: alioquin omne cælum, omnisque generatio cõcidat, definatque, necesse est; neque rursus vnquã constare possit, vnde hæc motum nacta oriantur. Cum igitur appareat immortale esse, quod seipsum mouet; animæ substantiam, & rationem hanc ipsam, qui dixerit, non erubescet: omne enim corpus, cui motus extrinsecus incidit, inanimatum est; cui verò intus in seipso inest, animatum; tanquam hæc animæ natura sit. Quod si ita est, vt non sit aliud quicquã, quod seipsum moueat, præter animam; necessariò ingenua, & immortalis est anima. Hæc Plato, ex quibus colligitur omnem animam esse immortalem: tum primò, quia statim in principio ipsemet asserit omnem animam esse immortalem: tum
insu-

insuper, ex medio suæ demonstrationis: quia
omnis anima est numerus se mouens: tum de-
mum ex eo, quod addit, sola animantia se mo-
uere, quia habent in se principium motus: re-
liqua minimè. Confirmatur ex 10. de Legibus
vbi Plato enumerans motus, quibus anima se
mouet; inter cæteros enumerat lætari, dolere,
audere, metuerè, odisse, diligere: quæ motus vi-
dentur attinere ad partem sentientem. Con-
firmatur etiam ex demonstratione, qua vtitur
idem Plato in Phædone; nam ostēdit animam
esse immortalem, quoniam eius propria est vi-
ta, ideo non est capax mortis: quod enim ex
sui natura sibi vnum exposcit, non est capax
oppositi eius. Prætereā confirmatur eadem o-
pinio, quoniam in Philebo dixit Plato: Vt sin-
gula corpora, vniuersi corporei mundi sunt
partes: ita singulæ animæ, vniuersæ animæ: a-
deò quòd videtur asserere Plato, omnem ani-
mam esse partem animæ mūdi, & consequen-
ter omnem animam esse immortalem. Hanc
sententiam tetigit Auer. in prima disputatio-
ne contra Algazelē dub. 8. inquiens: Et si quis
fortè diceret, quòd opinio Platonis est vera,
scilicet, quòd anima est vna, & antiqua, & di-
uiditur diuisione corporum; & in separatione
à corpore, redit ad suam radicem, &c. Deno-
tauit tunc Auer. sententiam hanc, quam non-
nulli colligunt ex Philebo Platonis; & ab ex-
positoribus locus ille Auer. minùs rectè ex-
plicatur. Postremò eadem opinio confirma-

tur, quia frequēter Plato cum Pythagora cōcedit transitum animarum in corpora iumentorum. Iurē itaque colligunt nonnulli, ex sententia Platonis, omnem animam esse immortalem. Simplicius hac de re fuit anceps: propterea dixit in 8. Physic. in expositione contextus 44. Sed Plato primò quidē, & propriē ex seipsa mobilem tradit esse omnē animam; vel, ut videtur peritiorib⁹ interpretibus, rationalem: sic dubium se ostēdit, num omnis anima, vel sola rationalis, sit ex seipsa mobilis. At si sola rationalis se moueret, quomodo animæ iumentorum essent initia motus? Res profectò est apprimē dubia. Ex aduerso tamen Plato manifestissimē in Timæo vim nutriendi, & appetendi, mortalem ponit, & frequenter de mortalibus animæ viribus facit mentionem: & præter cætera inquit in Timæo; Et diuinorum quidē ipse est auctor, mortalium verò generationem nat̃is suis tradit absolueudam. Illi igitur suum imitati parentem, principiumque animæ immortale suscipientes, animā ipsam mortali corpore clauferunt; totumq; corpus animæ, quasi vehiculum, subdidere; atque in eo aliam animę speciem mortalem fabricauerunt, quæ grauib⁹, necessariisq; perturbacionibus afficeretur; & post pauca; Cæterum, ne diuinum vlla mortalium contagione, nisi quantum summa necessitas cogeret, pollueretur; seorsum ab illo in alia corporis sede mortale collocauerunt; atque à pectore caput, ceruice

uice, & collo interiecto, separauerunt: in pectore igitur, & thorace mortale genus animæ posuerunt. Hæc Plato: per quæ manifestissimè asserit, partes animæ in pectore residētes, mortales esse: quod etiam in lib. de Repub. affirmavit. Insuper in Phædro inquit; Quæ immortales animæ vocantur, ad cœli dorsum eleuantur: indicans etiam dari animas mortales, quæ minimè eleuari possunt, nec valent beari. Propterea, ne Plato secum pugnare videatur, dicamus, propriè animam eam solam esse, quæ rationalis est: ideo Plato hanc à mundi opifice fieri asseruit; cæteras verò esse umbras animæ, & à secundis Diis fieri: à quibus ea, quæ pendent, mortalia sunt; & iurè quidem: nam prodeuntia à primo principio, non pendent à materia, & solùm agunt, non patiuntur; quæ verò pendent à secundis Diis, etiam pendent à materia, & perpeffioni subiiciuntur. In anima rationali insunt propriè sumptæ rationes, quibus animam propriè se ipsam mouere potest: ab anima rationali pendent aliæ, quasi umbræ, vestigia, & facultates ex copulatione animæ cum crasso corpore consurgentes. Hinc Plato animam rationalem nuncupauit in Timæo Principium, dum dixit; Principiumque animæ immortale suscipiētes, animam ipsam mortali corpore clauserunt, &c. Anima hominis iuncta crasso corpori, omnē in eo facultatē exercet: iuncta vehiculo spirituioso, & æthereo: non omnē, sed quandam

magis spirituosam; vt puta facultatem videri di, audiendi, & appetendi, quemadmodum de Dæmonibus se habere putandum est. Ideo in Phædro, currum animæ cum equis eleuari in cælum, asseritur: equi autem sunt facultates appetendi: equus bonus est appetitus honesti, & timor pudoris; malus verò est appetitus libidinis, & concupiscentiæ. Sed dubitatio remanet de iumentis; & feris; quæ se mouent, sunt præditæ capite seiuncto à pectore; in quo pars diuina residet; vt dicitur in Timæo: pariter sunt præditæ cerebro, quod à Platone in Timæo dicitur medulla; in qua velut in agro, diuinum semen, hoc est anima rationalis sumpta ab opifice mundi, erat iaciendum, &c.

Solutio difficultatum.

CAPITULUM X.



Profecto si ad communia Platonis dicta, & ad externa verba respiceremus; difficile esset seruare, quomodo in iumentis, & feris aliæ animæ facultates sine ratione inuenirétur; si aliæ sunt ymbrae, & vestigia rationis. Attamen, pro aperienda eius sententia, dicendum est; à mundi, vel sphærarum animis, in feris gigni proprias earum animas, instrumento tamen propriæ animæ singularum; quæ cum verè generentur, etiam intereunt. Et dum dicitur; Plato asserit omnem animam esse immortalem: dico, id

id debere intelligi de rationali; quæ sola propriè, & absolutè est anima. Dū additur, quòd etiam iumentorum animæ se mouent: dico, se mouere, non tãquam prima principia motus; sed quia sunt vestigia, & vmbra animæ rationalis, vel mundi, vel suæ spheræ: sic ratione sui primi principij sunt immortales. Sola anima rationis compos, verè, & primò se mouet; vt etiam sola est libera, & primò est rationibus prædita, & per se subsistere valens; cū cæteræ vitæ postremæ, solùm cum corpore, & dependentia ab eo, subsistant: ideo se ipsas primò mouere non videntur. Ad confirmationem sumptam ex 10. de Legibus, patet solutio: iam enim patuit animam rationalem comitari vim sentiendi, & appetendi in spirituosso vehiculo. Ad cōfirmationem sumptam ex Phædone, quia animæ propria est vita: respondeo, animæ rationalis propria est vita, non cū morte permixta; ea verò irrationalis animæ, est potius vmbra, quàm verè vita, & est pendens à vita animæ rationalis; & propterea solùm æterna est, vt suo principio, & fundamento nititur: vita, animæ rationalis animam comitatur, quæ oppositi non est capax; ea verò, quæ est vmbra vitæ, in corpore recipitur, quod vtriusque oppositi est capax. Ad auctoritatem ex Philebo depromptam, vbi videtur asserere omniā animam esse portionem animæ mundi, dicendum; quòd, vt corpus est pars vniuersitatis corporum, ita tamen, vt sit numero ab

aliis distinctum; ita vnaquæq; anima est pars, non quidem animæ mundi, sed vniuersitatis animarum: in hoc est vera ea similitudo considerata à Platone. Ad Auerrorem dicendum est, quòd errauit cum illis, qui perperâ assumpserunt sententiam Platonis; vt etiam decepti sunt Stoici, & Manichæorum illi, qui putarunt animas nostras esse porciones Dei. Ad confirmationem sumptam ex transitu animæ hominis per corpora iumentorum, & ferarum, respondeo transitum illum, partim esse allegoricum, quatenus homines ducentes vitam ferarum, in feras transire dicuntur; partim esse moralem, vt per eum nos deterreamur, & abstineamus à vitiis; partim demum esse verum, & ex sententia prolatum: nam etiam viri Sancti diuersa animarum in hoc mundo purgationis genera concesserunt; ideo etiam Plato, quamuis cōfusè, & sub nube, modo aliquo purgatorium cognouit. At dum animæ adsunt iumentis, non propterea eis insunt, nec iumentorum sunt animæ; nam tunc in iumentis etiam propriæ eorum animæ à rationali distinctæ inueniuntur. Et pro huius confirmatione confidero pulchrum locum in Phædro, ubi inquit Plato; animas delinquentium hominum, meare quidem per corpora iumentorum; at eas iumentorum, non meare per corpora hominum. verba hæc sunt: Hinc & in bestiae vitam humana anima transit, ex bestia rursus in hominem; si modò anima quandoque

que prius fuerit hominis: nam quæ nunquam
veritatem inspexerit, in hanc figuram venire
non poterit, &c. manifestè Plato per hæc indi-
cat animam ferarum distingui ab ea hominis,
nec meare per hominum corpora. Et dum po-
stremò dicebatur, feras esse præditas capite,
& cerebro, & consequenter anima Diuinita-
tis compote ibi residente ex sententia Plato-
nis: Dico animam rationalē residere quidem
in capite, & in cerebro; non tamen e contra,
omne residens in capite esse animam rationa-
lem: in iumentis, & feris; vis sola sentiendi in
capite posita est, saltem ratione instrumento-
rum, quibus utitur; non autem anima rationis
particeps: & iurè quidem; quia caput, & cere-
brum omnibus suis numeris absolutum, soli
conuenit homini; adeo, ut dicere valeamus,
hominem solum esse capite, & cerebro prædi-
tum; cætera non, nisi æquiucè. Colligamus
itaque, ex Platonis sententiâ, humanas animas,
cùm à Deo, tum à mente esse distinctas; nume-
roque inter se, & ab anima mundi secretas; &
absolutè, ac verè animâ esse rationalem; eam-
que solam esse æternam; cæteras esse postre-
mas vitas, & animæ umbras, & mortales. Ex
sensibus illi soli sunt æterni, qui rationalem
animam comitantur; & ab ea non substantia,
sed ratione distinguuntur, ac vehiculo pro in-
strumento utuntur. Conuenit Arist. cum Pla-
tone in eo, quod ambo asserunt solam animam
rationalem esse æternam; dissentiunt tamen:

quoniam Plato ab anima rationali cæteras animas produci existimat, & iurè quidem; cum semper gradus inferior à superiore pèdeat, & ducatur: Arist. tamen ferarum animas ab anima aliqua rationali pèdere minimè existimat.

De vehiculis Animarum.

CAP. XI.

MEns, cum verè sit, à corporis fluxu est secreta; cum sit lux pura, à corporis tenebricosa labe longè distat, nec corporeo vehiculo eget: ex aduerso Natura adeò in crasso corpore est immersa, & cum materia complicata, vt sine ea existere non valeat. Anima, quia media est, medio quodam modo erga corpora est affecta: ea nanque cum corpore familiaritatem habet, & ad corpus est procliuis; præsertim tamen ad id, quod purum, nitidumque est, & secum quodam familiaritatis nexu complicatū; quod tamen aliqua latitudine præditum est. Hoc cum mediet inter corpora crassa, & animas; iurè, veluti nexus, animas cum crasso corpore ligat: non enim extrema sine convenientibus mediis nectuntur. Hinc quoque euenit, quòd variæ animæ vehicula assignantur; nonnulla proximius, alia remotius cum anima complicata. Vehiculum animæ familiarissimum, est æthereum, siue igneum; quod duplex est: nam & stella primò animæ destinata, à Platone in Timæo vehiculū eius nuncupa-

cupatur: ac in super corpus illud æthereum, siue cœlestis spiritus, cum quo descendunt animæ in mortalem orbem ad formanda corpora: quod vehiculum radij, & stellæ similitudinem seruat. Ideo Plato in 10. de R. P. dixit animam ex Letheo campo ascendere ad generationem, tanquam stellam. De eodem vehiculo rectè dixit Iamblicus, Diuinum æthera fecundissimum esse pro gignendis vehiculis. Hoc itaque præcipuum vehiculum, est æthereum, perspicuum, rotundum; puritate tamen, & impuritate distinctum: nam purissimo vtuntur sphærarum animæ, minus puro Dæmones, & adhuc impuriore animæ hominum: per hoc vehiculum puriorum sensuum munera perficiuntur, visus scilicet, & auditus; ita tamen, vt anima per totum vehiculum videat pariter, & audiat; quo sentiendi munere impuri, & rudes homines non funguntur. At si quis per purgatrices virtutes, & per sapientiā, crasso neglecto corpore, in vehiculum æthereum totus eleuetur; audit cœlestem harmoniam; loquitur cum Dæmonibus; videt nedum Dæmones, sed etiam ea, quæ longè ab illo distant: quod Pythagoræ, & ter maximo Mercurio contigisse affirmant. Hinc mirum iudicari non debet, quod ab Olympiodoro Platonico relatū est, Apollonium Thianæum per hanc purgationem, & eleuationem consueuisse ex vrbe Roma, quæ fiebant in Ægypto, conspiceret: pro quo obeundo munere,

necessariæ sunt rationes cum Ideis coniunctæ, vt in præcedentibus declaratum fuit. De hoc igneo, siue æthereo vehiculo loquens Zoroaster dixit: Ne sedes spiritum, neque in profundum exaugeas, quod est planum; hoc est, ne sedes æthereum vehiculum, neq; illud cum crasso corpore permisceas: æthereum enim vehiculum ex se est planum, hoc est tenue, purum, & splendidum; & propterea conueniente metaphora à Platone in Phædro currus animæ nuncupatur: in quo insidens anima in æthereo mundo rebus intelligibilibus incumbit, astrorum circuitus certis sectatur periodis, & cum diuinis animis vniuersum gubernat. Vehiculo æthereo, quod & igneum, & cœleste nuncupare valemus (hoc enim ætheris nomine nunc designo) aliud succedit, quod spirituosum dici potest; cum quo iunguntur animæ, dum in mortalem mundum descendunt, & in crasso corpore recipiuntur: Quod secundum vehiculum nil aliud est, nisi sanguis tenuis, vel spiritus per nostra corpora diffusus. Et quoniam huiusmodi spiritus insequuntur conditionem temperamenti humani corporis; ideo ratione dominantis, modò aquei, modò aerei, modò ignei nuncupantur: & huiusmodi vehiculum ex elemētorum sphæris Dij secundi, siue cœlestia corpora conficiunt. Hoc recipit anima, mortale corpus subitura; & deserit, in ætheream regionem reuersura: cum eo tamen in hoc mūdo mortali versari potest; adeò,

adeò, vt per illud nonnunquam conspiciatur,
 & apud inferos det pœnas suorũ delictorum;
 quo secundo vehiculo sphærarum animę non
 egent, inmò nec animæ hominum eleuatae in
 cœlum. Duplex hoc vehiculum eleganter si-
 mul, & doctè expressit Virgilius in 6. *Ænei-*
dos inquiring:

*Donec longa dies,perfecto temporis orbe,
 Concretam exemit labem; purumq; reliquit
 Æthereum sensum, atq; auræ simplicis ignem.*

Hæc duo vehiculorum genera, adeò iuncta,
 complicataque sunt cum animæ essentia; vt
 nonnulli animam à vehiculo non secreuerint;
 sed eandem esse cum altero eorum existima-
 uerint: cuius sententiæ fuisse Arist. Cicero cen-
 suit, dum animam entelechiam esse affirma-
 uit; sed manifestissimè hallucinatus est. Gal.
 in 7. de Placitis Hippocratis, & Platonis cap. 7.
 dixit: Veruntamen si de animę substantia sen-
 tentia est proferenda, de duobus alterum di-
 camus, necesse est: vel ipsam esse fulgidũ hoc,
 ac quasi æthereum corpus; ad quod asseren-
 dum, velint nolint, consecutione, descendant
 Stoici, & Arist. vel ipsam incorpoream quidẽ
 esse substantia, vt tamen hoc corpore, tâquam
 præcipuo; quo utique medio, aliorum corpo-
 rum postea commercium habeat. Hæc admi-
 rabilis Gal. qui rectè tribuit Stoicis, vt puta-
 rent animam esse portionem ætherei, diuiniq;
 corporis: perperam tamẽ de Arist. asserit, eum
 cogi cõcedere, animam esse purum id corpus;

cum manifestissimè in libris de anima demonstrauerit, animam non esse corpus. Tertium vehiculum est terrenum hoc, & crassum corpus; quod à Platone in Timæo, quasi animæ vehiculum dictum fuit; & in Phædro vehiculum ostreaceum fuit nuncupatum; à Plotino autem sepulchrum animæ. De his tribus vehiculis ita decernit Plato, vt anima in ostreaceo per breue tēpus habitet, in aereo per multa secula, in æthereo siue igneo mox per omnia. Et quoniam in singulis vehiculis insunt sensus, propterea cūm vehicula sint diuersa, vario modo in eis sensus reperiuntur: nam in æthereo est sensus communis, sine perpeffione; in spirituosō communis, at cum perpeffione; nam per vniuersa huiusmodi vehicula sensus est totus; in ostreaceo demum reperiatur sensus diuisus per distincta sentiendi instrumenta, & cum perpeffione. Et quoniam sensus constituit animal, propterea ex tribus vehiculis tria consurgunt subordinata animalia; ex quibus tamen vnum animal totum constitui potest: de quo verè enunciare valemus, partem esse maiorem toto; quia anima iuncta cum solo vehiculo æthereo, est potior aggregato ex omnibus. Vehiculum ostreaceum cōtagionis morbo sc̄dat spirituosum; ideo pro facultate nitendum, vt superius ab inferiore eleuetur, ac secernatur. His tribus vehiculis Simplicius addit quartum; nam in procēmio de anima, imaginatiuum, & sensitiuum, nuncupat

cupat diuinum animæ nostræ vehiculū. Considerandum tamen est, quòd vis imaginandi, & sentiendi, rectius cum Arist. quàm cum Platone vehiculū animæ rationalis nūcupari potest: quoniā ex opinione Arist. recipitur mens, siue rationalis anima in corpore, in quo prius vis imaginādi, & sentiendi genita sit; non quidem virtute rationalis animæ, nil enim ad earum virium generationem hæc confert; sed virtute genituræ; adeò, vt cum facultate imaginandi iam genita, copuletur anima rationalis, siue intellectus. Ex sentētia verò Platonis, ab anima rationali inferiores vitæ producuntur, non tamen sine elementis; & propterea à secundis Diis fieri dicuntur: id verò, quod ab alio producitur, & fluit, minùs propriè vehiculum eius nuncupatur. Cōstat itaque, quid de vehiculis sentiat Plato: qua de re qui vellet Arist. cum Platone conciliare; simul initia distincta, viasque diuersas confunderet. Aristot. negat stellas esse vehicula animarum, & ab eis moueri; cū in secundo de Cœlo pro facultate nitatur ostendere, stellas solū moueri ad motum orbis. Insuper vehiculum æthereum à spirituosō distinctū non cōcedit, & vehiculum spirituosum solum gigni existimat in hoc crasso corpore, & seorsum ab eo negat seruari posse. Demum non censet animas sine instrumento, & crasso corpore reperiri; vt manifestissimè asseruit in 2. de anima 26. inquiens, animam non esse corpus; attamen non esse si-

ne corpore, & sine corpore tali, hoc est physico, & instrumentario. Propterea Simplicius, & Philoponus manifestissimè aberrant: dum nituntur cum Arist. seruare animam cum spirituofo vehiculo à crasso corpore seiungi, & seorsum seruari.

De Animæ descensu.

CAP. XII.



Vim animæ rationales, perinde ac corporeæ formæ, non vna, vt perperam putauit Auer. sed multæ numero sint; per hoc tamen à reliquis numerosis formis seiunguntur: quia reliquarum nullus est certus numerus: animæ verò rationalis, ex opinione Platonis, numerus est ita certus: vt nunquam plures, vel pauciores redantur: Hæ nanque in origine mundi ex cratere denotante vitæ rationalis ideam, certo, eisq; conuenienti numero prodierunt. Rectè nouit Plato rationales animas ab opifice creari, pluresq; numero esse; à vero tamen eatenus recessit, quatenus censuit ab æterno in certo numero fuisse creatas: ad quod existimandum deductus fortasse fuit; primò, quia omne in tempore genitum existimauit esse mortale; secundò, quia fortè minùs rectè intellexit sententiam illà Moysis in Genesi, quòd Deus perfecit omne opus, & in die septima requieuit ab omni opere, quod patrauerat: per

per quæ verba subindicare videtur, nil postea à primo opifice creari. Cuius opinionis etiam fuit Origenes, nec non Manichæi; qui tamen à vero longè recesserūt. Animæ itaque, ex sententia Platonis, ab initio creatæ, per stellas firmamenti fuerunt distributæ; proclivis est enim anima ad corpus, præsertim tamen ad id, quod purum est: & quoniam stellæ sunt corpora lucida, perfectæ, satis diuersa ab orbe; idè per animam propriam in suo loco reuoluuntur. Insuper, quoniam stellæ sunt diuersæ conditionis, diuersorumq; graduum; idè animæ quoq; diuersæ cōditionis sunt: nonnullæ sunt Martiales, aliæ Venereæ, quædam Apollineæ, vel Iouiales, & sic de cæteris: & propter eà descendunt ad formanda ea corpora, quæ proprio temperamento conditioni animæ respondent, & ad quod cōstituendum per propriam stellam contulerunt. Dicuntur descendere per Cancrum, & ascendere per Capricornum: nam Cancer est domicilium Lunæ, quæ generationi destinata est; Capricornus est domicilium Saturni, & cōtemplationis, per quā anima eleuatur in cœlū. Insuper descēdūt per Cancrū; quia Cancer suo retrogrado motu significat regressum à perfectione, & lapsum ad deterius: Ascēdūt per Capricornū; quoniā est animal, quod sua natura, & cornu superna petit. Descendunt animæ ob naturalem propensionem, quam habent ad corpora, sibi affectionum similitudine conueniente proportionē

respondentia : ea autem propensio ex eo pendet ; quoniam superna, pro facultate, sua munera aliis impartiuntur. Ea etiam propensio ad corpora, à Platone in Menone nuncupatur antiqua miseria animæ : hoc est conditio, per quam à primo principio anima recedit, & cū corporea natura iungitur ; ideo nuncupatur culpa conditionis animæ, cuius tenetur dare pœnas, proportionē respondens peccato originali : quod eminūs Plato conspexit, ideo dixit in Menone ; Quicunque enim pœnas antiquæ miseriæ Proserpinæ iam dederunt, iis illa ad supernum Solem, nono anno rursus animam reddit, &c. Insuper descendant animæ, sœtūque terreno insinuantur cum tonitru, & terræ motu ; hoc est, cum cœli, & terræ trāsmutatione, magnoque conatu eorum, & cum signo futuræ miseriæ. Dum anima cum materia, mortali que corpore copulatur, ac in fabrica corporis est occupata ; iure dicitur degustare aquam fluminis Amelitæ, hoc est negligentia, quoniam diuina negligit : & dicitur versari, ac dormire in cāpo Letheo, hoc est obliuionis ; quoniam cū progrediatur, & à se recedat, suimet, ac etiam diuinorū obliuiscitur ; dicitur recumbere, quia ad corpus est conuersa ; non in se, non in leges prouidentia, nec in supernam mentem erecta. Dum anima iuncta cum suo principio vitam uiuit intellectualem, & vnā cum anima mundi in attinentibus ad yniuersum sollicita est ; integra, & absolutissi-
ma

ina est: At, dum omiſſa contemplatione, in fabrica corporis per infimas eius facultates verſatur: ex maxima, redditur minima; ex diuina, mortalis; ex nitidiſſima, obſcuriſſima; ex ſapientiſſima, inſipientiſſima; ex libera, variis compedibus deuincta; & demum, ex viuente, mortua: ac, vt mortua in corpore, tanquam in ſibi per naturam à ſe cōſtructa ſepultura continetur, & clauditur: vt mox receptis aliis, reſeratoq; tegmine, bombycis exemplo, egredietur, & volet in cœlum.

*Quomodo Anima ſit in corpore.
Et de ſede eius.*

CAP. XIII.

ANIMA, quæ mediæ naturæ, & conditionis eſt: ad ſupera, ad infera, & ad ſeipſam referri poteſt. Dum ad ſupera, nempe ad mentem, refertur: in eam conuerſa formatur, terminatur, & vim quandā recipit, quæ frequenter nomine mentis, & intellectus honeſtatur; per quam cum primo principio iungitur, ſupra motum, & tempus eleuatur, ac in æternitate degit. Dum ſecundò anima in ſemetipſa conſideratur, iam modo aliquo actum habet cum potentia permixtum, cum ſucceſſione ratiocinatur, & poſt idealem verus rationalis homo eſſe dicitur. Demum conſiderata, vt vergens ad corpus, in illud vitam, quaſi actum animæ effundit: quæ eſt tanquam idolum, & imago animæ, ab ani-

ina distincta; pendens tamen ab ea in produ-
 ctione, & cōseruatione: & quoniam animæ est
 imago, ideò frequenter nomine animæ desi-
 gnatur. Anima rationalis non est forma pro-
 ximè formans corpus instrumentarium (non
 enim hoc conuenit rei diuinæ, & immortalis)
 sed ea vis diffusa ab ea, est actus, & forma cor-
 poris; quo corpore ita formato vtitur anima,
 vt artifex instrumentis suis. Ideo Proclus di-
 xit animam mediare inter vitam circa corpō-
 ra extensam, & mentem. Ob id etiam Simplicius
 in libris de anima frequenter facultates,
 & vires animæ distinguit in vtētes, & forman-
 tes. Rectè sentit Simplicius, tradēs distinctio-
 nem illam: fallitur tamen, quatenus ea vtitur
 pro explicando Arist. cū tamen Arist. hac de
 re longè secūs sentiat. Nam Arist. facultatem
 formantem ab vtente nō secernit: sed eiusdem
 facultatis esse censet, instrumentum formare,
 & eo vti; ideo animam absolutè asserit esse a-
 ctum corporis. At rediens ad Platonem asse-
 ro, absolutè perfectam, veramque vitam in
 mente vigere; in anima verò recipi vim quan-
 dam eius vitæ, à mente ei tributam: Insuper,
 in anima vigere perfectè animariam vitam; in
 corpore verò vmbra, & vestigium eius: pro-
 pterea ea corporis, postrema vita nuncupatur.
 Vita potest dici postrema tribus modis: pri-
 mò, in ordine ad gradus animæ; sic ea virtutis
 nutrientis, dicitur postrema: secundò, in ordi-
 ne ad gradus, & dispositiones animæ rationalis;

lis; in qua consideratione intellectus progressus, ac imperfectus, sæpe à Simplicio dicitur vita postrema: tertio; facta comparatione inter animam, & eius umbram; & sic eam vitam ab anima manantem, in corpore receptam, & extensam, postremam vitam nūcupamus; quæ postrema vita, quamuis fluat ab anima, nō tamen produetur sine corporeis principiis. Dū inuicem comparatur anima, & vita in corpore extensa; quia anima à corpore non pendet, ideo non diuiditur ad diuisionem eius; sed ubi est, tota est. Vita verò in corpore recepta, quia etiam à corpore pendet, verè est extensa; & est tota in toto, & pars in parte. Animæ non conuenit propriè sedes, ut corpori: neque etiam, ut formæ corporis à corpore pendentis; sed solum per quandam similitudinem ei sedes assignatur. De qua loquens, assero primò, omne vehiculum animæ posse modo aliquo iudicari sedem eius; præsertim tamen vehiculum illud, quod animæ est magis familiare. Sic stella, vehiculum æthereum, spirituosum, & ostreaceum, seruato conuenienti ordine, sunt sedes animæ. At facta comparatione in ostreaceo vehiculo inter partes eius; caput, & capitis cerebrum, est sedes animæ rationalis, & sensuum, qui eius sunt familiares, ei que proximè famulantur; cor verò, irascibilis; iecur, facultatis concupiscibilis est sedes; qua in re præsertim Plato sectatus est Pythagoram, & Hippocratem. Suam sententiam protulit Plato, cum

in Rep. tum maxime in Timæo: nam præter cætera inquit in Timæo, loquens de medulla: Postea verò ferens in ea, scilicet medulla, animarum genera alligauit. & post pauca; Et illā medullæ partem, in quam, velut agrum quendam, diuinum semen iaciundum erat, globosam, & vndique teretem finxit; atque ἐγκέφαλον, id est cerebrum, idcirco voluit nominari; quia, vnoquoque animali denique absoluto, vasculum cerebri capax κεφάλαιον, id est caput, vocandum erat: quod autem reliquas mortales animæ vires compræhensurum erat, rotundis simul, oblongisque figuris ornauit; totumque medullam voluit nominari; atque ex iis. quasi quibusdam ancoris, iaciens totius animæ vincula, circa illas iam vniuersum nostrū corpus abfoluit, ossiumque textura extrinsecus eas fulciuit, &c. Ex his constat Platonem præsertim animam in medulla, & in cerebro collocasse: hinc etiam genituram, tanquam medullam, esse censuit: pariter de capite dixit, id esse habitaculum rei diuinissimæ, & sacratissimæ: insuper, caput esse habitaculum partis animæ immortalis, pectus verò mortalis. Sed magna est confusio in dictis Platonis. Primò, quia si medulla est sedes animæ immortalis, & æternæ: quomodo pectus dicitur sedes animæ mortalis? Præterea, si vis sentiendi viget in capite, quomodo in eodem Timæo dixit: Tenduntur à lingua venæ ad cordis sedem, saporum nunciæ? Præterea, si Plato vim nutriendi censuit esse

esse positam in iecore, quomodo dixit in Timæo; Cor verò venarum originem, fontemq; sanguinis per omne corpus impetu quodam manantis, in stipatorum regione suspendere voluerunt, &c. hæc enim inter se valde pugnare videntur. Ad hæc dico; Medulla est sedes, ratione originis; quoniam ea ex semine oritur, & est origo fundamenti nostri corporis; nempe neruorum, & ossium, & modo aliquo cæterarum partium; non tamen sine sanguinis concursu: & quoniam præcipua medulla ac initium aliarum, est cerebrum; ideo præsertim in capite anima collocata esse dicitur. Propterea Plato in Timæo semen dixit esse medullam; quæ à capite per ceruicem, & spinam deriuaretur. Pectus est sedes partis animæ mortalis, ratione instrumentorum eius: Plato enim, dum dixit vim nutrientem esse in epate, irascibilem in corde; ad instrumenta præsertim respexit, & ad sanguinem, siue magis, siue minus spirituosum; quo anima vtitur in fungendis muneribus nutritionis, & facultatis irascibilis, vt Enneade 4. lib. 3. cap. 23. dixit Plotinus. Nec Plato diuulfit, & secreteuit partes animæ; sed vitæ, & imaginis eius; quatenus vnicuique parti corporis dedit facultatem ei conuenientem. Ad aliud, dum inquit Plato, tendere à lingua venas ad sedem cordis, saporum nuncias; quæ etiam fuit sententia Arist. in lib. de partibus animal. dico ad hoc, in capite vires sensuum exerceri magis spirituales, ma-

gisque familiares rationi; in pectore verò, vires minùs spiritales: in cerebro inesse sensus, vt comitantur rationem; in pectore verò esse sedem eorum, vt conueniunt vitæ, & idolo animæ: insuper, quosdam sensus esse in capite vt in instrumento proximo; in pectore, vt in primo, & præcipuo fundamento. Et hoc esse verum, ex eo patet; quia Plato in Timæo agēs de auditu, inquit vocem esse pulsationem ab aere, per aures, cerebrumque, & sanguinem, vsque ad animam penetrantem; & motionem incipere à capite vsque ad sedem iecoris. Sic itaque, varia cōsideratione & caput, & pectus dicitur sedes sensus. Ad postremum, dum Plato inquit cor esse venarum originem, & fontem sanguinis; & propterea non iecur, sed cor esse sedem animæ nutrientis: Ad hoc rectè respondet Gal. in lib. 6. de Placitis Hipp. & Platon. cap. 9. Platonem per venas denotasse arterias; vt frequens apud Hippocratem, & antiquos cōsuetudo fuit. Colligamus itaque cum Platone, sedem præcipuam animæ esse caput; in eo enim reperitur illa, quæ propriè est anima, & quæ eam comitantur: Pectus esse sedem vmbre, & idoli animæ; & esse sedem, ratione instrumētorum ei primò inferuentium: Medullam demum esse sedem, respiciendo magis ad originem animæ, & ad eius effusionem per vniuersum corpus; quatenus medullam censuit Plato esse initium cæterarū corporis partium; quàm ad propriè sumptam sedem.

Compa:

*Comparatio inter Arist. & Platonis
opinionem.*

CAP. XIII.

Hoc in loco cōspicuè patere potest, quàm inaniter laborēt, qui Arist. cum Platone conciliare nituntur: nam in attinentibus ad sedem animæ, in plurimis re vera dissentiunt. Primò ab Arist. carpitur Plato in 2. de partibus animal, cap. 7. quia asseruit cerebrum esse medullam: cum tamen medullæ, & cerebri oppositum sit temperamentum. Sed ad hoc dicendum censeo, Platonem latè vsum fuisse nomine medullæ: cerebrum dicitur medulla, ratione similitudinis, & alicuius cōnvenientiæ; quatenus intra os continetur, & initium est medullæ dorsi: propterea etiam apud Galenū medulla triplex ponitur: primā cerebri; secunda spinæ, quæ cerebri quædam est propagō, vt dicitur in 10. de Placitis Hippo. & Platonis; tertia ossium reliquorum. Insuper carpitur, cum in cerebri medulla Plato videatur collocare facultatem animæ cognoscentem: ideo inquit Aristot. in 2. de part. animal. cap. 7. Nullam verò cum partibus, quæ vim habent sentiendi, continuationem habere cerebrum, cum intuitu patet, tum maximè inde constat; quòd cum tangitur, nullum efficit sensum; quemadmodum nec sanguis, neque excrementum vllum. &c. Ad hoc respondeo pro Platone, cerebrum non ita esse sedem, vt cerebrum cognoscat, &


sentiat: manifestè enim Plato de auditu loquens dixit voces per aures, cerebrumque, & sanguinem transire ad animam, & ita sentiri: solum dixit medullam esse veluti agrum, in quo diuinum semen iaceretur; ob causam suprà relata. Insuper arguitur Plato, quatenus semen ex medulla, medullamque ex semine oriri dixit: aduersus quem inquit Arist. in 2. de partibus animalium: Medulla natura quædã sanguinis est; non, vt quidam volunt, vis genituræ seminalis: patet hoc in his, quæ nuper in lucem prodierint; medulla enim in ossibus quoque eorum sanguinea continetur, &c. Sed levis est instantia Aristotelis: quia quamuis medulla ex semine fiat, non tamen fit sine sanguinis concursu; per quem crescit, & sanguinea in ortu conspicitur. Insuper, cum Plato dicat semen esse medullæ defluxum; profectò non Platonis solum, sed etiam modo aliquo Hippocratis ante Platonem fuit ea sententia, vt manifestè patet ex lib. eius de semine. Carpitur quartò ab Arist. Plato in tertio de anima; quia animæ appetitiones diuulsit, & in variis corporis partibus varias collocavit: appetitum alimenti in iecore; appetitum vindictæ, honoris, & similibus, in corde; volutatem, in cerebro. Pariter carpitur, quòd loco seiunxerit partes animæ. Sed facilè est Platonem tueri: nam Plato nò propriè secreuit partes animæ, sed solum seiunxit instrumèta, ac insuper partes imaginis animæ; ac demum secreuit ima-

ginem,

ginem, siue idolum animæ, à propriè sumpta anima. Et quòd Plato non propriè secreuerit partes animæ, ex eo præsertim constat; quia animam cēsuit esse in quauis parte totam. Sic rectiùs Plato vim nutriendi collocauit in epate, quàm fecerit Arist. qui eandem in corde esse positam censuit. Postremò, ex sententia Platonis, membrum præcipuum absolutè, est caput, ideò diuinissimum nuncupatur; ex opinione Aristot. membrum præcipuum, & sedes absoluta animæ, est cor. Nam Plato ad propriè sumptam animam respexit, non ad idolum, & imaginem eius: Aristot. è contra vnum ab altero non distinguens, & præsertim ad idolum, & vimbram respiciens, à Platone rectè sentiente dissentit.

L 3





STEPHANI THEVPOLI;

BENEDICTI F. PA-

TRITII VENETI,

ACADEMICARVM

Contemplationum,

LIBER QVINTVS.

DE ANIMA MVNDI, ET
Sphærarum.

Mundum esse animatum.

CAP. I.

N Il in corpore est pretiosum, nil illustre, & præclarum sine vita; nec vita vlla, sine anima cōsistere valet. Cū itaque vniuersi corpus, omnium consensu, sit præstantissimum; iure merito anima præditum iudicari debet; & ea quidem præstantissima. Plurima conspiciuntur corpora, quæ cū sint vniuersi particulæ satis obscuræ, & viles; attamen sunt anima præditæ: quare insipientis est putare mundum, quod est corpus absolutissimum, & vniuersum, anima carere. Plurima in mundo


mundo apparent opera vitalia; omnes eius
 partes dicuntur plenæ animæ; est itaque mun-
 dus anima, & ea quidem præclarissima deco-
 ratus. Nec secus profecto sese habere potest:
 nam quomodo vniuersum continenter ex se
 in orbē cieretur, nisi in eo anima reperiretur,
 quæ motus eius esset principium? Quomodo
 differentiæ positionis, & præsertim dextrum,
 & sinistrum, ei conuenirent, si anima careret?
 Quomodo propria clauderetur figura, nisi à
 præcipua aliqua, sibi quæ propria anima ter-
 minaretur? Ac demum, qua ratione homo di-
 ceretur mundus paruus; præsertim, quia in eo
 anima dominatur, cuncta mouet, & rectè dis-
 ponit; nisi etiam in magno vna anima, vnaque
 vita, cuncta ligans, & disponens inuenire-
 tur? Prætereà, cum mundus sit vnus; cum
 mirus in eo, ac in eius partibus appareat
 consensus; cum omnia in eo accuratissime
 perficiantur, quæ per opificis prouidentiam
 disponuntur; & hæc sine communi anima ser-
 uari non possint; iurè anima mundi conce-
 denda est. Propterea rectè Stoici mundi ani-
 mam posuerunt: errarunt tamen, quia nil su-
 pra corpus excogitantes, animam quoque esse
 corpus existimarunt. Rectius Plato post Deū,
 & Mentem, Animam mundi reperiri asseruit,
 à Mente, & Deo distinctam; & vsque ad eam,
 diuinitatis conditionem descendere censuit,
 vt in epist. asseruit. Propterea etiam rectè in
 Philebo dixit; Mundi corpus animam habere

necesse est, cūm contineat ea, quæ nostrum continet corpus, & præstantiora. Proclus etiā in Timæum asseruit; Opifex omnium, componens vniuersum hoc, animans esse voluit; anima, & intellectu præditum: nam pulchrius existimabat esse animatum quodcūque, quàm inanimatum; intellectuque præditum, non intelligente. Diuinus Iamblicus in lib. de Mysteriis affirmauit Mundum esse animal; in quo partes, quamuis loco distantes, tamen propter naturam vnā inuicem ad se feruntur. Hanc mundi animam eleganter simul, & doctè Platonius Poeta descripsit inquitens:

*Spiritus intus alit, totamq; infusa per artus
Mens agitat molem, & magno se corpore miscet.*

An Mundi Anima distinguatur à DEO.

CAP. II.

 Onuenere profectò illustriores Philosophi in statuendo mundo animato. Verū quænam sit hæc mundi anima, & quomodo se habeat ad Deum, nō eodem modo explicarunt. Nam, vt cæteros prætereā, Arist. animam Mundi minimè seiunxit à Deo: ipse enim in octauo Physic. & in 12. Metaphys. Deum statuit motorem primum; illum in 8. Physic. 84. in 12. Metaph. 43. nuncupauit motorem totius, quatenus ab eo pēdet motus diurnus, qui per vniuersū diffunditur; nec vnquam in cælo, vel in vniuerso,

com-

communem aliam vitam reperiri indicauit præter eam, quæ à Deo effunditur. Hinc constat errasse eos, qui putarunt Arist. animam mundi à Deo distinctam potuisse, & solum in verbis esse litem inter Arist. & Platonem; falluntur, inquam, manifestissimè. Quoniam si conceditur cum Arist. anima mundi, ea profectò non pendet à materia; alioquin non esset æterna: si à materia non pendet, necessario est intelligentia aliqua; quoniam apud Arist. forma non pendens à materia, est verè, & absolutè intelligibile; omne tale est intelligentia, vt dicitur in 3. de anima 16. non enim animam à materia seiunctam distinguit ab intelligentia: si itaque anima vniuersi non pendet ab vniuerso, erit intelligentia vniuersi; huiusmodi autem communis intelligentia, ex opinione Arist. est solus Deus. Pariter Strato, & Chrysippus, vitam per vniuersum effusam dari confitentur; sed eam esse Deum affirmant: cuius sententiæ videtur fuisse Poeta, dum ita cecinit:

Deum namq; ire per omnes

Terrasq; tractusq; Maris, Cælumq; profundum.

Hinc pecudes, armenta, viros, genus omne ferarum,

Quemq; sibi tenues nascentem arcessere vitas.

Sic Iouis omnia plena.

Ac, vt dicebat Seneca, Deus est, quodcunque vides, & quod non vides. Ex aduerso Plato alferens dari animam mundi, celsit eam à Mente, & à Deo esse distinctam; inētis tamen summo opere esse compotem. Aliam enim Plato A-

nimæ, aliam Mentis, & Dei conditionem esse nouit. Anima seipsam mouet, cum corpore iungitur; est pars constituti ex ea, & corpore; est creata; & ex eodē cratere educta, ex quo mox animæ hominum prodierunt; quæ nec Menti, nec Deo nata sunt conuenire. Colligamus itaque dari animam mundi: addamus, eam à Deo esse distinctam. Vt verò appareat, quomodo ad reliquas animas se habeat; dicamus & animæ mundi, & hominū eandem esse ideam; & propterea ex eodem cratere dicuntur eductæ; crater enim, vt dictum est in præcedentibus, denotat vitæ rationalis ideam. Dicamus insuper, animam mundi esse primam illius ideæ participationem: hinc cæteræ animæ dicuntur ortæ ex reliquiis præcedētis commixtionis: nam sola puritate, & impuritate ab anima mundi distinguuntur. In hac significatione est vera sententia Plotini; qui dixit, animas in sua vnitatē, & radice conuenire; conueniunt enim in sua idea.

Qualis sit Anima mundi.

CAP. III.

MT mundus est animans præstantissimum, vt eius corpus omni corporis perfectione est cumulativè præditum; ita eius anima, non humilis, sed præstantissima censerī debet. Cū verò præstantissima sit, maximè debet esse cū mente complicata, à qua omnis animæ rectitudo ducitur.

• ducitur: non autem maximè cum mente complicaretur, nisi esset ratio pura, non permixta cum secundis vitis, non extra se progrediens, non declinans ad corpora. Est itaque anima mundi pura ratio, in se manens; ita se habens ad corpora, vt corpora sint eius, non autem ipsa corporum. Et quoniam omnis anima est vbique tota; ideo etiam anima mundi meat per omnia, & vbique tota seruetur; ac vbique apparent opera illi parti mundi conuenientia; nam in cœlo cœlestia, in terris terrena refulgent; præsertim tamen à Platone dicitur in medio collocata, vt appareat eam æquè diffundi per omnia, & non magis ab vna, quàm ab alia parte distare. Per hanc mundi animam singulæ mundi partes viuunt: non enim rationi est consentaneum, vt in paruis animalibus viuant partes omnes; in magno autem, & præstantissimo non viuant omnes. Nec propterea putandum est, cæterorum animas esse portiones animæ mundi; iam enim hæc sententia reiecta est in præcedentibus; sed est asserendum, vniuerso, & eius partibus, vt partes sunt vniuersi, vnā conuenire animam; ratione verò propria, conuenire gradibus animalium animas distinctas. Non desunt ex Platonici, qui animam mundi esse eandem cum anima firmamenti existimarunt; & propterea ab ea asserunt provenire motum diurnum, qui totius vniuersi quodammodo est; quam opinionem quamuis celsam

probabilem, probabiliorem tamen iudico alteram, quòd ab ea distinguatur; vt Ficinus, & multi ex Platoniciis existimarunt. Hanc de anima mundi sententiam fortasse ex illis verbis Geneseos Plato desumpsit, dum dicitur; Et spiritus Domini ferebatur super aquas: nam aquæ apud Ægyptios materiam denotabant, spiritus verò animâ. Propterea Plotinus mundi animam dixit esse animam primæ materiæ; quæ eadem est in cælo, & in orbe mortali. Sed Plato distinguens Dei spiritum, siue animam mundi à Deo, à recta verborum Moysis significatione recessit. Vt verò clariùs appareat, quomodo hæc anima ad mundum se habeat, & quomodo per eam mûdus viuat: cum Proclo præstantissimò Platonis interprete dicamus, vniuersum triplici vita esse donatû; corporea, animaria, intelligente. Vt enim ab hominis anima manat vita quædam, quasi idolum, & imago eius, quæ per corporis partes diffunditur; ita à mundi anima in mundi partes vitam manare censendum est. Et inde euenit vt triplicem illam in mundo vitam considerare valeamus: datur enim vita ei conueniens, ratione participationis mentis ab anima; datur vita animæ propria; & demum vita effusa per corpus. Vita prima, quæ intelligens est, indiuidua est penitus, in æuo manens, sempiternaque existens, immobilis, ac simul omnem intelligibilem naturam comprehendens: Vita postrema effusa per corpus, diuidua est, cum

tem.

tempore, & motu maximè complicata; ita tamen est cum corpore permixta, vt vndique commeari dicatur: Vita animaria media est; circumuolat enim, ambitq; corporis molem, extra existens, & conditionibus extremorum medio modo participat. Hâc mundi animam denotauit Plato in Phēdro, inquit: Magnus utique Dux in cœlo Iupiter, citâs alatum currum, primus incedit, exornans cuncta, prouideq; disponens: Hūc sequitur Deorum, Dæmonumq; exercitus, pēr vn̄decim partes ordinatus, &c. & in Philebo inquit; Ergo in Iouis ipsius natura regiam animam, regiamq; mentem inesse propter vim causâ confiteberis, &c. Eadem mundi anima à Platone, in 10. de R. P. Neccsitas, vel potiùs Dea neccsitudinis nuncupatur; quia inuiolatas seruat leges, sibi per Dei prouidentiam præscriptas: à Plotino nonnunquam nomine Veneris denotatur: ab Apuleio nuncupatur fons animarum, at profectò minùs rectè; non enim ea propriè est fons animarum, sed potiùs prima ideæ animæ participatio.

De Fato.

CAP. IIII.

DVo sunt præcipua opera animæ mundi, contemplatio, & mūdi administratio: propterea, Iani instar, duplici facie dicitur donata; superna vna, altera inferna: quæ duæ facies inter se comparatæ, ita se habent; vt superaiungatur

cum mente, infera conuertatur ad corpus; supera dirigatur à mente, infera dirigat corpora; supera concipiat, rationesque recipiat, infera pariat; supera indiuiduè & simul operetur, infera cum successione & tempore; supera degat in æuo, infera in tempore. Et quoniam Anima mundi proximè succedit Menti, à qua prouidentia leges recipit, cui prouidentia succedit Fatum; ideo in anima mundi fatum obtinet principem sui sedem. Fatum ducit ortū à Prouidentia, desinit in Naturam: Prouidentia pertinet ad mentem, Natura ad corpora, Fatum inter vtramque medians propriè ad animam mundi pertinet. De Fato variæ fuerūt Philosophorum sententiæ: ego tamen cum Platone assero, Fatum esse immutabilem in anima mundi rerum mobilium dispositionem; & propterea frequenter ea anima nuncupatur Dea necessitatis. Pro cuius clariori explanatione considerandum est, in Mundo quatuor inueniri subordinatos ordines, qui omnes nomine legum merentur honestari: primus est ordo Prouidentia, secundus Fati, tertius Naturæ, quartus Prudentia: Ex quibus ordinibus consurgunt primò leges Prouidentia, mox leges Fati, sequuntur leges Naturæ, postremæ demum sunt leges humanæ prudentia; quæ potiùs sunt umbræ, quàm verè leges; quæ eatenus firmæ, & recte sunt, quatenus cum præcedentibus conformantur. Ex quo cõstat veros, præcipuosque legū indagatores,

res, non esse eos, qui quarto legum ordini nauant operam; quamuis illi soli se tales prædicant, ac profiteantur; sed eos, qui præcedentibus incumbunt, & ad eos conuertuntur. Constat insuper, neminem posse exactè intelligere leges postremas, nisi cognoscat & primas, à quibus cōuenienti ordine ducuntur. Et quoniam primæ à Philosophis cōspiciuntur; propterea rectè dixit Plato, tunc solùm vrbes fore beatas, dum Philosophi regnabunt; ipsi enim ex primis principiis rectas valent deducere leges, & ex viuis fontibus aquas humanæ vitæ nutrites valent haurire. Fatum itaque præsertim in anima mundi, sedem habet. Et quoniam animæ mundi, tanquam duci, subordinantur animæ sphærarum, cœli, elemētorum, & hominis; ideo mox fatum in hac vniuersa caussarum subordinatione collocatum esse dicitur, & nūcupatur ordo, & nexus caussarum supra naturam positarum.

An Plato, & Arist. de Fato conueniant, & an omnia Fato fiant.

CAP. V.



Sserunt nonnulli Aristotelem de fato idem cum Platone sentire, sed summo perè falluntur. Ponit Plato fatum medium inter Prouidentiam, & Naturā: fundamentū suæ sententiæ est; quoniā inter mentē, & formā in materia extēsam, mediam posuit animam rationalē à materia non pendentem; qualem esse dixit animam mūdi,

sphærarum, Dæmonum, & hominis. Aristoteles hoc medium non posuit; sed omnem formam à materia pendētem, dixit esse naturam; non pendentem verò à materia, inentem, & propriè intelligibile nuncupauit: Propterea fatum in idem venire censuit cum natura; & ab ea, sola ratione distingui. Natura enim futura respicit; fatum præcedentia: dicitur natura, vt intrinsecùs rem constituit; & est initium operationum, & motus eius: nuncupatur fatum, vt id per diuinam prouidentiam est constitutum, ab ea dirigitur; & à primo principio quasi mandatum, & ordinatum est: Propterea fatum significat ordinem, & nexum cū antecedentibus causis: natura verò minimè. Natura itaque, & fatum, re sunt idem, & sola ratione distinguuntur. Hinc euenit, quòd Aristoteles de fato mentionem fecit; de eo tamen, quid sit, non differuit: quoniam explicato ordine diuinæ prouidentię in 12. Metaphysicor. explicataq; natura, sunt explicata omnia pertinentia ad fatum. Quòd autem re idem sit cū Natura, nobis manifestauit in quinto Physic. cont. 57. inquiens: Sunt igitur & generationes quædam violentæ, & non fato determinatæ; quibus contrariæ sunt eæ, quæ secundum naturam, &c. Manifestat his verbis Aristoteles, non esse secundum naturam, & non esse fato, in idem venire: quare pari ratione fato, & natura fieri, re idem sunt; vt rectè Alexander in libro de Fato explicauit. Patet itaque, re vera eos dissen-

dissentire. Sed duo occurrunt consideratione digna: Vnum est, an omnia, quæ fiunt, fato fiant: Alterum, an quæ fiunt fato, fiant necessariò. De primo agens, apparet ex sententia Platonis, omnia fato fieri; quoniam ex eius opinione, nil subterfugit Diuinam prouidentiam, vt in proprio loco apparuit: omnia itaque cum Diuina prouidentia fiunt; & quæ ita fiunt, fato fiunt: omnia itaque fato fieri, censendum est. Præterea, omnia pendent ex præcipuarum caussarum ordine; & quæ ex huiusmodi iuncta caussarum serie proficiuntur, fato fiunt: quare omnia fiunt fato. Ad hoc resolutè dico, ferè omnia in vniuerso fieri fato: quòd autem absolutè omnia ita fiant, minimè verum esse. Fieri ferè omnia fato, ex eo constat: quoniam si consideramus pertinentia ad cælum, pertinentia ad communem ordinem rerum; hæc semper eodem modo legibus fati seruantur, & fiunt: ideo omnia fato, diuinaque prouidentia fieri, censendū est. Insuper, si conuertimur ad ea, quæ apud nos fiunt, ferè omnia per naturam fieri conspiciamus; facta autem per naturam, etiam fato dicuntur esse genita, cum natura fato subordinetur. Demum, si ad humanas actiones conuertimur, in eis magnam vim habere cognoscimus propensionem naturæ, per quam plurima ab homine fieri manifestissimè iudicamus. Iure itaque asserui, ferè omnia in vniuerso fieri fato: non tamen omnia absolutè dicuntur fato fieri. Primò, quia non-

nulla violentia, & præter naturam fiunt, vt de interitu frequenter euenit: quod Virg. loquens de morte Didonis manifestauit, inquiens:

Sed quia nec fato, merita nec morte peribat.

Insuper multæ, ex humanis actionibus fato non fiunt; sed contra naturæ propensionem, & liberè ab homine proficiscuntur. Propterea iure dictum est, nonnulla fato non fieri. Sed hoc dignum est consideratione, quòd quamuis hæc, quæ dixi non fieri fato, re vera proximè fato non fiant: attamen modo quodam subiiciuntur fato, & ad fatum rediguntur. Ratio est: quoniam hæc omnia pendent, vel ex hominis libertate, vel ex contingentia, & impotentia materiæ: at quòd talis sit conditio hominis, & primæ materiæ; ex fato, & prouidentia pendet: ideo cum hæc proximè non dicantur fieri fato: remotè tamen, & ratione suæ communis conditionis, sub fato collocantur: & quamuis respectu vnius, vt puta inclinationis corporis, non fiant fato; tamen fiunt fato respectu alterius. Quam distinctionem cum non considerauerit Pöponatius, manifestissimè est hallucinatus: ex eo enim, quòd ratione communis conditionis principiorum, quæ ex serie fati, & prouidentia pendet, cuncta dicuntur subiici modo aliquo fato; colligebat absolutè, & penitus fieri fato: adeò, vt etiã ineuitaliter fierent. Ad rationes, quib. ostēdebat omnia fieri fato, facile est respondere. Ad primā, dū dicitur nil subterfugere diuinā prouidentia,

respon-

respōdeo, id posse intelligi dupliciter: primò, quia absolutè p̄ diuinā prouidentia constitutū sit, vt res ita fiat: & hoc non est dicendū: nā inquit Plato in Timæo, opificē ostendisse animis vniuersi naturam, legesq; fatales edixisse, vt mox culpa eligētis esset. Altero modo intelligi potest, omnia esse sub diuina prouidentia; quatenus omnia, vel ita fieri per eā statuitur, vel ita fieri permittitur: & in hac significatione, nil eā subterfugit. Demum nil eam subterfugit, ratione initiorum contingentia; quæ per diuinam prouidentiam constituta, & ordinata esse dicuntur. Ad alteram rationem, dum dicebatur omnia pendere ex serie, & ordine causarum, solutio patet ex dictis: omnia enim ex eis pendent; vel ratione constitutionis principiorum contingentia; sunt enim contingentia; principia per diuinam prouidentiam ordinata: vel ratione permissionis, vt dictum est. Hac de re Aristoteles non dissentit à Platone: nam pariter Aristoteles ferè omnia per naturam fieri affirmat: non tamen omnia, sed nonnulla asserit fieri non fato, vt in quinto Physic. 57. pariter nonnulla liberè ab homine fieri, vt in libris de Moribus manifestauit.

An quæ fiant fato, fiant necessariò.

CAP. VI.



Atum frequenter à Platone cum necessitate esse coniunctum manifestatur. Nam mūdi anima, ad quam præsertim pertinet fatum, nuncupatur

Dea necessitatis: insuper in 12. de Legibus, decreta fati lignis ad ignem contortis dicuntur similia, vt indicetur secùs disponi non posse: fusus quoque Dea necessitatis dicitur ex adamante constare, vt id ipsum manifestetur; & iurè quidè, nam fatum dicitur, quasi Dei mandatum, & ineuitabile aliquid: propterea Homerus in 6. Iliad. cecinit:

*Non est, qui fixas Parcarum auertere leges
Effugere aut possit.*

Et Seneca in Tragœd.

Primusq; dies dedit extremum.

Et Manilius in 4. Astrologicorum.

*Fata regunt orbem, certa sunt omnia lege,
Longaq; per certos signantur tempora cursus,
Nascentes morimur, finisq; ab origine pendet.*

Huiusmodi sententiis referti sunt libri poetarum. Videtur itaque dicendum, fatum inferre rebus necessitatē; & iure profectò: quid enim primis causis obistere, ordinique providentiæ aduersari valet? Sic natura in suo operandi modo. necessitatem quandam dicitur habere coniunctam. Profectò nedum lumine veritatis illustrati, verum etiam sententiæ Platonis addicti, asserere debemus, nequaquam omnia necessariò fieri; nec etiam quæ fato fiunt, semper necessitatem includere. Diuina enim providentia, & fato cõstitutum est, ne vniuersum aliquo suæ integritatis gradu esset destitutum, vt in eo principia contingentia inueniantur: quæ duo sunt: vnum, humana

na libertas; alterū, materiæ indifferentia: primum est principium magis efficiens; alterum verò solū recipiens, & patiens. Et propterea, quamuis ratione sui communis sit aliquid necessarium; quia est necesse pro mundi plenitudine, vt in eo contingentia inueniantur: at tamen respiciendo ad singula, quæ efficiūtur, multa eorum necessitate carent. Propterea rectè Ptolemæus in quadripartito asseruit, effecta à Deo in cœlestia, & à cœlestibus inter se, indissolubili quadam serie proficisci; sed à cœlestibus in inferiora non semper ineuitabiliter, & ordine cœlitus inchoato produci; permutari enim & impediri posse, tū naturis inferioribus aliquando repugnantibus, tum arte simul, atque consilio. Sic itaque non omnia necessariò eueniunt, vt perperam existimarūt Stoici; sed in rebus locum habet cōtingentia: tum quia non omnia fiunt fato, vt patuit; tum insuper, quia nonnulla eorum, quæ fiunt fato, potuissent impediri, & secūs fieri: vt nonnulla Naturæ, hominisque opera. Propterea rectè enunciauit Plato in 10. de R. P. virtutem esse immobilem, & liberam; eligentis esse culpam; Deum verò esse extra culpam. Hinc quoque anima, ex Platonis sententia, & supra fatum, & in fato, & sub fato consideratur. Supra fatum est, vt erecta supra se, cum mente cōiungitur: In fato est, vt in se considerata, menti subiicitur, & fatalis ordinis est fundamentum: Demum anima est sub fato, quatenus aliqua ex

parte subiicitur corpori, & insequitur propensionem à corporis temperamento prodeuntes. Insuper, admirabilius est, quòd nedum hominis anima, verùm quoque ea brutorum, valet nonnunquam subterfugere fatum; vt rectè etiam Simpl. in Epictetum considerauit, veluti, dum animalia fera, studio, & disciplina, mitescunt; domantur equi; lupi redduntur cicures; quæ animalia ita constituta, non insequuntur naturalem suam propensionem; & propterea hæc non fato operantur, sed arte quadam, & disciplina. Quòd si id conuenit feris; longè magis conueniet homini, qui magis est disciplinabilis. Hæc tamen est differentia inter hominem, & feras; quia homo virtute propria, & munere suæ rationis id efficit; fere autem id faciunt per curam ab homine adhibitam: veluti etiam, dum plantæ ex syluestribus redduntur domesticæ; id sola hominis cura, arte, & diligentia perficitur. Ad rationes, quibus ostendebatur omnia, quæ fato fiunt, necessariò fieri, non est difficile respondere. Nam anima mundi nuncupatur Dea necessitatis; non quia singula ab ea pendentia, necessaria sint; sed quoniam operatur ubiq; eodem modo, cum quadam naturæ necessitate, sibi à superno principio iniuncta. Insuper, quoniam omnia in suo conuenienti ordine à suo opifice constituto conseruat; neq; permittit quicquam leges illius adeò transgredi, quin mox regrediatur in leges; & ea transgressio, in exiguis

guis est particulis, non in toto: immod ea transgressio in illis particulis, est cum conseruatione ordinis: quoniam ex propria natura, & conditione sunt tales, vt secus se habere possint. Sic fati decreta sunt similia lignis ad igne contortis, & fusus ex adamante constat: ac demum seruatur ordo, & lex à Deo imposita: quia, vel proximè, vel remotè omnia subiiciuntur facto, & relabuntur in fatum. Quæ autem à Poetis dicuntur, non omni ex parte approbanda sunt: sed quatenus veritati, & rationi sunt consentanea: Ideo Plato in sua R. P. ex dictis Poetarum, nonnulla approbanda, alia penitus reijcienda ostendit. Qua de re Arist. à Platone non dissentiens, in rebus contingentiam concedit.

De Parcīs.

CAP. VII.



Nima mundi, quæ Dea necessitatis nuncupata est, etiam conuenienti metaphora, mater humanarum conditionum, humanarumq; sortium dicta est; & iure quidem: nam ab ea, per conuenientia media sortes mundanæ in exitum perducuntur. Sice eius tres numerantur filia ex Demogorgone natæ, quæ vulgò Parcæ nuncupantur. Dicuntur Parcæ, vel à contrario sensu, quia nemini parcant, vt est communis sententia; vel potius, vt ego censeo, quia cum nemo sit sua sorte contentus, Parcæ, hoc est Aua-

ræ ab omnibus iudicantur. Accommodatissima profecto est metaphora, qua vsi sunt prisca, cum Poetæ, tum Sapientes: dum tres animæ mundi filias, finxerunt esse tres fœminas nentes, & ex stamine fila ducentes. Nam mater est anima mundi; filiæ sunt tres eius animæ vires, rerum fatalium ordinem absoluentes: Mater cœlum reuoluit genibus, hoc est mira facilitate, & infima facultate motui accommodata: cum interim vis eius superna, vnâ cum mente circa diuina versetur. Fusus, quo stamina nent filiæ, ex adamante conflatus; si ad externam fusi imaginem respicimus, est mundi axis, centro, polisque munitus; si rei conditionem consideramus, est natura per corpora diffusa, cuius instrumento anima mundi cuncta ad exitum perducit. Vertigium fusi, à Platone constare dicitur ex adamante, aliisque materiis: nam vertigium est cœlum, & præsertim firmamentum; in quo, ob orbium multitudinem, stellarumque cōditiones varias, nedum adamantis soliditas reperitur; verum insuper inueniuntur aliæ, ac eminentiores materiæ cōditiones. Stamen est cœli fœcunditas; cum qua mox corporea rerum vita, ob distantiam à cœlo, ob tenuemque virtutis participationem, fluxilemque conditionem, fragili, tenuisque filo dicitur alligata. Filiæ animæ mundi, explentes munera fati, tres sunt; Clotho, Lachesis, Atropos; æquali inuicem intervallo in throno sedentes, vestibus albis indutæ, capite

coro.

coronatae, & ad Syrenarum Harmoniam canentes: quarum Lachesis, praeterita; Clótho, praesentia; Atropos, futura irremeabilia canit. Clotho una cum matre, intermissione quadam temporis, dextra manu tangens externam fusi circumferentiam, illum circumducit: Atropos sinistra tangens internam circumferentiam, id ipsum efficit: Lachesis vicissim utraque manu utrinque tangit, ut refert Plato in 10. de R.P. Quibus vulgaribus velaminibus latentia, & praecleara mysteria elegantissime circumteguntur. Sunt tres istae filiae, non firmamentum, Saturnus, & aggregatum ex reliquis Planetis, ut in 12. de Legibus censuit Ficinus; cum enim mater non sit corpus, neque etiam nomine filiarum corpora intelligere debemus: sed potius sunt tres vires, vel tria munera animae mundi, vel ipsamet anima ad tria relata. Iure dicuntur tres: nam cuncta ternario, quasi initio, medio, & fine; vel essentia, potentia, & actione perficiuntur. Insuper sunt tres, quoniam anima mundi, ea, quae à mente in ævo, & supra tempus collocata recipit; in tria mox tempora distribuit, in praeteritum, praesens, & futurum; quibus mobilia subiiciuntur. Praeterea dicuntur tres; quoniam anima mundi, in sui muneris functione ternario utitur: nam ea, ut media, aliunde recipit; mox recepta in se continet; tertio in alia vitae sortes diffundit. Praeterea, dum etiam consideratur anima, ut aliis varias vitae conditiones impartitur, ter-

nario vtitur; quatenus cætera recipiunt ab ea suæ vitæ initium, medium, & finem. Præterea consideratur anima mûdi, vt rationibus, quasi seminaibus grâuida; vt pariens, vt parta seruans; suoque fine terminâs, & absoluens. Demum ternario vtitur; quatenus disponit; quæ semper, quæ ratò, & quæ frequêter eueniunt. Iure itaque filiæ eius tres sunt dictæ. De quibus loquens ter maximus Mercurius in Asclepio inquit; Fatum tribus constare, Imarmene, quæ rerum omnium parit initia; Necessitate, quæ initia ad progressum cogit; demum Ordine, id est dispositione temporis. Per has itaque Parcas indumentis albis, hoc est, cõditionibus inuiolabilibus indutas; quæcunque in Ideis, quasi in Glom̃ sunt inuoluta, euoluuntur, & explicantur in corpora. Hæc de Parcis explicata, consentanea sunt principiis Academicorum: ex opinione Aristotelis, secûs esset dicendum. Quæ enim Platonici ad mundi animam, eiusque vires referunt; Peripatetici, vel ad Deum, vel ad naturâ sub Deo ordinatam, esse referenda existimant.

De Animis Sphærarum.

CAP. VIII.



Nimiam mundi, veluti ducem, insequuntur duodecim animæ duodecim sphærarum mûdi: octo scilicet cœlestium orbium, & quatuor elemêtorum. Hoc eleganter protulit Plato in Phædro inquiens; Magnus utiq; Dux in cœlo Iupiter, citans

citans alatum currū, primus incedit, exornās cuncta, prouideq; disponens. Hunc sequitur Deorū, Dæmonumq; exercitus per vndecim partes ordinatus. Permanet autem Vesta in Deorū æde sola, &c. Hæc Plato. Magnus Dux est anima Mundi. Exercitus vndecim Deorū, sunt vndecim animæ cælorū, & trium elementorū: & dicuntur exercitus: quoniam eas animas, alię deinde Dæmonū, & hominū insequuntur; & alię insequuntur alias ratione diuersitatis conditionū, & propensionū. Vesta, quę in æde Deorum sola permanet, est anima terræ: cum enim cæteræ sphæræ vertantur in orbem, sola terra in suo loco requiescit. Ex his patet decipi eos, qui putarunt per vnā mundi animam omnes cælos, & elementorū sphæras vitā recipere; manifestè enim Plato diuersas eorum esse animas affirmat: neq; etiam est rationi cōsentaneum, vt anima vna, tot distincta corpora, motibus adeò diuersis, tamq; diuersa velocitate moueat. Sic ex octo sphærarum animis, & ex anima mundi, chorus nouem Musarum confurgit. Et hæ sunt Syrenæ, cum quibus recinunt Parcæ, & ad quarum harmonicos cantus sua munera dicuntur obire; quatenus certis numeris, cum lætitia, per commensuratos cæli motus, cuncta perficiunt: est enim cælū, vt dicebat Pythagoras, Lyra Dei: ad cuius sonum cuncta numerosè saltant, & canūt. Propterea cecinit Orpheus, opificem yniuersa custodire; quia æreos baculos sumens, tympano

tantopere personat, ut Deos omnes ad se conuertat. Et quoniam animæ supra se mentem habent; ideo Apollo, qui Musis præest, est mēs animæ mundi. Nonnunquam tamen nomine Apollinis anima Solis denotatur: nam respiciendo ad varia munera, diuersasque proprietates; modò hoc, modò illud dicere valemus: ut etiam nomine Iouis nonnunquam mens præna denotatur, ut dum cecinit Orpheus: Mens idea omnium: nonnunquam anima orbi Iouis destinata: nonnunquam demum anima mundi, ut à Platone in Phædro: dicimus enim Cælum denotare Deum; Saturnū, mentem; Iouem verò, animam mundi. Animæ itaque cælorum vnà cum anima mūdi, chorum Musarum cōstituunt; & sunt nouem Syrenæ: non illæ quidem, quæ humanas aures corporea voluptate deinulcentes, nos deuiant à recto cursu; quales sunt Syrenæ numero tres in Mari, quasi in voluptatū materia, & pelago, à Poëtis excogitatæ: sed hæ sunt Syrenę diuinę, ad conuenientem finem nos inuitantes; quæ per octo tonos, octo sphærarum; & per concentum, qui ex omnibus confurgit, Dei facultatem canunt, & vnà cum cælis enarrant Gloriam Dei.

Propterea cecinit Orpheus:

Tu totum cælum canora cithara temperas.

De

*De Pythagoreo Cæli sono, & animis
Elementorum.*

CAP. IX.

Mirantur nōnulli, quodd Platonici Pythagoram sequuti, in cælo sonos, tonos, & harmoniam cōsiderarint. Sed mirari potiùs nos debemus, quòd ipsi adeò mente sint surdi, vt eam purgatis auribus apprimè notam, audire non valuerint: ea enim, non corporis, sed mentis auribus nata est audiri. Nam sonus duplex est: vnus cum strepitu, & violentia iunctus; & hic in cælo nō habet locum, à quo abest omnis violentia: alter in sola motuum, & corporum conuenienti ratione, ac proportionē collocatus; qui eminentissimè in Cælo reperitur. Hunc viri vulgares, qui ob prauam assuetudinem, & cōiunctionem cum terrenis, ad diuina facti sunt surdi; audire non valent: at aures à terrenis sordibus purgatæ, supra corporeas assuetudines erectæ, illum solum audiunt, & ad terrena surdæ euadunt. Hunc itaque sonum Plato, Pythagoras, Apollonius Thianeus, ter maximus Mercurius, audierunt, & admirati sunt. Nam viri hi sapientissimi, quibus metaphoræ fuere familiares; vt aures vulgarium demulcerent, & animos sagacium, studiosorumq; iuuenum rectè formarent; per vulgarem sonum, vulgaremque harmoniam, sonum internum, harmoniamque in origine, & causa collocatam manifestare voluerunt; quam soli audiunt,

qui auribus mentis vtuntur : de cæteris id verè dici potest; oculos habent, & non vident; aures habent, & non audiunt. Variæ, & omnes præclaræ, in cœlo melodiæ inueniuntur; aliæ tamen aliis dulciores, & diuiniore. Nam in eo primò est harmonia in sola anima; ratione compositionis ex principiis eius; & ratione numerorum, quos includit. Secundò in orbe cœli, in quo mira proportionē colligatæ inueniuntur conditiones elementorum. Tertiò consideratur harmonia diuerforum motuum, cum stellarum, tum orbium: nam motus velociores, sonum indicat acutiorem; tardiore, grauiorem. Harum trium harmoniarum, prima est causa secundæ, secunda tertiæ. Inuenitur quartò conueniens ratio, aptaque proportio in cœlo inter mobile, & motorem. Insuper, inter motores ad inuicem. Præterea, inter magnitudines corporum mobilium inter se. Septimò inter animas, & participatam mentem. Octauò inter aspectus stellarum, luminumque earum inter se. Ac demum inter cœlestia corpora, & mundum mortalem. Ex his nouem rationibus, quasi nouem Musis, chorus cœlestis Musicæ cõsurgit, gratus Deo, mundoque salutaris; nam ex huiusmodi melodia cõsurgit mortalis mundi moderatio, ac temperamentum. Et quoniam cœlo elementa succedunt, quæ mortalis orbis sunt primæ partes, in quibus opera conspiciuntur vitam præferentia; propterea iure Plato elementa quoque

quoque suam habere animā existimauit. Non enim est rationi consonum, vt vermes, formicæ, & alia consimilia exigua corpora, viuunt: Terra autem, & supra terram ordinata elementa, quæ sunt insignes mundi partes, & aliis vitam tribuunt, sint vita penitus destituta. Conspicimus enim per animam terræ viuere lapides, & metalla, quandiu fuerint cum terra cōplicata; & elementorū portiones cum suo toto seruari; & ad suum totum, cū fuerint ab eo decisæ, reuerti. In mortalibus animalibus marem à fœmina distingui manifestè conspiciamus; in animis elementorum, & cœli, maris & fœminæ vires coniunctæ inueniuntur; & iure quidem: quò enim in gradibus rerum magis ascēdimus, eò maiorem in eis vnionem inuenimus. Dicuntur huiusmodi elementorū animæ, vtriusq; sexus vires includere. Primò, quatenus constant ex anima, & mente: in quo nexu mens marem refert; anima verò fœminam à mente, tanquam à mare, semina recipientem. Insuper, animæ duas dicuntur habere facies, vt dictum est; quarum superna mare, inferna fœminam repræsentat; superna etiam semen habet; inferna emittit, & parit. Hinc patet ratio, cur prisci sapientes Orpheum imitati, vnicuique elemento duas diuinas potētias, quasi duos Deos, assignarunt; marem vnam, alterā fœminam: vt Terræ Plutonem, & Proserpinam; Aquæ Oceanum, & Thetim; Aeris Iouem, & Lunonē; Igni Phœnetam, & Aurorā.

Et quoniam ea duo munera, modo tamen eminētiore, obeunt etiam animæ cœlorum; ideo Orpheus in illis quoque marem, & fœminam considerauit; & singulis cœlorum Sphæris Deum, & Deam præesse cecinit; in quibus tamen hæc inueniuntur cum minori distinctione. Constat itaque, de his quid sentiat Plato. At perpendamus, in quo Arist. ab eo dissentiat; & an valeat conciliari cum eo. Nam primò dissentire videtur; quoniam Plato octo sphæris cœli, octo præesse animas affirmat; Aristoteles verò in 12. Metaph. in cœlo, non octo, sed plusquam quinquaginta numerauit intelligentias, proportionē respondentes animis à Platone excogitatis. Sed hac de re leuis est altercatio; quoniam Aristoteles non ad octo sphæras, sed ad singulos orbes respexit; Plato verò non diuisim ad orbes singulos, sed ad præcipuas sphæras ex eis conflatas respexit. Hinc Plato non dixit absolutè, animas esse octo; sed tot esse animas duces, sub quibus aliæ reperiuntur; adeò, quòd non aduersatur Platoni Aristoteles, dum longè plures asserit esse cœlorum intelligentias. In hoc potiùs dissentiant, quia Plato stellis distinctas animas conuenire censuit; quod non existimauit Aristoteles. Insuper re vera maximè de alio dissentiant; quatenus censuit Plato elementa esse anima prædita; Aristoteles, cum in primo de anima propè calcem cumulatè; tum in 2. libro eam sententiā reiecit; & elementa ca-


rere

vere anima affirmavit. Simplicius suo more
nititur in lib. de Anima Aristotelém cum Pla-
tone conciliare, & nititur ostendere ex opi-
nione Aristotelis elementa esse animata; & in
libro de Cœlo carpit Alexandrum, qui cum
Aristotele ea carere anima affirmavit. Sed
quàm rectè sentit Alexander, tam longè Sim-
plicius recessit à vero; manifestissimè senten-
tiam Aristotelis pervertit, qui ubique ne-
gavit, nullibi indicavit elementis a-
nimam convenire; adeò, ut sit
superuacaneum in eius
sententiæ compro-
batione im-
morari,

FINIS LIBRI QUINTI

N





STEPHANI THEVPOLI;

BENEDICTI F. P. A-

TRITII VENETI,

ACADEMICARVM

Contemplationum;

LIBER VI.

DE DAEMONIBVS.

*De multiplici nominis Dæmonum
significatione.*

CAP. I.

D OQVVTURI de Dæmonibus,
qui conuenienti ratione ani-
mæ mundi, & sphærarum, tan-
quam ducibus succedere viden-
tur; vt id bono Dæmone efficia-
mus, optandum est. Nos monet bonus Dæ-
mon, vt à nominis significationib. ordiamur;
præsertim, cùm Dæmonis nomen, non vno
modo, sed multipliciter accipiatur. Dicitur
Dæmon, vt ait Plato in Cratylo, quasi sapiens;
& cùm sit sapiens, etiã dicitur esse Dux peri-
tus. Huiusmodi sapiens, & peritus Dux; non-
nun-

nunquam propriè accipitur, pro natura Dæmonis ab aliis rerum gradibus distincta: nonnunquam verò latè accipitur, pro denotandis illis, quæ similitudine, & analogia quadam includunt cōditiones Dæmonum: quod potest contingere dupliciter, vel cum depreSSIONE, vel cum eminentia. Hinc pater, quomodo confluant tres Dæmonum præcipuæ acceptiones. Dæmon propriè sumptus, ex sententia Platonis in conuiuio in oratione Diotimæ, denotat naturam mediam inter mortales homines, & Deos; conciliatricem eorum inter se; ministram Deorum, Ducein verò hominū: In quarto autem de Legibus, dicuntur Dæmones interpretes Deorum apud homines. Cū itaque munus Dæmonis sit præesse, interpretari, curare, & ducere, quod munus in eminentia conuenit Diis; ideo nonnunquam Dæmonis nomen apud Platonem ad Deos extollitur: & per Deos intelligi volo vniuersam mentium latitudinem, vel abiunctam, vel median-te anima cum æterno corpore complicatam. Dij enim eminentes sapiunt, ducunt, & prouident: ideo Orpheus Iouem, magnum Dæmonem appellauit. Accedit, quòd, vt supremi Dæmones nonnunquam, ob affinitatem cum Diis, Deorum nomine honestantur; ita Dij postremi, qui Dij dicuntur, non absolutè (v-nus enim absolutè est Deus) sed participatione, & similitudine, ob nexum cum Dæmonibus, Dæmones aliquando nuncupantur. Ex

aduerso, vtimur nonnunquam nomine Dæmonis cum depreſſione conditionum; dum Naturas infra Dæmonicam collocatas, nuncupamus Dæmones: in qua ſignificatione humanas animas, & præſertim mētē ab ea participatam, Dæmonem nuncupamus; & iure quidem. Nam vt vniuerſa Dæmonis natura, ex anima & participata mente conſtans, præeſt vniuerſæ naturæ hominis, ex animæ & mēte conſtituti; ita mēs participata ab anima hominis, eidem animæ, tanquam Dæmon eius præeſſe dicitur: quæ acceptio eatenus dicitur cum depreſſione, quatenus participatio mentis in humana anima eſt obſcurior, quàm participatio eiſdem in anima Dæmonis: Eſt itaque cum depreſſione, comparando animam hominis animæ Dæmonum, mentemq; menti. Propterea dixit Timæus, Deum nobis ſupremam animæ partem, vt Dæmonem conſeſſiſſe. Ob eandem rationis conuenientiam, Prudentia, & Imprudentia hominis; ea boni, hæc mali Dæmonis nomine denotantur: & ab Ariſt. ſcéllicitas nuncupatur Eudæmonia; quia à Sapientia, & Prudentia, vt à duobus pendet. Hinc mos vniuſcuſque Dæmon dicitur; & Zenocrates eum habere bonum Dæmonem aſſeruit, cuius anima eſſet ſtudioſa. Seruata quoque eadem rationis ſimilitudine, nedum Mens hominis, vel eiſdem Sapientia, & Prudentia, dicuntur Dæmones; verum inſuper ipſi quoque affectus, à quibus ducimur. Inde nobis.

nobiscum duo conuiuere Dæmones dicuntur, ratio, & animi affectiones, siue appetitiones. Et quoniam ex affectionibus animi vehemens est Amor; qui nedum nos sæpè rapit inuitos, verum insuper valet homines eleuare ad Deos, & Deos cum hominibus conciliare: ideo à Platone in Conuiuio, Amor magnus Dæmon nuncupatur: ob eandem quoq; conditionum similitudinē, ab Arist. in lib. de Diuinatione per somniū, Natura Dæmonia nuncupatur, & Dæmonia dicitur: quoniā, vt Dæmones sunt Deorum famuli; sunt periti dutes, & Deorū leges absoluūtisita ex sentētia Arist. Natura Deo famulatur, opera ei⁹ absoluit. Ideo, inquit Arist. in 1. cœli 32. Deus, & Natura nil faciunt frustra: & Auer. in 12. Met. 18. inquit cū Themist. Naturā non errare, quia dirigitur ab intelligentia nō errante. Accedit demū, quòd iure Aristot. Naturam dicit Dæmoniam: quoniam ea admirabilia opera, quæ ob latentem causam ab aliis iudicantur fieri per Dæmones, ab Aristotele dicuntur fieri per naturam modo latente; per proprietates rerum obscuras, vel ignotas. Cū itaque Dæmonis nomen varia significet, ego de Dæmonibus ex sententia Platonis loquuturus, de propriè sumptis verba faciam: qui non similitudine, sed natura, essentia, & proprietate sunt Dæmones.

videntur Dæmones, sententia Aristotelis, id est

CAP. II.

Dæmones, qui ferè omnium gentium, sapientiumque consensione conceduntur, & approbantur ab Aristotele, quasi sphingis, & chimeræ inania nomina negliguntur: quod ex eo manifestissimè patet, quia nūquam, quid sit Dæmon, manifestavit. Insuper, ea omnia opera, quæ alij Dæmonibus tribuunt, ipse retulit in naturam, in proprietates rerum naturæ constantium, in humores hominum, in conditiones halituum; adeò, ut nullum Dæmonū dereliquerit usum, ut patet ex 30. part. problema te primo, ex 7. de Moribus cap. 3. & locis aliis. Legitur etiam in lib. de Mundo ad Alexandr. multis in locis orbis, exitus spirituum patefieri: qui partim fanatico furore afficiunt homines propius accedentes; partim tabifica vi absumunt; partim fatidicos efficiunt; ut Delphici, & Lebadici sunt &, qui prorsus enecent, ut in Phrygia; &c. & ob hanc rationem, ut iam dixi, Aristoteles in lib. de Divinatione per somnium, Naturam dicit Dæmoniam; quia ea efficit, quæ alij Dæmonibus tribuunt. Quod Arist. Dæmones non admiserit, etiam ratione confirmari potest. Nam si dantur Dæmones, vel sunt seiuncti ab omni corpore, vel cum corpore aliquo iuncti: non seiuncti, quoniam Aristoteles in 12. Metaph. neque intelligentiam ullam ponit non iunctam corpori: si sunt iun-

Et corpori, vel æterno, vel mortali: non æterno: quia id est cœlum, in quo solæ locantur intelligentiæ: non mortali: quia vel erit simplex, vel mixtum: non simplex: quoniam in simplici elemento negat reperiri animam, in 1. & 2. de anima: & in mortalibus negat reperiri animam sine corpore instrumentario, vel potentiam animæ superiorem sine inferioribus: non potest esse corpus mixtum: quoniam huiusmodi omnia corpora sub sensum cadunt, Dæmones sensu non percipiuntur. Ideo Arist. in quarto Meteororum inquit: Et in terra, & in aqua solum animata existunt: in aere autem, & igne nulla sunt: quia corporum materia hæc. Eo in loco rectè Olympiodorus consideravit damnari ab Arist. sententiam Platonis: qui in igne maximè longeva, in aere minùs, ponebat animantia. Et in primo de historia animalium cap. I. inquit: Nullum est animal, quod tatum aereum sit: adeò, ut nunquam descendat, & requiescat in terra: & hoc dixit: quia censuit animalia omnia à principatu molis esse terrea. Patet itaque in conspicuo errore eos versari, qui asserunt Arist. posuisse Dæmones: cum enim nos per conspicua loca, debeamus obscura, & latentia illustrare: hi è contra per nonnulla latentia, ea, quæ conspicua sunt, obscurant, atque pervertunt. Manifestè igitur Arist. neglexit Dæmones. Quòd si in 5. Metaph. de illis facit mentionem inquiens: Substantiæ sunt simplicia corpora, quæ ex his constant,

& animalia, & Dæmonia: putandum est, quòd, vel substantias enumerauerit ex communi aliorum, & præsertim Platonis opinione, vt sæpe in alieno loco facere consuevit; vel per Dæmonia denotauerit omnem substantiam diuinitatis compotem. At afferunt, qui secus censent, pro comprobanda sua opinione locum ex 3. de Gener. animalium cap. 11. vbi quærens Arist. cur plures rerum differentiæ existant in humore, quàm in terra; soluens, inquit: An, quia humor naturam habet ad effingendum, afformandumque habiliorem. Cæterum mare sua natura calidum est, & particeps omnium partium inuenitur, videlicet humoris, aeris, terræ: Itaque omnia adipiscitur, quæ singulis his locis gignuntur. Plantas enim Terræ incolas esse, quis statuerit; Aquæ, aquatilium animalium genus; Aeris, & πῆλξ siue pedestria: sed quòd magis, minùsve, & remotius, aut propius, res constet; magna, miraque differentia existit. Quartum genus non in his locis quærendum est, quainquam aliquid esse exigit ordine ignis, id enim quartum corpus enumeratur: Verùm ignis semper formam non propriam habere videtur, sed in alio corpore; aut enim aer, aut fumus, aut terra esse videtur, quod ignitum est, sed enim genus hoc apud Lunam quærendum est: hæc enim quartam illam differentiam adipisci videtur, &c. Hæc Arist. Ex quibus nonnulli colligunt, Aristot. in sphæra ignis sub cælo collocasse Dæmones.

Ferè

Ferè similem sententiã protulit in lib. de Respiratione. Sed falluntur; quoniam manifestissimè in locis propriis neglexit Dæmones, vt apparuit in præcedentibus. Verba suprà relata, apprimè sunt obscura; nec per obscura evertenda sunt loca perspicua. Et pro solutione dicere possumus, quòd si Aristot. denotauit Dæmones, id fecit ex sententia Platonis, vt inquiunt nonnulli. Vel dicamus, quòd dum Aristot. inquit; Quartum genus non in his locis quærendum est: non de Dæmonibus, sed de igne loquitur: Nam animalia debèt apud nos fieri; apud nos autem non est elementũ ignis, sed apud Lunam; ideo non dantur animalia igni respondentia: Sic Auer. ex eo loco colligit, minimè dari animalia ignea. Vel dicamus, quartum id genus animalium, apud Lunam esse quærendum, & considerandum, an ibi inueniri possit; at ex alibi declaratis constat, ibi animalia non reperiri: nam in secundo de Gener. animalium cap. 3. inquit; Quamobrè ignis nullum animal generat; nec constitui quicquam densis, vel humidis, vel siccis videtur; nam calor animalis, nec ignis est, nec ab igne ducit originem. Ita etiam in quarto Meteororum inquit, in ventriculo ob calorem non posseigni vermes. Constat itaque; siue Aristoteles per quartum genus denotet ignem, siue denotet quartum animalium genus; semper auctoritatem illam reddi leuem, & nullius momenti.

An dentur Dæmones, sententia Platonis.

CAP. III.



Irui profectò est, quomodo Peripatetici Dæmonicam naturam non concedant; cùm plurima opera nobis sese offerant, quorum causam conuenienter assignare non valemus, non positis Dæmonibus; veluti, dum viri vulgares Dæmone correpti, Hebraicè, Græcè, & Latine loquuntur; res aliis occultas patefaciunt; adiurationibus varia efficere compelluntur: quæ sine Dæmone non efficerent. Ita quoque mira priscorum oraculorum responsa, secretorum reuelationes, plurimæ solis verbis incurabilium ægritudinum curationes, historiae variae; tam manifestè Dæmones nobis patefaciunt, vt nil manifestius conspiciere valeamus. Asserere autem ea fieri, vel per bilem atram, vel per vim imaginandi, vel per varia halituum genera; vt asserit Aristoteles, & cum eo Póponatius, & alij nonnulli; delirare est: quomodo enim per humores, in imaginatione formari possunt rerum imagines, & idiomatum verba, & nomina, ex hominum institutione prodeuntia; quæ nunquam sub sensum illius hominis ceciderunt? Non enim ea in anima præexistunt; quæ, ex sententia Aristotelis, omnibus formis est denudata: nec per halitus, & humores manifestatur, cùm in eis non sint huiusmodi imagines; & præsertim rerum futurarum, & vocum ex hominum institutione pen.

pendentium. Accedit, quòd huiusmodi homines sæpe, immota lingua, & ore clauso loqui videntur. Insuper, oraculorum responsa ex Dæmonibus prodiisse, ex eo manifestè cõstat: quia post Christi incarnationem, oracula illa omnia euauerunt: quod non contigisset, si ex causis purè naturalibus duxissent ortum. Præterea, prætermissa etiam auctoritate, experientia, & sensibus; si rationi credimus, cogimur ponere Dæmones. Et primò, cùm in terra, & aqua varij viuètium gradus inueniantur, cùm cœlum viuat; inficiari non debemus, corpora intermedia animantibus esse prædita: sed rationi consonū est existimare, in eis eò nobiliora animalia reperiri; quò sunt eminentiora, & nobiliora postremis elementis. Tetigit hæc rationem Arist. in 3. de Gener. animalium: attamen Dæmones, qui ex ea colliguntur, minimè concessit: quoniam existimauit animalia cunèta in terris degere, ex principatu molis esse terrea: quod minimè necessarium est. Præterea, quoniam homo cum crasso corpore cõplicatus, longè distat à Deo; pro nexu necessaria fuit natura aliqua media, quæ extrema conciliaret: huiusmodi est natura Dæmonum; quæ tenuitate corporis, acumine ingenij, celeritate actionum, aliisq; conditionibus conuenientissimè mediat. Et præsertim dari debuit, quia mundus est specierum plenitudo; nullus gradus deseritur inanis; & quæ in eo fieri possunt ex attinentibus ad eius perfectionem, etiam

necessariò in eo sunt. His accedit, quòd cum in Deo, vt in principio, sit cura, & prouidentia communis vniuersi; in Mente solùm sit distincta prouidentia specierum; etiam debet dari natura aliqua media, ad quam pertineat cura, & prouidentia partium. Ad Deum, & Mêtem pertinet dirigere, & imperare; ad mediam hanc Dæmonum naturam exequi, & perficere Iure itaque Plato Ægyptiorum Theologis, sensus, & rationi credens, Dæmones posuit: in quorum notitiam interna quadam naturæ commotione perducimur. Eos religio omnis supponit; Prisci sapientes in eorum cultu plus æquò versati sunt; ter maximus Mercurius frequenter de illis loquitur; sapientes Ægyptiorum, ope Dæmonum admirabilia effecerunt: Quapropter Plato ex his plurima depròpsit, & splendidissimè suos libros exornauit. Ex qua Academicæ, & Peripateticæ sententiæ conspicua diuersitate colligimus, quàm longè illi à vero recedunt, qui in omnibus Aristot. cum Platone nituntur conciliare.

Quid sit Dæmon.

CAP. III.



Calcidio in Timæum Platonis, ab Apuleio, & ab aliis, vario modo definitur Dæmon. Inquit Calcidius, Dæmonem esse animal rationis particeps, immortale, affectionibus animi obnoxium, corpore æthereum, curam hominibus imper-

Impertiens. Apuleius in lib. de Socratis Dæmone, ferè similem dedit definitionem: solùm eam permutavit: quia loco ætherei corporis, acreum sumpsit. Hæc definitio in parte mihi dubia est: & præsertim, quia Dæmonum corpus non consimile est, cum varij sint Dæmonum gradus. Præterea, cum homo definiatur à Platone, non quòd sit animal: sed anima rationalis mentis particeps, corpore vtens: longè minùs Dæmon debet per animal definiri, sed per animam corpore vtentem: cum magis quàm homo dominetur corpori, & minùs ex eo pendeat. Insuper, non explicatur in ea definitione, quomodo per rationem Dæmones præstent hominibus. Propterea ita potiùs esse definiendos existimarem: Dæmon est anima, rationis, & mentis supra humanam conditionem particeps, tenui corpore vtens, Deorum famula, pro mundi particulari custodia. Sic Plato animas puritate, & impuritate inter se distingui affirmavit. Dæmonū anima purior est, quàm anima hominis: & vtitur corpore, non ita, vt eius sit perfectio, & forma: sed ei iungitur cum quadam insinuatione: ita tamē, vt ei inaximè dominetur, & virtutem quandā impartiat: quò enim anima est sublimior, eò magis corporibus dominatur. Insuper, vtitur corpore non crasso, sed tenui: vtitur enim vehiculo, vel æthereo, vel aereo: & quoniam acreum vehiculum, modò purius est, modò crassius, & obscurius: hinc & ignei, & aerei, &

aquei & subterranei numerantur Dæmones. Valent etiam Dæmones, ob eorum vires, & eminentiam, noua recipere corpora; ita tamen, vt interim proprium non derelinquant: & cū suscipiant noua corpora, eisque maximè dominantur; varias eis valent tribuere figuras. At nunquid sub sensum nostrum cadāt? Dixit Porphyrius, Dæmones omnes prorsus inuisibiles esse. Iamblicus censuit, eos à nobis frequenter sensibus vsurpari: quod etiam affirmavit Plato in Timæo, & Epinomide; asseruit tamen, nunquam manifestè apparere. Sententiam Porphyrij censeo veram, dum Dæmones considerātur cum corpore sibi proprio; quod ob tenuitatem, & puritatem sensum effugit; vel non distinctum apparet ab eo intermedio corpore, in quo reperitur. Insuper, eiusdem opinionem commendandam censeo; quatenus inuisibile, solam difficultatem manifestat: non autem, quòd penitus videri nequeant. Opinionem Iamblici probandam iudico, dum Dæmones aliis corporibus insinuantur; & nobis diuersa figura, colore, & luce circumfusi, sese offerunt. Sunt itaque Dæmones, cū visibiles, tum inuisibiles: Insuper, potiores Dæmones sunt inuisibiles, humiliores verò magis sub iatutum cadunt; magis enim cum crasso corpore permiscetur, & nobis sese offerunt. Cū à nobis cōspiciantur Dæmones, id duobus modis contingere posse putandum est: nonnunquam verè cōspiciuntur: quia cor-
pora

pora densiora assumunt, ea figurant, & per eadem sese nobis ostendunt: nonnunquam verò radios nostrorum oculorum sua facultate formant ad libitum, ac reflectunt, imaginationemque nostram permutant; adeò, ut cum à nobis re vera non conspiciantur, attamen conspici videantur. Propterea dixit Plato in Timæo, eatenus Dæmones nobis esse cōspicuos, quatenus ipsi volunt. Id ipsum euenire putandum est de voce, & sono; quē emittunt, vel formare videntur. Neque propterea Platoni aduersamur, qui in secundo de R. P. inquit: Est itaque omnino sine mendacio, Deorum, Dæmonumque natura; est simplex, neque mutatur, neque alios decipit; neque per visiones, neque per sermones, neque per signa, neque nobis dormientibus, neque vigilantibus, &c. Nam Plato hæc dicit præsertim de Diis, ut ipsemet sæpe repetit. Quod si Dæmonis quoque facit mentionem, id euenit: primò; quia postremos Deos, sæpe nomine Dæmonū appellat. Accedit, quod Plato ibi de deceptionibus loquitur: Dæmones, quamuis ad libitum se nobis ostendant; id faciunt, ut nobis profint; non ut decipiant, & fallant; ut nos auertant à malo, non ut in malū perducant: & hoc præsertim faciunt postremi Dæmones. Insuper, Dæmones, nedū nostris sensibus vsurpantur, verū etiam ipsi vtuntur sensibus; nisi omnibus, saltem eminentioribus, & magis spiritalibus; ut visu, & auditu; quorū munerib. eū

fungantur, non est putandum, quòd id faciant per oculos, vel aures; sed præstantiori modo ob eminentem facultatem: ac per quamuis corporis partem vident, & audiunt; id quæ eis conuenit minùs cum perpeſſione, magis verò cum actione, quàm nobis.

Gradus Dæmonum.

CAP. V.



I Amblicus in lib. de mysteriis Ægyptiorum nouem ponit diuinorum gradus: in primo, collocat Deos inuisibiles; in secundo, visibiles, vt sunt cœli; in tertio, Archangelos; in quarto, Angelos; in quinto, Genios, siue Dæmones; in sexto, Principatus priores; in septimo, Principatus posteriores; in octauo, Heroas; in nono demum, Humanas animas. Ex his nouem gradibus duo primi sunt supra Dæmonum latitudinem, postremus verò est infra; adeò, vt sex remaneant, qui communi nomine possint dici Dæmones. Psellus sex enumerat Dæmonū genera, sed modo longè diuerso; ponit enim Dæmones Igneos, Aereos, Terrenos, Aqueos, Subterraneos, Lucifugos. Porphyrius, modò duo, modò tria ponit Dæmonū genera: Nam in secundo de abstinentia ab esu carniū, ponit duo genera; vnum Dæmonum bonorum, alterum malorum: At in lib. de Occasionibus tria enumerat, addendo medium; quod modò iratum, lædit; modò placatum sacrificiis, prodest.

dest. Plato in *Epinomide*, quinque ponit animalium genera: duo extrema, quæ sunt; *Dij* visibiles, denotans cælum & *Altra*; & *Animalia* terrena mortui obnoxia, quorum Princeps est homo: Media sunt tria, *Ætherea*, *Aerea*, & *Aquea*; quæ tria communi *Dæmonis* nomine designantur. *Ætherei* *Dæmones* sunt, qui degūt in superna aeris parte, quam *æthera* nuncupauit Plato in *Timæo*: *Aerei*, in parte aeris posteriore: *Aquei*, prope fontes, lacus, & maria; quos aqueos, semideos appellat. Sic itaque non constat, quot sint gradus *Dæmonum*. De quibus ut notitiam aliquam cōsequamur, adnotandum est, posse *Dæmones* multiplici consideratione distingui; nam primò distingui possunt, respiciendo ad loca, in quibus degūt: secundò, respiciendo ad naturam corporis, cū quo iungūtur, & ad quod sunt proclives: tertio, per animæ eorum puritatem, & impuritatem: quartò, per munera eorum, munerumq; functiones. Quæ quatuor distinctionis genera ita se habent, ut primum sit desumptum ex puritate naturæ *Dæmonis*; ex quo secundò sequitur propensio ad diuersa corpora; ex hoc tertio ducitur distributio per loca varia; ex quib⁹ omnibus sequitur postremo distinctio sumpta à muneribus: & hic est ordo respondens naturæ rei. At respectu nostri è contra se habet; nos enim per opera eleuamur in cætorum notitiam: Cū itaq; hæc ita se habeant, censerem ego rectè cum Platone in *Epinomi-*

de, distribui Dæmones in tres gradus: in aqueos, aereos, & æthereos. Ratio distinctionis est: primò, quia triplex est hominis vita: effectiua, cui aquei; actiua, cui aerei; contéplatiua, cui ætherei Dæmones respondent. Insuper, vita est triplex; voluptuosa, actiua, & contemplatiua; quibus pariter respōdent tres gradus Dæmonum: voluptuosæ vitæ, respondent aquei; actiuæ, aerei; contemplatiuæ, ætherei. Insuper, vt dixit Proclus in Alcibiade; Dæmonum, quidam sunt magis intellectuales, quidā minùs, alij mediant. Prætereà, si ad corpora respicimus; quoniam corpus Dæmonum tenue est; id præsertim potest esse triplex; vel aerèu, vel ad æthereum vergens, vel ad aqueum: ex quibus tria loca, tresque Dæmonum naturas conuenienter colligemus. Et si quis ambigat de subterraneis Dæmonibus: Dicendum est; cū aqueos, tum aereos, meare posse per terræ antra; vt aquam, & aerem meare conspiciamus. Præcipua itaque distributio est trimembris: non tamen est absurdum, in singulis eorū diuersitatem aliquam considerare; & præsertim in aqueis, & aereis. Adeò, vt varia consideratione Dæmones omnes, vt in vnum genus redigi possunt; ita in tria, & in quinque valent distribui. Rediguntur primò in vnum genus: & omnes vel Aerei dicuntur, vt ab Apuleio; vel Aetherei, vt à Chalcidio; quatenus vniuersa hæc latitudo inter cœlestem ignem, & aquā, præsertim Dæmonibus destinata, denotatur.

vel

vel nomine aeris dominātis, vel ætheris nobilioris. Secūdo, distribui possūt in tres gradus; quaten⁹ hoc tenue corpus sub cœlo positum, per partē eius sublimē, est æther; per mediam, aer; per infimā vaporib. refertā, aqua: in qua cōsideratione Plato in Appēdice Legū, tres Dæmonum gradus explicauit. Demum possunt resolui in quinque; quatenus ratione permixtionis, & maioris vel minoris puritatis, vniuersum hoc tenue corpus intermedium, quamuis à principatu sit aer, tamen conditionibus omnium quinque corporum participare potest; & inde consurgere dicuntur Dæmones ignei puriores, ac eminētiores, ætherei, aerei, aquei, terrei. Sic itaque sine contradictione Dæmones, tum vnius, tum trium, tum quinque generum esse dicuntur; magis propriè tamen in tria genera, (vt fecit Plato) distribuuntur. Pariter etiam Dæmonū, nonnulli dicuntur Australes, alij Septentrionales, quidam Orientales, alij Occidentales; sed omnes ad tres enumeratos ordines rediguntur; nam in singulis considerari possunt hæ quatuor differentiæ. Postremò etiam putādum est; præter eos, qui sunt sui natura Dæmones, sui que natura medij inter Deos, & Animas; dari Dæmones quosdam aduenas, & peregrinos; qui sint animæ hominum solutæ à crasso corpore, degentes aliquandiu in aere: de quibus Plato in Cratylō loquens inquit, Scisne, quos Hesiodus Dæmones esse ait: HE R. non. S O C. neq; etiam

quòd aureum genus hominū ait in principio extitisse? H E R. hoc quidem noui. S O C. ait enim ex hoc genere, post præsentis vitæ fatā, fieri Dæmones sanctos, terrestres optimos, malorum expulsores, & custodes hominum, &c. Pōnit itaque Plātō etiā Dæmones aduenas: non tamen omnes esse tales censet; cū in Timæo de Dæmonum generatione loquatur, distincta ab ea humanarū animarū. Ex his constat, propriè Dæmones non esse erraticos quosdam Deos, vt censuit Ameliū; neque esse humanos animos corpore crasso solutos, vt quidam alij crediderunt: hi enim sunt aduenæ, non autem sui natura Dæmones; sed propriè Dæmones, esse gradum sui natura mediū inter visibiles Deos, & homines. Sed dubitatio est, num etiā dentur cœlestes Dæmones. Nonnulli eos ponunt, alij renuunt. Cui difficultati dicendum censeo, duplici consideratione concedi posse cœlestes Dæmones: primò, facta comparatione inter Dæmones propriè sumptos; quorum eminentiores, cœloq; proximi, vt ignei, ita cœlestes dici possunt: secundò, facta comparatione inter Deos; quāuis enim cœlestes à Platōne nuncupētur Dij, vel inuisibiles, vel visibiles; euēnit tamen, vt per conuenientiam naturæ & conditionum, nonnunquā postremi Dij nuncupentur Dæmones, vt supremi Dæmones nuncupantur Dij: at dum absolutè, & propriè de Dæmonibus Plātō loquitur; eos significat, qui sub cœlo

lo positi sunt: Qui tamen ita, ex Platonis sententia, sub cœlo sunt collocati; vt semper caput, hoc est, mentis aciem, supra cœlū habeant eleuatum; & intimiūs cum prima mente nectantur, quā homines.

*De nonnullis affectionibus ad Dæmones
pertinentibus.*

CAP. VI.

Dæmones humano generi affines, cū hominibus libentissimè versantur, vel cum humanis animis ostreateo vehiculo solutis; mouēt, ducuntque homines; & hoc præsertim faciunt Dæmones inferiores: nisi eueniat scēlici aliqua sorte ob puritatem animæ alicuius, vt ei iungatur, & cum eo versetur Dæmon quidam supernus; quod Socrati, Plotino, & Platoni contigisse, multi affirmāt: adeo, quod legitur in vita Plotini à Porphyrio scripta, Plotinum pro Dæmone Deum habuisse; nomine tamē Dei cēseo tunc denotari Dæmonem aliquem superni ordinis, Diis proximū, non propriè Deum. Et quemadmodum vitæ hominum sunt variæ, ita à variis Dæmonum conditionibus duci censent Platonici. Sic dantur Dæmones Saturnij, ad vitam contemplatiuam ducētes Saturnias animas; Iouiales, ad ciuilem; & ita de cæteris. Sed variæ sese nobis offerunt difficultates, attinentes ad naturam, & conditiones Dæmonū. Quæritur, an Dæmones sint mor-

tales. Inquiunt nonnulli, igneos, & aereos immortales quidem esse; aqueos verò longæuos, sed morti obnoxios: Propterea dixit Martianus Capella Pausaniam sectatus, Satyros prouectioris ætatis, nuncupari Silenos: Plutarchus in lib. de defectu oraculorum ait, Dæmones certis temporum curriculis interire, & vivere per nonies mille septingentos viginti annos: Sic Pana magnum Dæmonem aiunt esse mortuum. Quam sententiam approbandam non censeo: quoniam si ad animā respicimus, omnes sunt immortales: si respicimus ad corpus; quoniam id elementare est, sub cœlo positum, contrarioque præditum; non apparet, cur vnum mortale, alterum sit æternum. Prætereà, in elementari corpore non rectè iuuentus, & senium consideratur. Inquiunt alij, Dæmones omnes esse immortales; ideo definientes Dæmonem aiunt, esse animal immortale: Addūt, quòd cum corpus sit solubile, attamen Dei voluntate seruat æternum; vt de mundo dixit Plato. Quam sententiam etiam dubiā censeo: Primò; quoniam Plato solū de mundo dixit, sua voluntate seruari æternum, & de nullo alio: prætereà, vbi reperitur multitudo indiuiduorum sub specie, vel facile est corpus refici, vt euenit Dæmonibus; nō est necesse, vt Dei volūtate compositum seruetur æternum. Propterea dicendū censeo, Dæmones omnes, ratione animæ, esse immortales: ratione corporis, partim mortales, partim immortales;

mor.

mortales, quoad partes, quæ interire, & refici possunt; immortales, quoad totum corpus: vt etiam de Elementis se habet: adeo quod corpus Dæmonum variationi, & perpeſſioni esse obnoxium cenſeo: at asſero id ei conuenire, non ſimul, ſed cum partium ſucceſſione, & reſtauratione: ſeruatur enim ſummopere ab eius anima, quæ corpori illi maxime dominatur, conferente ad id etiam puritate corporis eorum: corpus enim, quod purius, eò diuturnius eſt. Propterea rectè Porphyrius dixit, Dæmonum ſpiritum, quia corporeus eſt, affectionibus, & interitui eſſe obnoxium. Sed quæritur inſuper, num Dæmones animi perturbationibus ſubiiciantur. Proculdubio, cum ſint ſub Diis collocati, affectu quodam ad corpora ſint procliuēs, cum elementari corpore ſint iuncti; etiā animi perturbationibus ſunt modo aliquo obnoxij: ita tamen, vt in ſupremis Dæmonibus, cum mira tranquillitate; in mediis, cum moderatione; in poſtremis, cum aliquo exceſſu, perturbationum genus inueniatur. Ideo Plato in Epinomide dixit, Dæmones prope nos exiſtētes nunquam manifeſtè conſpici: prudentiæ mirabilis eſſe participes: acuto inſuper ingenio, tenaciſque memoria, cogitationes omnes noſtras cognoſcere; honeſtos, bonosque homines mirificè diligere; improbos vehemēter odio proſequi, utpote, qui doloris participes ſunt. Sic itaque manifeſtè Plato aſſerit perturbationibus ſubijci; quarum

fontes sunt voluptas, & dolor. Sed cum perturbationibus afficiantur, dubium est: An amores, inimicitiae, æmulationes, pugnae, locum habeant in eis? Si loquimur de naturali quadam eorum inter se mutua dilectione, propria voluntate confirmata; profecto hæc eis conuenit, cum similia omnia naturali quodam instinctu mutuo se diligant; Si loquimur de amore uenero, de propriè sumpta contrarietate, & lite; hæc cum absint ab homine rectè disposito, longè magis aberunt à gradu supra hominem à Platone collocato. Affero tamen, hæc eis conuenire similitudine quadam; quatenus diuersi gradus Dæmonum, ad diuersas vitas ducunt, distinctoque generi vitæ præsunt. Quapropter, quæ à nonnullis dicuntur de incubis, & succubis; longè abesse censeo à sententia Platonis. At maior oritur dubitatio, & est; num Dæmones per suorum corporum alterationes, perpersionem sentiant, & lædantur. Proculdubio; cum non pendeant à corpore, & solum corpore, ut vehiculo utantur; non ægrotant, nec patiuntur, ut homines: In hoc sensu, veram ad aures Platonis censeo sententiam Iamblici in libro de mysteriis Ægyptiorum, Dæmones esse à passionibus immunes. Quod verò dictum fuit à Psello, Dæmones igne torqueri posse; non Platonicum censeo, sed ex Theologorum fontibus haustum. Affero tamen, Dæmones, non per sensum tactus, ut homines; sed per affectum, quo in corpus suum sunt proclives, ex opinio-

ppinione Platonis, dolore modo quodā posse affici, ex læsione sui corporis; vt euenit hominibus, ex læsione rei ab eis dilectæ. Cognoscuntne se mutuò Dæmones? alloquuntur? respondent? Ita profectò. Nam si iumenta, & homines, se cognoscunt; longè magis se cognoscent Dæmones, quibus exactior conuenit cognitionis gradus. Nam, vt ait Plato in Epinomide, Dæmones prudētia mirabilis sunt participes, acuto ingenio, tenaciq̃ue memoria; cogitationes omnes cognoscunt, &c. Cognoscunt itaque se mutuò Dæmones, & cū cognoscant, sibi mutuò proprias animi affectiones manifestant; quod humanis interrogationibus, responsionibusq̃ue proportionē respondet: non enim id efficiunt cum vocis strepitu, sed sine eo; carent nanque instrumentis vocis, nec eis egent: quoniam sonus ob distantiam requiritur, & ob notionum animi latentiam: at animi puriores, crasso corpore soluti, vel non distant; vel notiones habent adeò sibi cōspicuas, vt sine strepitu, mutuò sibi eas manifestent. Et nedum sine strepitu loquuntur inter se, verū etiam cum hominibus, dum ad varias eos hortātur actiones, cum hominibus tamen id longè secūs efficiunt: nam dicuntur loqui hominibus: quatenus iūcti cum animarum, excitant in ea rationes congenitas, animæq̃ue insertas, vel imagines afferunt virtuti imaginandi, per quas, vel eos hortantur, vel dehortātur. Sic Socrates sæpè vocem sui Dæ-

monis audiebat eum dehortantem; quam tamen alij adstantes non audiebant. Valent etiam Dæmones cum strepitu loqui; dum hominibus insinuantur, eorumque vtuntur instrumentis.

Munera Dæmonum.

CAP. VII.



Il in vniuerso superuacaneum, nil inutile, nil otio penitus torpens inuenitur; sed quò res eminentioris sunt conditionis, eò eminentiores præbent vsus, & salubriores pariunt fructus. Dæmones, qui sub orbe Lunæ obtinent principatum; nedum proprium in vniuerso gradu complent, pro mundi perfectione: verum in super conducunt ad citò, rectè, exactè implenda mandata Dei; ad regionum, vrbium, hominumque custodiam. Nonnulli enim vniuersæ regioni, alij vrbibus, quidam singulis hominibus præsunt. Hi sunt, quorum ministerio animæ in corpora descendunt; quorum consilio in vita diriguntur; quorum reuelatione varia cognoscunt; quorum opera pœnas luunt, & purgantur; demum, quorum auxilio ad superna eleuantur: adeò, vt non iniuria humana felicità Eudæmonia nuncupata sit; quia bono Dæmone duce eam consequimur. De his dixit Plato in Epinomide, in somniis, in vaticiniis percipi; per voces audiri, in sanitate, in ægitudine, in vitæ exitu conspici; & propterea multa sacra eis fuisse instituta. Historiæ nobis pate-

patefaciunt, experientiaque cognoscimus: hominum nonnullos esse fortunatos, alios infortunatos: mira sæpè conspiciamus, vel legimus contigisse, attinentia ad sortes, ad furores, ad ægritudinum curationes, ad somnia, ad oracula, ad diuinationē; quorum nec quidem probabilem valemus asserere rationem, nisi Dæmonum auxilio fuisse facta confiteamur. Pomponatius Peripateticus solertissimus, ingenio sublimi, iudicio acri præditus: cum in multis se admirabilem præstiterit: dum in lib. de Incantationibus, neglectis Dæmonibus, plurimarum rerum causas nititur asserere: se prorsus deridendum patefacit: cum opera eminentissima dicat à causis leuissimis profluxisse. Multa itaque, & præclara sunt opera Dæmonum. Propterea dixit Proclus: Dæmon solus omnia mouet, cuncta gubernat: nostra omnia excolit, atque disponit: enimvero rationem perficit, perturbationes temperat, Naturam inspirat, corpus cōtinet, fortuita subministrat, fatalia complet, Prouidentia dona largitur: vnusque hic existit vniuersorum, quæ in nobis, & circa nos sunt, rector, totius vitæ gubernacula tenens, &c. Quæ Procli sententia non ita accipienda est, vt homo penitus in Dæmonum manibus sit collocatus; adeo, vt sua libertate sit destitutus: ita enim approbanda non esset: sed eatenus est vera, quatenus plurimum in nobis, ex Platonis sententia, possunt Dæmones; & vim habent in animam potius,

quàm in mentem; mens enim Dæmoni non subiicitur. Sed hoc est consideratione dignū, nunquid vni homini vnus solus præsit Dæmon, vel multi præesse possint? Profectò vnus est proprius, plures possunt esse aduentitij: & qui proprius est, nunquam in eodē vitæ curriculo hominem deserit; sed à genitura, vsque ad præsentiam iudicis vitæ, eum gubernat, & ducit; vt Socrates in Phædone testatur: quæ sententia absolutè vera erit, si nōmine Dæmonis participatam mentem intelligemus. Cùm igitur tot sint munera Dæmonum; iurè contigit, vt olim apud Ægyptios, Chaldæos, Arabes, Dæmonum cultus summo opere floruerit; qui hodie penè in vniuersum euauit, cùm opera Dæmonum non tam frequenter appareant. Cuius rei Plato superno lumine destitutus, conuenientem rationem assignare non posset: Nos autem optimè scimus, Christum à prauis Dæmonibus priscum imperium, & facultatem subtulisse; adeò, vt iure cum eorum facultate illorum cultus apud homines olim delusos magna ex parte delituerit.

An dentur Dæmones mali.

CAP. VIII.



Magna inter Academicos est altercatio, an Dæmones omnes debeant censerī boni; vel etiam Dæmones inueniantur, qui mali sint. Plurimī censent, Dæmones omnes esse bonos: quoniā
non

non videtur rationi consentaneum, vt natura homine eminentior, adeò sit peruersa; vt sit sui conditione mala, & solum ad hominũ perniciem & detrimẽtum parata; hoc enim prorsus etiam ab humana conditione est alienum: Præsertim, quia si Dæmones sunt Deorum interpretes, internuntij, & ministri; si Dei madata implent; Prudentia, & Sapientia pollent; minimẽ videntur posse esse mali, & ad sola mala parati, cùm hæc sit dispositio aduersa naturæ; & præsertim, quia apud Platonem, omnis malus dicitur ignarus; ignorantia in Dæmone non habet locum. Ideo Plato in Cratylo, Dæmones aduenas fieri asseruit ex eorum animis; qui in ætate aurea boni, & sapientes extiterunt. Quare de ratione Dæmonum esse videtur, vt boni sint, non mali; nam Semidei dicuntur, & Heroes: quod eis non conueniret, nisi boni essent. Ex aduerso, frequenter de peruerso, malo, & deprauato Dæmone mentio fit apud Porphyrium, Psellum, & alios Platonicos; sic Calcidius pollutos, & infectos admittit Dæmones; Ægyptij occidentalem plagam prauis Dæmonibus esse assignatam affirmabant; Democritus bonos, & malos existimans dari Dæmones, deprecabatur, vt bonos semper haberet obuios; Mercurius ter maximus, salutare, & noxios inueniri Dæmones asseruit: propterea veteres carpebat, qui diffidentes, vel esse numina super cœlum, vel hominũ vota ad cœlestia peruenire, statuas con-

fecerunt domicilia Dæmonum, quos quasi familiares colerent Deos: aiebat enim, quamuis nonnunquam salutare Dæmones descenderent, sæpè tamen descēdere etiam noxios. Sic de succubis, & incubis, adulterio, vsuique venereo inseruiantibus fit sermo; adeò, vt, communi Gentium, Populorumque voce, mali Dæmones concedantur. Pro cuius difficultatis determinatione dicendum censeo, Dæmonis nomen apud nostros Theologos in malam partem vsurpari; pro denotanda peruersa conditione eorum Angelorum, qui ob superbiam è cælo in terras deiecti fuerunt; qui destituti gratia Dei, eius facti æmuli, sub imagine boni, & veri, tentant homines à Deo auertere, & ad se conuertere: ad quod etiam efficiendum, minis, & verberibus vtuntur. Plato destitutus lumine fidei, hanc Angelorum peruersionem non cognoscens, considerauit Dæmones, non ex peruersione ortos; sed vt naturam supra hominem collocatam, quales sunt Angeli rectè, secundum naturam, animique electionem dispositi: ideo Dæmonum genus, absolutè bonum esse censuit; & solùm admisit Dæmones malos ex euentu, & quo ad hominum iudicium; qui dum puniuntur, prauos, & infames iudicant ministros iustitiæ. At non defuerunt, qui vel ducti simul ratione, & experientia, vel cupientes Platonis sententiam cum ea Theologorum pro facultate conciliare; Dæmones bonos, & malos, quasi Angelos lucis, & tenebrarum

brarum etiam cum Platone statuerunt; cum tamen, ex sententia eius, omnes debeant censerī bonis; depravationem autem Angelorum, & permutatōnem ex Angelis lucis in Angelos tenebrarum, solo superno lumine cognoscamus. Hinc in 2. de R. P. asseruit, Dæmonum naturam esse sine mendacio; nec nos decipere, vel fallere.

De Sylvanis, Faunis, & similibus.

CAP. IX.



Requenter apud priscos, recētiōresque auctores de Faunis, Nymphis, Dryadis, Sylvanis, Satyris, Panibus, Manibus, Laribus, Lemuribus, Laruis, Fatuis, Incubis, Succubis, Pygmæisquē fit mentio. Georgius quoque Agricola in calce libri de Animantibus subterraneis inquit: Subterraneorum animantium haberi possunt Dæmones, qui in quibusdam fodiis versantur: quorum duplex est genus: vnum truculentum, & aspectu terribile; quod plerunque metallicis infestum, inimicumque est: Alterum mite, &c. De his sententiæ sunt variæ. Quidam censent, eos esse homines, qui vel ingenio valeant, vel furore sint correpti, vel atræ bilis spiritu elati: Alij, plura eorum esse naturæ monstra, vel Poetarum commenta. Proculdubio difficile est de Dæmonibus certi aliquid humana ratione inuentum enunciare; quod etiam ipsemet Plato in Epinomi

de, agens de Dæmonibus confitetur: inquit enim; Scire quisque debet, mortali naturæ nō esse possibile, certi quicquā de Dæmonibus cognoscere. Vt tamen aliquid Academicorum doctrinæ consentaneum, & probabile proferamus; dicendum censeo: Nemini inficias esse eundem, plurima, quæ de his apud varios auctores leguntur, vel esse fabulas; vel inanes apparitiones, siue imaginationes; vel cum fabulis, & fictionibus maximè esse permixta: at non ita esse fabulas, vt etiam aliquid verī nō includant. Quod de Pygmæorum genere dicitur, fabulam censeo; nō enim vsquam in terrarum orbe huiusmodi homunculorum genus est inuentum; quod ex sui natura, non autem per aliquam principiorum generationis deprauationem, tale sit. Incubos, & Suecubos cēseo esse falsas imaginationes, & somnia dormientium hominū, ad libidinem procliuū: nō enim id mihi verisimile esse videtur, quod aiunt nonnulli; dari Dæmones, qui genitale semen emittāt, ex quo pusilla animalia oriuntur. Faunos, Syluānos, & similes, censeo esse Dæmones postremæ regionis incolas; vel rusticæ, vel piscatoriæ, vel pastoralis vitæ præsides: qui cū corpore vtantur densiore, etiam nonnunquam idipsum sponte coarctantes, sese nostris oculis offerunt. Sic veram censeo sententiam Maximi Tyrij; quōd Dæmonum, quidam rustici, alij urbani sint. Insuper Laruarum, Lemurum, & similibus muneribus, censeo

ſeo frequēter fungi Dæmones peregrinos; hominum ſcilicet animas corporea vita functas. Demum nonnulla ex dinumeratis, non Dæmones ſunt: ſed vel iumenta humanam formam præſeferentia, vel informes hominēs; adeò, vt non vna eorum omnium ratio ſit. Si byllas, ex horum numero eſſe non ceniſeo: ſed cum Theologis rectè ſentientibus affirmo, eas fuiſſe ſœminas prophetico ſpiritu repletas; cū Platone verò, fuiſſe ſœminas fatidicas, mungere Dæmonum futura præſagientes.

De nutritione Dæmonum.

C A P. X.

N Vtriri Dæmones Porphyrius, aliiq; nonnulli aſſeruere: quam ſententiā abſolutè falſam, in parte tamen veram exiſtimo. Quòd Dæmones facultate nutriente, caloreque illo naturali viuentium ſint præditi, vt animalia terrena, falſum eſt: non enim os, epar, venæ, cæteraque nutritionis inſtrumenta eis conueniunt; nec corde illius caloris fonte ſunt præditi. Eſt tamen vera in parte, & ſimilitudine quadam. Quatenus eorum corpora, per nonnullos halitus, & fumos lèduntur; per alios reſciantur, recteque diſponuntur: eorum nutritio ſimilis eſt nutritioni halituum, ſpongiarum, & ſimilium; dum imbibunt humida, vel alia ſibi conuenientia corpora. Inſuper ea Dæmonum eſt potiùs alteratio quædam, quàm verè nutri-

tio. Cùm itaque solùm metaphoricè nutriantur; solùm etiam metaphoricè verū erit, quod dicitur à Porphyrio; eos pinguere, & repleri. Et quoniam Dæmones affectu quodam erga corpora sunt affecti; hinc euenit, vt halitus, fumosque nonnullos vitent, ad alios libentissimè accedant. Insuper, quoniam nostri corporis spiritus miro sunt similitudinis nexu cū eorum corporibus iuncti; propterea curandum est, vt abstinentia ab immundis purgemur; & conuenienti aeris, & ciborum electione, purioribus spiritibus repleamur; nostræque habitationes fœlici cœli aspectui sint expositæ: vt nos simus potiorum Dæmonum habitationes. Nec propterea necessariam iudico eam ab esu carniū abstinentiam, quam præcepit Porphyrius, innixam potiùs Pythagoricis fictionibus, quàm absoluta veritate: ex multis enim aliis alimentis deteriores, quàm ex carnibus reficiuntur spiritus. Nec propterea eos damno, qui alia conuenientiori ratione ab esu carniū abstinerent. At si nutrirī modo aliquo dicuntur Dæmones; nūm etiā dormire, & somniare dicātur? Minimè profectò: non enim ita eorum operatio à corpore pendet, vt ea terrenorum animalium; nec ita per sensum, & imaginationem operantur, vt illas; sed longè secūs: nec corde, & cerebro sunt præditi, instrumentisque sensuum, sine quibus somnus fieri non potest; nec alimentum illud metaphoricè sumptū, valet efficere somnum.

num. Solùm itaque metaphoricè, & similitudine quadam dicere possumus, Dæmones dormire, & vigilare; dū eorū vehiculū, magis, vel minùs fuerit externo humore perfusum.


Quomodo vel in statuas, vel in homines trahantur Dæmones.

CAP. XI.

EX Plotini, Ægyptiorumque sententia, Natura Maga est; ob mirum nexum rerum natura constantium, certumque ordinem earū; ex quo antipathia, & sympathia confurgit. Inde euenit, vt rerum vna à se repellat alteram, vel ad se aliam secum cōsentientem alliciat. Nam si oleo illita ligna, valēt ad se flammam trahere; Herculeus lapis, ferrum; longè admirabilior, ac vehemētior in re incorporea inuenietur attractio, ac repulsio. Et quēadmodū ea nō est violēta attractio, sed naturalis; ita lōgè minùs hęc violenta erit, sed naturalis, & volūtaria. Simul trahit quotidie mundus hic mortalis à mūdo cœlesti diuinum aliquid per naturam; & præfertim, dum fœtus in aluo mollis, certo modo contemperatus, diuinam à cœlo haurit animam. Quòd si mortalia à cœlo aliquid hauriunt, quantò magis à corporibus sibi proximioribus aliquid haurire valebunt? Hinc itaque ducit ortum vis magiæ naturalis; per quā corpora natura constantia, & spiritus, & Dæmones valent allicere: præfertim, dum ad id

efficiendum accesserit conueniens cœli, luminumque eius aspectus. Quæ Magia eatenus est naturalis, quatenus à principiis pendet per modum naturæ operantibus, & cum conditionibus propriæ naturæ eorum conuenientibus: absolutè tamen est supra naturam; cum anima, & Dæmones, supra naturam sint collocati. Sic itaque dixerunt Ægyptij, affirmarunt Iamblicus, ter maximus Mercurius, & alij; posse confici statuas ex corporum quibusdam naturis, certæ cuidam Dæmonum conditioni respondentibus, sub conuenienti cœli aspectu; quæ Dæmones traherent, ad interrogationes responderent, aliaque opera mira efficerent. Hæc Magia apud Priscos summo pere floruit, qui Dæmonum opera utebantur; vel vt, tanquam interpretes Deorum, eis diuina reuelarent; vel pro absoluendo aliquo opere, supra eorum vires collocato; vel pro cognitione rerum physicarum; vel pro miro aliquo per naturam latenter efficiendo; vel pro futuro præcognitione; & similibus. Cum enim Dæmones sint corpore liberiores, ingenio perspicaciores, prudentia sagaciores, vt Plato in Epinomide docuit, multa quæ hominem latet, lucidissimè valent conspiciere. Et quoniam Dæmones diuersæ sunt conditionis; ideo Dæmones variij, rebus variis sunt addicti: adeo, vt non iniuria Max. Tyrius asseruerit, Dæmonum quosdam exactius cognoscere pertinentia ad Artē medicam; alios, ad res metallicas; nonnullos,

nullos, ad secretiora naturæ arcana; quosdam, ad Deorum consilia; & ita de cæteris. Ex his, quæ hæctenus de Dæmonibus dixi, constat primò; Arist. sententiam de natura, operibus, & conditionibus Dæmonum, toto, vt aiunt, cælo ab ea Platonis distare: hæc enim omnia à Platone affirmantur, quæ vniuersè renuuntur ab Arist. Constat secundò, Platonem nouisse quidem genus Dæmonum; affirmasse tamen, se nil certi de eis dicere posse, cum mortalibus sint occulti: nā solo lumine fidei, procul ab errore à nobis cognosci possunt. Constat demum, quòd, cum exactè humano studio natura, & conditio Dæmonum cognosci non valuerit; iure antiqui in varias, & inanes superstitiones lapsi sunt: vel enim excogitare non valuerunt, quòd dentur Dæmones mali: vel si in malorum cognitionem per opera deuenierunt, quomodo euaserint mali, non perceperunt; vel Dæmonum delusiones, & fraudes, res serias, & diuinas existimarunt; vel demum ea, quæ humano appetitui, & menti conueniunt, Dæmonibus tribuerunt: mens enim, & appetitus, sunt duo illi pugnantes Dæmones, qui nobiscum oriuntur, & viuunt; quorū vnus ad bonum, alter ad malum ducit. Propterea nos, repulsa ignorantiae nube, abscisso cæcitatæ velo, in veritatis lumen cum nostris Theologis aciem mentis conuertamus; & ea sola constanter affirmemus, quæ dilectis suis dignatus est reuelare omnipotens Deus.



STEPHANI THEVPOLI,

BENEDICTI F. P. A-

TRITII VENETI,

ACADEMICARVM

Contemplationum,

LIBER VII,

DE NATVRA, AC DE PRINCIPIIS RE-
rum natura constantium.

Intentio, & ordo explicatur.

CAP. I.



ACTENVVS, duce Platone, præ-
cipuos lustrauius totius vni-
uersi gradus: & naturæ ordinem
sequuti, exorfi ab vno supra ea,
quæ sunt, collocato: ad mentem,
caput entis, Solemque intelligibilem descen-
dimus: mox ideas, quæ verè sunt, intuiti, ad a-
nimam deuenimus, potioresque eius partici-
pationes; nempe ad eam mundi, sphærarum,
& Dæmonum. Quapropter rationi videbitur
fortè consentaneum, vt modò de homine lo-
qui debeamus: qui naturæ ordine, ex Platonis
sententia, Dæmonum generi subordinatur,
Verum,

Verum, quia homo inter ea numeratur, quæ in naturæ manibus collocantur; verè ortui subiiciuntur; & ex corpore constant penitus mortali, naturalique generationi propriè obnoxio: necessariū esse duxi, prius de natura, deque principiis corporum natura constantium loqui; ut explicatis corporei hominis vndique principiis, cumulatiùs de eo, eiusque conditionibus verba facerem. Versati hæcenus sumus in luce, & lumine; versabimur modo in natura, quæ umbra quædam est; utinam in materiæ tenebras descendamus: quæ nedum verè non esse dicitur; immò neque etiam id valet assequi, ut fiat. Et iure quidem à luce in tenebras progredimur, cum solum per lucem nobis datum sit, ut tenebras modo aliquo intueamur. Nec mirari quispiam debet, si tam longè à vulgi sententia, communi que loquendi modo recedimus: cupimus enim, non sensu, sed ratione, & mète philosophari. Censent vulgares homines, nil esse supra corpus; & propterea solam materiam, & corpora verè esse dicunt: qua de re carpuntur à Peripateticis, qui supra materiam, & corpora, formas, animas, cœlestesque mentes reperiri affirmant. At ipsi quoque arguendi esse videntur; quatenus corporea, quæ re vera non sunt, ipsi absolutè esse affirmant: Nam apud Aristotelem ens multipliciter accipitur. Nōnunquam usurpatur in sua magna latitudine; & sic absolutè vnumquodque nomine entis denotatur. Non-

nunquam accipitur, vt contradistinguitur à primo rerum principio: in qua significatione Deus dicitur principium entis; mundus verò corporeus, ens nuncupatur: Ideo Aristoteles in 8. Physicorum 52. dixit manere ens ipsum, hoc est, corporeum mundum in seipso, & in eodem; principio enim manente, necesse est omne manere continuum cum principio. Demum accipitur ens pro composito mortali; cuius entis materia, & forma, dicuntur principia: in qua significatione Aristoteles est vsus nomine entis in primo Physicorum 69. inquiens: Vt æs ad statuum, ita materia rerum naturalium se habet ad id, quod est: In eadem quoque significatione censeo Aristotelem eodem nomine fuisse vsu in 2. Physic. cont. 1. dum dixit: Eorum, quæ sunt, quædam esse natura, quædam propter alias causas; & propterea in eo loco, non cælum, sed sola mortalia, inter ea, quæ natura constant, dinumerauit. Plato intimius considerans conditiones rerum, quoniam corporea esse umbras in fluxu collocatas optimè nouit; propriè verò, & absolutè esse, denotat quid verum, quid permanens, & constans: propterea in latitudine mentis considerauit esse, in corporibus umbram, & fluxum eius. Nam quemadmodum, qui solo corporis oculo vtuntur, sola ea esse cèsent, quæ eo vsurpantur; qualia sunt corpora: ita qui solo vtuntur oculo mentis; quo vñ præsertim sunt ter maximus Mercurius, Pythagoras, & Plato; sola ea, quæ
menti

menti respondent, verè esse cognoscunt. Et quamuis lis inter Aristotelem, & Platonem in solis verbis videatur posita: attamen ea ex rebus ducit originem: Plato enim cum nouerit ideas, rectè nouit veras, & proprias rerum formas; quas absolutè esse asseruit, easque ab umbris valuit distinguere: Aristoteles, cum ideas non posuerit, umbras à veris rebus non secreuit; sed umbras pro rebus amplexus est. Sunt itaque corporea, umbræ rerum. Neque propterea omnia corpora æquè fieri, & non esse putandum est. Nam Cælum, quia non tot variationibus subiicitur, sed solum mouetur in orbem; quamuis ratione motus, & dependentiæ per motum, dicatur fieri; attamen ob constantiam essentiæ eius, & per mansionem, modo aliquo etiam dicitur esse: adeò, vt in parte sit simile animæ; quæ ratione actionis, & motus, dicitur fieri; ratione verò essentiæ, dicitur esse,

De Natura,

CAP. II,



Vim debeamus in umbra corporum versari: quoniam eorum umbra, luminis rationum, & luci idearum respondens, est natura, vel naturæ vestigiū; iure primò de ea differendum occurrit. Conspicuum est, varias esse nominis naturæ significationes: vsurpatur enim frequenter id nomen pro quauis rerum essentia; nonnun-

quam pro conditione, & proprietate rerum; nonnunquam etiam secùs, vt ex 5. Metaph. & ex 2. Physic. apud Arist. colligitur. At cæteris acceptionibus posthabitis, accipiens modò naturam, vt contradistinguitur ab anima, & mente; illisq; subordinatur, ac famulatur; quid ea sit ex Platonis sententia, mihi declarandum propono. Variæ profectò fuerunt Philosophorum de natura sententiæ: conuenire tamen prisca sapientes in quadã communi, & confusa eius significatione; quatenus omnes id proximum principium, ex quo corporea constant, per quod intrinsecùs gignuntur, & transmutantur, videntur nomine naturæ significasse. Verùm quodnam sit id principium, vario modo explicarunt. Censuit Hesiodus, id esse terram; Thales, aquam; Diogenes, aerem; Heraclitus, ignem; Anaximander, intermedium quoddam. Sed hi longo intervallo à vero recesserunt; quoniam ea sunt cõposita, includunt naturam, & natura constât, nõ autem sunt naturæ: quod ex eo patet, quia transmutantur, gignuntur, & intereunt. Arist. proximius ad veritatem accessit: nam censuit naturam esse formam, quæ in materia recipitur, & à materia pendet; ac insuper materiam, ob propensionem, quam habet ad formam: & propterea dixit, Naturam esse internum initium motus, & quietis. Verùm exactè, quid sit natura, non manifestauit. Primò, quia natura non propriè est rei forma, vt forma; & absolu-
tè ini-

tè initium motus est, sed præsertim, vt initium generationis rerum: nam *φύσις* Græcè, natura Latinè, dicta est à *φύω* quod est nasci, & generari; vt indicetur, eam perinde generationis esse principium, ac ars, eius æmula, sit principium rerum effectibilium. Nouit profectò etiam Arist. naturam, & nasci siue generari, inter se adeò esse connexa: vt vnum ab altero deduceretur: ab exacta tamen veritatis explanatione recessit, quatenus cœsui generationē dici naturā, quia via sit in naturā; cū potius dicēdū sit generationē dici naturā, quia naturæ est opus, & à natura proficiscitur; quemadmodū effectio artificis ars appellatur, nō quia ad artem deducat, sed quia pendet ab arte; artisq; leges, & rectitudinē seruat. Nec est necesse, vt sēper nomē recipiatur à fine; quod ex eo patet, quia generatio ducit ad animam, quæ re vera non est natura. Insuper, cū Natura ad nasci præsertim referatur, minùs rectè censuit Arist. eam primò dici principium motus in loco; cū potius primò debeat censerī principium generationis rerum. Præterea materia, quæ solūm subiicitur, solūmque apta est, vt transmutetur; nequaquam debet censerī natura; sed potius naturę, tanquam artificis, materia, vel eius vehiculum: est enim ex se penitus sterilis, & nil generare valet. Præterea Arist. nexum naturæ cum anima, & dependentiam, non manifestauit; adeò, vt ex eius explanatione minimè sit conspicuus nexus vniuer-

fi, & graduum eius. Propterea rectius Plato dixit; Naturam esse vitalem, seminariamque virtutem ab anima mundi infusam materiæ. De qua rectè dixit Plotinus, id ipsum esse naturam, quod ab anima mundi est ordinatum: adeò, quòd, vt mens à Deo, anima à mente; ita natura pendet ab anima. Insuper, vt mens à Deo ideas recipit, anima recipit rationes à mète; ita natura recipit semina ab anima. Demum, vt mens à Deo, ita anima à mente, itaq; natura ab anima regitur, & dirigitur. Ex quibus primò conspicuum est, quomodo rerum gradus nectantur, pendeant, & dirigantur: Constat insuper, naturæ opera verè esse opera Dei: cùm primò ab eo omnia proficiscantur, & dirigantur: Prætereà constat, quomodo natura, quatinus proximè nil cognoscat, tamen oculatissima dici mereatur; & opera eius eminenti consilio, & providentia esse facta, iure merito dici possint. Propterea nō iniuria Plotinus Enneade tertia, naturæ insertam esse speculationem, & eius effectiones modo aliquo speculationes dici posse, existimauit.

Opinionis Platonice de Natura, clarior explicatio.

CAP. III.



Quoniam Platonis de Natura sententia, vt pulchra, & erudita; ita obscura est, & à paucis exactè explicata: Propterea pro eius lucidiori explic.

plicatione, alius nonnulla repetenda cenſeo. Ut omnia per conuenientes gradus à primo principio proficiſcantur: putandum eſt: quemadmodum ab ipſo vno cum mente, emanant idæ omnes; à mente cum anima, cunctæ rationes prodeunt: ita ab anima cū natura produci ſemina, quæ omnium rerum ſint proxima generationis principia. Natura itaque animæ ſubſternitur, & ab anima ſemina recipitur per quæ omnipara, & fœcundiſſima nuncupatur. Inſuper, Natura duplex eſt: vna præcipua, & propriè naturæ nomine honeſtanda: altera eſt, veluti vmbra, & veſtigium eius. Propriè natura, eſt vis, & poſtrema quædam vita: quæ ab anima pendet, & materiæ infunditur: Et eſt vis ſeminaria, ſeminariis rationibus prædita: per quam materia materiatis affectionibus perficitur. Hæc non eſt anima, ſed infra animam poſita, ab eaque profluens. Anima non eſt: quia non ſe mouet, ſed ſolū aliud: cū ſit propriè principium generationis alterius: nuncupatur tamen vita, quia ab anima fluit, intrinſecusque ad formandum per ſuas rationes ſeminarias excitatur; & eſt, veluti perennis actus animæ; poſtremus tamen, & in materiam tendens, ac demum eſt propriè generationis principium; generare autem eſt munus vitæ: & dicitur vita poſtrema, quia ad materiæ affectiones eius actio terminatur: & ſub ea, non alia vita, ſed qualitatum vmbraſumque eſſentia, quæ latiùs extenditur, quàm vita, re-

peritur: & postrema materia, quæ nedum infra vitam, sed etiam infra essetiam collocatur; Huiusmodi natura, ea est, cui ars conuenienti ratione respondet: vt enim ars recta sua ratione est principium effectibilium; ita hæc natura suis seminariis rationibus est principium generationis rerum natura constantium: differunt tamen; quia Ars, non in suam, sed in alienam materiam operatur; Natura verò intrinsecus in propriam materiam suas vires effundit. Hæc itaque propriè natura est; cui seminariæ rationes ita sunt insertæ, vt minime sint in ea, tanquam accidentia eius; sed potius sint ipsamet natura, & eius essentia. Altera reperitur, quæ quamuis natura sæpè nuncupetur, nō tamē propriè natura est; sed vmbra, & vestigium eius: vt enim in consideratione animæ assignabatur, & anima, & simulacrum; siue vmbra, & vestigium animæ: ita loquendo de natura dicimus, infra propriè sumptam naturam dari vestigia, & vmbra eius: huiusmodi sunt materiata formæ, siue affectiones materiæ; quæ, non principia, sed instrumenta sunt: cum enim non sint vitæ, nil generare valent; sed solum materiam reddunt procliuem; & aptam ad generationem: ideo instrumenta potius naturæ, quàm natura dici merentur; attamen ea quoque non nunquam, naturæ nomine appellantur.

*Diuisio Naturæ in vniuersalem, &
propriam.*

CAP. III.

Quemadmodum Anima, alia est totius vniuersi anima, alia verò singulorum viuentium; ita Natura, quæ animam insequitur, quædam esse dicitur vniuersi natura, quædam verò propria singulorum. Natura communis est vis seminaria, à mundi anima infusa materiæ; de qua multæ à Plotino in libro de natura, & contemplatione dicuntur. Natura verò propria, est vis seminaria, à propria singulorum anima propriæ materiæ tributa. Ex quo euenit, quòd quamuis natura vniuersalis ad omnium generationem conducat; non tamen valet generare leonem, vel equum, & ita de singulis, sine propriæ equi, vel leonis natura. Si per fundamenta, & principia Arist. vniuersalem naturam explicare vellemus; nil aliud dicere possemus, nisi quòd ea esset, vel Deus, vel Cælum, vel vniuersa caussarum series; quarum nulla, propriè natura dici meretur. Hanc enim propriè sumptam naturam, Peripatetici non cognouerunt; cum neque etiam putarint dari animam vniuersi, cuius hæc communis natura dicitur esse proles. Ex his patere potest, minùs rectè Simplicium in 2. Phys. sententiam Arist. de natura, cum sententia Platonis permiscuisse; valde enim diuersa est opinio eorum; adeò, vt consiliari minimè possint. Insuper patet, perpe-

ram sensisse Philoponum, dum in 2. Physic. dixit definitionem naturæ ab Arist. traditam, esse imperfectam: & ita debere perfici, dicendo: Naturam esse vitam, siue vim, quæ per corpora diffunditur; eorum formatricem, & gubernatricem; initium motus, & quietis; in quo est primò, & per se. Hoc cum dicat Philoponus, primò imperitè sententiā Platonis cum ea Arist. permiscet: quod enim addit, præsertim Platonicum est. Præterea definitionem, quam Arist. vult esse communem, & ipsemet communem affirmat, ita contrahit; vt non amplius sit communis, sed soli formæ conueniat. Insuper, ex communis naturæ declaratione colligi potest recta explicatio illius sententiæ, quam etiam Arist. in primò cœli 32. approbavit; quæ est, Deum, & Naturam nil frustra facere: quæ sententia, de vniuersi natura vera est; dicimus enim Deum, vt causam primam; naturam, vt vitam postremā, & causam proximam, nil frustra facere. Ex qua sententia colligitur primò, quòd si extrema nil frustra faciunt, etiam media nil frustra facere dicuntur. Insuper colligitur, opus naturæ esse opus Dei: ac, vt dicebat Plotinus, esse contemplationem quandam; quatenus est absolutio primæ contemplationis. Ex cognitione etiam naturæ communis, & animæ vniuersi, conuenientem rationem assignare valeamus generationis animalium quorundam, & plantarum, sine proprio semine eorum; sed vel ex halitibus cum humi-

humida terra permixtis, vel ex putri aliqua materia: Hæc enim carentia vita, vitam producere non possent, nisi per animam mundi, & vniuersi naturam, in ea materia inessent latentia semina viuientium: Sed iure aliquis dubitauerit, quomodo ex Platonis sententia dictum est, Naturam esse præcipuum, & verum generationis principium, & esse vim seminariam: cum ex aduerso Simplicius, qui Aristotelem per Platonem explicat, affirmet, & in secundo de naturali Auscultatione, & in secundo de Cælo; Naturam esse principium patiens, & esse propensionem quandam materiæ ad formam, & propterea inter materiam, & formam, modo aliquo mediare: Cui difficultati duobus modis satisfacere valemus. Primò, asserendo Simplicium id dicere, non de prima, & propriè sumpta natura; sed potius de umbra eius, per quam materia ad formam paratur, & procliuis redditur. Hinc in sua digressionem secundi de naturali auscultatione dixit Simplicius, propriè sumptam naturam, esse vitam postremam, & esse propriè principium efficiens proportionem respondens arti: ideo dubitauit, an de hac propriè sumpta natura verba fecerit Arist. Secundò dicere valemus, quòd etiam natura propriè sumpta, est potius idoneitas, & via ad formam; quàm propriè principium motus; quoniam esse propriè principium motus, soli conuenit animæ. Insuper, vis seminaria mediare dicitur: quatenus non est id, cu-

ius est semen, cum postrema perfectione, sed via ad illud. Accedit postremo, quòd Anima dicitur propriè principium motus in locos: Natura verò est propriè principium generationis. Et hæc satis de Natura.

De Mundo corporeo.

CAP. V.



Voniam Natura in corporibus versatur, & nobis de attinentibus ad corporeum mundum futurus est sermo: iure merito confusè primò, ac vniuersè de corporeo mundo loquemur: vt mox ad magis propria deuenire valeamus. Ordiam autem à variis mundi significationibus: vt, de quo sit sermo, magis reddatur conspicuum. Vniuersum id esse dicitur, in quo cuncta in vnum versa sunt, & quod cuncta modo sibi consentaneo includit. Et quoniam variis modis possunt in aliquo cuncta inueniri: propterea multiplex consurgit vniuersum. Nam primò vniuersum duplex est, vel incorporeum, vel corporeum. Vniuersum incorporeum adhuc multiplex est: nam vel est vniuersum solùm in eminentia, & causa: in qua acceptione ipsum vnum, hoc est, Deus, est vniuersum: vel est vniuersum in forma exemplari: sic mens prima, & singulæ subsequentes, sunt vniuersum; in singulis enim omnes rerù ideæ inueniuntur. Hoc est vniuersum, quod verè est ideale, ac intelligibile. Datur in tertio gradu vniuersum in rationibus positum, ad animas

animas pertinens: singulæ enim animæ rationis compotes, includunt rerum omnium rationes; & propterea tot sunt mûdi rationales, quot animæ. Altera ex parte vniuersû corporeû, vel per corpora extensû, multiplex est: Nâ vel est vniuersum absolutè, vel in parte. Si absolutè, hoc duplex est: nâ vel est vniuersû seminarium; & hoc est natura in vniuersa materia cõsiderata, in qua insunt semina omnium: vel est vniuersum iam ad frugé deductum; & hoc est aggregatû ex vniuersa materia, & idearum participatione. Si verò est vniuersum corporeum in parte, hoc multiplex est: nam vel est vniuersum igneum, & purum; & huiusmodi est cœlum, in quo eminentiæ, & puritates elementorum inueniuntur, redactæ modo aliquo in naturam & conditionem ignis: vel est vniuersum impurum, & tenebricosum; & hoc est mûdus mortalis, in quo cuncta inueniuntur, sed cum conditione mortali. Ideò dixit Iamblicus, in cœlo esse terrena, sed modo cœlesti; in terra cœlestia, sed modo terreno. Insuper, vnumquodque elementum, ex sentetia Platonis, est vniuersum; quoniam in singulis sunt omnia: non enim corporea elementa, pura sunt; sed denominantur à superabundanti; adeò, vt detur vniuersum æthereum, vniuersum acreum, aqueum, & terreum. Demum tot mundorum, totque vniuersorum, voluit optifex compendium, & veluti epilogum constituere; huiusmodi autem est homo, in quo sin-

guli enumerati mundorum gradus, modo homini conuenienti inueniuntur: quos cum in homine ter maximus Mercurius cōspexisset, iure exclamauit: O homo, admirabilis nature artificium. Patet, quid de mundorum gradibus, ex sententia Platonis dicere debeamus: qui per fundamenta, & principia Peripatetica, concedi omnes nō possunt: præsertim, quia Arist. nec ideales, nec rationales, nec seminarios mundos ponit; sed eos potius pro facultate variis rationibus reiecit: nec ita singula esse in cælo, & in singulis elementis existimat; ut Plato. Propterea Arist. ex enumeratis concedit mundum incorporeum, qui est omnia in eminentia: Ex corporeis, ponit mundum pro vniuerso corporeo. Insuper admittit mundum paruum, metaphoricè mundi nomine designatum: Cælum concederet esse mundum corporeū, sola eminentia cætera corpora continens; non ita tamen, ut modo aliquo formas quatuor elementorum includeret redactas ad igneam puritatem. Quare ita dissentiant, ut ratione diuersitatis principiorum conciliari nequeant.

Quomodo Mundus sit vnus.

CAP. VI



I ad nuper dicta conuertimur, variasque mundi significationes, mundorumque gradus consideramus: optimè percipiemus, mundum & vnum.

Vnum, & duos, & plures, & innumeros iudicari posse: adeò, vt à calumnia conuenienter vindicare valeamus Empedoclem; qui mundum litis, & amicitiae excogitauit: necnò alios nonnullos, qui mundos innumeros reperiri existimarunt; verè enim mudi sunt multi: quorum illi sunt maiores, & magis continent; hi minùs extèduntur, magisque indiuidui sunt. Eadem ratione, & via, gemitus Alexandri rectam rationem assignare valemus: deplorauit enim Alexand. conditionem suam, audiens plures dari mundos, cùm ipse incomparabili labore adhuc vnus imperio non fuisset potius. Inquiunt alij, causam fletus, & lacrymarum eius, fuisse desiderium imperij inanium mundorum Democriti: sed falluntur; non enim Alexander, qui cumulatè ab Arist. didicerat, vnicum esse mundum corporeum; tam crasso detinebatur errore, vt putaret dari innumeros illos Democriti mundos. Sed censendum est, eum iure luxisse; cùm contulisset hunc corporeum mundum, pro cuius assequendo imperio laborauit, cùm mundo eminenti, & diuino: nouit enim mundum hunc esse mundum mortis, & tenebrarum, supra quem dantur alij longè præstantiores; pro quorum adeptione inania sunt arma, & militaris ea disciplina, qua se cæteris antecellere manifestauit. Datur itaq; varij mūdorum ordines: in quibus, præter cætera, hoc est admirabile; vt ex omnibus, quasi ex centro, & orbibus, vnum confurgat

vniuersum; omni ex parte, cunctisque modis,
 vniuersi plenitudine, & conditionibus honestatum. Verum ex innumeris mundis vnum eligens, qui presentis est considerationis, mundum scilicet corporeum ex omnibus corporibus constitutum; assero vnà cum Platone, & Arist. eum esse vnum. Rationem unitatis eius, assignauit Plato in Timæo inquit: Vnus profectò est mundus, si modò ad vnus similitudinem est formatus, &c. adeò, vt ex unitate mundi Idealis, ostēdat mundum corporeum esse vnum. Hanc rationem paruipendunt Peripatetici, & præsertim Alexander: quia etiam hominis, equi, & aliorum, vna est Idea; & tamen multa sunt indiuidua sub specie, eam imitantia. At falluntur profectò; quoniam secus de totius idea, quàm de idea partium se habet: nam de ratione Ideæ vniuersi est unitas, ac vt vnum solum sit participans; nam idea vniuersi est quid aggregatum ex omnibus Ideis, de cuius ratione est vt non possit à multis participari: & hoc indicat Plato addens: Quod enim viuētia omnia, quæcunque intelliguntur, continet, socium alterum habere non potest: est itaque de ratione vniuersi, vt vnicum sit. Et Aristot. dum potiorem causam vult asserre, quæ cæterarum sit fundamentum, ad hanc confugere cogitur; vt patet ex mundi definitione, ac etiam ex nomine: nam & vniuersum ab eo nuncupatur, & omne, & totum, & cunctorum ordinata series, & rerum

rerum plenitudo; & magnum, ac vniuersum animal: quæ omnia indicant, de ratione vniuersi hoc esse, vt vnū sit; ideò de ratione ideæ vniuersi, id ipsum esse dicitur. Scio nonnullos ex interpretibus Arist. existimare, mundo solum repugnare multitudinem ratione materiæ, non autem ratione formæ: quos manifestè errare patet: si nomen, definitionem, proprietatemque mundi consideramus; quæ ab Aristotele explicantur. Propterea cum Platone, & Aristotele dicamus; etiam de ratione formæ mûdi esse, vt vnus sit. Præterea, mundū esse vnū, cōfirmatur ex efficiente, & fine: nā fuit ab ipso vno, & ad vnū cōuertitur, & tendit; qđ ab ipso vno, vt vnū est, fuit, vnū est; quod tendit ad vnum, & proximè ex corporibus cum vno necitur, pariter vnum esse debet. Demum ostenditur mundi vnitās à Platone, ratione sumpta à materia; quæ est causa, sine qua res non valent esse multæ: nam materia mundi, est corpus omne, sub sensum cadēs. Dicamus itaque: Quod constat ex vniuersa materia; immò id, de cuius ratione est, vt ex vniuersa materia cōstet: necessariò est vnū: Vniuersum est huiusmodi: Quare vniuersum necessariò est vnū. Arist. in 12. Metaph. 49. mundum esse vnum ex eo ostendebat; quia primum principium, primaque entelechia, vna est; nec potest esse multiplex: quæ ratio similis est rationi Platonice suprà relatæ, desumptæ ex ipso vno, à quo mundus pendet. Hæc tamen est

differentia; quia secùs Plato dependentiam mundi ab vno manifestat, quàm Arist. & magis ipsum vnum supra mūdum eleuat, quàm faciat Aristoteles.

De principiis proximis corporei Mundi.

CAP. VII.

SI à primis ordiri volumus, & Mundi principia cupimus cognoscere, primò nobis occurrit vnum, quod absolute prius principium est: mox sequuntur in omnibus recedentibus à primo, tria communia principia; infinitū, terminus, vno: succedunt tertio quinque rerum genera, siue communes efficiendi causæ; essentia scilicet, identitas, alteritas, motus, & status: quæ principia, & genera, modo quodam intelligibili reperiuntur in mundo intelligibili, modo rationali insunt in mundo rationali, demum modo corporeo inueniuntur in mundo corporeo. Ut in supernis supra corpus collocatis, ex principiis dominatur terminus, & vno; ex generibus, essentia, status, & identitas: ita in corporibus dominatur infinitum, motus, & alteritas. At de principiis loquens, quoniam priora sunt, assero cum Platone in Philebo, principij nomen propriè denotare causam efficientem: quod etiam latenter indicauit Arist. in 3. de anima cont. 19. in qua significatione absolute vnum est primum principium: Latè tamen principij nomen ad alia quoque extenditur.

In

In qua latiore significatione dicendum est, tria esse principia corporum, terminum scilicet, infinitum, commiscens; siue mensuram, incom-
 mensuratum, terminans, & magis Peripateti-
 ce loquendo, formam, materiam, efficiens; ex
 quibus consurgit genitum, siue terminatum, si-
 ue vnum: quauis voce utaris, nil refert; nam i-
 dem significatur. Efficiens proximum, & semi-
 narium, quod est mouens ab alio motum, est
 natura: quæ ab anima recipit semina rerum, &
 ea duce, ad frugem illa perducit; qualitatibus,
 vt instrumentis, materiæque dispositionibus
 utens. Terminus, & mensura, siue forma, est
 imitatio ideæ, siue eius umbra; quæ propriè
 principium non est, sed principij imitatio; nã
 idea rectiùs principium nuncupatur. Ultra ef-
 ficientem causam, & ideam, siue eius imitatio-
 nem, sequitur genus tertium, vt cum Platone
 in Timæo loquar; scilicet materia, quæ locus
 est imitationis idearum; ex quo vnâ cum ter-
 mino, compositum, tanquam Proles consur-
 git: Quæ materia Magnum, & Paruum nun-
 cupatur. Sic Arist. in 1. Physic. tribuit Platoni,
 quod pro principiis posuerit, magnum, par-
 uum, & vnum; per magnum, & paruum, deno-
 tans materiam: per vnum verò ideam, siue o-
 ius imitationem; vt ex Philebo, & præsertim
 ex Timæo colligitur. Hæc de principiis est
 Platonis sententia. At conferamus eam cum
 opinione Arist. & perpendamus, an re vera dif-
 sentiant. Arist. in 1. Phys. dimisso efficiente, &

solum loquens de principiis internis, tria statu-
 tuit generationis principia; materiam, formam,
 & priuationem. Ratio, cur tria posuerit, est: quo-
 niam de principiis loquitur generabilium, in
 ordine ad generationem: generatio est trans-
 mutatio quædam: de ratione transmutationis
 est, ut tria includat, subiectum, & duos termi-
 nos: vnum, à quo recedit: alterum, ad quem
 progreditur: hinc tria consurgunt principia,
 materia, forma, & priuatio: materia est subie-
 ctum; forma, & priuatio sunt termini: & quo-
 niam termini transmutationis debent esse op-
 positi, ideo principia rerum ab Aristotele sta-
 tuuntur opposita. Aristoteles itaque pro in-
 ternis principiis statuit materiam, formam, &
 priuationem; quæ verè tria sunt: Plato ponit
 magnum, paruum, & vnum; quæ non tria, sed
 duo principia sunt: nam magnum, & paruum,
 materiam solam circumscribunt. Insuper, Ari-
 stot. contrarietatem accipit loco principiorum
 ad formam pertinentium: Plato accipit con-
 trarietatem loco materie. Demum Aristoteles
 priuationem numerat inter principia: Plato
 eam prætermittit, & negligit. Iure itaque vi-
 dentur dissentire, & iure videtur de his om-
 nibus Plato ab Aristotele carpi. Quid itaque
 dicendum est? Affero breuibus, Platonem, &
 Aristotelem de his re vera non dissentire. Nam
 vel loquimur de principiis rem genitâ intrin-
 secus constituentibus; & sic, ex opinione vtrius-
 que duo sola sunt, materia, & forma: ut ex Ari-
 stote-

stotele patet in primo Physicorum, ubi ait, priuationem non remanere in genito; & ex Platone id ipsum patet in Timæo, & Philebo; & in hac consideratione principia non sunt contraria: vel loquimur de principiis in ordine ad generationem, considerando terminos generationis; in qua consideratione principia, hoc est, termini generationis, ex opinione vtriusque sunt contraria; ut patet ex Arist. in 1. Phys. & ex Platone cumulatissimè in Phædone: ubi latissimè ostendit, omne, quod fit, fieri ex contrario, tanquam ex termino; & ea omnia de contrarietate principiorum ibi declarat, quæ mox ab Aristotele in primo Physic. explicantur: adeò, ut de re hac nedum maximè conueniant; verùm insuper Arist. multa ex Phædone Platonis ad contrarietatem principiorum pertinentia, desumpsisse videatur. Et ad instantias: Ad primâ, dum dicitur, Plato ponit duo interna principia, Arist. tria; respondeo; Plato ponit & duo, & tria, quemadmodum Arist. duo in ordine ad rem genitâ, tria in ordine ad generationem, ut ex Phædone latissimè patet. Ad secundam, quia Plato contrarietatem ponit loco materiæ, Arist. loco formæ; dico manifestè errasse Aristotelè, dum in 1. Phys. cont. 55. loquens de contrarietate, quæ pertinet ad terminos generationis, tribuit Platoni, quòd eam statuerit loco materiæ. Nam verè Plato materiam designauit terminis includentibus oppositionem, ut in progressu apparebit; sed

tunc non loquebatur de contrarietate terminorum generationis, de qua loquebatur Arist. nam de huiusmodi contrarietate loquitur in Phædone; & eam non ponit pro materia, sed pro terminis generationis: ideo culpandus iure videtur Aristot. qui contrarietatem terminorum generationis sumpsit ex Phædone Platonis; in quo Platonem, quasi secus sentientem, carpit, & reprehendit. Ad tertium, quia Plato despicit priuationem: respondeo, quomodo se habeat priuatio ad materiam, in sequentibus apparebit: Priuatio proculdubio inter principia intrinsecus rem constituentia numerari non debet; ideo in Philebo, & in Timæo Plato eam neglexit: Quod ea sit terminus, à quo, generationis, in Phædone manifestauit; ubi terminos generationis statuit contrarios. Quare colligo, de numero principiorum internorum litem solum esse in verbis.

De Materia & Priuatione.

CAP. VIII.

AM doctè & accuratè Plato in Timæo naturam, & conditionem materiæ explicauit, ut animus rectè dispositus nil ultra valeat expetere. Accommodatissimè enim asseruit: eam esse locum, qui nunquam interit; sed omnibus, quæ fiunt, sedem exhibet: esse sinum omni dispositione, & forma denudatum; ut omnes recipere valeat. Et quoniam omnino est potestate, solum

solùm respicit aliud; & eius natura infinita penitus est, solùm maximè nata terminari ab alio: ideo, vt eius interminata, infinita quæ natura manifestaretur; vocibus infinitatem præferentibus est circumscripta: & nuncupata est magnum, & paruum; hoc est, indefinitum quoddam, natum cum angustis, tum latis terminis circumscribi. Iure etiam duabus vocibus, hoc est, binario, designata est; vt Pythagoræ sententia explicaretur, qui numerum parem, numerum quæ binarium conuenire materiæ existimauit; & iure quidem: nam, vt binarium est initium multitudinis, & diuisionis (statim enim cum ab vnitæte recedimus, in binarium labimur) ita materia cum quantitate, multitudinis, & diuisionis est origo. Insuper, vt numeri impares vnà iuncti, eandem semper constituunt numeri figuram, quadratam scilicet: numeri verò pares, semper diuersam: ita materia, quasi numerus par, distinctionis, & multitudinis est mater. Demum magnum, & paruum, optimè circumscribunt, nedum naturam; sed etiam interminatas dimensiones, quæ materiam semper comitatur. Præterea, quoniam vniuersa latitudo eius, quod est, consideratur in formis, vel vmbreis earum; & quoniam materia est infra hanc latitudinem, & solùm vmbrearum est capax; ideo iurè verè non ens, infra ens, & exemplar diuinitatis expers, nuncupatur. At non propterea est nihil; adeò, vt, quæ ex materia fiunt, absolutè ex nihilo fieri; & ex

nihilo, tanquam ex parte cōstare dicantur: est enim non ens, quia est infra latitudinem formæ; attamē est locus, & vehiculum umbrarū. Perpendamus, an iure Plato ab Aristot. reprehendatur, vt pertinet ad conditionem materiæ: nam in quinque ab Aristot. carpi videtur. Primò carpitur in 4. Phys. quia materiam existimauerit esse locum: secundò carpitur in primo Phys. quòd materiam dixerit esse non ens: tertio, quòd eādem statuerit cum priuatione: quartò, quòd eā asseruerit esse contrarietatem: postremò, quia Arist. asserit materiam malam, & fœminam ex euentu, & ratione priuationis: Plato verò per se, cū materiam à priuatione non seiunxerit. At facile est ab huiusmodi calumniis vindicare Platonem. Ad primum dico, materiam esse locum, non corporum, neque rationum, siue idearum; sed formarum, siue participationis earum; nam multiplex est locus: Materia est locus metaphoricè, vt ab eodem Arist. in 3. de anima cont. 6. intellectus dicitur locus formarum intelligibilium. Ad secundam obiectionem patet solutio ex dictis: iam enim explicauimus, quomodo materia à Platone non ens nuncupetur. Ad tertium, dum ei obiicit Arist. quia priuationem à materia nō seiunxerit; Plotinus pugnans pro Platone asserit, re vera materiam à priuatione nō seiungi: non enim seiungitur subiecto, vt idem Aristot. fatetur; non ratione, quia non distincta vtriusque est ratio; sed vnum per alterum defini-

finitur. At si rem accuratè perpendimus, nec Arist. rectè carpit Platonem, nec Plotinus rectè eum defendit. Primò Arist. non rectè carpit; quoniam Plato materiam, & priuationem, non rem eandem existimauit: sed in Phædone manifestàs, omne, quod sit, ex contrario fieri, rectè indicauit priuationem esse terminum à quo, non autem subiectum generationis. Insuper in Timæo, cùm dixerit, materiam esse locum, qui nunquam interit, & esse denudatam omni forma; rectè manifestauit materiã à priuatione distingui: nam priuatio interit in aduentu formæ; & non dicitur denudata, & priuata, nouit itaque Plato, materiam esse quid distinctum à priuatione. Quod manifestissimè colligo ex dialogo, qui Lysis, siue de amicitia inscribitur: vbi manifestans, quæ requiruntur ad appetitionem, ostendit ea esse tria scilicet appetibile, vt bonum; appetens; & oppositum appetibilis: & manifestat, non oppositum appetere suum oppositum: sed subiectum, quod neutrum est, occasione vnius oppositi in eo existentis, appetere alterum. Ex quo patet, Platonem seiunxisse priuationem oppositam formæ à materia; & materiæ assignasse non quale, siue negationem. Plotinus, qui pro Platone disputans, nititur ostendere materiam à priuatione nō distinguī ratione, etiam minùs rectè sentire videtur: quamuis enim in definitione vnius alterum accipiatur, non propterea definitione sunt

idem, cum vtriusque assignetur diuersa definitio. Priuatio enim est absentia formæ in materia, cum facultate ad eam recipiendam; materia verò est subiectum non habens formam, & natum eam recipere. Errauit Plotinus, quia nō distinxit negationem à priuatione; nec rectè nouit, quæ sit ea priuatio, quæ ab Arist. inter principia ponitur. Ideò cum Plato dixerit in *Lyfide*, non quale appetere quale; & in *Timæo* asseruerit, materiam sine sensu tangentis tangi; hoc est, per negationem cognosci, & de ea negationes esse veras; Plotinus loco priuationis consideratæ ab Arist. negationem, & nō quale considerauit; quæ negatio, non est quidem essentia materiæ, sed de ea verè dicitur: verè enim materia nō est ex sui natura homo, non est cælum, non formata; at non propter eā est ipsa negatio; sed est id, de quo negatio verè dicitur: non autem priuatio ita se habet; priuatio enim non verè dicitur de natura materiæ: nam materia non est ex sui natura alba; non autem ex sui natura est priuata albedine; quoniam si ex sui natura esset priuata albedine, non posset eius natura cum albedine conseruari. Seiunxit itaque Plato materiam à priuatione; solum dixit, de materia, ex sui natura, veram esse negationem; vt etiam *Themistius*, & *Alexander* ex sententia Arist. rectè explicarunt. Ad quartam obiectionē, quia Plato sumpsit contrarietatem pro subiecto: Respondeo, cum non sumpsisse pro subiecto contrarietatem
termini.

terminorum, de qua loquebatur tunc Aristot. sed solum subiectum designasse per voces indicantes naturam, & conditionem quandam infinitam; & interminatam. Ad postremam instantiam, quia Plato materiam dixit per se malam, & expetere contrarium, patet solutio: nam Plato materiam à priuatione seiunxit: ideò non asseruit eam esse per se malam, quia sit priuatio: sed solum esse per se malam cum negatione: quoniam de eius natura, vera est negatio. Immò Plato in Lyside cumulatissimè id declarauit, quod mox Aristot. in primo Physicor. 81. breuissimè ex propria sententia profert: declarauit namque Plato, non malum appetere bonum: sed id, quod neutrum est, ob mali sensum, appetere bonum, tanquam inelam. Sed de hoc infra latius agam; dum considerabo, an materia sit bona, vel mala.

Quomodo Materia cognoscatur.

CAP. IX.



Quoniam Materia, Diuinitatis est expers, propria idea est destituta; & solum aliud est, siue infinitudo, aliteritas, & locus capax imaginis idearum: propterea per se intelligi nata non est: sed quemadmodum ceteros actus, ita actum cognitionis aliunde recipit. Cognoscitur primò materia per negationem; & iure quidem, cum de ea veræ sint negationes, vt patuit. Hunc cognitionis modum manifestauit Plato in Ti-

R

mæo inquiens, materiam sine tangentis sensu tangi: nam ad eam conuersa animi acies, perinde se habet, ac oculus corporis ad tenebras. In hoc cognitionis genere cõuenit materia cū Deo; nam Deus quoque negatione cognoscitur: & iure conueniunt, quia ambo extrema sunt. At differunt; quia negatio in Deo oritur ex perfectione, & eandem manifestat: de Deo enim agentes, negationi superaddimus, quòd sit quid eminentius; Deus non est cœlum, sed cœlo eminentior: non anima, non mens; sed aliquid supra mentem, & animam: Materiam explicantes, econtra negationi addimus quid infra: nam Materia non est anima, sed infra animam; non est natura, sed infra naturam; & ita de singulis. Sic etiam Arist. in 10. Metaph. vnà cum Platone dixit, materiam negatione cognosci. Dum materia per negationem explicatur, non est putandum, eam esse puram negationem; est enim pura negatio graduum formarum, non autem pura negatio absolute; alioquin nil prorsus esset; ideò putandum est, eam in negatione cum quadam affirmatione esse positam; quam subindicamus, dum addimus, sed aliquid infra. Et propterea non ita se habet anima, dum materiam considerat, vt dū nihil intelligit; dum enim nihil intelligit, asserit id nihil esse: non sic de materia dicit. Propterea Scotus, dum materiæ tribuit actum illum, quem entitatum appellat; rectè sentit, & cum Aristotele, & cum Platone: at minus rectè

rectè loquitur. Non enim apud Arist. propriè dicitur actus; nec apud Platonein, aut actus, aut entitativus; sed cùm de materia aliquid affirmare debeamus, ne videatur penitus nihil, ad eam affirmationem cõuenienter ducimur per analogiam: quam rectè, & convenientissimè formamus, respiciendo ad transmutationes, & formas, quibus ea subiicitur. Cognitionem materiæ per analogiam, manifestavit Plato in Timæo inquiring, eam adulterina ratione vix opinione percipi posse. Cognitione per analogiam, posita est in convenientia plurium rationum: nō enim cognoscere materiam per analogiam, est cognoscere materiam per respectum ad formam, vt multi censent: qui enim hoc dicunt, verè indicant se ignorare, quid sit analogia, & quali methodo cognoscatur materia. Explicatur autē materia per analogiam vario modo: veluti, dum à Platone nuncupatur locus, nuncupatur sinus informis, species inuisibilis, binarius, Sylva, Mater mundi, nutrix formarū, & similibus vocibus; quæ cùm per metaphoram tribuantur materiæ, ad analogiam rediguntur: metaphora enim est quædam analogia, vt dixit Arist. in Rhetoricis. Ex quo patet, licere etiam in scientiis nonnunquam, ratione difficultatis rei, vti metaphoris. Præsertim tamen materia per analogiam explicatur; dum similitudo, & convenientia rationis, sumitur ex materia rei artificiosæ: idcirco dicimus; vt lignum se habet ad lectum, &

materia rei artificiosæ, ad rem artificiosam; ita materia rerum naturalium, se habet ad ea, quæ natura constant. Sic itaque per negationem, & analogiam ducimur in materiæ cognitionem; analogia est nobis familiarior, negatio verior; analogia remotius, negatio intiniùs nos ducit ad eam; quatenus post analogiam etiam dicimus materiam, nec locum, nec matrem, nec nutricem absolutè esse; sed solum ei similem. Ex utrisque itaque modis consurgit integra nostra cognitio materiæ, quæ cognitio est omnium infima: nec unquam rectè dicemus, materiam per se à nobis cognosci; cum materia careat idea, ratione, & notione, quæ intellectum formare valeat.

*An Materia sit genita, & Mundi generationem
antecedat.*

CAP. X.



Anichæi Materiam primam, non secus ac Deum, existimarunt esse initium primum, à nullo pendens; cætera verò omnia à Deo, & à materia pendere: ita tamen, ut bona penderent à Deo, mala verò à materia; inter quæ duo boni & mali principia, perennis vigeret pugna; & in nonnullis vnus, in aliis alterius appareret victoria. Stoici cum Manichæis in hoc conueniunt, quod materiam asseruerunt esse initium primum, ab alio non pendens; quæ ita patiendi esset principium, ut Deus agendi, & mouen

mouendi: dissenserunt tamen; quia materiam, non malam, sed mediam, & indifferentē nuncuparunt. Hi, quatenus conuenerunt, longē recesserunt à vero: cū enim materia bonum appetat, bonum quærat, ad bonum conferat, ad bonum dirigatur; vt ab ipso bono pendeat, necesse est: nam quærūt bonum ea solū, quæ pendēt à bono. Accedit, quòd ipsum bonum, non absolutē ei dominaretur, nisi ab eo absolutē penderet: Cū itaque bonum absolutē debeat dominari materiæ; est necesse, vt materia ab eo pendeat, & sub eius facultate posita sit. Ad demum, vt vniuersum optimē sese habeat, vnicus esse debet Princeps eius: vt Princeps verē sit vnus, est necesse, vt cætera omnia ab eo pendeant: Pendet itaque materia ab ipso vno; ab ipsoque bono; cum quo insolubili nexu iungitur; & admirabili catena imaginum, seminum, rationum, idearumque ligatur. Pendet ab ipso bono, tāquam ab efficiente per emanationē materia, quo ad esse suum; nam ab eo pendet, & formator omnium, & formabile: at quo ad actum, proximē pendet à participatione idearum. Materia antecedit corporeum mundum, non tempore, sed origine: nam emanauit materia vnā cum forma: quæ emanatio, quo ad esse materiæ, terminatur primò ad materiam; quò verò ad actum, terminatur primò ad formam, siue imaginem formæ: Primum, sine mediō inat à Deo: alterum verò, mediante idea; cuius forma exi-

stans in materia, est participatio. Inquit Plato, quod materia, ante ordinem, & generationem mundi, fluctuabat, & inordinate mouebatur: quæ sententia est vera, cum de materia prima, tum de materia proxima mundi; immo Plato eam profert de materia proxima, quæ sub sensum cadit: qui inordinatus, & fluctuans motus, negationem & priuationem potius denotat, quam motum verè contrarium ordinato. Et id à Platone dicitur; vt manifestetur, quid conueniat materiæ ratione propria, vt materia est; & quid ei conueniat munere opificis, & formæ: Materia enim, & sensibilia corpora, seorsum ab anima mundi, confusè, & sine ordine mouentur; hoc est, penitus carent ordine, decore, & perfectione. In eadem quoque consideratione valemus concedere Chaos ante mundi compositionem: quatenus materia primò, in reliqua corpora, ad quæ prius origine terminatur generatio, quam ad formam mundi; sunt ex se confusio, inordinatio, terminorum priuatio: quæ mox per mentem componuntur, terminantur, rediguntur in ordinem. Ideo iure de Chai inordinatione cecinit Ouidius:

Hanc Deus, & melior litem natura diremit.

Melior autem illa natura, per quam Chaos in ordinem fuit redactus, Mens Diuina fuit. Colligens itaque dico, materiam ab ipso Bono manasse, & recepisse id esse, quod ei conuenit; & Mentem recepisse ordinem; ab Anima motum

à Na-

Natura proximè formari; demum per imitationē ideæ, intrinsecus perfici, & terminari.

Conditiones nonnullæ materiæ.

CAP. XI.

Quoniam Diuina Mens, rerum omnium formis est decorata, apprimè est fecunda; summopere est nata efficere, suæque perfectionis umbras aliis impartiri; quod fieri non poterat sine comuni aliquo subiecto, quod effectiōni subiiceretur, umbrasque idearum reciperet: propterea necessaria fuit materia. Et quoniam id, quod pro receptione optimè est paratum, debet nil recipiēdorum in sui natura includere; iure materia omnino nuda, omnino egena esse debuit; vt splendidissimè posset indui, nulla ratione formanti resisteret, & ex summa eius indigentia, mira opulencia cōsurgeret. Nuda itaque penitus formis est conditio materiæ; & propterea dicitur exemplar diuinitatis expers. Insuper, quod omnino, & maximè debet pati, & perpeffionis aliorum futurum est initium; omni efficiendi facultate debet esse destitutum; materia, huiusmodi esse debuit: iure itaque, vt primum efficiens nulla ratione patitur, ita primum hoc subiectum nil valet efficere: & iure Diana sterilis nuncupatur, ex cuius sterilitate eximia fecunditas consurgit. Præterea, quod omnibus figuris circumscribi, omnesque terminos susci-

pere debet; ut cunctis careat, necesse est: iure itaque materia, magnum, & paruum; ac insuper infinita, vel potius infinitudo nuncupatur. Neque propterea cum Stoicis, & plurimis ex antiquis putandum est, materiam esse corpus; nam si corpus esset, iam formam haberet, nec esset nata recipere omnes: habet tamen materia dimensiones sibi coæternas, termino destitutas; ratione quarum nuncupatur magnum, & paruum: adeo, ut primò consideretur natura materiæ; mox participatio dimensionum, & quantitatis. Dum cogitamus, magnitudinem aduehire materiæ; non est putandum, ut per eam tunc materia, quasi ex angusto, ac indiuiduo loco, in latum extendatur; nullibi enim ita contracta considerari potest in materia: sed solum est dicendum, quod cum prius quantitate careat, mox eam habet. Imaginamur tamen nonnunquam materiam, quasi dimensionem quandam inanem; & propterea nonnunquam, cum ab Arist. tum à Platone, vacui nomine designatur. Iure pñimum omnium quod in materia recipitur, moles est; nam per molem redditur diuidua: & cum diuidatur, valet simul per varias partes, omnes formas recipere, & cuncta fieri; quæ fieri non potuisset, si indiuidua permanisset. Partes itaque materiæ, insequuntur quantitatem: non autem quantitatem antecedunt, ut minus rectè nonnulli ex Latinis existimarunt; qui partes substantiæ, quantitatem antecedentes exco-

gita-

gitarunt. Insuper, cùm materia per molem partes habeat; quæuis eius pars, quæ mortales recipit vmbra, cùm simul non valeat fieri omnia, temporis successione omnia fit: Dico, quæ mortales recipit vmbra, vt portionem præcipuam eius excludam, cœli forma honestatam; in qua simul facultate, puritate, & eminentia quadam, omnia continentur. Sic itaque materia, virtute suæ naturæ, fit omnia: virtute quantitatis, recipit modo diuisibili. Demum, cùm materia per interminatam molem nuncupetur infinita; non est putandum, vt ita sit infinita, vt superet omnes terminos: sed è cōtra infinita dicitur; quia infra omnes terminos collocata, nullum ex illis habet, & cunctos recipere valet; adeò, vt ratione opposita Deus, & materia nuncupentur infinita. Deus est infinitus, exuperans terminos omnes; materia è contra infra omnes collocatur: propterea, vt materiæ conuenit terminari; ita Deo maxime repugnat. De huiusmodi materiæ conditionibus, nulla profectò inter Arist. & Platonem lis est, sed summopere in sententia conueniunt vt etiam conueniunt de attinētibus ad potentiam materiæ: de qua cùm plurima dicantur ab expositoribus Aristotelis,

nil vltra esse dicendum censui,
ne in re morarer
in finities
acta.

An Materia bona, vel mala censeri debeat.

CAP. XII.



Enfuit Pythagoras ex Numenij relatione, materiam esse malā: & propterea ita esse initium malorum, ut Deus bonorum: id ipsum Manichæi postea existimarūt: asseruere Stoici materiam esse neutram, & indifferentem: Aristoteles dixit eam esse per se bonam, ex euentu malam: ut per se est ens, ex euentu non ens: Plato, non bonam, non malam; sed necessariam, & ordinatam in bonum, esse censuit. Sic itaque varie de re hac videntur esse opiniones: quæ tamen intimiùs consideratæ, respiciendo ad diuersa, omnes conciliari modo aliquo possunt. Nam mala, & noxia est materia cū Pythagora, prauitate nō pro forma sumpta, sed pro negatione vniuersi formosi boni: insuper est mala, ratione priuationis ei iunctæ; prauitate non formali, sed in priuatione formarum posita: præterea est mala, sumendo prauitatem pro origine impotentia, & deprauationum rerum: nā inquit Plato in lib. de Regno, à primo conditore ordinem, & ornamenta omnia pendere; à deformitate verò materia, omnia incommoda. Insuper, materia cum Stoicis indifferens est; quia omni caret forma, & oppositarum æque est capax. Tertiò materia cum Aristotele bona est per se, intelligēdo bonum pro gradu suæ essentia: quod bonum conuertitur cum ente latè sumpto; sic erit mala solū ex euentu,

euentu, hoc est, ratione priuationis ei iunctæ. Demum cum Platone; immò cum eodem Aristot. materia nec bona, nec mala est; intelligendo nomine boni id, quod tale est per formam; sed est necessaria, ordinata in bonum, bonumque appetens. Ac vt exactiùs rem explicemus, & sententiam simul Platoniam, & Peripateticam aperiamus; dicamus materiam posse in multiplici gradu considerari: primò enim eam consideramus, quo ad attinentia ad eius essentiam; secundò, eam referimus ad formas, quibus caret, & recipere valet: tertio eandem referimus ad formas, quas iam habet. Materia in prima illa notione est bona, quatenus est; accipiendo bonum, vt conuertitur cum eo, quod modo aliquo est. Insuper est mala, per negationem formæ: Deinum est neutra, quia nullam habet formam, nec dispositionem. In secunda notione materia ex se neutra est; ratione potentia, est bona potestate; ratione priuationis, est mala per priuationem. In tertia notione, cum iam sit adepta formam, iam est adepta bonum; quamuis ipsa, bonum non sit: materia enim bonum, & formas recipiens, non fit bonum, sed bono potitur; non fit forma, sed ea ornatur; cum omnia, quæ recipit, sint aliena à sua natura, non ei opposita; non eam constituentia, sed eam ornantia: adeò, vt colligere valeamus, materiam fieri omnia, nunquam tamen à se recedere. Postremò, quia materia fit omnia, non verè, sed adumbratè; ac in

ea, quasi in antro recipiuntur, non formæ, sed formarum imagines: iure ea quoque inter recipientia infima est, proportionem respondens umbris, quas recipit; à quibus nos in terræ antro collocati deludimur, cum ea verè esse putemus; nec vnaquam nos decipi animaduertimus, quousque anima in corpore sopita, non expergiscitur; & caput suum vnà cum mente supra cælum attollens, aciem ad verè entia nō conuerterit: in qua conuersione nos cætera negligentes, exclamamus; Vanitas vanitatum, & omnia vanitas.

Quomodo Numeri, & Figuræ sint initia rerum.

CAP. XIII.



Pythagoras, quem, vt Deum, excoluere multi, & Plato summopere est imitatus; ex numeris res constare, ac numeros esse essentias rerum existimauit: id ipsum frequenter quoque de Geometricis figuris, ac superficiebus affirmauit: Propterea etiam Plato, sæpe ex numeris, frequenter ex Geometricis figuris, res componi asseruit. Dicebat Pythagoras, Par, & Impar, Quadratum, & altera parte Lōgius, cum aliis ab eo enumeratis contrarietatibus, esse principia rerum. Præsertim tamen id munus tribuebat numeris; quoniam numeri magis seruant conditionem principij, quàm figuræ; cū
numeri

numeri sint priores Geometricis magnitudinibus, & figuris; immò cum figuræ Geometricæ in numeros; vt in principia resoluantur. Præterea, quia numeri sunt priores, & à materia magis seiuncti; conuenientiùs animæ, & menti respondent, quàm Geometricæ figuræ: è contra figuræ Geometricæ, quoniàm magis seruant conditiones materiæ, aptiùs respondent materiatis rebus: ideo rectiùs abiuncta, per numeros, corporata, per Geometricas figuras explicantur. In Mente non Geometricæ considerantur figuræ præterquam in eminentia numerorum; solùm ibi vigent originales numeri: in Natura præsertim figuræ inueniuntur; in Anima media, & numeri, & figuræ considerantur; numeri tamen dominantur. Hæc cum dicantur à Pythagora, approbentur à Platone, damnentur ab Aristotele; pro veritatis notitia, & Peripateticarum instantiarum repulsione, considerandum est: Pythagoram, & Platonem, non adeò fuisse mentis inopes; vt putarint; re vera ex Geometricis figuris, Arithmeticeve numeris res naturales constare; quemadmodum iis sæpe obiicit Arist. manifestissimè enim Plato Mathematicas disciplinas in accidentibus versari, neque præcipua rerum initia cognoscere, in sexto de R. P. & in 7. nec non alibi affirmavit. Lucidissimè etiam Pythagoras distinctionem numerorùm, in numerantes, & numeratos cognouit: & propterea, dum figuras, & numeros esse initia rerum di-

xerunt; id in triplici significatione pōtēst cēferi verum. Primò, intelligendo nomine numeri, & figurarum, non numerum Arithmeticum ab anima constitutum, vel externam figuram; sed numerum substantialem, ac figuram indiuiduam, & exactissimam; quę in ideis vigēt, priores sunt anima, & reliquorum sunt initia; de quibus cumulatissimè in libro de Ideis verba fecimus. Secundò, eadem sententia vera est analogicè, ratione convenientiæ in proprietatibus, & conditionibus. Et hoc lucidissimè ex eo colligimus; quia cū Plato vniuerso Orbi; & simplicibus corporibus putauerit conuenire figurā orbiculatam; & propterea moueri in orbem, in Timæo asseruerit: Attamen respiciens mox ad proprietates, asserēbat; Vniuerso, conuenire figuram duodecim facierum; Igni, pyramidem; Terræ, figuram cubam; & sic de cæteris: in qua significatione dixit Arist. in 8. Metaph. cont. 10. definitiones, & essentias rerum, perinde ac numeros se habere. Tertiò, vera est eadē sententia, respiciendo ad numerum; non quidem Arithmeticum, & numerantem; sed numeratum externarum rerum: in qua significatione dixit Arist. in primo Cœli, & in secundo de Partibus animalium, Naturam multa perficere numero ternario; quatenus perfectio rerum proximè in tribus est posita, in principio, medio, & fine. Hæ tres explicationes, quamuis primo aspectu videantur diuersæ; attamen interius consideratæ, ita se

se habent, vt vna ex altera pendeat: ex numeris enim idealibus ortum ducunt, tanquam imitationes, & vmbrae, numeri rerum numerati, ac numerorum proprietates; quas nos deinde per numeros numerantes, vt nobis notiores explicamus: Quibus explicandi modis iure merito viri hi sapientissimi utebantur, Pythagoras, & Plato. Illi enim primò accuratam rebus mathematicis nauabant operam: nam optimè cognoscebant, ingenia per huiusmodi disciplinas conuenienter parari ad inquirendum in scientiis illud exactum, & exquisitum, quod eis conuenire potest; ad percipiendam vim demonstrationis; ad gradus abstractionum à materia, sine quibus nemo exactè philosophari valet. Propterea præcipiebat Plato, ne quis mathematicarum ignarus, in Academiā ingrederetur. Mathematicis itaque disciplinis Pythagoras, & Plato imbuti; cuncta veluti per res sibi domesticas, & familiares; & veluti per res, quæ cunctis rebus conuenienter aptari possent, per mathematica explicabant. Et id etiam propterea libenter efficiebant; vt disciplinas, quas diuinum munus esse cognoscebant, seorsum à vulgi contagione solutas, purioresque conseruarent; & solis puris, solutisque animis eas patefacerent. Et iure etiam vtimur numero, pro denotanda rerum perfectione: nam ex numero numerato confurgit conueniens ordo, ratio, proportio, & consonantia rerum. Ex hætenus explicatis


patet primò, numeris vario modo conuenire
 virtutes: patet secundò, numeros, & figuras
 esse, & non esse principia rerum; demum
 constat, litem Aristotelis cum Pla-
 tone, & Pythagora, his de re-
 bus, esse in verbis, non in
 sententiâ.



FINIS LIBRI SEPTIMI.

STE.





STEPHANI THEVPOLI,

BENEDICTI F. P. A.

TRITII VENETI,

ACADEMICARVM

Contemplationum,

LIBER VIII.

DE PHYSICIS CORPORIBVS SIN-
gillatim consideratis.

De primis corporibus. CAP. I.



VONIAM iam ea sunt explicata,
quæ vniuersè ad mundi corpo-
rei declarationem pertinebant;
ac insuper nota sunt simplicia
principia mundum, & partes e-
ius constituentia: reliquum est, vt de cunctis
corporum gradibus verba faciam; & sigillatim
conditiones, & naturam eorum considerem;
à primis, quæ elementa nuncupantur, exor-
diens. Prima vniuersum constituentia corpo-
ra, ex quibus cætera per mixtionem cōficiun-
tur; partim quatuor, partim quinque, iudicari
possunt. Quatuor sunt; quatenus omnia, vel
ad aerem, vel ad ignem, vel ad aquam, vel ad

terrâ rediguntur. Insuper, sunt quinque; quatenus in aere magnam puritatis, & impuritatis differentiam consideramus: ob quam Plato in Timæo, & Epinomide, cœlû dixit ignem; aerem puriorem sub cœlo collocatum, quem Arist. hyppeccauma, siue fomitem incelsionis nuncupauit, dixit ætherem; sub quo aerem, aquam, & terram collocari cognouit. Rectius tamen prima corpora statuenda sunt quatuor, quàm quinque; quoniam ea quinque in quatuor deinum rediguntur. Dari elementa corporea, adeò conspicuum est, vt superuacaneû sit ostendere. Pariter ea esse quatuor, sensu, & experientia certiùs cognoscimus, quàm ratione: attamen, quod primò sensu cognoscimus; mox ratione, cùm physica, tum mathematica comprobare valemus. Sensu cognoscimus elementa esse quatuor; quia in sola quatuor, non in plura, resolui iuxta omnia cognoscimus: ac insuper nobis ad ordinem eorum in vniuerso conuersis, sola quatuor subordinata, & verè distincta corpora sese offerunt. Quem numerum ratione physica comprobamus: nā mundus est specierum, & graduum omnium plenitudo; ideò tot in eo inueniuntur primæ corpora, quot modis primæ qualitates sine pugna complicari possunt: id autem solis quatuor modis contingit fieri; vt Arist. in secundo de ortu, & interitu manifestauit: propterea quatuor sunt corpora prima. Præterea, id ipsû ostenditur medio sumpto à grauitate, & leuitate;

tate: nam rationi est consentaneum, ut detur corpus maximè graue; detur aliud summe leue: ita etiã detur graue in respectu & leue in respectu. Demum ratione mathematica numerus elementorũ quaternarius ostenditur: cum enim Elementa sint corpora conuenienti pportione pro mundi cõstitutione prædita; in quib. duo extrema considerantur, quæ mediis ligari debent: & quoniam media, quæ conuenienti ratione ligant solida, necessariò duo sunt, ut mathematici ostendunt: ideo necesse est, ut duo dentur elementa intermedia, ex quibus vnũ cum extremis quatuor consurgunt. Media autem, quæ geometrica proportionẽ duo solida ligant, debere esse duo, manifestè pater in numeris: nam primus numerus solidus, est 8. secundus est 27. qui duo solidi numeri per 12. & 18. geometrica proportionẽ, quæ sesquialtera est, ligantur; dicimus enim ut 27. ad 18. ita 18. ad 12. & 12. ad octo. Quatuor itaque sunt prima simplicia corpora, arcto nexu colligata; quæ denotantur per quatuor primas corporum proprietates: quæ sunt; solidum, denotans terram; continuum, aquam; perspicuum, aerem; & visibile, ignem. Demum constat prima corpora debere esse quatuor, ex plenitudine numeri quaternarij; in quò totus denarius, qui est plenitudo numerorũ, includitur. Propterea Pythagorici plenitudinẽ aliquam designaturi, numero quaternario utebantur: & iure iurando testabantur, Naturæ perpetuò

fluentis fontem esse quadruplicem. Hinc ortum ducunt quatuor anni tempora, quatuor vniuersi prima pūcta, quatuor humores, quatuor simplicia temperamenta, & sic de multis. Prætereā, quemadmodum mundus spiritalis, & incorporeus, ex quatuor constat; ex mente non participata, ex mente participata, ex anima, & ex natura: ita mundus corporeus, ex quatuor primis corporibus constare debet, proportionē eis respondentibus; nam ignis, supremæ menti: aer, menti participatæ; aqua, animæ; terra, naturæ, proportionē respondēt; quorū omnium caput, & princeps est Deus. Hæc prima & insignia corpora, mundum constituentia, elementa nuncupantur: sed tantum abest, vt elementa sint, vt neque etiam sint. syllabæ; quemadmodum eruditè dixit Plato. Verè enim elementum, est id, quod est primum; vt in 5. Metaph. docuit Aristoteles: Hæc nuncupata elementa, multiplicem compositionem includunt. Primò enim constant ex materia, & participatione formæ. Secundò, in singulis singula, saltem ratione proprietatum, inueniuntur. Hinc asserimus in vniuerso elementa pura non inueniri: neque id est contra naturam, sed maximè consentaneum naturæ elementorum. Primò; quia puritas est affectio rerum à materia seiunctarum. Secundò; quia, vt in rebus incorporeis omnia sunt in omnibus, ita de corporibus se habere debet; corporea enim pro facultate imitantur incorporea,

rea, à quibus pendent : ac cùm ita se habeant : vniuersum magis seruat, nedum in toto, verùm etiam in singulis partibus naturam, & conditionem vniuersi. Tertiò; quia de ratione elementi, vt est elementum, hoc est, vt in alio inueniatur. Postreminò; quia elementa viuunt, viuentia ex omnibus elementis constare debent, iure itaque in singulis elementis inueniuntur omnia; denominantur tamen per id, quod exuperat, & dominatur. Quòd elementa pura non sint, etiam fatentur Peripatetici; at dissentiunt: primò, quia negant ea esse animata: secundò, quia censent prima corpora esse, non quatuor, sed quinque; cùm statuunt cœlum omnino distinctum à natura elementorum. De prima dissensione egi, dum verba feci de animis spherarum; de altera in sequenti capite futurus est sermo.

An Cœlum sit essentia quinta, penitus distincta à natura quatuor elementorum,

CAP. II.



Cœlum est corpus, omnium opinionone, eminentissimum, & diuinissimum, omniumque consensu, sedes Deorum: quod vt maximè à sensibus nostris distat; ita nobilitate excellit, & cum difficultate cognoscitur. Putarunt primi Philosophi, eandem cœli, & mortalium esse materiam; & solùm differre cœlum à mortalibus puritate, & impuritate; ideo dixerunt Ægyptij, cœlum esse humorem concretum;

Diogenes, esse aerem puriorem; Heraclitus, esse ignem; Stoici, ardorem mobilem; Pythagoras, flammâ: Plato Pythagoram sequutus, stellas censuit esse non vrentes ignes; & cœlū præsertim esse ignem, constare tamen ex eminentiis omnium elementorum. Iure materia cœli, & mortalium, eadem censi debet; natura enim superuacaneis non abundat: si promundi constitutione vna materia est satis, nō duæ sunt statuendæ. Insuper, quia vniuersi opifex vnus est; opifici autem, & efficiēti respondet recipiens, & patiens; cū vnus sit opifex, est necesse, vt etiam recipiens & patiens ei primò respondens, vnum sit. Confirmatur: quoniam, nisi huiusmodi commune subiectū esset vnum; profectò vniuersum non esset maximè vnum, maximeque iunctum, & complicatum. Præterea, cū mundianima sit vna, vnus sit vniuersi finis; quomodo sola materia, cui minùs est nata conuenire distinctio, adeo est diuisa, vt in vnā communem non redigatur? Statuamus itaque cum Platone, & cum omnibus priscis sapientibus; materiam cœli, & mortalium esse eandē. Aristoteles frequenter asseruit eam esse diuersam; sed procul dubio minùs rectè sentit; ratione enim, & sensu eam esse eandē cognoscimus; ratione quidem, vt iam patuit: sensu verò; quia eadem accideṁtia in cœlo, & mortalibus conspiciamus; vt lucem, perspicuum, quātitatem & similia. Simplicius volens Platonem cum Aristotele conciliare,

ciliare, quia Aristoteles manifestissimè statuit materiam cœli esse diuersam, dixit etiam ex opinione Platonis diuersam esse. At in re conspicua manifestè lapsus est: nullibi Plato eam esse diuersam indicauit; nullibi, nisi vnam, explicauit materiam primam. Lucidissimè in Timæo dixit, hanc primam materiam, communemque sylvam, ignitam, humefactam, ceterisque qualitatibus affectâ: ignem, terram, & reliqua prima corpora cōstituere: Sic cœlū dixit ignē, & stellas animalia ignea nuncupauit. Est itaque materia cœli, & mortalium eadem; nec potest Plato cum Aristotele conciliari. Quæ cum ita se habeant, perpendamus: an cœlum censeri debeat essentia quinta, distincta à natura quatuor elementorum. Architas, & cum eo Arist. primi fuerunt, qui cœlum à quatuor elementis penitus seiunxerunt; & illud essentiam quintam, nil commune vniuo cum habentem cum mortalibus affirmarunt: vt rectè Porphyrius retulit. Vtitur Aristoteles præsertim fundamento à motu sumptō; præaccipiens, omnem simplicem motum alicui simplici corpori conuenire, & vnicuique simplici corpori cōuenire simplicem motum: ex quo infert, cum elementa per naturam moueantur motu recto, cœlum verò moueatur in orbem; qui est motus diuersus à recto, nobilior, & præstantior eo; iure cœlum esse corpus à quatuor elementis distinctum, eminentius, & præstantius illis. Id ipsum confirmat in

primo Meteororum ex eo: quia, si cœlum esset
vnum ex quatuor elementis, nulla inter cœlū
& reliqua elementa seruaretur ratio; & pro-
pterea iam cœlum cætera omnia consumpsis-
set, & in sui naturam conuertisset. Demum id-
ipsum ex eo confirmat; quia nulla in cœlo, vel
cœli partibus conspicitur permutatio; cū e-
contra elementa quatuor omnia, sint variis
permutationibus obnoxia. Afferuit itaque A-
ristoteles, cœlum esse quintam essentiam, om-
nino distinctam à quatuor elementis. At re-
ctius Plato cum antiquis sapientibus, cœlum
sola puritate ab aliis distingui existimauit; iam
enim ostensum est, cœli, & mortalium eandem
esse materiam, & sola esse quatuor prima cor-
pora; propterea nō potest statui essentia quin-
ta penitus distincta. Præterea, cū stellæ, vt
flammæ, luceant; cū radij earum, flammam
generent; cū tam manifestè mortalia cale-
faciant; cū cœlum qualitates elementorum
producat; proculdubio & esse verè calidum,
& includere puritates, & excellentias elemen-
torum putandum est. Afferere, quod cœlum
ea efficiat per mōtum, vt asserit Aristoteles; ra-
tioni, & sensui est aduersum. Sensui; quia fre-
quenter percipimus, longè vehementius, &
velocius moueri corpora prope nos; nec pro-
pterea ita calefacere corpora alia, nec ea ita ca-
lesceri, vt calefiunt à cœlo. Insuper sentimus,
ex contactu æstiuo radiorum Solis, vehemē-
ter corpora nostra calefieri: quod minimè cō-
tinge.

tingeret, nisi in radio inesset caliditas; nec in eo caliditas inesset, nisi cœlum actu calidum esset. Aduersatur rationi: quoniam motus, quī est actus mobilis à motore pendens, & est generatio quædam, solū per se ad id perducit, ad quod motor suapte natura expetit perducere mobile: propterea motus in loco, per se deducit ad loci acquisitionem: quòd si inde sequatur, vel calefactio, vel qualitatis acquisitio: id solū est ex euentu. At putare, hæc mortalia à cœlo solū ex euentu pendere, & calefieri, alienum est à ratione; cū calor à cœlo diffusus, omnia seruet, cūcta foueat, omnibus vitam impartiat, omnium generationes absoluat. Cū itaque hæc à primis motoribus, & mobilibus per se, non ex euentu intendantur, debent etiam per se produci: vt autem per se producantur, est necesse cœlum esse calidum; vt mox suo calore cūcta purget, seruet, ac perficiat,

Solutio Dubitationum,

CAP. III.



Ensent Peripatetici, rationes Aristot. contra Platonem omnino cogere; esse ostensiones insolubiles, necessitateque præditas; at dum intimiùs perpenduntur, satis leues, & facilè solubiles inveniuntur. Vt autem id manifestè appareat ex operibus conspicuis caloris; colligamus primò, mun⁹ caloris esse, aliena secernere, purga-

re, & purgata ad superna tollere. Cùm itaque
cœlum, supernum sit corpus, cætera purgans,
seruans, & secernens; iure censeretur debet cali-
dum, omni terrena sorde purgatum, ignis ni-
tidus, & refulgens: in quo tamen cæterorum
elementorum conditiones, & proprietates, si-
ne impuritate, & in eminētia inueniantur. Sic
dicimus cœlum esse ignem, ac insuper ex pu-
ritatibus elementorū omnium constare. Cœ-
lum est ignis, ratione dominantis; & quia in
eo cætera ad puritatem ignis sunt redacta, &
elevatoria. Insuper, cœlum constat ex omnibus
elementis, & in eo omnium elementorum ex-
cellentia inueniuntur; quatenus in eo insunt
eorum omnium conditiones: nam primò est
visibile, & lucidum; quod ignis est proprium;
est leue, & continuum; quod ex aqueo humi-
do pendet: est solidum; quod pertinet ad ter-
ram; est perspicuum; quæ præsertim aeris di-
citur esse conditio. Non itaque cœlum est es-
sentia quinta, vt cēsuit Aristoteles: Est tamen
in hac significatione essentia quinta; quoniam
in eo adeò cuncta sunt ad puritatem redacta,
vt iam diuersum ab impuritate cæterorum iu-
dicari mereatur. Ad rationes Aristotelis, facilis
est solutio. Nam ad eam ex motu sumptam di-
co, motum primum, & simplicem, vnum esse,
nempe orbicularem; non duos. Nam motus
rectus non est simplex, cùm sensim reddatur
velocior: non est secundum naturam elemen-
ti, quoniam non ei conuenit in proprio loco:
nec

nec ei conuenit sua completa natura, & perfectione prædita; sed tendenti ad eam: nec ei conuenit seorsum à violentia constituto; sed extra proprium locum per violentiam collocato: non itaque secundum naturam iudicari debet, sed potius reditus in naturam; vt cum Platone, Ptolomæus, Hipparchus, & alij viri sapientes nouerunt. Præterea, cum omnis motus secundum naturam, debeat redigi ad aliquem motoré, qui ex propria conditione illū appetat, & intédât; motus rectus nequaquam talis iudicari potest. Ná quæro, motus rectus à quo primò proficiscitur? Nempe, vel à natura, vel ab anima. Non à natura: quoniã ea, quamuis sit generationis principium; tamen in ordine ad motum in loco, est initium, per quod res moueantur; non auté est principium mouens; vt cum Plat. confitetur etiam Arist. in 8. Phys.: 2. loquens de motu elementorū. Quare motor, qui primò mouet, debet esse anima, nō autem natura: Et si est anima, & ea quidem rationis particeps, qualis est ea elementorū; ea, suapte natura, & conditione, in orbem est nata mouere. Iure itaque motus primus propriè conueniens elementis, est motus in orbem: & præsertim hoc dicere debemus, cum ostenderimus, elementa esse animata, & eorum animas esse eiusdem cōditionis cum anima mundi, & cœlorum; quæ cum moueant in orbem, iure elementa, non motu recto, sed in orbem per naturam esse nata moueri, censendum.

est. Ex quo patet, ostensionem Arist. falso innixam esse fundamento. Et dum vlteriùs addebatur; Si cœlum esset vnum elementorum, nō seruaretur ratio inter elementa: Respondeo, rationem optimè seruari. Primò, quia in omnibus omnia sunt. Secūdò, quoniam igneum seruans, fouens, & purgans, dominari debet; & ex dominio non sequitur consumptio aliorū, vt censuit Arist. sed potiùs sequitur conseruatio: quoniam cœlū adeò est igneum, vt simul purè includat omnia; & ignis eius sit vitalis, fœcundus, saluber, & seruatrix omnium. Philoponus in 1. Meteororum, & in disputationibus contra Proclum, soluit hanc eandem Aristotelis rationem per id; quia aucta mole, non augetur gradus qualitatis. Sed ea solutio non satisfacit: quoniam, vt rectè ei obiicit Simplicius; etsi non augeatur gradus; augetur tamen vis efficiendi, ex maiore extensione formæ, & numero partium confurgēs: Non itaque exactè, vt censeo, fundamenta solutionis manifestat. Sed eum dimittamus, & ad postremam Arist. confirmationem respondeamus. Dicebat Arist. nullam in cœli essentia apparere permutationem, nec in toto cœlo, nec in parte. Respondeo, id euenire ex puritate eius corporis, ex eius excellētia, ex magnitudine; & quia nihil extra se habet, à quo lædatur; ac insuper ex anima; quæ cū magis ei dominetur, & magis cum ipso vno coniungatur; valet illud ab omni permutatione, & interitu seruare incolu-

colume: His postremò accedit voluntas opificis: quæ, nexus est cæteris firmior, & insolubilior, vt inquit Plato in Timæo.

An Plato de quinta Cæli essentia debeat cum Aristotele conciliari.

CAP. IIIL



Væritur iure merito, num Aristot. cum Plat. de quinta cæli essentia conciliari debeat. Simplicius in primo cæli, necnô in secundo ait, eos in sola voce, minimè in sententia dissentire; nâ, inquit, etiam ex opinione Platonis, cælum esse quintam essentiam; quod confirmat: quia Plato quinque ponit animantium genera; terrena, aquea, aerea, ætherea, & ignea: pariter quinque ponit corpora prima: insuper in Epinomide asserit, quinque esse figuras primas, respondentes primis quinque corporibus; & propterea prima corpora esse quinque, non quatuor solum: demum, quia in Timæo se declarans, quid denotet nomine ignis, dum inquit cælum esse igneum; ait se lucem denotare, non autem comburentem ignem; ideo asserit, oculorû orbes esse participes eius ignis, qui non vrit quidem; sed illuminando suauiter, diem inuehit mundo. Non itaque Plato verè censuit in cælo ignem inueniri. Sed cùm hæc dicant Simplicius, & alij nonnulli, qui Simplicio adhærent; manifestè decipiuntur. Primò Simpl. aduersatur Aristoteli, cùm dicat

Cæli

in primo cœli com. 6. necnon 20. cœlum esse
 animatum; & propterea esse mixtum, & mo-
 ueri per id, quod dominatur in eo: nam si mo-
 uetur cœlum per id, quod dominatur: ergo in
 eo reperietur dominans, & id, cui dominatur,
 & consequenter oppositio partium compo-
 nentium cœlum; quod maximè Arist. iudicat
 absurdum. Insuper, tunc motus eius non esset
 omnino simplex, vt nititur ostendere Aristo-
 teles in primo cœli. Præterea, si cœlum ex eo,
 quia est animatum, deberet esse mixtum, vt
 asseritur in secundo de anima, referente eo-
 dem Simplicio: quia in secundo de anima, a-
 nimatum dicitur verè mixtum, ac insuper in-
 strumentarium; cœlum deberet esse verè mix-
 tum, & instrumentarium; quæ quàm longè
 distent à sententia Aristotelis, vnicuique est
 conspicuum. Propterea dicamus, Aristotelem
 in secundo de anima solum loqui de viuenti-
 bus mortalibus; & Simplicium perperam
 putare, ea quoque debere conuenire cœlo ex
 opinione Aristotelis, quæ mortalibus con-
 ueniunt. Præterea Simplicius in suo con-
 cilio etiam aduersatur Platoni. Primò; quo-
 niam, ex Platonis sententia, omnia simpli-
 cia corpora mouentur per naturam in orbem;
 vt in præcedentibus apparuit: ideo non est
 dicendum, quod cœlum moueatur in orbem,
 ratione dominantis solum. Præterea manife-
 stissimè Plato, vt in præcedentibus manifesta-
 ui, eandem cœli, & mortalium iudicauit esse
 mate-

materiam : de qua inquit in Timæo ; Generationis nutrice[m] ignitam, & humefactam, terræ item, & aeris formas fuscipientem, passionesque horum pedisse quas perpetientem, omniformem aspectu videri, &c. Vult itaque Plato, primam materiam, omnium esse communem; & vnâ cum affectionibus recipere formas elementorum; nec alia prima corpora ponit, præter quatuor enumerata. Quod manifestè indicat per verba subsequencia, in-
quiens; In operis huius exordio Deus ignem primò, terramque creauit: sed duo solùm absque tertio quodam commodè cohærere non possunt, mediumque aliquod vinculum vtrorumque desiderant. & post pauca; Qua ex coniunctione ita constitutus est mundus, vt aspici, tangique possit: propterea ex huiusmodi rebus numero quatuor, mundi corpus conflatum est. & post pauca; Quatuor igitur, earum rerum quamlibet integram, mundus accepit: ex omni quippe igne, aere, aqua, terra, eius faber ita ipsum composuit; vt nullam cuiusquam istorum partem, aut vim extrâ relinqueret. Ex his manifestissimè patet, Platonem sola quatuor prima corpora in vniuerso posuisse: & essentiam quintam simplicem, genere distinctam ab aliis, nec excogitasse quidem. Non itaque rectè sentiunt Simplicius, Ioannes Picus, Diacetius, Maynettus, & alij; qui Arist. in solis verbis de re hac dissentire à Platone affirmant, in sententia autem conuenire;

sed longè rectiùs vtriusque opinionem explicarunt Plotinus, Porphyrius, Taurus, Philoponus in tertiadecima disputatione contra Proclum cap. 15. & alij; qui re vera eos differtire existimârunt, nec putarunt posse conciliari. Ad fundamenta pro parte aduersa relata, non est difficile respondere. Ad primum; dum dicitur, Platonem quinque ponere animantium ordines, & quinque prima corpora; patet solutio ex ipsomet Platone in Timæo; ubi aerem in partem puriorem, quam nuncupat ætherem, & minùs puram distribuit: & in Epinomide id ipsum manifestat; nam quem Aristoteles incensionis fomittem sub cœlo positum appellat, Plato nuncupat ætherem; & sic ponit quinque animalium ordines, quâuis prima corpora absolutè solùm dicat esse quatuor. Ad fundamentum sumptum ex primis quinque figuris, respondet Philoponus in disputat. 13. contra Proclum cap. 18. inquit, Platonem tribuere figuram illam quintam duodecim facierum; non quinto corpori, quintæue essentia; sed vniuerso ex omnibus conflato; vt patet ex ipsomet Plat. in Timæo, inquit enim: Est & quinta quædam compositio; qua Deus ad vniuersi compositionem est usus; eaque descripsit, & figurauit. Sic itaque Plato, & simplicib. quatuor corporibus, & vniuerso, propriam figuram tribuit. Nam mundi, & simplicium corporum duplex potest assignari figura: vna, quæ sit terminus magnitudinis eorû:
altera,

altera, quæ naturam, & propriam eorum conditionem, per analogiam, ac proprietatū convenientiam nobis patefaciat. Si de prima loquimur; cœlum, & simplicia corpora omnia, sunt orbiculata, & rotunda; & iure quidem; nam hæc est figura prima, absolutissima, apprime simplex, & consimilium partium, apprime capax, aptissima corpori in orbem mobili; conuenientissima animæ eius, quæ iuncta menti in orbem mouere nata est: quæ figura exquisitissima conuenit cœlo ob puritatem, & præstantiam eius; minùs purè conuenit alijs. Arist. quoque eiusdem est sententiæ; hæc tamen est differentia: quia Arist. elementa sub cœlo posita, non ex se, sed à solo cœlo figuram recipere existimauit: Plato verò cognoscens elementa esse animata, & per naturam suam esse nata moueri in orbem, vel in suo loco requiescere; etiam nouit elementa, nedum à cœlo eam figurā recipere, & ex propria propensione in suum locum; verum etiam ex sui natura, vt sunt animata, mobiliaque in orbē. At si loquimur de figura, cuius cōditiones respondent conditionibus corporis, cui tribuitur, easque patefaciunt; sic diuersorum corporum diuersæ figuræ sunt. Nam Terræ conuenit figura Cubæ; proportionē respōdens conditioni terræ, ineptissimæ ad motum, aptissimæ ad quietem, & ad mutuam permutationem cum cæteris minimè accommodatā. Igni conuenit Pyramis; nedum, quia tenuis est,

T

acutus, ad perforandum maximè aptus; verùm in super, quia est apprimè levis, & mobilis: quæ omnia per Pyramidein aptissimè explicatur. Aquæ, & Aeri, quoniam in enumeratis conditionibus media sunt, iare figuræ mediæ conueniunt; Aquæ, Icosedra; hoc est viginti facierum; Aeri, Octedra, facierum octo. Vniuerso conuenit figura duodecim facierum; tum ob duodecim mundi sphæras; tum ob duodecim cœli signa: tum demum, quia hæc figura, ita intercentum, & sexaginta triangulos scalenos resoluitur; vt cœlum in tercentum, & sexaginta gradus. Ex his patet, rationem ex quinque primis figuris depromptâ, minimè nobis aduersari. Et longè minùs aduersatur postrema, dum dicitur, quòd Plato manifestat, ex quali igne constet cœlum; & quòd non constat ex igne, qui flamma sit; sed ex luce, quatenus est corpus lucidissimum. Ad hoc dico, Platonem puriori, eminentiori quæ igni lucem tribueres. & propterea per lucem eius proprietatem, puriorem ignem circumscribit: immò cum dicat oculos nostros esse participes cœlestis ignis; verè indicat, cœlum non esse diuersæ naturæ à mortalibus; sed posse à mortalibus participari, & sola puritate ab eis differre.

De Cœli compositione.

CAP. V.



Ristoteles statuens cœli materiam diuersam ab ea mortalium, nec videns in cœlo mutationem aliam vllam, præter motum in loco: censuit

suit cœlum solùm constare ex motore, & mobili: adeò, vt mobile esset simplex corpus; motor verò esset mens, siue intelligentia, siue anima eius: quouis enim nomine, vtāmur, nihil refert; semper enim eadem motoris natura denotatur. At Arist. nimiùm imperfectè cœlum resoluit; imperfectè quidem, cum ratione mobilis, tum ratione motoris. Nam si ad mobile conuertimur: quoniam includit materiam omnium corporum communem; ideo necesse est, vt in ea, etiam forma, siue formæ participatio inueniatur: & propterea inest in cœlo compositio ex infinito, & termino; siue ex materia, & participatione ideæ, vt etiam in aliis corporibus. Insuper, vbi hæc compositio inuenitur, etiam reperitur alia ex quinque generibus; ex essentia scilicet, identitate, alteritate, motu, & statu. Præterea, quoniam singula simplicia corpora, modo quodam cætera includunt; idè etiam in cœlo inueniuntur puritates omnium elementorum, reductorum in conditionem, & naturam ignis: conuenienti nexu, & proportionem iunctorum. Si deinde ad motorem conuertimur: primò, præter naturam mobilem, consideratur compositio ex mobili, & anima mouente: insuper, adest compositio ex anima, & participata mente; supra quam est mens non participata, & ipsum vnum. Diminutè itaque Aristoteles, exactè Plato, cœlum in sua componentia, & principia resoluit: qui compositionis gradus, vt in cœlo, ita in reli-

quis elementis inueniuntur; puriores in cœlo, in aliis impuriores. Ideo iure Proclus in Timæum, Aristotelem de diminuta resolutione cœli in sua principia reprehendit. Et quamuis in cœlo solum appareat permutatio in loco; & compositio ex motore, & mobili: tamen huiusmodi compositio, cæteras omnes præsupponit. Insuper, quamuis simplicia omnia corpora, ex anima, & corpore constet; attamen conuenienti ratione, nec terra, nec aqua, nec aer, animalia dicuntur. Primò, quoniam animæ illis potius adsunt, quàm insint; vt potius adesse, quàm inesse statuis, dicuntur Dæmones: id eò, vt ob id statum non dicuntur animalia; ita nec elementa ob suas animas. Præterea etiam id euenit, quia latet ea esse animata; ideo vulgò animalia non nūcupantur: at sapientiores, ea esse animata, & modo quodam animalia, percipiunt. Demum, quia animalis nomen his vulgò tributum est, quæ ante oculos versantur, sensu tactus sunt prædita, ac instrumentis vitæ inseruientibus sunt decorata: huiusmodi non sunt simplicia corpora: & ideo, quamuis eis adsit anima: attamen animalia vulgò non nuncupantur. Ex quo patet, leuem esse instantiam Aristotelis contra Plato-

nem in primo de anima, dum dixit:

Non dicere animal id, cui
conuenit anima,
absurdum
est.

De gradibus Animalium simplicibus corporibus respondentium.

CAP. VI.




Vemadmodum sphaeræ inferiorū corporum, refertæ sunt suis animalibus; pariter & cœlum sibi cōuenientibus animalibus est decoratum: quæ eò præstantiora sunt, quò cœlum mortalibus corporibus præstat; & eò magis eis debet esse refertum, quò corpus illud fecundius, & vitalius est cæteris omnibus. Sic dantur quinque animatium gradus, quinque simplicibus corporibus respondentes: quod in duplici significatione verum est. Primò, ratione Dæmonū: nam dantur Dæmones ignei, ætherei, aerei, aquei; & terrei, modo iā in præcedentibus explicato. Secundò, ratione diuerforum viuentium, & incolarum: dantur enim pecudes, iumenta, & homines, qui sunt incolæ terræ; pisces, aquarum; volucres, aeris; Dæmones, præsertim ætheris; Dij, ignis. sic stellæ, & cœli, visibiles Dij sæpe nuncupantur: sunt enim stellæ absoluta quædam corpora, anima propria prædita, per quam motu distincto ab eo sui orbis cientur; quamuis longè secus sentiat Aristoteles, qui solo motu sui orbis stellā moueri censuit. Et Simplicius volens motum illum proprium seruare etiam cum Aristotele, manifestissimè errauit: summopere enim aduersatur verbis, & rationibus Arist. Vt pro motu vniuersi cœli, non sunt necessaria instru-

mēta motui inferuientia; ita neque pro motu stellarum. Propterea valde leui in secūdo cœli vtitur ratione Aristoteles; dum ostendit stellas proprio motu non moueri, quia carent pedibus, cæterisque instrumentis motus: non enim, vt anima moueat id corpus, cui maximè dominatur, eget instrumentis; & præsertim, dum mouet in orbem. Insuper, quamuis Arist. in secundo de Generatione animalium cap. 3. dicat ignem nullum generare animal: tamen sententia eius, non de omni igne vera est; sed de eō, qui est combustio, & flamma; non de vitali, fecundo, & cœlesti igne: qui tantum adest, vt vitæ aduersetur; vt potius fons, & initium vitæ cæterorum, censeri mereatur. Sed obicit Platoni Arist. in 2. de cœlo. Si cœlum eget animata necessitate, detinente illud natum secūs moueri; eius anima, æterna premeretur miseria: primò, quia laboraret pro detinendo corpore nato secūs moueri; secundò, quia nunquā à corpore abiungeretur, & nunquam sortiretur dispositionem optimam, quæ animæ conuenit in separatione à corpore ex sententia Platonis: vt eidē Platoni obicit Aristot. etiam in primo de anima 49. inquit: Laboriosum autem est, & commixtum esse corpori, ita vt non possit absolui, & adhuc fugiendum: siquidem melius est intellectui, non cum corpore esse: vt consuetum est dici, & multis placet. Sed huiusmodi instatiæ, ex sententia Platonis rectè percepta, inanes iudicantur,

tur. Nam cœlum, & mundus dicuntur esse nata secus moueri; nō quidem propriè, nec quia ad oppositum, vel ad alium motum sint procliuia, & violentia detineantur; sed solum id est verum cum negatione; quatenus illū motum, & ordinem, non ex se habent; sed ab alio recipiunt; & propterea simplicia corpora, ante mundi productionem, fluctuare, & inordinatè moueri dicebantur. Insuper cœlestia, cū sint solubilia, dicuntur diuina voluntate detineri, ne soluantur; vt in præcedentibus declaratum est: quæ minimè est violentia contrariæ naturæ; sed diuina, supra naturam, & naturæ apprimè salutaris. Insuper, anima mundi, & cœlorum, quamuis semper sint coniunctæ cū corpore; attamen simul etiam sunt seiunctæ; coniunctæ cum mente, & supra cœlum eleuatæ; in qua eleuatione beantur semper, & æterna felicitate fruuntur.

De motu Cœli.

CAP. VII.

œlum moueri, & motum eius esse in orbem, conueniunt profectò viri sapientes: at in attinentibus ad eius motum, varix occurrunt difficultates. Quæritur primò, cur cœlum moueatur in orbem. Dicendum est, multiplici de causa id euenire; nam primò id euenit ratione mobilis: cū enim cœlum sit rotundum, motu in orbem inobili respondente debuit moueri:

insuper, cū cœlum sit corpus primum, & præstantissimum; motu primo, & præstantissimo moueri debuit; huiusmodi est motus in orbem: præterea, cū cœlum nunquam debeat mutare locum, sed semper in eodem reperiri, ne violentiæ subiiciatur, iure solum debuit in suo loco reuolui. Secundò, ratione finis: nam motus cœli debuit esse in orbem: vt posset esse vnus, æternus, & continuus: insuper, vt omnia in eodem ordine, & gradu conseruaret; eaque intra se ambiendo perficeret: præterea, vt vnà statum, & immobilitatem primi principij patefaceret: cœlum enim, & mundus, quamuis moueatur, tamen vnà cum motu seruantur immobilia: insuper, vt motus cœli esset velocissimus; motus enim in orbem, velocissimus est: demum, vt esset magis similis, & partibus præditus exacta proportionē iunctis. Tertiò, ratione efficientis: nam initium motus est anima mentis compos, anima motu quodam transeunte nata est mouere; ac ob nexum cum mente, quæ mens in se conuertitur, & orbem cōstituit, mouet in orbem: insuper, ob nexum cum primo principio ita mouet; quæ enim cū primo principio nectuntur, pendēt ab eo, redeuntque in illud; ex quibus spiritalibus conuersionibus pendet primò cœli, & mundi rotunditas; mox confurgit hæc cœli corporea conuersio. Aristoteles in primo de anima, in cont. 45. & sequentibus, inuehitur in hanc Platonis sententiam. Primò
cum

eum carpit: quia cū anima non sit magnitudo, non est prædita rectitudine, & reflexione in circulum; hæc namque sunt affectiones magnitudinis. Præterea, si Plato reflexionem, & circulum intellectus refert ad eius intellectiōnem, hoc etiam rectè dici non potest. Primò, quia intellectio est ex vno in aliud: & se habet, non vt continua magnitudo; sed vt numerus consequenter se habens, ex indiuiduis constans: & si continua fuerit, non est continua, vt magnitudo; sed vt actio. Præterea, si anima rationalis est circulus; & intelligit per contactum, tangēdo indiuiduum aliquod; quomodo circulus valet tangere vnum indiuiduum? Præterea, intellectio non videtur posse dici circulus; quoniam vel est intellectio ad actionem dirigens, vel ad contemplationem: si ad actionem; in ea consideratur principium, & finis à principio distinctus; nam actio finis est; & propterea non est conuolutio: si intellectio dirigat ad contemplationem; in attinentibus ad scientiam, principia & fine distincta sunt; principia sunt definitiones, scibile autem est affectio de subiecto; quare in ea quoque intellectiōne non reperitur conuersio, & circulus. Quòd si dicimus in intellectu inesse circulum per repetitionem eiusdem, hoc quoque dici non potest: quoniam dum intelligimus, non in circulum infinities repetimus idem. Accedit, quòd intellectio, & syllogismus, potius est similis cuidam quieti, & statui, quam

motui: quia intellectio, in termino, & fine posita est; & nobis conuenit requiescentibus, sedatisque animi perturbationibus, non motis. Propterea addit in cont. 50. Latet autem causa, cur cœlum in orbem feratur: neque enim animæ substantia causa est, quod cœlum ita feratur; sed ex euentu ita mouetur, &c. Hæc, & similia sunt, quæ Aristoteles contra sententiam Platonis affert: per quæ minimè euertit eam; sed solum manifestat, quæ à Platone tribuuntur animæ, vel intellectui, esse vera, tanquam de causa, & per translationem; non autem propriè: & hoc libentissimè concedunt Platonici, qui ad solam proprietatum conuenientiam respiciunt. Et hoc nedum faciunt Platonici, verum etiam ipsemet Arist. qui in 8. Metaph. cont. 10. ait, rerum essentias perinde se habere ac numeros; & in 3. de anima cont. 10. intellectionem quandam dicit similem lineæ rectæ, aliam circumflexæ: & in lib. de sensu & sensili, communem sensum centro circuli ait, esse similem; id ipsum facit & alibi: & iure quidem; nam incorporea valde latet: propterea metaphoris, & similitudinibus à re corporea sumptis explicanda sunt. Sic itaque rectitudo, & conuersio, ratione diuersorum consideratur in anima: nō quidem ea corporum; sed spiritalis, ei corporū conuenienti proportionē respondens. Et dum addit Aristoteles, intellectionem non esse similem circulo, & id ipsum ostendit: proculdubio de vno loquitur

Plato,

Plato, ad aliud respicit Aristoteles. Considerat Plato præcipuam rationalis animæ intellectiōnem; quæ est per reditum animæ in se, & nexum rationum cum ideis; qui nexus dicitur metaphoricè tactus; ratio autem, & idea, sunt indiuiduum, quod tangitur; in qua operatione cōsideratur circulus, cū ratione intellectiōnis, tum ratione appetitus. Ratione intellectiōnis: quia mens in seipsam intelligendo conuertitur; & anima mentem imitans, in se, & in mentem, vt in principium, reflectitur: qui contactus, conuersio, & reflexio, in cœlorum animis continua sunt, absque vlla temporis intermissione; immò supra tempus eleuata. Præterea adest circulus, ratione appetitionis; quoniam eximio quodam affectu, anima in mētem, mens in se, & in ipsum vnum reflectitur: propterea eodem quoque affectu, & desiderio, orbem; cui absolutè anima dominatur, ab eodem ducit ad idem; vt effectus pro facultate suæ causæ, suoque principio similis sit. Et quamuis intellectio aliqua ex parte sit similis statui, & requietis; attamen latè sumendo motum, primò in mēte est motus, pro transitu ab esse ad agere, & pro perfectione intelligentis ab intelligibili saltem ratione distincti: in anima adhuc magis propriè, & cum maiori alteritate seruatur motus; ob maiorem distinctionem rationum, & progressum ex vna in aliam: Sic itaque intellectio, aliqua consideratione motui; alia verò statui, & requieti

similis est. Sed Aristoteles secus sentiens de Ideis, de rationibus, de modo intelligendi, ac demum de compositione animæ; iure merito de adnexis, & pendentibus ab his, secus sentit, & secus loquitur. Rectè itaque cum Platone dixit Plotinus, animam cœli mouere in orbem; quia mentem imitatur, quæ in seipsam conuertitur.

An Cœlimotus sit naturalis.

CAP: VIII.

QUoniam cœli motus, & à natura, & ab anima, & à mēte pendet; propter eā variis conditionibus est præditus, variisque denominationibus denotari potest. Primò cœli motus à natura pēdet; à qua hoc recipit, vt cœlum sit natum ita moueri, & sit procliue ad illum motū; per quam naturam, & facilitatem, siue propensionem, motus ille naturalis dicitur: Vt verò ab efficiente, & proximè mouente, pēdet ab anima; à qua habet trāsitum ex vno in aliud, fluxum, & operationem suę naturali inclinationi congruentem; per quam animam motus ille animarius nuncupatur: Remotè pendet à mente, tanquam à dirigente, & tanquam ab ea, quam anima nititur pro facultate imitari; à qua mente motus cœli habet, vt semper sit sibi consimilis, & æternus; vt in lib. de Regno asseritur. Sic itaque in cœlō motus naturalis, animarius, voluntarius, mētalis, siue diuinus,
in

in idem veniunt; nec superuacanea, immò necessaria est ea principiorum subordinatio. Aristoteles etiam motum cœli, & à natura, & ab anima, & à mente prouenire affirmat; sed lōgē secūs, ac id faciat Plato; cū de natura, de anima, & de mente cœlorū, secūs sentiat. Duplex præsertim in cœlo apparet motus, vn⁹ ab ortu in occasum, alter è contra ab occasu in ortum. Aristoteles hos esse motus duos in obliquum sibi oppositos, nedum censuit, sed etiam ratione comprobauit in 2. lib. de Cœlo; causamque attulit, cur eo duplici motu moueatur cœlum. Plato de eo agens, tanquam de re dubia, ancipitem nonnunquam se indicauit: dubitauit enim, num re vera Planetæ eo duplici motu mouerentur, vt est communis sententia; vel potius vnico mouerentur, & viderentur nobis duplici motu moueri, ob tardiores quorundam orbium reuolutionem. Plato opinionem primam communiorem, & magis vulgarem censet; alteram iudicat veriolem: Ideo in Epinomide dixit, octauam sphæram nuncupari mundam supernum, & moueri ab ortu in occasum, cæterosque orbes secum trahere; vt hominibus pauca de iis scientibus videtur, &c. Sic vulgarem dixit esse eam sententiam; quòd primum mobile, secum trahat alia, quæ sint nata ex se moueri in oppositum. Insuper, prope calcem 7. de Legibus inquit. Non est, & viri optimi, vera hæc de Sole, & Luna, cæterisque stellis opinio, quòd vnquam pererrent;

sed contrà se res habet: eandem enim quoduis illorum viam, non multas, circumeundo peragit; quamvis videatur per multas ferri. Quod verò in eis velocissimum est, non rectè tardissimum, & contrà contrarium iudicamus, peccareque ita opinantes patet. Nam si in Olympico ludo, cursu certantes spectaremus; & velocissimum tardissimè, tardissimū velocissimè currere prædicaremus; laudibusque vicisse victum caneremus; non placerent, ut arbitror, laudes nostræ cursoribus. Nunc verò cū de Diis similiter peccemus, nonne ridiculi sumus; similiterque aberramus à recto? &c. Per hæc verba videtur indicare Plato, cœlos omnes ab ortu in occasum moueri: illū vetò, quem iudicamus esse motum ab occasu in ortum, re vera motum non esse; sed solū retardationem quandam. In Timæo tamen asserit moueri duplici motu; & motum ab ortu, nuncupat motum identitatis; alterum, diuersitatis; adeò, ut manifestet vtramque sententiam posse defendi, & vtramque modo aliquo esse rationi consentaneā: nos autem de rebus dubiis nil certi decernere debemus, ne Platoni duci aduersemur. Quod autē dixit Plato de motu cœli in lib. de Regno, dum asseruit; Vniuersum hoc aliàs Deus ipse regit, agit, atque rotat; aliàs verò dimittit, cū mundi circuitus competentia sibi curricula temporis expleuerunt. Mundus verò vltro, ac libero cum motu contrà reflectitur, &c. Hoc, inquam, &
alia

alia consimilia, quæ de alternatione motuum
cœli ibi dicuntur, allegoricè intelligi debent;
non autem, vt verba extrinsecùs significare vi-
dentur. Et proculdubio præclara mysteria mi-
ra arte solertibus ingeniis eo in loco latenter
indicantur; & præsertim ea, quæ pertinent ad
duplicem hominis ortum: quorum vnus est
corporis, & fit regnante Ioue, mundi commu-
ni Rege, per quem munera in vniuersum di-
stribuuntur: alter est animi; & fit regnâte Sa-
turno, hoc est, contemplatione; per quem mo-
tu retrogrado animus, qui manauit à Deo, re-
dit in suum principium: quo secundo ortu dū
oriuntur homines, senes sunt; quoniam spiri-
talis & animarius homo, solū oritur sene-
scente corpore: tunc enim solū anima ad
mentem, veræ vitæ principium, eleuatur. Sed
his prætermissis, quæ longam exposcerent ex-
plicationem, ne Platoni ea sub ænigmate pro-
ferenti aduersemur, eò reuertamur, vnde re-
cessimus. Manifestissimè proculdubio moue-
tur cœlū ab ortu in occasum, qui motus iure
merito motus totius nuncupari meretur; cū
nedum cœlum, verū insuper elemēta quoq;
sub cœlo posita, eodem motu moueantur: &
cū ita reuoluuntur, non rapiuntur à cœlo,
vt est vulgaris sententia: sed per animam, vel
mundi, vel propriam reuoluuntur in orbem:
per animam mundi, motu totius; per propriā,
motu proprio: vel per Animam mundi, tan-
quam per ducem; per cæteras, vt per eas, quæ

ducem insequuntur; vt in Phædro docuit Plato. Hinc colligi potest conueniens ratio fluxus, & refluxus maris: ille enim proximè à natura, & ab anima eius prouenit; non à Luna, nec ab alio cœli orbe; nisi remotè, & ratione alicuius conuenientiæ, & sympathiæ aquæ cum orbe Lunæ: hic fluxus, & refluxus, non similiter in omnibus aquæ partibus recipitur: ratione diuersitatis, magnitudinis, figuræ, positionis, & consimilium. Peripatetici cum secus sentiant de anima mundi; neque hanc, neque aliam conuenientem causam facile assignare possunt.

An terra moueatur in orbem.

CAP. IX.

Quoniam motus in orbem, & præsertim ille, qui est ab ortu in occasum, cæteris omnibus corporibus mundum primò constituentibus conuenit; videtur etiam rationi consentaneum, vt debeat conuenire terræ: & præsertim, quoniam motus ille nuncupatur motus totius: ideò singulis partibus competere debet. Accedit, quòd cum terra sit animata, & anima dicatur esse initium motus; necessarium esse videtur, vt terra quoque à sua anima moueatur. Hanc sententiam visus est protulisse Plato in Timæo, dum dixit; Terram autem altricem nostram, circa polum per vniuersum extensum alligatam, diei, noctisquæ effectricem, & custo-

eustodem esse voluit; necnon primam, antiquissimamque Deorum omnium, qui intra cælum sunt geniti, &c. Per hæc verba indicare videtur Platonem, terram vnâ cum cælo moueri in orbem: ideò Arist. in secundo cœli 75. tribuit Platoni, quòd asseruerit terram circa medium reuolui. Cicero quoque in secundo Academicarum quæstionum inquit; Atque etiâ circunvolui terram; Platonem in Timæo dicere, quidam arbitrantur; sed paulò obscuriùs. Aristarchus, & Seleucus, referente Plutarcho in septima quæstione Platonica, terram volui circa medium affirmarunt: & Seleucus, nedû id affirmauit; verum etiam demonstratione comprobauit. Id ipsum ex verbis Platonis nonnulli colligunt; dum dixit, terram esse effectricem diei, & noctis: non enim videtur posse hoc efficere, nisi moueatur. Proculdubio asserere terram moueri in orbem, est manifestè aduersari sensibus, & rationi: neque putandum est, Platonem huius fuisse sententiæ. Plato enim in Timæo terræ tribuit figuram cubam; eique idcirco cõuenire affirmat, quia omnium quatuor corporum maximè immobilis terra est, & corporatorum omnium maximè compacta. Insuper, clariùs in Phædro id ipsum manifestat, inquit; Magnus itaque Dux in cælo Iupiter, citans alatum currum, primus incedit; exornans cuncta, prouideque disponens: Hunc sequitur Deorum, Dæmonumque exercitus, per vndecim partes ordinatus; perma-

net autem Vesta in Deorum æde sola, &c. Cſi Plato dicat Vestam permanere in sua sede, quæ Vesta denotat Deum, & animam terræ; quid aliud denotare voluit, nisi quòd terra immobilis permaneret in centro? quam terrā, sedem Deorum nūcupauit in Timæo. Neque est difficile satisfacere aduersis rationibus: Nā ad primam, dum dicitur, cetera elementa moueri, & motum in orbem nuncupari motum totius; respondeo, de terra, & aliis elementis diuersam esse rationem: nam terra est, vt centrum maximè distans à cœlo; centro conuenit requies; distātia à cœlo, minùs mouentur; ideo demum ad immobile est deueniendum: Terra est, tanquam fœmina; quæ vt cumulatiùs munera, & semina recipiat à cœlo, tanquā à parente, & ea in frugem valeat deducere; debet requiescere: motus in orbem, dicitur motus totius; quia consideratur terra, tanquam centrum, & veluti aliquid nostrum sensum fugiens; in ordine ad vniuersum, quod mouetur. Dum id ostenditur ex eo, quia terra est animata, ideo prædita principio motus; respondeo cum Platone, Vestam solam manere in æde Deorum; nam quamuis omnis anima sit numerus se mouens, non tamen omnis necessariò mouet in orbem illud corpus, cui iuncta est; præsertim, dum tale corpus non fuerit illi motui accommodatum; neque expediat, vt ita moueatur. Et quamuis anima terram non moueat in orbem, non propterea frustra iungitur

gitur illi: siam eam seruat, vitam ei tribuit, secundam reddit; & nisi totam, saltem partes eius, vt expedit, mouet. Ad Aristotelem, qui Platoni tribuit oppositum; & ad verba Platonis in Timæo; dico cum Proclo, & cum Simplicio, ea verba dupliciter legi posse. Primò leguntur, vt referuntur ab Aristot. quòd Plato dicat terram altricem nostram, *ἡλικήν*, hoc est volui circa eum, qui per vniuersum ordinatus est, Polum: quam lectionem minimè approbandam affirmant, & iure quidem; cùm non consentiat cum sententia Platonis de terra, a libi approbata, vt apparuit. Alia lectio est: quòd Plato terram dicat, non *ἡλικήν*, hoc est reuolutam; sed *ἡλωμένην*, hoc est alligatam, & infixam; & hanc approbant Proclus, Simplicius, Diogenes Laertius, & Alcinoüs: immodò Cicero latina reddens ea verba Platonis, dixit; iam verò terram altricem nostram, quæ traiccto axe sustinetur, diei, noctisque effectricem fecit. Afferuit itaque, traiccto axe sustineri, indicans se legisse *ἡλωμένην*; vt Simplicius, & Proclus debere legi existimant. Propterea ex eo loco rectè assumpto, terram in medio, non reuolui, sed requiescere, colligimus; & propterea hac de re Platonem conuenire quidem cum Aristotele, non autem oppositum sentire, vt perperam ei tribuit Aristoteles. Quòd si etiam concedere volumus, Platonem ibi dicere, terram volui; cuius oppositum asserit in Phædro: dicamus, non ex propria opinione

illud dicere: sed ex opinione Pythagoræ, quæ in Timæo sectatur: Plurimi enim ex Pythagoreis asseruerunt, stante cœlo, volui terram; vt Philolaus, Heraclides Ponticus, atq; Ecphantus, & cum eis Niceta Syracusanus; vt in Academicis refert Cicero, auctoritate Theophrasti. Attamen ex opinione Platonis secus proculdubio est sentiendum; quod manifestissimè patet; quia cœlum moueri affirmat, & fatetur à nobis in terra positis seruari, & mensurari posse cœli motus: quod non contingeret, si terra volueretur in orbem.

De causa requietis terræ in medio.

CAP. X.



Cum terra in vniuersi medio requiescat, iure quis mirari poterit, & ad causæ inuestigationem excitari; vnde eueniat, quod ea saltem non decidat, & versus aliquam cœli partem cadat, & ruat. Quam difficultatem mouet Plato in Phædone: & cum varias retulisset, reiecissetque causas ab aliis relatas; demum afferens propriam sententiam, inquit: Persuasum mihi quidem est: primò, si est terra in cœli medio rotunda; nil ei opus esse, vel aere, vel aliâ necessitate eiusmodi, ad hoc, vt nunquam decidat; sed ad eam sustinendam satis id esse, quod & cœlum vndique sibi ipsi simillimum est omnino, & terra vndique æquilibris: Res enim æquilibris, in similis alicuius medio posita,

fit, nec magis, nec minùs potest in partem aliquam inclinari: cumque similiter se habeat, ab inclinatione permanet aliena. Hæc Plato. Aristoteles verò in secundo de cælo cont. 90. hæc opinionem tribuit Anaximandro, & esse falsam ostendit: præsertim ex eo: quia pari ratione sequeretur, nec ignem, nec aliud corpus in medio collocatum, debere moueri. Insuper, quia terra, nedum non mouetur à medio; verum etiam ad medium tendit, cum fuerit extra medium collocata; non autem ruit versus partem illam cæli sibi propinquiorem. Proculdubio; si pro causa, solam indifferentiam, & æqualem distantiam à cælo assignaremus: diminutè eam traderemus: at dum principia, & fundamenta Platonis perpendemus: ex eis, nec non ex indifferentia simul, conuenientem causam colligere valebimus: nam, & per naturam, & per animam, & per conuenientem mundi formam, in medio terram requiescere percipiemus. Per naturam primò; quoniam id, quod per animam vniuersi est dispositum, per naturam fieri dicitur: dispositio partium inundi, pendet ex prouidentia per animam, & naturam mediam. Id autem, quod à Platone dicitur de indifferentia; partim dicitur ex opinione aliorum satis apparente; partim dicitur, vt indicetur, terram requiescere in medio, ratione ordinis vniuersi; vt manifestetur, de ratione eius esse, vt æquè distet à cælo; cum ad illud se habeat, tanquam centrum. Consuevit

tamen in suis dialogis Plato, multa proferre ex aliorum sententia, & ad vulgi demulcendas aures; quæ à solerti Platonico debent deinde, per potiora Platonis fundamenta, in convenientem sententiam redigi.

De Gravitate, & Leuitate.

CAP. XI.



Riplex in corporibus, quæ elementa dicuntur, consideratur grauedo: Vna est aduentitia; per quam dicimus corpora, quò magis mouètur, eò ferri velociùs; & quò feruntur velociùs, esse grauiora: Altera est naturalis propensio ad proprium motù. Postrema est grauedo essentialis; de qua loquentes, dicimus terram grauem, ignem leuem. Si loquimur de prima aduentitia grauitate: ea solùm elementis conuenit, dum redeunt in suam naturam, & locum sibi competentem: & conuenit, non in principio, sed in progressu motus: & nò minùs conuenit ætheri, & aeri, quàm aquæ, & terræ. Cœlo hæc grauedo non conuenit, quia nunquam à suo loco, suæve natura recedit. Secunda grauedo conuenit elementis duplici modo; primo, dum redeunt in suum locum; altero, dum feruntur in orbem: nam hæc grauitas nil aliud est, nisi propensio ad illum motù. Ex his duobus modis, primus non conuenit cœlo; quia non mouetur motu recto: alter verò maximè conuenit; quia maximè ad motum suum est pro-

procliue; & grauissimum iudicarem^{us} cœlū, si nobis datum esset suo motui manum opponere. Tertia absolutè conuenit omnibus: cuncta enim elementa aliquid grauitatis includunt; cū materiam, & corpoream compositionem in se habeant. Hinc facilius elementa omnia descenderent, quàm ascenderent: facta tamen comparatione, aer, æther, & ignis, leuia dicuntur; aqua, & terra, graua. De hac tertia loquutus est Plato in Timæo, dum dixit; Leuissimum esse, quod paucissimas bases includit, & ex paucissimis partibus eisdem constat, qualis est ignis. De altera grauitate, scilicet, de secunda, verba fecit in Timæo, dum dixit; Vnum tamen id de his omnibus cogitandum; quòd via, gressioque singulorum corporum, ad simile, atque cognatum ferens; graue facit id, quod fertur: in quo quidein secundo grauitatis genere includitur modo aliquo etiam primum; vt consideranti notum est. Et si quis quærat, quomodo elementorum partes in suum locum reuertantur; dicendum est, quòd redeunt, & per suam naturam, & per animam simul: per naturam suam, habent propensionem ad illum motum; per animam, absolutionem, & perfectionem. Et si per imaginationem sphæra terræ sub orbe lunæ proximè posita esset, iam imaginaremur per uersionem ordinis vniuersi: ad quam, nec anima terræ, nec eius natura, esset procliuis: & propterea tunc partes liberæ derelictæ, ad suum totū

non mouerentur; quia nec anima ad illum locum traheret, nec partes in illum essent proclines; cum ea sit dispositio præter naturam; ex fatua nostra imaginatione pendens: ad quam si sequuntur absurda, nil refert, cum sequantur ex nostra inani imaginatione. Ex his patet, quomodo à calumnia vindicari debeat Plato, dum carpitur; quia dicat, elementorum partes ad suum totum moueri, ab eoq; trahi.

*Comparatio opinionis Aristotelis cum sententia
Platonis in nuper dictis.*

CAP. XII.

IN plurimis profectò Aristot. à Platone dissentire videtur. Primò, Arist. triplex illud grauitatis genus non ponit, sed solum duplex; primum videlicet, & tertium. Secundò, Arist. cœlum nec graue, nec leue esse affirmat: ex sententia Platonis dictum est, cœlum aliqua ratione leue, alia verò graue dici posse. Tertiò, Arist. ignem dicit solum leuem; Plato verò ætherem sub cœlo positum, igni respōdentem; & leuem in comparatione, & grauem in propensione ad suum locum affirmat. Quartò, Arist. in postremo lib. de Cœlo, à cont. octauo ad 10. reiiicit eam leuitatis, & grauitatis causam, à Platone in Timæo traditam; dum dixit, Leuissimum esse, quod paucissimas bases includit, & ex paucissimis partibus eisdem cōstat. Demum, dissentire videtur in assignanda causa redi.

reditus partium elementorum in suum locū:
nulla enim ratione, & modo censet, id ab ani-
ma posse prouenire; sed solū ab eorum natu-
ra. De quibus dissensionibus loquens assero,
nonnullas esse positas in sola voce, alias verò
in rei natura. Nam de prima, dum dicitur, Pla-
tonem nuncupasse grauedinem reditum, &
propensionem corporis in suum locum: dico,
hanc esse litem in voce, non in sententia. Con-
ueniunt, quòd detur illa propensio in suum lo-
cum, & ad suum motum: sed Plato censuit,
posse dici grauitatem; quod non censuit Ari-
stoteles. Ratio tamen huius diuersitatis pen-
det ex eo; quia Aristot. in vniuerso posuit sur-
sum, & deorsum, natura distincta; non autem
Plato, vt in sequentibus apparebit. De secun-
da differentia; quia Arist. cœlum dicit, nec gra-
ue, nec leue: assero, eatenus re vera dissentire;
quatenus Plato cœlum dicit ignem, vel igneū;
quod negat Aristot. De tertia, censeo eos etiā
re vera esse discordes. Nam Plato rationem se-
quutus, id omne censuit graue; quod materiā,
& corpoream aliquam compositionem inclu-
deret; denotatam ab eo per bases, & partes;
quamuis enim materia nō sit grauis; attamen
ad eam vnā cum forma, sequitur grauitas, vel
maior, vel minor; ratione maioris, vel minoris
densitatis corporis, & compactionis. Arist. ve-
rò sensui credens, quòd sursum absolutè ten-
dit, nuncupauit absolutè leue; quod Plato
nuncupat leuissimum omnium in compara-

tione, hoc est, minùs graue aliis. De quarta
dissensione, videlicet de caussa grauitatis tra-
dita à Platone, reiecta ab Aristotele: dico pri-
mò, Platonein per bases, & partes, denotasse
densitatem, multitudinem materiæ, & com-
pactionem; non mathematicas bases. Dico se-
cundò, dissentire re vera ab Aristotele; quoniã
ex fundamentis Platonis sequitur, in omni
corpore aliquid grauitatis reperiri, vt patuit,
Addo tertio, rationes Aristotelis contra Plato-
nem, leues esse, & facilè posse solui. Nam obii-
citur Arist. quoniam magnus ignis grauior ef-
fet paruo. Insuper, magnus ignis grauior ef-
fet exigua aliqua portione terræ; quoniam in
magno igne plures essent partes confimiles,
& bases, quàm in exigua illa portione terræ:
nos autem oppositum conspiciamus; quoniam
ignis, quò maior, eò videtur leuior; & magis
videtur tendere sursum. Ad hæc dico, maiore
ignem esse quidem grauiorem in extensione,
at nò in intensione; vt maior aqua, est grauior
exigua portione terræ. Insuper, magnum li-
gnum est grauius paruo ligno; at non ob id
magnum lignum non supernatat, vel non
tendit sursum in aqua, iminò maximè ten-
dit sursum, & cum maiori difficultate ab in-
ferente violentiam mergitur: pariter de igne,
& aere se habet. De postrema dissensione, per-
tinent ad reditum partium elementorum in
suum locum: vt pertinet ad propriam natu-
ram, & propensionem earum partium; uti-
que

que non dissentiunt: vt verò pertinet ad animam illius sphæræ conducentem ad illum motum, & attrahentem; re vera dissentiunt, nec conciliari possunt. Et quamuis in eo reditu partium in suum locum, consideretur aliquis tractus; non propterea motus ille est violentus: quoniam anima ita trahit, vt mobile est procliuè, & natum trahi. Et inde euenit, quod non difîciliùs trahitur maius, quàm minus corpus; vt Platoni obiiciebat Auerroes.

De differentiis positionis Mundi.

CAP. XIII.

Differentiæ positionis, quoniam modo aliquo oppositionem, & contrarietatem includunt; propterea verè, & propriè in animali perfecto, prædito partibus diuersæ facultatis, diuersæque figuræ inueniuntur: in corpore autem orbiculato, non absolutè; & propriè; sed solùm respectu nostri, vel ratione quarundam proprietatû, considerari possunt. Dum enim rotundum corpus consideramus; in eo ratione propria solùm reperitur medium, & circumferentia. Propterea iure Plato in Timæo eos dânat; qui in vniuerso sursum, & deorsum, ex rei natura distincta inueniri affirmant: corpus enim consimile, & rotundum; non sursum, & deorsum includit, quod ad lōgitudinem pertinet; sed solùm medium, & quod est circa medium. Insuper, conuenienti etiam ratione hoc

dictum est à Platone : quoniam, vt ob figurâ,
ita ob motum elementorum; sursum, & deorsum, concedi ex natura rerum in vniuerso, nō debent: nam, ex Platonis sententia, elementa, sui natura; non in rectum, sed in orbem ciuntur. Quare in vniuerso, & ratione figuræ, & ratione proprii motus eius; nec sursum, nec deorsum inueniuntur. At si tertio respicimus ad reditū partiū elementorum in suam naturâ, & locū; quoniam id faciunt per motum rectū; sic in ea rectitudine sursum, & deorsum cōsiderare valemus : attamen nō est maior ratio, quōd extremū vnum dicatur sursum, quàm aliud; pariter, quōd dicatur deorsum. Nos tamen ad nosmetipsos, & ad nostri corporis dispositionem respicientes; quod vergit ad pedes, nuncupamus deorsum : cū tamen, ratione mobilium, sursum sit, vnde mobilia recedunt; deorsum, quō tendunt : adeo, vt deorsum terræ, opponatur ei, quod est deorsum in motu ignis. Dextrum, & sinistrum, conueniunt cœlo, ratione principij motus : Sic Plato in Epinomide Orientem, dextrum; Occidentem, sinistrum appellat; imitatus in hoc Pythagorâ, & Homerum: quod dextrum, & sinistrum; vt cœlo, ita elementis sub eo positis conuenit: quoniam cuncta per naturam mouentur in orbem; sursum, deorsum, antè, & posterius, solum similitudine aliqua conueniunt cœlo, non propriè. Ideo iure Pythagoras, & post eum Plato, in cœlo dextrum, & sinistrum
posue

posuerunt, nulla de alijs differentiis facta mentione: nam cœlum solum mouetur in orbem, propterea in eo solum propriè consideratur initium motus: quod dextrum nuncupatur; in animalibus perfectis, & præsertim in homine, omnes positionis differentię verè distinctæ inueniuntur; ob diuersitatem figurę, positionis, & facultatis membrorum. Sed hoc est dubium, vtrum in homine dextrum à sinistro natura, vel potius sola assuetudine distincta sint. Plato in septimo dialogo de Legibus ait, distinctionem dextri à sinistro pèdere ex praua assuetudine, & ex ignorantia nutricum: rem autem ita se habere ex eo cõstat, quoniam per convenientem assuetudinem homo euadit ambidexter; & nōnulli rectius læua, quàm dextra manu vtuntur.

In quibus Plato ab Aristotele reprehendatur.

CAP. XIII.


IN tribus Plato ab Aristotele carpitur; & in tribus inter eos, vt ad præsentem considerationem pertinet, lis esse videtur. Primò, quia Plato in vniuerso negat sursum, & deorsum reperiri; sed medium, & circumferentiam. Secundò, quia Plato in cœlo ponit dextrum, & sinistrum, nulla facta de alijs differentiis mentione: qua de re Arist. in secundo de cœlo eum carpit asserens, errasse Pythagoram, & consequenter Platonem, qui eū sequutus est; cùm in cœlo solum posuerint dextrum, & sinistrum, quæ ex diffe-

rentiis postremæ sunt, & alias præcedentes in eo non manifestauerint. Tertio, dissentit Aristoteles à Platone: quia Plato in homine dextrum, & sinistrum dixit, non distingui naturas: sed praua assuetudine; Arist. verò, & in 5. Eth. cap. 7. & in tertio de partibus animalium asserit, dextrum à sinistro distingui natura. De his diffensionibus agens, ut pertinet ad primam, dico: litem præsertim pendere ex diuersa consideratione, diuersaque sententia de naturali motu elementorum. Plato respiciens ad mundi rotunditatem, ac insuper existimans elementa moueri in orbem; debuit, & ratione figuræ, & ratione motus, solum considerare medium, & circumferentiam: Aristot. solum respiciens ad motum elementorum, & asserens elementa moueri motu recto; debuit longitudinem, & sursum, atq; deorsum statuere: & propterea lis pendet ex diuersa consideratione, & ex varia sententia de motu elementorum; propterea non in solis verbis est posita, ut censuit Simplicius. Insuper, pendet ex varia acceptance grauitatis: Plato enim grauedinem nuncupauit propensionem in suum locum; ideo ratione etiam reditus elementorum in suam naturam, & medium, & circumferentia potest dici deorsum: id enim, ad quod graue per naturam tendit, deorsum dicitur. De altera controuersia, quia Plato in cælo posuit solum dextrum, & sinistrum: Respondeo, iure hoc facere. Primò; quia Pythagoras considerauit dextrum,

&

& sinistrū, tanquam principia contrarietātū: quatenus dextrum denotat bonū, virtutem, & formam; sinistram verò malum, diminutionem, & priuationē quandā: ideo Pythagoras numerauit dextrū, & sinistram inter primas decem rerum contrarietates; ad quas cæteræ modo aliquo rediguntur. Insuper nouerunt, in cœlo solūm reperiri motum in loco: vt pertinet ad motū in loco, solūm consideratur dextrum, quod est principium motus; & sinistrum, eius oppositum. Ad instantiam Aristot. quia posterius præsupponit id, quod est prius: respondeo, id esse verū de mortalibus, in quibus non reperitur posterius generatione sine priore; de cœlo secus se habet: in cœlo enim; sine mutatione, quæ indicat partē sursum; & sine instrumentis sensuum, quæ formant partem anteriore, vt confitetur Arist. in 2. de Cœlo; reperitur anima mouens cœlum in orbem. Præterea; quamuis dextrum, & sinistrum in mortalibus ordine originis, postrema sint: at tamen absolutè considerata, vt denotant bonum, & malū, sunt primæ; & inter primas contrarietates numerātur, ad quas ceteræ illius ordinis rediguntur. Præterea, rectè sensisse Plat. ex eo constat; quia etiam Arist. in cœlo primò considerat dextrum, & sinistrum, respiciendo ad principium motus: qua differentia constituta, in ordine ad eam statuit alias. Ex quo patet, solūm in cœlo propriè reperiri dextrū, & sinistrū; cæteras verò in ordine ad hanc, & per

quandam similitudinem cum mortalibus animalibus: adeò, vt re vera lis sit in verbis; Plato tamen rectius sit loquutus. De postrema differentia dico, rectè sentire & Platonè, & Arist. solumq; differre in verbis: Nā ambo nouerunt dextrum à sinistro in animalibus per naturam modo aliquo distingui: Nouerunt insuper, quòd, quamuis à natura habeant principium distinctionis; tamen per assuetudinem pars sinistra potest reddi aptior, & robustior ad motum, & operationes. hoc nedum dixit Plato; verum etiam affirmavit Arist. 31. par. probl. 12. inquiring; Pars dextra exercitatione assuescere, & in meliorem frugem euadere videtur; effici nanque vtrinq; dextri, per assuetudinem possumus. Colligo itaque eos hac de re non dissentire: nam Plato, vt civilis, respiciens ad utilitatem ciuitatis, & ad militum vsum; nos hortari voluit, & debuit; vt assuetudine redderemur ambidextri, ac pro facultate aptissimi ad custodiam, & salutē patrię. Insuper, non dixit absolute, dextrum non distingui à sinistro; sed addit, ferè, inquiring; Nā cū natura ferè ad vtramq; partē æquè se habeat, ipsi per consuetudinem non rectè vtentes, differentiā facimus, & c. Ita nanq; loquutus est, vt indicaret; quòd quāuis per naturā adsit aliqua differentia, nos tamē per assuetudinē valemus sinistram reddere aptiorem; vt per artem sępe naturam corrigimus, & superamus: quod etiam nouit, & affirmavit Aristoteles.



STEPHANI THEVPOLI,

BENEDICTI F. PA-

TRITII VENETI,

ACADEMICARVM

Contemplationum,

LIBER IX.

DE GRADV MIXTORVM.

De Mixtis inanimis.

CAP. I.



Vanuis ea sit vniuersi fecunditas, & plenitudo; vt in singulis corporibus omnia, modo aliquo inueniantur: attamen nonnulla corpora conspiciuntur, quæ ad eò accedunt ad naturâ alicuius simplicis corporis; vt simplicia esse videantur, & nominentur; ex quibus deinde propriè, & verè mixta constituuntur. Iare profectò ex primis corporibus constituuntur mixta: nam ea, & communi subiecto, & contrariis qualitatibus prædita sunt; propterea ex mutua actione, & perperessione in vnum redigi valent: hoc enim est mirabile in vniuerso, quòd ex pugna, & lite pax,

ex multitudine vnio confurgit; & cū omnia ex vno pendeant, in vnum confluunt, & conspirant. Hanc mixtionis conuenientem rationem paucis quidem, at exactissimè explicauit Plato in Timæo, inquiens; Nō cessant elementa agitari; quousque expugnata, in vnū quiddam ex multis superanti simile tandem euadant, familiariterq; cum victore permaneant. Quibus verbis, præter cætera, hoc quoq; manifestauit; Mixtum omni ex parte æquale non dari, sed vnum semper cæteris dominari: quare re Arist. cum eo libentissimè conuenit; Galenus verò magis dissentire videtur. Veruntamen censeo Platonem ad id, quod euenit, vt plurimum, respexisse; & ad præcipua mixta: non enim principiis, & fundamentis Platonis aduersatur, dari mixtum exactè æquale; nisi in omni, saltem in oppositione. Inter mixta dantur nonnulla, quæ potius elemēta aliquid passa, quàm verè mixta nuncupari merentur; vt Nubes, Caligines; Grando, cui in terra respondet Glacies; Nix, cui respōdet Pruina; Pluuia, cui respōdet Ros. Arist. in i. Meteor. cap. ii. inquit, gradini in sublimi genitæ, prope nos nil respōdere; Plato dixit ei respondere Glaciē: at nō ob id dissentiunt; quoniā Arist. cōsiderauit generationes ex nubibus in aere factas; Plato verò cōsiderauit naturas, & conditiones rerum absolutè; in prima cōsideratione rectè dixit Aristoteles, in altera rectè Plato. Quamuis enim apud nos detur glacies, naturæ grandinis

dinis respondens: vt dixit Plato: non tamen
glacies ea producitur ex aqua, & ibi, & tunc ex
nube genita: ad quod respexit Aristoteles.
Metalla sunt fusiles aquæ; quatenus ex aqueo
vapore ducunt ortum, & fundi possunt: hæc
sunt exactius mixta, quam niues, & grâdines.
Fossilia magis ad terræ naturam, & conditio-
nes accedunt, magisque cum terra sunt com-
plicata; & eatenus viuunt, quatenus terræ
iuncta sunt. Mixta perfecta, mixtorumque ex
vna in aliam naturam permutationes, ab ho-
mine per artē fieri nequeūt; sed à sola natura.
Propterea cum Plat. inaniter eos laborare exi-
stimo, qui per sublimationes aurum, & argen-
tum se posse conficere sperāt: deluduntur pro-
fectò externa quadam auri, vel argenti imagi-
ne; verum essentiam attingere nō valent. Nec
propterea inanis penitus est ars ea, quæ Alchi-
mia dicitur; sed eatenus est approbanda, qua-
tenus ope naturalis Magiæ quodam tenus ei
datum est ascendere: qua de re Aristoteles &
Platone minimè dissentit.

De Plantis.

C A P. II.



Ro mundi integritate, & ornamen-
to; pro animalium vsu, & præsertim
hominis; varia herbarum, arborum,
& arborum genera producta sunt; ex
eis enim alimētum desumimus, quod omniū
alimētorum maximè est naturale; & pro-

pterea etiam eo solo vitæ gradu plantæ sunt præditæ, cui nutritionis munus est demandatum; vt indicaretur, eas nutritioni esse destinatas. Nō conueniunt Platonici in hoc explicando; vtrum plantæ propria vita, distincta-
 que anima sint præditæ; vel potius viuant per animam terrę. Plotinus, & multi cum eo, hanc secundam partem approbarunt, eo præsertim signo persuasi, quia plantæ euulsæ à terra non viuunt. Veriorem tamen censeo partem alterā, & magis ad mentē Platonis: nam Plato in Timæo inquit, plantas esse participes tertię animæ speciei, scilicet nutrientis; & animalia nūcupari: at profectō animalia ab eo non dicerentur, si solūm viuerent per vitam alterius; non enim partes animalis dicuntur animalia, & longē minū excremēta eius. Accedit, quōd non tot plantarum inuenirētur species, si per eandem animam viuerent; neque etiam propriū deberent emittere semen, si propria vita essent destitutæ; & si etiam semen emitterent, non diuersum deberent producere, si omnium plantarum eadem esset anima. Dicamus itaque plantas viuere per animam propriam nutrientem. Destitutæ profectō sunt plantæ opinione, ratione, & mente: Et qui cū Democrito, & Anaxagora, eis esse præditas affirmant; semetipsos ostendunt mente, & ratione esse destitutos: Nisi velint plantas in eo sensu mente esse præditas, in quo Plotinus Ennead. 3. declarauit contemplationē per omnia
 meare

meare, omnibusque rerum gradibus conuenire. De sensu inquit Plato, Plantas esse eius aliqua ex parte compotes: nam prædita dicuntur sensu suauis, & tristis, ac vnâ cupiditatibus: Insuper, etiam semina à Platone dicuntur anima prædita, & consequenter dici possunt animalia: omne enim anima præditum, asserit esse animal. Aristot. in tribus videtur à Platone dissentire: primò, quia plantas negat esse animalia, Plato affirmat: secūdò, quia negat plantas esse prædita sensu, & cupiditate: demum, quia semina non censet esse animata. De prima lite putandum censeo, eam in verbis esse positam; quia Plato omne præditum anima, nuncupat animal: Aristoteles verò, nō omne anima præditū; sed id solū, quod conspicuo aliquo vitæ gradu donatum est, nuncupat animal; adeò, vt ad minus includat sensum tactus. Sequutus est Aristoteles magis communem loquendi vsum: Plato verò, eo neglecto, rationem solam sectatur. De secunda differentia pariter dicendum censeo, litem esse in verbis; nam Plato latè vtitur nomine sensus, & cupiditatis: propterea, dum asserit, plantas esse prædita sensu suauis, & tristis; censeo denotasse, nō sensum iudicij, & cogitationis; sed sensum, siue potiùs naturalem consensum; per quem hauriunt alimentum sibi conueniens; deserant, quod sibi aduersum est: insuper, à consimilibus qualitatibus rectè disponuntur, ab aduersis læduntur; ratione quorū,

cupiditate quadam naturali dicuntur prædictæ. Quod autem hæc fuerit Platonis sententia, ex eo colligo, quoniam in eadem Timæi parte de Plâtis loquens, inquit; Quod autem nunc dicimus, tertiæ animæ speciei est participes, quam inter diaphragma, & vmbilicium locauimus, &c. Ex quo patet, solam nutriendi facultatem eis verè tribuere, non autem propriè sumptum sensum; sed solùm consensionem, & dissensionem quâdam naturalem. Sic in subsequētibus verbis solùm perpeffionem eis tribuit; non autem cognitionem, & iudicium: qua de re Plato verba faciens, præsertim imitatus est modum loquendi Pythagoræ; & propterea in persona Timæi Pythagorici eam sententiam profert. De postrema differentia censeo, re vera eos magis dissentire: Nam Aristot. semina non censet actu animata, cùm nō sint corpora instrumentaria: Plato verò, qui animam magis in quouis corpore seruari censuit; & medullâ asseruit esse cāmpum, in quo anima sereretur; ac insuper genituram nuncupauit medullam; magis asserere potuit, & debuit, semen esse animatum; adeò, vt non in solis verbis sit lis. Et iure Plato statuere videtur semina animata, cùm conspiciamus ea frequenter ex se emittere germen, & per solam cum terra coniunctionem incipere nutriri; quod non facerent, nisi animam includerent. Viuunt itaque semina, sed vitam postremam: vita autem sine anima non reperitur: Dicuntur

tur tamen animam includere potestate; quatenus nō includunt illam cum postrema perfectione, cum partium corporis distinctione, & cum actu secundo; vt conuenit plantis. Insuper, eis conuenit sola vis, quæ formare debet corpus, eoque formato mox vti; nō autem ea, quæ ex illa confurgit, & actu format.

De Animalibus ratione carentibus.

CAP. III.



Vinenta, & feræ, quæ infra hominem, & supra plantas collocantur; etiam in facultatum animæ participatione mediæ sunt: in eis enim, vltra virtutem nutriendi communem plantis, etiam vis sentiendi reperitur; altera ex parte, ratione homini conueniente sunt destitutæ. Insuper: quoniam vis sentiendi, latitudine prædita est; propterea per diuersas suæ latitudinis partes, diuersis animalium gradibus conuenit: inde confurgunt tot animalium formæ, tam variæ eorum naturæ, tam distinctæque perfectiones. Hinc clarior eorum elucescit error; qui ferarum, iumentorumq; animas eiusdem esse rationis existimarunt cum animis hominum: manifestè enim Plato distinctas ponit animarum ideas; manifestissimè affirmat mundum esse plenitudinem omnium graduum, vniuersæque latitudinis rerum: nō autem esset plenitudo, nisi etiam distantia inter plantas, & hominem, quæ lata est, fuisset

cumulatissimè omni media formarum varietate referta: carent opinione, ratione, & mente animalia cuncta, infra hominem collocata; nisi eiusmodi vocibus minùs propriè vti velimus: nam caput in eis sentiendi solùm munera explet; non autem opinandi, vel intelligendi. Neque propterea cum Stoicis existimare debemus, iumenta carere vniuerso perturbationum animi genere: immò maximè putandum est, eis esse obnoxia; cùm appetitiones sensuum in eis principatùm obtineant, & maximè à cupiditate, irascendique facultate ducantur; quæ omnium perturbationum sunt fontes. Hoc animalium genus, in sola terra, aqua, & aere, locum habet; propriè tamen, & verè in sola terra requiescit. Hinc nullum datur animal rationis expers, quod in terra aliquando non requiescat. Et quod dicitur de Auicula Dei, quæ semper degat in aere, fabula est: nam eiusmodi avis, in præruptis altissimorum montium aliquando requiescit; quamuis, vt plurimum, degat in aere. In æthere, & igne; quia cæteris corporeis elementis præstant, & modo eminentiori vitalia sunt; solùm degunt animalia ratione prædita, & ea quidem liberiori, & celeriori. Insuper, in terra, aqua, & aere, gigni possunt animalia ex putri; in æthere, & igne, nequaquam: suprema enim ea corpora, à putredinis labe sunt immunia. Et quamuis Arist. in libro quinto de historia Animalium dicat: in Cypro insula, in fornacibus ærariis,

vbi chalcites lapis ingestus compluribus diebus crematur; bestiolas in medio igne nasci pennatas, paulò muscis grádioribus maiores; quæ per ignem saliant, atque ambulent: emoriqué hoc genus, & illud niuis alumnum; cùm alterum ab igne, alterum à niue dimotum sit: Cùm, inquam, Aristot. hæc proferat, minimè propterea censeo, inter eum, & Platonem esse litem. Nam vel Arist. id dixit ex aliorum relatione, quam in secundo de Gen. animalium cap. 3. non approbavit: inquit enim; Quamobrem ignis nullum animal generat, &c. Nam varia profert Arist. in libris de historia, quæ in aliis non approbat; vt etiam de Pygmæis sentiendum censeo. Accedit, quòd si bestiolæ illæ in igne genitæ concederentur, vt à nonnullis Cypriis fide dignis approbari audiui: dicendum esset, nō ex igne fieri, sed ex humoribus, vel ex terra, vel ex chalcite prodeuntibus excalefactis, conuenientiқ temperamento præditis. Non itaque censeo, hac de re Platonem, & Aristotelé dissentire; sed potiùs dissentiunt, loquendo de modo generationis animalium ex putri; quæ gigni censent Platonici, virtute animæ mundi, vel eius elementi, in quo gignuntur: quod minimè asseritur ab Aristotele; qui nec animam mundi, nec elementorum dari existimauit. Demum loquendo de huiusmodi animalibus rationis expertibus; & perpendendo, quid ea sint, ex sententiâ Platonis: quoniam eorum anima à corpore pender, in

inateria vndis inersa est, penitusq; est instrum-
mentaria; iure animal, non rectè dicitur ani-
ma corpore vtens, vt de homine dicere Plato
consueuit sed animal est conflatum ex anima,
& corpore, vt in Epinomide Plato asseruit: ad-
eò, quòd primum animal est idea; alterum ve-
rò est aggregatum ex corpore, & anima: non
enim eorum anima, libera est à corpore, quæ
mox corpore vtatur; vt ea hominis. Quòd si
etiam de iumentis, & feris seruire volumus, q
anima sint; id in alia significatione accipi de-
bet, quàm dum de homine loquimur; nam ea-
tenus est verum, quatenus vnumquodq; per
formam est id, quod est: & ideo in iumentis
quoque, & feris consideratur triplex gradus;
datur enim leo pro idea, leo pro imitatione i-
deæ, demum leo corporeus: Aristoteles, reie-
cto primo, hos duos postremos concedit.

*De Homine, an sit sola anima, vel aggregatum ex ani-
ma, & corpore, opiniones variæ.*

CAP. III.



Vemadmodum Lux tenebris, Æter-
num mortalibus, Dominus seruis
præest; ita ferarum, iumentorumque
gregi, præstat Homo: & iure quidem;
cùm solus mentis, & rationis sit particeps; so-
lus religionis, diuiniq; cultus splendore re-
fulgeat. De quo inter cætera, quæ præclara
consideratione digna nobis occurrunt, hoc
prin.

principatum obtinet; An Homo sit sola anima, vel potius aggregatum ex anima, & corpore: Et iure profectò: nam ex hoc patebit, quid verè sit homo; constabit, quomodo parendum sit Apollini præcipienti, *THEIRSVM NOSCE*; & demum constabit, quæ hominis sint conditiones, quæ sint Hominis propria, & quæ aliena ab eo. Quæ consideratio, vt est præclara, ita est ardua; variæ enim de ea fuere philosophorum sententiæ. Nonnulli supra corpus nihil excogitantes, hominem esse solum corpus credidere: alij altius eleuati, incorporeamque animam cognoscentes; hominem esse aggregatum ex corpore, & anima existimarunt: nonnulli demum putarunt, hominem esse animam rationalem. Primæ opinionis fuerunt illi, qui materiam, & corpus esse vniuersam rei substantiam existimarunt: quorum opinio cumulatè satis, primò à Pythagora, mox à Platone, demum ab Arist. reiecta fuit. Secundæ opinionis sunt Peripatetici, qui hominem esse animal mortale existimant; quod sine carnibus, & ossibus esse non potest. Et iure videtur homo esse id compositum: quoniam in his, quæ subeunt rationem partis, nulla pars dicitur de toto; non enim domus est lapides, neque figura, sed aggregatum ex vtrisque: ita homo, non rectè dicitur anima, non carnes, & ossa; sed compositum ex vtrisque. Sic compositi, non autem solius animæ, dicuntur esse humanæ

operationes: non enim anima ratiocinatur, & videt; sed homo per animam: pariter proprietates hominis, non animæ soli, sed composito conueniunt; vt facilitas ad ridendum. Tertiæ opinionis fuit Plato: qui, cum alibi, tum præsertim in Alcibiade primo asseruit, hominem esse solam animam; ex eo, quia instrumentum non est pars opificis; homo dicitur opifex, corpus est instrumentum eius; nõ itaque corpus est pars hominis. Prætereà, homo est, qui imperat, & dominatur: at sola anima imperat, corpus verò inseruit. Prætereà, cum anima rationalis sit huius conditionis, vt seorsum ab hoc crasso corpore seruetur incolumis; iure videtur esse quid totum, integrum, & perfectum in specie; cuius totius corpus nõ sit pars, sed solum instrumentum, & vehiculum quoddam. Ex his sequitur, vario modo à Peripatetico, & à Platonico definiri hominem: inquit Peripateticus; Homo est animal rationis particeps: ait Plato; Homo est anima rationalis, mentis particeps, corpore vtens. Quid itaque in huiusmodi controuersia dicendum est?

Solutio difficultatis.

CAP. V.



Pro resolutione propositæ difficultatis, considerandum primò; quòd secùs se habet de his, quæ includunt animam rationalem; secùs de aliis, ex mortali forma constantibus. Quæ constât

ex

ex forma mortali, profectò non sola forma, sed aggregatum esse dicuntur: ideo inquit Plato in Epinomide: Verissimè animal, secundùm naturam tunc esse affirmamus: cum vna animæ, corporisque constitutio, vnâ suo concursu formam parit; &c. Et ratio est: quoniam mortalis forma non est quid perfectum, & integrum, ex se valens subsistere: ideo Plato animal ex anima, & corpore censet esse constitutum, & de hoc non est lis cum Peripateticis. At de constantibus ex corpore, & anima rationali, secùs se habet: anima enim rationalis cum sit æterna, est quid totum, & integrum, valens seorsum à crasso corpore subsistere. Insuper, cum sit æterna, non propriè est altera pars compositi, contradistincta à parte alia mortali: quia ex mortali, & æterno non propriè fit vnum, cum sint alterius generis. Accedit, quòd si homo esset compositum ex anima, & corpore: quia corpus continenter variatur, & fluit: continenter etiam permureretur homo: neque idem homo, qui peccat, mox apud inferos pœnas daret: nec idem, qui cum probitate vitam traducit, mox vita functus bearetur: sic itaque ob animæ immortalitatem, homo, non compositum, sed sola anima esse videtur. Insuper, considerandum est, ob diuersitatem mentis, animæ, & naturæ, triplicem posse considerari hominem: datur enim homo mentalis, siue intelligibilis: & hic est idea hominis: datur homo animarius: &

hic est anima rationalis: demum datur homo naturalis; & quia natura versatur circa corpora, ideo hic postremus homo corporeus est. Primus est ipse homo, secundus est homo, tertius est imago hominis. Hanc distinctionem optimè nouit Plotinus Enneade 6. lib. 7. cap. 5. Tertium, & corporeum hominem declarauit Plato in Phædone inquit: Aliud ne quid nos ipsi sumus, quàm partim corpus, partim anima? Nihil aliud, inquit. Ex his colligitur conspicua resolutio difficultatis, ex sententiâ Platonis: nam primus homo est aliquid supra animam; secundus est sola anima; tertius est conflatus ex anima, & corpore. At perpendamus, num Aristoteles cum Platone debeat conciliari? Affero, id omnino fieri non posse; Primò; quoniam si respicimus ad primū fundamentum ex eo sumptum, quia anima rationalis possit seruari seorsum à corpore instrumentario; hoc non conceditur ab Aristot. qui; quamuis nouerit animam immortalem; attamen censet, absolutè eam esse actum instrumentarij corporis, nec posse subsistere sine eo; ut in secundo de anima cont. 26. lucidissimè asseruit. Mox, si consideramus secundum fundamentum, Aristoteles non approbat trimembrem hominis distinctionem: quoniam hominem Ideale non concedit. Demum per sua fundamenta non ita potest dicere, hominem esse animam rationalem, corpore utentem, ut ait Plato: quoniam Plato considerat distin-

distinctionem inter facultatem videntem, & formantem; quam non ponit Aristoteles: considerat enim Plato animam rationalem videntem; mox quasi idolum, & imaginem ab ea fluentem, corpusque formantem; & sic videntis distinguitur ab eo, quo vtitur, ut asserit in Alcibiade primo. At Aristot. videntem à formante, siue animam ab eius idolo non distinguit. Quare colligo, eos in fundamentis dissentire; propterea rectè conciliari non posse. Affero tamen cum Aristotele, in alia consideratione hominem posse dici, & solam animam, & aggregatum. Nomina enim duo significant, primò significant formam, secundo compositum; ut asseritur ab Aristotele 8. Metaph. cont. 7. & frequenter ab Auer. in 4. Metaph. 14. in Paraph. Metaph. secundo, & alibi explicatur. Propterea ex sententia Aristotelis, homo pro primo significato, est sola forma; pro secundo, est aggregatum. Concederet itaque Aristoteles, hominem esse & solam animam, & compositum; sed per diuersa fundamenta; & longè secus, quàm Plato. Hinc Aristoteles censet, hoc esse verum de omni nomine concreto; quòd primò significet formam, mox compositum: Plato verò censet, hoc esse quid proprium animæ rationalis, ut homo dici possit, ob causam suprà relatam. Et quoniam Anima rationalis conuenit, nedum homini, verum etiam mundo, cœlis, & Dæmonibus, ex sententia Platonis; propterea de his omnibus eadem

est ratio: in omnibus enim valemus considerare tres illos gradus in homine explicatos: immò de omnibus est vera ea definitio, quæ à nonnullis iudicatur hominis propria; dum dicitur, quòd sit anima rationalis, mentis particeps, corpore vtens. Hæc tamen est differentia, quòd eminētiores animæ, magis sunt participes mentis; minùs verò, & minùs propriè vtuntur corpore; anima hominis è contra, minùs est mentis particeps, magis vtitur ministerio corporis; cùm sola sit prædita corpore instrumentario; ideò absolutè ea dicitur definitio hominis. At si omnium vellemus distinctas tradere definitiones; & gradus participationis ideè & mentis, & proprium earum corpus in singulis definitionibus esset explicandum: vt Homo est anima, obscuræ rationis particeps, mentis compos, corpore instrumentario vtens; Mundus est anima rationalis, maximè pura, primò mentis particeps, vniuersi corpore vtens: Dæmon est anima rationalis, media quadam conditione prædita, mentis particeps, tenui corpore vtens; & ita de singulis.

Hominem esse monstrum, & ludum Deorum.

CAP. VI.



Voniam ex declaratis in præcedentibus satis manifestè patet, hominè esse triplicem: ideo nunc eis, vt iam conspicuis vtens, & alia ad humanà condi-

conditionem pertinentia perquirens; assero verum, sincerumque hominem, illum esse; qui in mente regnat, idealisque nuncupatur: secundum hominem statuo animam rationalem: tertium, & quasi imaginem hominis; aggregatum ex anima, & corpore. Primus, est homo idealis, secundus, rationalis; tertius sensitivus. Primus in æternitate est collocatus, supra tempus; secundus in termino æternitatis, & temporis; postremus in solo tempore: Primus est ingenuus, tertius est genitus, medius medio modo se habet. Homo iure merito à Platone in 9. de R. P. esse dicitur admirabile monstrum, constans primò ex variis animalium capitibus, mox ex leone, demum ex humana forma, quæ minima omnium sit. Quæ sententia solum de tertio homine vera est: in quo latissima est prima diversorum animalium portio, concupiscentiam, & nutritionem præferens: minor, ea leonis: quæ in facultate irascendi posita honoris custodem indicat: minima demum est ea hominis, rationem, & mentem denotans. Ex quibus tribus, veluti partibus, ad varia propensio, tria præcipua consurgunt humanæ vitæ genera: voluptarium, videlicet, iracundum, & studiosum. Insuper, homo in primò de Legibus dicitur vel ioco, vel serio factus. Inquit doctissimus Ficinus, hominem ioco esse factum; si anima semper à cælestibus ad terræna, atque vicissim, quasi ludendo transmigrans, nunquam immutabili apud Deum sede requiescat:

factus verò studio, si modò penes effectorem Deum animus quandoq; sit immobiliter permanens. Hæc explicatio satis manifestè videtur aduersari Platoni in septimo dialogo de Legibus: vbi de hac eadem re loquens inquit; Hominem Dei ludo esse fictum, atque id verè ipsius optimum esse, &c. Ait Plato, homini optimum esse, vt sit fictus Dei ludo: quod minime verum esset, si ludus solam denotaret miseriam hominis conditionē. Ex quo etiam constat, minus rectè 2^o eodem Ficino in eodem loco aliam sententiam prolatam fuisse: nam cum Plato asserat hominem, siue ioco, siue feriō (non enim id nouimus) à superis constitutum, inquit Ficinus; Vtram verò disiunctionis huius partem eligere debeamus, affirmare hîc Plato non audet; probabile tamen habet, vt hîc, alibiq; significat; hominē studio quodam potiùs, quàm ludo fuisse diuinitus constitutum, &c. Cui sententiæ manifestissimè aduersantur verba Platonis in septimo dialogo; vbi non ampliùs cum disiunctione, sed absolute asserit, hominem Dei ludo esse fictum: & asserit, se in præcedentibus id ipsum protulisse; denotans primum librum de Legibus. Dicamus itaque hominem esse triplicem; & de omni, manifestissimè tamen de postremo, verum esse, quòd sit ludus Deorum: nam quid aliud est ludus, nisi quædam imitatio cum degeneratione, & recessu ab eo, cuius est imitatio? Si consideramus hominem idealem; ille est

est quædam imago Dei, ob quam homo dicitur deinde factus ad imaginem Dei; & est imago cum maxima degeneratione, & recessu; idcirco iure est ludus. Si consideramus hominem rationalem; ipse est imitatio idæ, & degeneratio ab ea; propterea ludus est. Tertius homo, cum sit umbra potius, quam verè homo, manifestissimè ludus iudicari meretur. Et in hoc est collocata hominis perfectio, ut sit ludus, imago, umbra, & quasi simia Dei; quæ ita Deum æmulatur, ut simia hominem. Hanc explicationem manifestè approbavit Plato in Hippia, inquit; Nonne Heraclitus, quem tu in testimonium adduxisti, hoc idem tradit; hominem, scilicet, sapientissimum, ad Deum simiam apparere; quo ad sapientiam, & formam; & alia omnia? Accedit, quod cum Plato in primo de Legibus cum disunctione loquatur; inquit; Hominem, vel ioco, vel seriò factum esse; Vtrunq; varia consideratione verum est. Homo enim ad duo referri potest; ad supera; & infera: dum refertur ad supera; ludus est; imitatio, umbra, & degeneratio: dum verò refertur ad infera; seriò est factus, quoniam eminet omnibus; & solus est mentis, divinitatis, & eius, quod verè est, particeps. Hinc Plato in primo dialogo, dum loquitur cum distinctione; non refert hominem ad sola supera, sed absolute eum considerat: in septimo autem dialogo, dum inquit esse ludum, comparat illum cum Deo. Hanc Dei in homine imitationem

expressit Græcus ille sophista : qui interrogatus, quid sit Deus, immortalis homo; quid sit homo, mortalis Deus, respondit. Insuper, nuncupatur homo Mundanus ciuis; & hoc non iumentis, & feris, sed soli homini conuenit: solus enim homo sub Dei imperio, ex mortalibus animalibus meretur ciuis nūcupari; quoniam solus est rationis particeps; solus est natus dominari, præesse, & ciuium munera obire. Præterea, nuncupatur homo à ter Maximo Mercurio, quem imitatur Plato in primo de Legibus, diuinum miraculum : & iure quidē; nil enim eo admirabilius apud nos excogitari potest. Ipse enim est, veluti vniuersi mundi Epilogus; in quo omnia breuissimè sunt perstricta, & conformata : est Magni mundi nexus, & hymenæus; in quo diuina cum terrenis iuncta sunt : est in hoc Terræ Theatro, veluti statua Dei, formata ad eius imaginem. Insuper, cum sit actus nihil; est omnia potestate, & virtute: cum sit natura impotentissimus; arte, & studio, omnium euadit potentissimus: cum sit corpore mortalis; est animo æternus : cum in specu vmbrarum sit collocatus; ad atrium lucis, & verè entis euolare natus est : Demum cum vnus, & simplex appareat; attamen, Prothei more, formam omnem recipere, omnemque vitam vīuere valet. Quibus de Rebus Aristoteles à Platone minimè dissentit,

De præcipua Hominis proprietate.

CAP. VII.

HActenus à primo rerum principio
vsque ad postremum omnia lustra-
uimus; cumulatè vidimus, quomo-
do à primo opifice per conuenien-
tia media vsque ad extrema, omnia effundantur;
vidimus hominem in tenebris, & umbra
collocatum: Reliquum modò est considerare;
quomodo ei vires, & facultates tributæ sint;
per quas valeat ex infimo ad summū gradum
extolli, ex tenebrisque ad lucem per animæ a-
las enolare. Procreationis munus, solius Dei
est; munus verò conuersionis, est hominis, nō
tamen sine Dei auxilio. Deo minimè fuit pro-
creatio difficilis; homini verò reditus in Deū,
apprimè arduus, & difficilis est. Sic facilis est
descensus; at reuocare gradus, hoc opus, & hic
labor est. Vt homo ad hunc reditum excita-
retur, maximeque aptus, & accommodatus
ad eum esset; variis proprietatibus donatus
fuit. Homo enim cū sit anima rationis parti-
ceps, rerum omnium rationibus decorata; in
corpore tamen sopita, quasi ebria, sui quemet
oblita: vt est anima rationis particeps; omnes
scientias, & rerum formas actu includit: vt ea
cum corpore est iuncta, & sopita; nullam ha-
bet actu, sed est, vt liber inscriptionibus carēs:
vt valet excitari, in se reuerti, & reminisci; est
nata fieri omnia. Hinc homo per rationem est
disciplinæ capax; & cū disciplinæ sit capax,

eius maximè propria est admiratio: quæ est occasio inquisitionis veritatis; & cùm eius admiratio sit propria, etiam aptitudo ad ridendū propria est, quæ admirationem exposcit. Aristot. in procæmio Metaphys. disciplinam, non propriam hominis asserit, sed communem etiam nonnullis iumentis, & feris. De hoc tamen lis nulla est inter eum, & Platonem: quia, dum asserimus disciplinam esse propriam hominis; de præcipua, & propriè sumpta loquimur, quæ rationem exposcit: ea, quæ communis est etiam feris, est disciplina ex sola assuetudine, & memoria pendens. In hoc tamen Aristot. verè à Platone dissentit, nec conciliari potest; quia Aristot. intellectum, quem potestate appellat, vt omnia fieri valeat, omnibus intelligibilibus formis debere esse denudatum existimat: Plato verò solūm asserit esse denudatum in respectu, & in parte; nō absolutè: conciliari inquam non possunt; quoniam Aristot. neque ideas, neque rationes ideis respondentes concedit, vt alibi ostensum est.

De Gradibus in acquirenda scientia.

CAP. VIII.



Quoniam ex veritatis cognitione, in homine manat omne bonum, vniuersaque eius perfectio; ac insuper, quoniam modus acquirendæ scientiæ est difficilis cognitus; adeò, vt de eo summo opere Arist. à Platone dissentiat: propterea

ptereà latiùs, & cumulatiùs in eius explicatio-
ne versari debemus. In scientiis, ac in earum
acquisitione, varij nobis occurrūt gradus; qui,
diuerfa consideratione, diuersi sunt. Primò e-
nim ex sententia Platonis in Epist. 7. hi quin-
que gradus considerantur, nomen, ratio, si-
mulacrum, scientia, idea. Nomen quid sit, satis
constat; & per nomen, etiam verbum signifi-
catur. Nomen, & à natura, & ab humana insti-
tutione ducit ortum. In nomine enim duo cō-
siderantur: primò, rectitudo, rectaque eius in-
stitutio: secundò, eius impositio, sub ea ratio-
ne, qua absolutè signum est. Si ad primum re-
spicimus, proculdubio rectitudo ex rei natu-
ra pendet; nomen enim debet naturæ rei re-
spondere. Hinc munus sapientis est, impone-
re nomen; hinc non omne nomen vnicuique
rei rectè conuenit; hinc demum ducit ortum
ratio ex etymologia deprompta, qua frequen-
ter etiam vtitur Arist. Si verò nomen secundo
modo consideramus: quia id nō à natura, sed
ab homine rebus est impositum; & est signū,
quod ab homine excogitatum est, pro deno-
tandis, ac distinguendis rebus; quod etiam si-
ne rectitudine frequēter res significat; & mul-
tifariam, multisque modis apud varias natio-
nes variatur: sic ad hominis libitum formari
dicitur. Hac de re in solis verbis, non in sen-
tentia lis est inter Platonem, & Arist. ambo e-
nim concedunt, quæ dicta sunt. Ideo Plato
nonnūquam nomina ex rei natura asserit esse

desumenda, vt in Cratilo, vbi rectam nominū institutionem considerat; nonnunquam verò ea nil firmit includere, in hominisque facultate esse posita affirmat. Arist. autem asserens ea ex hominis impositione pendere, ad id respexit; quòd nomen ex eo solo recipit, vt sit nomen, quia impositum est, & factum est signum pro re aliqua significanda: at non propterea inficiatur, rectitudinem nominis ex rei natura esse desumendam. Ex his patet, quomodo nomina significant, & sint, vt instrumenta artium; quemadmodum dixit Plato in Cratilo: & non significant, vt instrumenta; quemadmodum dixit Arist. in lib. de interpretatione. Nam quatenus seruant rectitudinem, ex rei natura depromptam; se habent, perinde ac instrumenta artium: in quibus necessaria est rectitudo quædam, & conueniens figura; vt suū opus absolueri valeant. Ex aduerso, non sunt sicut instrumenta; quatenus etiam sine rectitudine impositionis funguntur suo munere: & ex eo solo, quòd facta sunt signa; id habent, vt nomina sint. De nominum facultatibus varia occurrerent dicenda; sed, vt minùs instituto nostro inferuentia, prætermittuntur. Nomen itaque est id, quod in acquirenda cognitione nobis primò occurrit. Ei succedit ratio, siue oratio, pluribus vocibus explicans nominis significationem; vt circulus est figura plana, vna linea terminata, in cuius medio est punctum, &c. Tertiò consideratur simulacrum, &
imita-

imitatio quædam in materia recepta; vt circulus pictus, vel torno factus, deletus, vel destructus: in quo consideramus, quòd ille non est verus circulus; & quòd ipse circulus nec deletur, nec destruitur, & exquisitè circulus est. Ex qua animaduersione, per excitationem à circuli imagine factam, & per rationem animæ insertam, in actum expromimus ingenitam circuli formam: ex qua vario modo se habente, consurgit in nobis scientia, & vera opinio: quæ nunc ob vnitatem rationis vno nomine designantur, infra verò cumulatius distinguuntur. Postremò per huiusmodi actum insertæ rationis, dirigimur in Ideam in mente vigentem: in qua directione, & cum ea nexu posita est propria intelligentia; quæ est absolutio, & postremus terminus humanæ cognitionis. Ea tria, quæ primò numerata sunt, non semper omnia necessariò nobis occurrunt; valemus enim, etià sine cognitione nominis, in cognitionem naturæ rei eleuari: postrema duo, necessaria sunt pro scientiæ absolute. Prima tria, variis permutationibus sunt obnoxia: quartum minùs: postremum verò minimè penitus. Prima tria potiùs versantur circa quale, circa imaginem, & vmbra: quartum nos extollit ad veri participationem: quintum ad ipsum verum, rei quæ essentiam. In primis gradibus versantur ferè omnes: in quarto pauci: in quinto, Dij quidè omnes, homines verò paucissimi; vt in Timæo asseritur. Quatuor

prima sine quinto, cognoscuntur quidem, sed confuse; exactè autem innotescunt ex cognitione quinti, ut effectus ex cognitione causæ. Quintum verò assequi nullo pacto valemus, nisi primò accuratè in reliquis versati fuerimus; nos enim ex diuersitate ad identitatem, ex multitudine ad vnum, ex vmbra ad essentiam, cogimur eleuari. Dum nos rerum cognitionem expetimus, & quærimus; si solùm earum simulacrum cognoscere, vel explicare cupimus, in tertio gradu collocatum (quod faciunt multi) facile est assequi; quod cupimus; & multitudini cumulatè satisfacimus; & vera enunciare iudicamur: At dum ingenium ali- quod verè Philosophicum, quod ita rarū est, ut rari sunt corui albi, ad quintum aspirat, & foelici euentu illud attingit: quamuis ille contactus sit omni cognitione clarior, firmior, & certior; attamen difficile est illum literis mandare, & aliis manifestare: ut de mundi opifice dixit Plato in Timæo, quòd difficile est illum inuenire; inuentum verò aliis manifestare, est impossibile: eadem enim ideæ, & opificis est ratio, cùm ideæ opifici conueniant. Et iure aliis manifestari non potest: Primò, quia desunt verba exactè respondentia essentiae rei, cùm sint signa vmbra- rum: Secundò, quia cum illis loquimur, qui in solis versantur vmbis; & propterea ab eis carpimur, & digni reprehensione iudicamur; cùm nō videant illud quintum quadrare, exactèque respondere simula-
cris

eris in materia positus, quæ sola verè esse existimant. Hinc quoque euenit, quòd frequenter non animus scribentis, vel loquentis redarguitur, sed verba tantùm; vt contigit Platoni de Republica loquenti: ipse enim Reipublicæ diuinam quandam ideam considerauit, quam rectè nouit inter homines reperiri non posse; carpitur autem ab aliis, ad sola humana, & umbras respicientibus. Hinc conspiciamus libros de Legibus libris de Republica nō omni ex parte respondere: nam Plato leges formaturus, humanas condiciones magis considerauit. Arist. in his re vera à Platone dissentit; non enim ita nos eleuat, vt Plato. Arist. rerum imaginibus contentus, in eis requieuit, nec altiùs eleuatus est: Plato verò imagines despiciens, ad quintum gradū ascendit; quem solum magnificat. Ex quo euenit, quòd ab Aristotele non commendatur; & sæpe verba, non eius sententia reiicitur. Et quamuis Plato hæc omnia præuidens; sua decreta, suamq; sapientiam, vel potiùs idearum contactum, renuerit aliis manifestare; vt patet ex epistolis, & ex libris de Republica: attamen non adeò hoc præcauere valuit, vt etiam aliorum moribus aliqua ex parte non se exposuerit.

Alia graduum cognitionis explicatio. CAP. IX.



T clariùs pertinentia ad internam animæ nostræ cognitionem elucescant, alio sumpto principio cum Platone in 6. & 7. de R. P. dicamus. In.

ternarum animæ nostræ cognitionum, quatuor sunt gradus; Imaginatio, siue Assimilatio; Fides; Cogitatio; & demum Scientia, siue Sapientia. Primi duo gradus simul iuncti, opinionem constituunt: Duo verò postremi pariter iuncti, pariunt intelligentiam latè sumptam. Dico latè sumptam; quia tribus modis apud Academicos vsurpatur intelligentiæ nomen. Primò, vt confurgit ex opinione, & scientia; quemadmodum in septimo de R. P. asserit Plato. Secūdò, vt in idem venit cum scientia: sic in calce sexti de R. P. intelligentiam cum scientia confudit. Demum, vt distinguitur à scientia, & intelligibile à scibili: sic scientia essentialis animæ rationes respicit; intelligentia verò eleuat ad ideas, & hæc propriè intelligentia est. Distinctio horū quatuor graduum præsertim pendet ex distinctione rerum, in quibus anima versatur. Nam considerantur hi quatuor rerum gradus; imago rei sensibilis, res sensibilis, imago rei intelligibilis, & demū ipsum intelligibile. Imaginatio, siue assimilatio, respicit imaginem rei sensibilis: quæ imago nil aliud est, nisi vmbra, vel simulacrum; quod in aquis, vel aliis corporibus lucidis, & tersis apparet. Fides versatur in re sensibili: res sensibiles sunt animalia, plantæ, & demum corpora, quæ apud nos sensu vsurpantur. Ex imaginatione, & fide opinio confurgit. Cogitatio versatur in imagine rei intelligibilis: quæ imago nil aliud est, nisi vniuersale quoddam

ex sensibilibus collectum, ad rationes rerum in anima existentes relatum, earumque ope constitutum; sed non ad ideas eleuatum, in easque resolutum. Qui versantur in hac rei intelligibilis imagine, suppositionibus vtuntur; & ex eis, non ad principia, quæ sunt rationes, & ideæ; sed ad inferiora nos deducunt. Demum scientia, vt cum intelligentia confunditur, in intelligibili versatur; quæ est essentia rerum, & est initium ceterorum graduum: huiusmodi sunt rationes ad animam, ideæ ad mentem pertinentes. Vt in splendore, & veritate, intelligibile se habet ad sensibile, & forma ad imaginem; ita superiores cognitionis gradus, se habent ad inferiores. Hi quatuor gradus, vt in quinque resolui possunt, secernendo intelligentiâ à scientia; ita in duos præcipuos à Platone rediguntur; quatenus duo primi versantur circa generationem, duo verò postremi circa essentiam. Neque putandum est, hos quatuor cognitionis gradus à Platone positos, respondere quatuor generibus argumentationum; nempe exemplo, inductioni, enthymemati, & syllogismo siue demonstrationi: adeo, vt exemplum imaginationi, enthymema fidei, inductio cogitationi, & demonstratio scientiæ respondeat: hoc, inquam, dici non debet; quoniam quatuor argumentationum genera, ad eandem rem possunt referri; cum quatuor hi gradus à Platone positi, referantur ad varios rerum gradus, nec in eodem versari possunt;

quod ex eo patet: quia multi hos rerum gradus non concedunt, qui tamen ea quatuor argumentorum genera libētissimè approbant. Ex his constat, quinam debeant cenferi philosophi, & qui *philodoxoi*. Nam qui in sola rerum generatione versantur, non Philosophi, sed Philodoxi dici debeat: Qui verò versantur in essentia, & ad ideas extolluntur, easque solas inquirunt; iure philosophi cenferi merentur: ut in quinto de R. P. monuit Plato. Hos gradus Peripatetici non valent per sua principia concedere; nec ad supremum eorum, ingenij aciem attollere; cùm Ideas menti insertas non cognouerint.

Quæ merentur nuncupari Scientiæ:

CAP. X.



EX dinumeratis quatuor gradibus, necnon ex eorum explicatione, patere potest; quænam ex humanis disciplinis sint dignæ nomine scientiæ, quæ verò minimè. Nam illæ solæ iure merito censendæ sunt scientiæ; quæ liberæ sunt, nullis suppositionibus vtuntur, in prima absolute resoluunt, in essentia versantur, & demum ad ideas nos eleuant: hæ sunt, quæ iure merito, ne dum scientiæ; verum etiam sapientiæ, & intelligentiæ nomine honestari merentur. Huiusmodi ex disciplinis est sola Dialectica: nam ea sola nullis suppositionibus vtens, umbras, & imagines negligens, sublimi indagine

gine ad prima principia nos euehit; & propterea disciplinarum apex, earumque colophonium, iudicari meretur. Nōmine Dialecticæ, non logicam, non logicæ partem, nec disputandi methodum, qua de rebus omnibus probabiliter differere valeamus, denotari putandum est; sed disciplinam supremo acumine præditam, suppositiones omnes negligentem, libereque ad prima initia euolantem, in illis solis requiescentem. Aristoteles huiusmodi Dialecticam nequaquam dari existimat, cū non putauerit dari Ideas: neque Metaphysica Aristotelis, est Dialectica Platonis; vt Marfilius, & alij cum eo existimarunt: sed solum dicere possumus, Metaphysicam Aristotelis proportionē respōdere Dialecticæ Platonis; quatenus ambæ ad ea eleuant, quæ sunt prima ex opinione suorum auctorum, & sunt dominæ cæterarum. Re vera tamen maximè differunt; quoniam Dialectica Platonis ad Ideas eorū, quæ sunt, nos perducit: quod minimè facit Metaphysica; quæ cū laboret pro euertendis Ideis, etiam laborare dicitur pro euertenda vera Dialectica Platonis. Et hoc ex eo manifestè patet, quod dicitur ab Arist. in primo Metaph. cont. 47. nec non 48. vbi hanc liberā, suppositionibus non vtentem Dialecticam arguit, & refellere nititur. Quem locum Arist. nec Auerroes, nec illi interpretes rectè explicare valuerunt; qui non fuerunt versati in disciplina Platonis, aduersus quam ibi disputa-

tat Aristot. quamuis eius rationes, per fundamenta Platonis rectè intellecta, facile dissoluantur. Propterea ego nunquam induci potui, vt omni ex parte eos commendarem; qui se Aristotelis profitentur interpretes, & disciplinæ Platonicæ penitus sunt ignari. Quæ enim ratione quælo valent Aristotelem sine notitia doctrinæ Platonicæ explicare? cum Aristoteles, vt plurimum, Platonem arguat, aduersus eum de rebus præcipuis differat? Quomodo iudicium tradere, vim rationum perpendere valent; eo non cognito, de quo sermo est? Sed hoc prætereuntes, ad id reuersi, vnde recessimus; iam constare censeo, quid sit Dialectica apud Platonem; & quomodo conueniat, & differat à Metaphysica Aristotelis. Patet insuper; scientias ab Aristotele de rebus traditas, vt ab eo traditæ sunt, scientias non esse, sed opiniones; & consequenter non esse partes philosophiæ, sed solum partes dilectionis opinionis. Mathematica, quæ certissima dicitur scientiarum, minimè est scientia: tum quia non de intelligibilibus, sed de sensibilibus est: tum insuper, quoniam non traditur per principia scientiæ; cum solum vtatur petitionibus, & suppositionibus nonnullis; non autem resoluat in verà, & prima principia. Promuntur quidem in facultatem imaginandi formæ illæ, quæ à mathematico considerantur, ab anima per rationes; vt cum Proclo etiam Simplicius manifestauit; attamen Mathematicus rationes

tiones eas non cognoscit, nec ad eas, & longè minùs ad ideas eleuatur: aliud enim est cognoscere per rationes, & cognoscere rationes; primum conuenit Mathematico, non secundum; ideo iure non cognoscit propria principia eorum, quæ considerat. Propterea Mathematicæ solùm per consuetudinem dicuntur scientiæ, non autem re vera scientiæ sunt; ut docuit Plato in 6. de Republica: scientiæ autem essent, si ad principia ascenderent, ut facit Dialecticus: qualem fuisse censendum est Mathematicam Pythagoræ, & Platonis, ut alibi explicatum est. Sic intelligi debet sententia Simplicij, in 3. de anima, & alibi asserentis, Mathematicas non esse scientias; quia ad propriè sumpta principia non eleuant: per quæ principia rationes, & ideas denotauit; à quibus, vel proximè, vel remotè pendent, nedum mathematicæ; verùm etiam cætera omnia, quæ fiunt. Quæ Simplicij sententia minùs rectè, à plurimis refertur, minùs exactè considerantibus fundamentum eius.

Quomodo in nobis de Rebus fiat iudiciũ.

CAP. XI.



Vamprimùm nobis sese offerunt externa sensibilia, ac sentiendi instrumentum vita præditum attingunt; primò consideratur affectio, ac percussio quædam viuientis organi: quod, ratione

corporis, patitur; ratione formantis vitæ, reddit affectionem illam puriorem, ac magis spiritalem; & hæc est actio facultatis formantis: quæ actio, iudicium non est; sed mox ea purior affectio, attingit facultatis vtentis rationem; cum ea iungitur, vt effectus cum sua causa: & tunc facultas vtens, per rationes sensibilibus respondentes, eas iudicat; nam per vnâ dulcedinis rationem, iudicat omne dulce; & ita de singulis. Adeò, quòd in obeundo sentiendi munere, & facultas formans, & vtens agunt: formans agit; quia ex minùs pura puriorem, vel ex non spiritali spiritalem reddit actionem; id quæ efficit munere rationum, & propterea promere dicitur sensilem speciem: facultas verò vtens, per nexum speciei sensilis cum ratione, tanquam cum causa, iudicat; adeò, vt iudicium solùm sit facultatis vtentis. Sic vera est sententia Academicorum, quòd perceptio in sensibus terminatur ad actionem. Pariter vera est eorundem sententia, quòd simile cognoscatur à simili: quæ longè priùs ab Empedocle fuit prolata, & mox à Galeno in septimo de Placitis Hipp. & Plat. cap. 5. & 6. approbata, & explicata; quamuis longè secùs, & longè diuersa significatione, ac fuerit primò ab antiquioribus, maximè à Platone prolata. Quæ sententia; quamuis ab Aristotele in primo de anima damnetur; attamen leues sunt eius rationes: quoniam,

quoniam, vel respexit ad similitudinem corpoream tantum, per quam asserit putasse antiquos fieri cognitionem: de qua si loquimur, etiam cum Platone fatemur, simile à simili non cognosci: vel respexit ad solam perpeffionem instrumentorum sensus: de qua etiam fatemur, non fieri propriè à simili: quia similitudo in actione considerata est: vel deinum ideas, & rationes pro cognitione apprimè necessarias, inutiles, & superuacaneas existimauit. Quemadmodum ab externis sensibus iudicium ferri asseruimus, ita idipsum fieri ab internis putandum est: nam ea simulacra actu reddita ab externis sensibus, per conuenientes gradus transeunt ad internas facultates: ibique puriores adhuc redduntur: & per rationes superioris ordinis, illis simulacris respondentes iudicantur. In internis cognitionibus, ut ex Sophista colligitur, reperitur hic ordo. Nam primo post sensus externos, communi sensu ligatos, occurrit vis imaginandi: quæ vel Assimilatrix est, vel Phantastica: Assimilatrix dicitur, ut ea apprehendit, quæ à sensibus ei offeruntur: Phantastica verò, dum supra simulacrum erigitur: idque sub ratione, vel pulchri, vel deformis, amici, vel aduersi apprehendit: ac etiam ad libitum noua phantasmata format. Sequitur mox Cogitatio, supra quam est scientia. Insuper, Opinio, & Fides, dupliciter accipiuntur: vel enim obscura, & diminuta sunt penitus, & sic cogitationem antecedunt; nam

fides sequitur imaginationem; ex fide autem, & imaginatione cōsurgit opinio: vel accipiuntur, vt maiori perfectione sunt prædita, & sic sequuntur cogitationem. Propterea inquit Plato in Sophista, quòd anima, quæ intus viget, dum quasi secum loquens ratiocinatur, ea interna locutio cogitatio est; affirmatio verò, & negatio ex cogitatione pendens, dicitur opinio: cū verò anima non per se, sed per sensum id facit, imaginatio dicitur, &c. Ex his constat primò; Platonem, & Aristotelem non idem sentire de modo sentiendi, & cognoscendi; & diuersitas pendet ex rationibus, quas ponit Plato, reuult Aristot. De numero autem facultatum dissentire non videntur. Carpitur Plato ab Aristotele in secundo de anima cont. 158. quia Plato dixit imaginationem esse compositam ex opinione, & sensu. Simplicius, & Philoponus pro Platone inquirunt, eam non fuisse sententiam Platonis. At re vera Aristoteles tunc in Platonem inuehitur; & modo aliquo id colligitur ex verbis Platonis in Sophista, dum inquit, internam cogitationem externæ nostræ loquutioni respondere; ac vt in oratione reperitur affirmatio, & negatio, ita in cogitatione opinio: & cū talis passio, nempe opinio, non per internam animam, sed per sensum accidit; nō aliter, quàm Phantasia cognominari potest. Sic itaq; asserit Plato Phantasia modo aliquo consurgere ex opinione & sensu; quatenus Phantasia est ea tenuis, & obscu-

obscura opinio, ex sensu confurgens. Quæ sententia dum rectè intelligitur, vera est: nam loquitur tunc Plato de virtute imaginandi phantastica, de opinione tenui, & obscura; nō de ea, quæ ex ratiocinatione confurgit. Aristoteles eum carpens, de opinione alia loquitur, quæ ex ratiocinatione confurgit; ideo inquit in cont. 159. Apparent autem per imaginandi vim sæpe falsa, de quibus simul opinionem, siue existimationem veram habet: vt apparet Sol vnius pedis; persuasum autem est, eum maiorem esse vniuersa terra. Hæc Aristot. per quæ patet eum in verbis carpere Platonem, & sophisticè; cū secus accipiat nomen opinionis, ac id fiat à Platone.

Quomodo in nobis producaturscientia.

CAP. XII.



Varia ad hominis cognitionē pertinentia, in præcedentibus dicta sunt: superest tamē adhuc, vt modum explicemus, quo scientia in nobis paritur; quæ consideratio viro studioso est apprimè necessaria. De qua hanc censeo Platonis fuisse sententiā: Anima rationis particeps, cui ab æterno leges fuerunt ostensæ; hoc est, cui rationes omnes ideis respondentes, fuerunt insertæ; in humano corpore, quasi in campo obliuionis recepta; propè flumen negligentiae, hoc est propè fluxum humorum

collocata; ex quo in ea varia perturbationum genera confurgunt, quæ sunt caussa, vt anima suimet obliuiscatur, suaque negligat. Ita, inquam, anima constituta; quasi dormiens, & ebria; dormiens, antequam excitetur; ebria, antequam excitata purgetur; incipit ab externis sensibilibus moueri, & excitari: excitata ob scientiarum initia in se conseruata, incipit auidius scientiam expetere: sic omnis homo, per naturam, hoc est, per veri intrinsecus infertas rationes, scire desiderat; cuius desiderij non tam conuenientem caussam valent Peripatetici assignare. Anima verum, & scientias expetens, in rerum externis imaginibus versatur, in quibus verisimile refulget; eas inter se per ratiocinationem pro facultate distinguit; & si in aliquo conueniunt, in vnum colligit. Sic coniunctum in multa seiungens, multaque in vnum redigens, eò usque progreditur, vt per verisimile ad verum eleuetur; essentiamque rei ab omni, vel aliena, vel contraria qualitate seiunctam attingat, in ratione, & idea refulgentem. Ex quo contactu sibi apprimè salutari, tãquam ex reditu in propriam naturam, optimamque dispositionem, incomparabili quadam lætitia perfunditur; adeoque exultat, vt umbras omnes negligat, & paruipèdat. Tunc verè cognoscit, quod, dum homo ad corporea respicit, in simulacris versatur, ad imagines conuertitur; & quamuis multa se scire putet, tamen re vera nihil scit; sed tunc solum ad scientia

riæ sublimem gradum eleuatur, cū ideas attingit. Ex quo patet, quatuor hominum in ordine ad sciētiam inueniri subordinatas dispositiones. Primò enim pueri, tanquam noui huius mundi hospites, se nil scire cognoscunt. Mox in ymbris, & imaginibus rerum naturalium versati; neque adhuc ad essentias rerum conuersi; cū nihil sciant, multa tamen se scire existimant. Tertiò ad superna conuersi, eaque sola verè esse iudicantes; se nihil eorum scire affirmant, quæ primò existimabant se scire: in quo gradu se reperiri profitebatur Socrates, dum dicebat; Hoc vnum scio, quòd nihil scio; cuius ignorantia, aliorū scientiæ præferenda est: quem ordinem indicauit Socrates, dum in Phædone dixit, se, dum primò in rebus naturalib. versabatur, putasse multa scire; in progressu tamen eò deuenit, vt se nil scire animaduertetet. Postremò per animæ acie ad ideas homines eleuati, cum eisq̃ coniuncti, iam scientiæ splendore illustrati refulgent. Hinc constat, quid sit intellectus adeptus; quò à longè conspexit Auerroes, & in cuius adeptione summum bonum collocauit. Nam duplex in anima consideratur adeptio: vna sui ipsius; dum extrà progressa, in se, ad suasq̃ rationes reuertitur; altera mentis; dum per rationes cum ideis iungitur, & mentem, tanquā formam adipiscitur. Demū ex his patet; quomodo vera scientia, quæ eadem intelligentia, & sapientia est; pietatem, & religionem parit;

scientia enim nos ad mentem, & ad diuinam eleuat; cum eis animam copulat, cum quibus anima sola pura, recteque purgata coniungi valet; propterea ea coniunctio sine pietate, sanctitate, & religione, nec esse, nec seruari potest: adeò, vt pugnancia proferant; qui inquirunt, aliquem esse sapientem; sed impium, & à religione alienum.

An scire sit reminisci.

CAP. XIII.



Requenter Plato, cum in Menonem alibi, scientiam esse reminiscētiā ostendit; & iure profectò. Cū enim à primo opifice manarint; à quo omne, quod effluit, perfectum est; animas quoque omni perfectione absolutas ab eo manasse, putandum est: animæ perfectio est scientia; quæ adeò est eius propria, vt seorsum ab ea, nec quidē iure anima dici mereatur. Quod etiam ex eo patet: quoniam externa accidentia, quæ sola sensibus vsurpantur, nunquam ad substantiæ, internæque essentiæ cognitionem nos eleuarent; nisi in anima nostra per rationes formæ rerum essent insertæ, ei que essent familiares. Neque tam facile per excitationes, per interrogationes, & responsiones, in nobis excitaretur cognitio veritatis; nisi cum ea veritate cōcreatæ fuissent animæ. Accedit, quòd neque etiam adeò tenax esset hominis memoria, neque tam diu seruaret anima notions

tionem rerum; neque eorum, quæ ante quinquaginta annos didicit, recordaretur; nisi firmo, & stabili aliquo interno fundamēto, scientiæ munitæ essent; firmisquæ radicibus hærerēt: quomodo enim tam diu, vel in spiritibus, vel in essentia animæ, imagines solū extrinsecus receptæ, seruari possent? Fateamur itaque cum ratione, cum experientia, cum Platone, scientiam esse reminiscētiā; asseramus, ab æterno animæ fuisse insertas rationes rerū ideis respondentes, per quas dicitur Deus in Timæo ostendisse animis fatales leges; cognoscamus ex hoc, qua ratione, ex sententia Platonis, anima sit diuinæ mentis imago: vt enim diuina mens est omnia per Ideas; ita anima est omnia per rationes ideis proportionē respondentes. Scientia itaque nostra, est reminiscētia eorum; quæ anima primò soluta à crasso corpore, in seipsa nouerat: quorū, ob lapsum à se, & coniūctionem cum corpore, oblita est. Nuncupatur autem reminiscētia, duplici de causa: primò; quia anima soluta à corpore, eammet primò sciebat: secundò; quia eadem anima cum alio corpore iuncta, eadem addiscere, & scire potuit. ¶ Prima tamen est ea, ad quam præsertim respexit Plato; nam ea propriè potest dici reminiscētia, cū nobis conueniat per reliquias intelligibilium in anima intrinsecus seruatas: Altera verò reminiscētiæ nomine designari non meretur; cū id, quod in vna corporea vita acquiritur, in obitu penitus

aboleatur. Infuper, dum dicimus scientiam ef-
fe reminiscientiam; id minimè est verum, refe-
rendo scientiam ad compositum; sed solum
ad animam, cui ab æterno insertæ sunt ratio-
nes rerum; per quas soluta à corpore, valet li-
berè euncta cognoscere.

Quæ à Peripateticis obijciuntur Platoni.

CAP. XIII




Eripatetici ad sola externa respi-
cientes, in imaginib. potiùs, quàm
in essentia rerù versati; Platonem
supra eorum terminos eleuatum,
in conspicuo versari errore affirmant: quod
facile se ostendere credunt. Primò; quia quod
apprimè aptum, natumque est aliquid recipe-
re, eo debet esse denudatum; quod est in po-
tentia, debet esse priuatum forma recipienda;
quod ad opposita est indifferens, ad nullam
partem debet esse contractum, nullique desti-
natum: hominis anima, ante scientiarum ade-
ptionem, est capax; est in potentia; est indiffe-
rens ad verum, & falsum; & modò in vno, mo-
dò in altero versatur: non itaque insertam ha-
bet scientiam, & veritatem. Præterea, à ratione
omnino esse alienum asserunt, quòd in anima
insertæ sint rerum scientiæ: quasi Thesauri
pretiosi, & optimi, qui nos lateant: non enim
veritatis splendor, & lux, ocella seruari po-
test. Addunt, quòd non anima scit, sed homo
per animam; non itaque anima soluta à corpo-
re,

re, ea cognoscit; quæ percipit, iuncta corpori. Confirmant; quia hominis anima, sine virtute imaginandi nihil intelligit; & propterea reminisci non possumus, cum vis imaginandi pereat. Addunt, Platonein, nedum cum ratione, sed etiam secum pugnare: Ex vna enim parte asserit, scientiam esse reminiscentiam: ex altera inquit, imagines nouas in anima formari, easque seruari, vel deleri; quæ memoria, vel obliuio dicitur; vt patet ex Theæteto: Insuper, asserit in Philebo; animam libro sine scriptione esse similem, in quo denuo multa scribantur: Iure itaque negligenda penitus esse videtur ea Platonis de reminiscentia sententia; quam ipsemet reiecit, & seruare non valuit. Proculdubio, qui leuiter perpendunt, & extrinsecus solum considerant sententias sapientum; facile in eis oppositiones adinueniunt, lites excitant, rationesque pro earum euersione formant: quæ facillime delentur, dum sententiæ intrinsecus considerantur, intimiusque perspiciuntur. Hoc manifestè patere potest in proposita difficultate: de qua non est cum Simplicio dicendum; quod lis sit in verbis; & quod, vt ex sententia Platonis, ita etiam ex sententia Aristotelis scientia sit reminiscentia; & quod Aristoteles eam non censuerit nomine reminiscentiæ denotandam. Manifestissimè fallitur Simplicius; cum sit conspicua differentia de rationibus animæ insertis, de statu animæ extra crassum corpus, de numero animorum,

& aliis ad rem hanc pertinentibus; ut frequenter ostensum est in præcedentibus. Dicamus itaq; nos, eos re vera dissentire; & Platonem, nec secum, nec cum ratione pugnare; sed sententiam proferre humanæ rationis apprimè consentaneam. Et dum inquirūt Peripatetici, intellectum esse indifferentem, in potentia, & maximè natum recipere: dicendum est, hæc esse vera de anima rationali, ut nobis iuncta, ut cum imaginatione complicata; in qua conjunctione etiam seruat facilitatē, & habilitatem ad vnum oppositum; nempe ad veritatē, ad quā per insertas rationes est procliuvis. Insuper, cum in eius essentia, siue in anima in se manente, insertæ sint rerum rationes; optimè seruator, quod ab Aristotele dicitur in tertio de anima; in nobis reperiri, & quod est natum omnia fieri, & quod est natum omnia facere: adeò, ut Aristoteles à veritate coactus, sententiam protulerit apprimè consentaneam sententiæ Platonis. Neque est à ratione alienum, ut inquirunt, quòd huiusmodi Thesauri scientiarum, nos lateant: nam adeò inuoluti sumus in tenebris, & umbra corporum; ut potius mirum sit, quomodo aliquis animi aciem supra tenebras valuerit eleuare, & lucem veritatis conspiciere. Accedit, quòd etiam in huiusmodi tenebricosa dispositione, acutè insipientibus varij offeruntur huius splendoris radij, veritatisque indicia in præcedente capite enarrata. Præterea, si non miramur Geometram dormientem

mientem, & ebrium latere habitus suos: cur mirari debemus, quòd anima longè vehemē-
tiora passa ob coniunctionem cum corpore,
suimet, & suorum bonorum videatur oblita?
Et dum inquirunt, non animam, sed hominem
intelligere; & nil intelligere, sine virtute ima-
ginandi: dicendum est, & hominem, & animā
intelligere; sed modo vario: cū enim anima
seorsum à corpore seruetur, seorsum à virtute
imaginandi subsistat, etiam seorsum ab his o-
perari valet. verum est, quòd homo nil intelli-
git sine virtute imaginandi: falsum autē, quòd
anima sine ea nil intelligat; immò sine ea verè,
& propriè intelligit. Affero tamē, dum ex Pla-
tonis sententia dicimus, scientiam esse reminis-
centiam; id minimè esse intelligendum, refe-
rēdo hoc ad corporeum hominem: sed solūm
esse verum, ratione animæ: non enim ille met
numero homo, sed eam et anima prænouit il-
la; vel seiuncta à corpore, vel cum alio corpo-
re iuncta. Dum verò vlteriùs inquirunt, Plato-
nem secum pugnare: qui hoc asserunt, se igna-
ros prorsus ostendunt Academicę disciplinæ.
Nam ex sententia Platonis, dum loquimur de
hominis scientia, ad duo respicere valemus:
vel enim respicimus ad compositum hominē,
vel ad solam animam: in super, vel respicimus
ad imagines per externas sensuum excitatio-
nes expromptas, vel ad rationes intrinsecūs in
anima insertas. Si ad hominem, & ad imagi-
nes aduentitias respicimus, sic nouæ scribun-

tur literæ, vt in Theæteto, & in Philebo legitur; id tamen non fit sine auxilio internarum rationum: Si verò ad solam animam conuertimur, & ad rationes in ea insitas; non denuo acquiruntur, nec vnquam penitus delentur, & eliduntur; sed solum obruuntur, & obscurantur. Ex his colligi primò possunt omnium aduersarum rationum solutiones: colligitur secundo, opinionis, & fidei acquisitionem, nò propriè esse reminiscentiam, cum ad solum compositum pertineant, & in imaginibus extrinsecus aduenientibus versentur; solum ea tenus potest dici reminiscentia, quatenus ea quoque cognitio ab insertis rationibus habet ortum, propriè tamen sola scientia meretur dici reminiscentia. Ex his ratio colligi potest: cur Plato pro inuenienda veritate præsertim vsus sit Dialogis; & Socrates ad solutam orationem se minimè aptum prædicauerit, sed solum ad interrogationes accommodatum; ac demum, cur se obstetricio fungi munere affirmauerit: per hæc enim omnia denotauit, veritatem in animis nostris esse insertam; & per interrogationes animam ad partum latentis veritatis esse excitandam: scientiasque non extrinsecus induci, sed intus existentes educi. Demum patet, quòd Apollo præcipiens, Τῆ ΙΠΣΥΜΝΟΣ ΕΙ; latenter præcepit, nos omnia debere noscere: quoniam qui se noscit, animam exactè cognoscit; in qua rerum omnium veritates, vt in speculò refulgent.



STEPHANI THEVPOLI,

BENEDICTI F. PA-

TRITII VENETI,

ACADEMICARVM

Contemplationum,

LIBER X.

De Humana fœlicitate differendum proponitur.

CAP. I



QUONIAM finis, cui inferuire, o-
pemque ferre debet humana cõ-
templatio, est Homo; ac ob id so-
lùm vigilandum, laborandumq;
nobis est pro scientiarum acqui-
sitione; vt nosmetipsos à corporea labe purge-
mus, & pro facultate perficiamus; ac insuper,
quoniam hominis perfectio, & scopus nobis
in hoc vitæ cursu propositus, Fœlicitas est: iu-
re in fine mearum Platonicarum contempla-
tionum, de Homine, vt de fine cui; de Fœlici-
tate, vt de scopo postremo, in quo solo cumu-
latè requiescimus, mihi differendũ proposui.
Natura in formando homine, de nulla alia re
magis sollicita fuisse visa est, quàm, vt ad sub-

limem hanc perfectionem eum redderet aptissimum: propterea, præter animi facultates, ei pro origine dedit admirationem; pro medio, animi habitus: pro fine, ei felicitatem proposuit. Habilitas ad admirationem, est hominis affectio origine prima: facilitas ad capeffendas disciplinas, est proprietas origine secunda: facultas ad assequendam felicitatem, est proprietas origine postrema; perfectione verò, & intentione præcipua: in quo ternario numero, vniuersa hominis perfectio posita est. Et quoniam de attinentibus ad duas præcedentes proprietates, satis superque in præcedentibus sum loquutus; superest solum, vt de animi habitibus, tanquã de proxima ad felicitatem dispositione, loquar; ac demum immensam humanæ felicitatis amplitudinem quam breuissimè perstringam.

De Animi habitibus.

CAP. II.

Quemadmodum ad nostrum corpus se habet sanitas, & pulchritudo; ita ad animam se habere putandum est virtutes in more positas, & scientiam: vt corpus per naturam præsertim formosum est, & bene valet; ita anima, ex sui natura, virtutibus, & scientiis est decorata: Demum, vt ars, & humana industria, conducunt ad sanitatem recuperandam, ad illustrandamque formam; ita disciplina, & studium, apprimè necessaria sunt

sunt pro scientia è tenebris in lucem reuocanda, virtuteque comparanda: quam vt animam assequatur, nil extrinsecus recipere debet, sed solum eget purgatione à corporea labe; non secus ac aurum, vt fulgeat, solum debet à terrena sorde secerni. Hinc euenit, quòd virtus omnis purgare dicitur; & omnis anima purgata, virtutibus, & scientiis, tanquam splendore proprio, est honestata. Dicitur tamen anima habitus recipere; quoniam habitus ad duò referri possunt: vel ad essentiam animæ, eiusque rationes; & sic firmi, permanentes, animæque manenti coætèrni sunt; vel possunt referri ad hominem animam præditum; & ad notionès, quæ per externas excitationes à sensibilibus factas promuntur; in quâ consideratione acquiri studio, & disciplina dicuntur: adeò; vt tunc dicamur habitu præditi, dum (repulsa nube, solutaque caligine; qua anima ob nexum cum corpore obducta, & circumfusa erat) anima in se conuersa, rationes, vel ideàs conspiciere valet; & ita est affecta, vt non facile ampliùs, vel à corporis illecebris decipiatur; vel à nubibus eius offundatur. Ex quò constat, pro habitus adeptione nil denuo in anima recipi, sed solum aliena repelli. Et quemadmodum supra crassam ignorantiam considerabantur tres cognitionis gradus: vnus opinionis rerum fluxilium; alter animaduersionis, quòd ea non sit scientia; postremus adeptionis veræ intelligentiæ, & scientiæ: ita quòd

que in habitibus animæ hi tres gradus inueniuntur. Nam consideratur primò habitus opinionis, qui expostit conseruationem phantasmatum rerum sensibilibum in memoria: cōsideratur secundò habitus, & constantia in eo iudicio; quòd sensibilia non sint res veræ, sed vimbæ; qui est habitus, supra phantasmam eleuatus: demum cōsideratur habitus supremus in reditu animæ in se, & cōtactu idearum; qui phantasmatum ope minimè eget, nisi pro origine conuerſionis animæ in seipsam. Ex qua explicatione primò colligimus, quomodo anima per scientiam fiat omnia: nam ea, vt nobis iuncta; primò est penitus in potentia, & nihil actu; mox fit omnia per rationes omnium sibi insertas; adeò, vt ea, ex se, semper sit omnia; vt nobis iuncta, modò sit potestate, modò actu, inodò nihil, modò omnia; absque eo, quòd aliquid extrinsecùs in se recipiat. Patet insuper, quid verè sit intellectus agens, & possibilis: nā duplex in nobis consideratur intellectus agens, duplexque possibilis; quatenus duplex potest fieri comparatio: vna inter animam in se manentem, & à se recedentem, siue progredientem; in qua comparatione anima progrediens, nuncupatur intellectus possibilis; in se manens, dicitur agens. altera comparatio fit inter animam, & inentem, quatenus anima à mente perficitur; in qua comparatione anima est intellectus possibilis, mens verò agens. Quæ omnia longè secùs per principia, & fundamēta.

damēta Peripatetica explicanda sunt, vt satis constat.

*An animā iuncta corpori, valeat per Ideas
intelligere.*

CAP. III.

DAlet proculdubio homo, per rationes animæ insertas, de rebus rectam habere opinionem; & ideo opinio ita dicitur esse hominis propria, vt intelligentia Deorum. At, num valeat anima corpori iuncta, ad ideas eleuari; & per eas intelligere; non levis est dubitatio. Non enim apparet; quomodo animā adeo depressa, adeo terrena mole grauata, valeat ad supernā idearum lucem extolli, cum eisque coniungi. Insuper non apparet; quomodo iuncta corpori; sine virtute imaginādi intelligere valeat. Vulgata est Peripateticorum sententia, oportere intelligentem phantasmata speculari: in nexu autem animæ cum mente, & ideis, anima imaginationis ope non ampliùs vtitur: non itaq; apparet, animam iunctam corpori per ideas posse intelligere. Attamen si ad Platonis verba, & sententias conuertimur; asserendum est; hominem posse quidem, sed cum difficultate; & rarò per ideas intelligere. Hoc affirmavit Plato in Timæo inquit; Veræ opinionis virum quemlibet esse particeps; intelligentiæ verò, Deos quidem omnes, homines verò particeps, &c. at intelligentia ea est; quæ ad ideas ani-

cientes; iure nos ad ideas eleuant, & cum eis animam neētunt. Propterea non iniuria Plato in Phædro alas animi augeri asseruit illis omnibus, quæ ad superna nos eleuant; vt Pulchritudine, Sapientia, & similibus: & conueniente metaphora in eodem dialogo considerauit currum vitarum animæ, Aurigam eius, equos ducentes, calcaria; & demum cuncta conferentia ad animæ eleuationem, eiusque nexum cum mente, & ideis. Simplicius in tertium de anima rectè dixit, animam nonnunquam viuere vitam separatam, quamuis sit iuncta corpori: quod verum est ex sententia Platonis, at ex sententia Aristot. nequaquam: nunquam enim anima, iuxta Aristotelem, sine imaginatione operatur; verum semper habet imaginationem antecedentem: at ex sententia Platonis secus se habet. Ratio diuersitatis est; quoniam, ex sententia Aristotelis, nostra scientia penitus pēdet ex phantasmatibus: ex opinione verò Platonis, phantasmata solùm excitant; at propriè sumpta intelligibilia, seruantur in substantia animæ, & mentis. Hinc pendet, quòd Plato, & Aristoteles, in alio dissentire coguntur; si seruare volunt initia, & fundamenta sua: Nam ex sententia Arist. intellectus non seruat; sed desinente actu intelligendi, solùm seruantur phantasmata ad imaginationem pertinentia: At ex opinione Platonis; in virtute imaginandi, seruantur phantasmata; in anima rationali, rationes; in men-

te ideæ per quas mens sine anime, & anima sine virtute imaginandi, intelligere valent.

De Hominis felicitate. CAP. IV.

MOmo, qui inter animalia solus mundi ciuis nuncupari meretur; cum solus sit rationis, & mentis particeps, natus præesse aliis; quoniam à cœlo descendit in terras, etiam à terris debet censerī aptus eleuari in cœlum: facilis est quidem ei descensus, ascensus verò difficilis; non ita tamen, vt studio, & sollicitudine difficultatem superare non valeat: in quo ascensu putandum est, esse positum summum bonum eius. Id ipsum ex eo patet; quoniam conspiciamus omnes homines interna quadam animi commotione felicitatem expetere, & quærere: ne autem illa naturalis propensio sit inanis, putandum est paratam eis esse felicitatem; in qua, tanquam in postremo fine requiescāt. Et præsertim; quia si secus esset, noster appetitus inaniter in infinitum progredēretur, nec finē ullū adinuenire posset. Præterea, id ipsum confirmatur; quia anima rationalis, affinitatis nexu, cum diuinis est iuncta; ideo diuinarum conditionum debet esse particeps: conditio autem, ac veluti affectio diuinorum, felicitas est. Fateamur itaque natum esse hominem assequi felicitatem: de qua variæ Philosophorū fuē re opiniones. Nam quicunque hanc solam mortalem nouere vitam, & ad futuræ notitiæ eleuari non potuerūt; in hac sola homini conuenire

uenire fœlicitatem existimarunt: è quorum numero fuerūt Peripatetici; qui, vt in futuræ vitæ cognitione, ita in fœlicitatis explicatione summopere sunt hallucinati. Quicunque verò futuram nouere vitam, vt nostri Theologi, & cum eis Plato; rectè asseruerunt, vitam hanc esse, veluti viam ad aliam; & in hac vita, vel nobis fœlicitatem non conuenire, vel conuenire valde tenuem, & paucis; adeò, vt potiùs dispositio ad fœlicitatem, quàm vera fœlicitas, homini sub orbe lunæ collocato conueniat; adeò, vt, ratione quoq; huius, homo iudicari debeat ludus Deorum. Vt autem hæc veritas clarior appareat; quid sit fœlicitas, perpédamus. Afferere, quòd summum hominis bonum, eiusque fœlicitas sit virtus, vt aiunt Stoici, falsum est. Nam virtus est purificatio animi; & propterea est dispositio ad fœlicitatem, non fœlicitas. Pariter non videtur esse dicendum eum Aristotele, quòd fœlicitas sit actio virtuti consentaneæ; quoniam actio est accidēs, quod non valet esse postrema perfectio substantiæ: insuper, omnis actio est gratia boni, respicit finem, perducitque ad aliud; ideo non ea finis est, sed potiùs medium, per quod finem attingimus. Propterea putandum est, fœlicitatem esse positam in summi boni fruitione, postremi finis consecutione, nexuque cum eo; & iure quidem: nam fœlicitas, & summum bonū, in idem veniunt; summum bonum est auctor, & finis omnium; in eius itaque fruitio-

ne fœlicitatem esse positam, censendum est. Confirmatur; quoniam ab eo solo potest absolute pendere bene esse, à quo pendet esse: homo esse habet ab vniuersi opifice; ab eo itaque solo debet sperare bene esse. Colligamus itaque fœlicitatem non esse virtutem, non cumulum humanorum bonorum, non vitam naturæ consentaneam, non actionem probam; sed nexum cum primo principio, fruitionem eius, & conformationem humani animi cum eo, vt ei licet.

Qua Via ad summum bonum eleuemur.

CAP. V.



Vulgata satis est sententia, eosdem esse gradus ascensus, & descensus; & sola ratione differre: cum itaque patuerit, per quos gradus anima à mundi opifice descēdat; etiā patere potest, per quos ascēdere valeat: descēdit anima post mentē, & ideas non participatas, ac participatas, recedēdo à se, ac ad vitas postremas declinādo; id eò, vt ascendat, debet ad se redire; & per rationes, ideas, & mentes medias, cū ipso vno, ipsoque bono coniungi. Finis postremus huius diuinæ conuersionis, & reditus, vnus est: ea verò, quæ ad hanc conuersionē nos excitāt, ac ad finē perducunt; non vnū; sed tria esse possunt: vt ex Phædro, & Phēdone colligitur: Nam Amor, Musica, & Philosophia, id efficere valēt; & ppter ea Mercurius, Venus, & Phēbus nostro ascen-

ascensui præesse dicuntur: Mercurius enim per rationes, Venus per amorē, Phæbus per Musicam eleuat animos ad sublimia. Iure etiam his tribus tribuitur munus cōuersionis; quoniam nos, vel per visum, vel per auditum, vel per rationē ad diuina excitamur, & inuitamur; visui, amor; auditui, musica; rationi, philosophia respondet. Insuper, tria sunt; quæ primò in intelligibili, mox in sensibili mundo resurgent: pulchritudo, quæ est ipsius boni splendor: ratio, siue proportio, cūm rationum animæ, tum idearum inter se; in quibus essentialiter numeri vigent, vt in earum explicatione declaratum fuit: demum essentia, & conditio rationum, & idearum: pulchritudo amorem parit; proportio excitat musicæ dilectionem; rationes, & ideæ, philosophiam formant. Ex his tribus conuersionis igniculis, philosophica est præcipua; & est talis, vt sine ea reliquæ consistere nequeant; ac suo fundamēto, & radicibus sint destitutæ. His conuersionis, ac eleuationis occasionibus valemus, & bene, & malè vti: quibus si malè vtimur, præcipites reddimur; si bene, in ipsum bonum eleuamur, in quo foelicissimè requiescimus. Vt bene his vtamur, vt incolumes à mundi fluctibus euadam⁹, vt firmi⁹, & tuti⁹ ad supera eleuemur; duos consiliarios, duos duces, duas alas nobis parare debemus: Appetitionem boni, Desiderium veri: Appetitioni boni, respondet Prudentia; Desiderio veri, respondet Sapientia.

His purgati, & muniti, cum recessu à corporeis eleuamur ad supera, & incorporea: ad quam eleuationem parant nos virtutes morales; sapientia verò proximè iungit, quatenus sapientia est nexus rationum animæ cum ideis, mentis, idearumque contemplatio: & quoniam ideæ pro parente agnoscunt ipsum vnum, ipsumque bonum; ideò anima, dum iungitur cum ideis, cum ipso vno, ipsoque bono mirabili nexu complicatur: Et quoniam hæc omnia, vel non conueniunt animæ cum mortali corpore iunctæ, vel vix, & obscurè valde conueniunt; ideo iure in Epinomide dixit Plato, paucos in hac vita, & eos obscurè valde, posse dici beatos. Et hoc fortasse voluit denotare Solon, dum asseruit, neminem ante mortem posse dici beatum; quamuis Arist. in primo de moribus, longè secus eius sententiam explicauerit. Ex his patet, in multis Aristotelem ita à Platone dissentire, vt nullus cōcilio derelinquatur locus. Aristoteles ait fœlicitatem esse actionē probam; Plato hanc probam actionem iudicat esse, vel viam, vel medium ad fœlicitatem: Aristoteles duas homini tribuit fœlicitates, vnam ciuilem, alteram contemplatiuam; Plato has esse censet vias duas miro nexu coniūctas ad fœlicitatem vnam: Aristoteles in hac sola vita homini tribuit fœlicitatem, nunquam in alia; Plato è contra, in hac vmbra, in altera veram homini nouit fœlicitatem conuenire. Aristoteles itaque pro termino viam, pro essen-

tia v-

tia vinbram coluit: Plato verò ad terminum, & essentiam, mentis aciem direxit.

Nonnulla ad felicitatem pertinentia.

CAP. VI.



Homo, qui felicitatis, & miserie est capax, & in eius manibus est positum ad vtramlibet progredi; iure in biuio collocatus esse dicitur: & in eo boni Dæmonis virtus, ingenij conueniens dispositio, humanæ sortis splendor refulget: dum, derelicta via obliqua, rectam eligit; neglectis tenebris, properat ad lucem; sprete vinbris, essentiam quærit, & magnificat. Et quoniam felicitas sumpta pro scopo, & eius essentia, est ipsum bonum; sumpta pro eo, & proximè nos necit cum scopo, est sapientia, & amor: iure, vt ad nos pertinet, & in ordine ad ea, quæ in nobis felicitatem formant; primas partes Plato in Philebo sapientiæ tribuit. Et quoniam sapientia est eleuatio ad ideas, & contactus earum; in quo cōtactu anima per mentem formatur, & ratio per ideas perficitur, & cum primo principio necitur: iure felicitas dicitur similitudo animæ cum Deo; nam in eo nexu p diuina formatur, vitamq; diuinā haurit, & recipit; ideò, vt iure Deo simillima dicatur, Insuper, quia Mēs supra cælum est posita, cū sit ab omni corpore soluta; Anima verò cum motu, & corpore complicata: ideò iure dicitur in Phædro, pertinētia ad mentē, supra cælum esse collocata, & in loco supercœlesti:

animas verò, quæ in cælum eleuantur, vnâ cum cælo circunuolui; & solùm aurigæ caput, hoc est, mentem supra cælum extolli. Ex nexu animæ cum primo principio, incomparabile consurgit gaudium; & iure quidem: nam ille nexus, est reditus animæ in dispositionem sibi per naturam, & electionem summopere congruentem; reditus autem in suam naturam, optatiq; finis fruitio, gaudium saluberrimum parit. Et quoniam obiectum est immensum, & voluntas nil aliud quærebat, nec ad aliud tendebat, nisi ad illud; iure gaudium quoque est immensum, cum nullo dolore permixtum, vniuersam expetitionem cumulatifsimè explens. Et quoniam gaudium pendet ex obiecti adeptione, nobis per sapientiam conueniente; ideo iure Plato in Philebo, secundas partes pro fœlicitatis constitutione tribuit gaudio. Ex his varia cognitū vtilia colligere valemus. Primum est, fœlicitatem nedum attinere ad facultatem animæ cognoscentem, verū etiam ad appetentem: nam sapientia, ad facultatem intelligentem; gaudium, quo inde perfundimur, ad voluntatem pertinet: & id profectò iurè cōtingit; vt omnis animæ facultas perficiatur, optimaq; dispositione fruatur. Colligimus secundo, fœlicitatem eminentiori modo conuenire intellectui, quàm voluntati: quia fœlicitas magis in eo nexu posita est, qui nobis conuenit per sapientiam, quàm in gaudio inde consurgente; gaudium enim est affectio, &
comes

comes felicitatis, non autem præcipua essentia eius. Propterea cum Scoto non sentio, qui ad voluntatem potius, quam ad intellectum censuit pertinere felicitatem: Et Marsilius Ficinus, dum in suis epistolis oppositum asserit, & confirmat; manifestissime aduersatur Platoni in Philebo, quem tamen pro facultate sectari nititur. Demum colligimus; quidnam sit ambrosia, & nectar; quibus refici, & saturari animæ equos, asseptitur in Phædro. Nam in animæ nostræ eleuatione; primò cōsideratur nutritio, & accretio alarum animæ; hoc est, virium, & appetitionum eius: quæ nutritio, & accretio dicitur fieri pulchro, sapientia, & bono; quoniam animæ vires non vehementer ad superna conspirant; nisi, munere sapiētiae, bonum & pulchrū aliqua in parte nouerint. Post alarum accretionem, quæ in animæ descensu deciderant; sequitur eleuatio, adeptio, contactusque obiecti, & eminens quædam ab ipso animæ nostræ formatio; & hoc dicitur conuiuium animarum, quæ supra cælum eleuātur: in quo conuiuium animæ, quæ saturantur, amplius non esuriunt. Postremò equis, hoc est, facultatibus appetentibus, ambrosia, & nectar offertur: & primò Ambrosia, quasi cibus; qui est expletio appetitionis, per nexum animæ cum primo omnium principio; mox nectar, hoc est, gaudium inde consurgēs; qui est, quasi potus cibum temperans, & dulcedine animam perfundens: qui cibus, & potus dici-

tur tribui equis, hoc est, facultatibus appetentibus; quoniam nutritio, & expletio ad facultatem appetentem propriè pertinent; vt etià gaudium inde consurgens. Hæc primò; & propriè Dîs conueniunt; qui supra cælum ad cōuiuium, & dapes tendere dicuntur: in propria tamen conditione, & gradu etiam conueniunt animis hominum; quatinus non ita, vt Dij, eleuentur sublimes. His metaphoris Platō eleganter, & doctè cuncta explicauit ad fœlicitatem, & ad gaudium eius comitē pertinētia; ita sublimia ingenia docuit; vulgaria verò demulsit, & oblectauit. Verum cum post varios decursus, cum post descensum à primo rerum principio vsque ad postremam materiam, iam in principium primum reuersi simus; in eoq; fœlicitatem, summum gaudium, finemque nostrum inuenerimus: conueniens esse duxi, vt Deo gratias agentes, in eo optimo fine, nostrorum laborum finem statuamus; & non sine gaudio, in eo immenso gaudio requiescamus:

Peroratio operis:

CAP. VII.



Atissimī sunt campi Platonicæ contemplationis, & à viris diuino potius, quàm humano ingenio præditis accuratè culti. Hos ego, qua potui, breuitate percurri; summa potius tangens fastigia rerum, quàm exactè cuncta perquirens:

Verfa-

Verſatus ſum præſertim in attinentibus ad contemplationem. Ciuilia verò, in quibus Academicum ſummopere refulſerunt; ob temporis anguſtiam, & quoniam eminentè inſipientia, & contemplatione contineri iudicaui, ſilentij velo obuolui: ſpero tamen, ſi Diſ mihi ocium, viresque ſuppeditabunt; in alia huius operis editione, & hæc limatiùs, & reliqua cumuſatiùs me explicaturum. Interim ex his ſatis conſtare cenſeo, inaniter eos laborare; & oppoſita, Heracliti more, in idem tentare redigere; qui Ariſtotelem manuſteſſimè à Platone diſſentientem, nituntur cum Platone conciliare. Ac inſuper conſtare cenſeo, Platonis ſententias non adeò eſſe paruipendendas, nec tam leuiter relinquendas; vt frequenter id fieri conſpicimus, vel ab Ariſtotele, vel à ſectatoribus eius. Ab Ariſtotele primò, qui sæpe ſæpiùs potiùs verba Platonis, quàm ſententiam damnat; & ſi ſententiam arguit, id efficit rationibus ſatis leuibus, facileque ſolubilibus. A ſectatoribus verò Ariſtotelis negligitur Plato: vel quia nimium in verbis Ariſtotelis iurauerunt, ei que vni, tanquam ſaxo, ſint affixi; adeò, vt eis præcluſum ſit iter liberè philoſophandi: vel quia in fertiliffimis Academicorum campis minimè verſati, eos fructus reſpuunt, quos non deguſtarunt; ac eorum iudiciũ ferre audent, q̃ minimè nouerũt. Quod viri iudicio, ſapientiãque inſignes, nequaquæ fecere; vt Diu⁹ Auguſtinus, Magn⁹ Dionyſius


Areopagita, admirabilis Galenus, Cardinalis Bellarion, Ioannes Picus, & alij quamplurimi; qui Platonem summo opere commendaverunt, vehementerque sunt admirati. Immo Theophrastus, qui nedum disciplinæ, verum etiam affinitatis nexu, cum Aristotele iunctus erat; defuncto Aristotele, in Academiam inclinavit; & Academicorum placitis, veluti illustribus ornamentis, suos libros splendidissime decoravit. Patere demum censeo, quam magnifice sententiarum varietate, & splendore animum nostrum exornent; quam facile ad sublimia nos elevent, quam pios erga Deum nos reddant; quam in multis conveniant Platonice contemplationes, cum decretis Sanctorum Patrum Christianæ religionis, cumque revelationibus Prophetarum. Quod si Platonis verba non in omnibus Christianam redolent veritatem, mirum non est; quia homo non æquatur Deo: Mirum hoc potius cense-ri debet, quod homo his tenebris circumfusus, suo ingenio tot veritati consentanea attingere valuerit. Propterea, si quid à me in his libris dictum inuenietur, quod cum decretis Christianæ religionis non conveniat; sciant omnes me id protulisse, non quia ita sentiam, sed ut Platonis sententiam patefaciam: mihi enim exploratissimum est pertinentia ad Divinam Trinitatem, ad Divinationem, ad Mundi creationem, ad immortalitatem animæ, ad Naturam & conditionem hominis, adque

adque alia huius generis, minimè fuisse notà
Philosophis; sed cognitionem eorum nos ex
sacris fontibus debere haurire: quorum de-
creta in me adeò sunt firmà, adeò certà, & ex-
plorata; vt pro eorum seruanda veritate,
etià vitam expirare para-
tus sim.



F I N I S

Libri Decimi & Vltimi.



Bb



INDEX CAPITVM OMNIVM

QVAE IN DECEM HISCE LIBRIS
continentur.

Capita Primi libri.

R ogium op- ris. Cap. 11. pag. 1	De modo cogno- scendi Deum. Cap. 2. pag. 15
De ipso Vno. Cap. 3. 18	De ipso Bono. Cap. 4. 22
Defenditur Plato à calum- niis Peripateticorum de Idea boni. Cap. 5. 27	De ipso Pulchro Cap. 6. 31
De nonnullis, quae Deo tri- buuntur. Cap. 7. 35	Vbi sit Deus. Cap. 8. pag. 38
De providentia. Cap. 9. 40	An Mundus ab aeterno e- manauerit à Deo, opinio- nes aliorum. Cap. 10. 44
Alia opinio de Mundi De- pendentia à Deo Ca. 11. 48	Sensitio. Anterioris propria, & dissolutio difficultatis Cap. 12. 52

Capita Secundi libri.

D e Mente, an re distin- guatur à Deo Cap. 1. pag. 56	Quid sit Mens. Cap. 2. 59
--	---------------------------

De principiis, & generibus rerum. Cap. 3. 60	Quomodo in Mense sint prin- cipia rerum. Cap. 4. 63
Quomodo in prima Menie sint quinque genera rerum. Cap. 5. 65	Conditiones nonnullae pri- mae Mentis. Cap. 6. 67
Aliae primi Entis conditio- nes. Cap. 7. 68	De numero mentium. C. 8. 71
De Aeternitate, & Aeuo. Cap. 9. 73	Aristotelis sententia, eiusque cum Platonica collatio. Cap. 10. 76
De Gradib. Entis. C. 11. 78	

Capita Tertij libri.

A n Idea sint. Cap. 1. pag. 81	Inuentores Idearum. Ca. 2. 83
Quid sint Idea. Cap. 3. 85	Cui conueniant Idea. C. 4. 89
Quomodo in Mente se ha- beant, & consurgant I- deae. Cap. 5. 91	Conuenientia, & differen- tia Idearum. Cap. 6. 94
Quorum non sint Idea C. 7. 96	Vtrum Mathematicarum for-

MAIUS

marū dentur <i>Idea</i> . Ca. 8.	
pag.	100
Quorū sint <i>Idea</i> . C. 9.	104
Quos vsus præbeant <i>Idea</i> . Cap. 10.	108
An <i>Arist.</i> in disputatione de <i>Ideis</i> , cum <i>Platone</i> debeat conciliari. Cap. 11.	111

Capita Quartilibri.

Q uid sit <i>Anima</i> , ex al- iorum opinione. Cap. 1.	pag. 116
Quid sit <i>Anima</i> , opinio <i>Pla- tonis</i> . Cap. 2.	118
Qualis numerus conveniat <i>animæ</i> . Cap. 3.	121
Quomodo <i>Anima</i> dicatur movere seipsam, & esse i- nitium motus. Ca. 4.	125
Quæ à <i>Peripateticis</i> obii- ciuntur <i>Platoni</i> , & an debeant conciliari. Ca. 5.	pag. 127
De <i>Animæ</i> generatione. Cap. 6.	132
De <i>Animæ</i> compositione. Cap. 7.	135
Quod <i>Anima</i> sit mediæ cu- iusdam naturæ, & con- ditionis. Cap. 8.	136
An omnis <i>Anima</i> sit immor- talis. Cap. 9.	139
Solutio difficultatū. Cap. 10.	pag. 144
De Vehiculis <i>Animarum</i> . Cap. 11.	148

De <i>Animæ</i> descensu. Ca. 12.	pag. 154
Quomodo <i>anima</i> sit in cor- pore : & de sede eius. Cap. 13.	157
Comparatio inter <i>Aristote- lis</i> , & <i>Platonis</i> opinionē. Cap. 14.	163

Capita Quinti libri.

M undum esse anima- tum. Cap. 1.	166
An mundi <i>anima</i> distingua- tur à Deo. Cap. 2.	168
Qualis sit <i>anima</i> <i>Mundi</i> . Cap. 3.	170
De <i>Fato</i> . Cap. 4.	173
An <i>Plato</i> , & <i>Aristoteles</i> de <i>Fato</i> conveniant, & an om- nia <i>Fato</i> fiant. C. p. 5.	175
An quæ sunt <i>Fato</i> fiant ne- cessario. Cap. 6.	179
De <i>Parcisi</i> . Cap. 7.	183
De <i>Animis</i> <i>Sphærarum</i> . Cap. 8.	186
De <i>Pythagoreo</i> <i>Cali</i> <i>Sono</i> , & <i>Animis</i> <i>Elementorū</i> . Cap. 9.	189

Capita Sexti libri.

D e multiplici nominis <i>Dæmonum</i> signifi- catione. Cap. 1.	194
An dentur <i>Dæmones</i> , sen- tentia <i>Arist.</i> Cap. 2.	198
An dentur <i>Dæmones</i> , sen- Bb 2	

INDEX.

essentia Plat. Cap. 3.	202
Quid sit Damon. Ca. 4.	204
Gradus Damonis. C. 5.	208
De nonnullis affectionibus ad Demones pertinenti- bus. Cap. 6.	213
Munera Damonis. C. 7.	218
An dentur Demones mali. Cap. 8.	220
De Sylvanis, Faunis, & si- milibus. Cap. 9.	223
De nutritione Damonum. Cap. 10.	225
Quomodo vel in statuas, vel in homines irahantur Demones Cap. 11.	227

Capita Septimi libri.

I ntentio, & Ordo explica- tur. Cap. 1.	230
De Natura. Cap. 2.	233
Opinionis Platonica de Na- tura, clarior explicatio. Cap. 3.	236
Divisio Nature in univer- sale[m] & propriam. C. 4. pag.	239
De Mundo corporeo. Cap. 5. pag.	242
Quomodo Mundus sit vnus. Cap. 6.	244
De principiis proximis cor- porei Mundi. Cap. 7.	248
De Materia, & Priuatione. Cap. 8.	252
Quomodo Materia cogno- scatur. Cap. 9.	257
An Materia sit genita, &	

Mundi generationem an- tecedat. Cap. 10.	260
Conditiones nonnullae Ma- teriae Cap. 11.	263
An Materia bona, vel ma- la censeretur debeat. Cap. 12. pag.	266
Quomodo Numeri, & Fi- gurae sint initia rerum. Cap. 13.	268

Capita Octavi libri.

D e primis corporibus. Cap. 1. pag.	273
An Calum sit essentia quin- ta, penitus distincta a na- tura quatuor elementa- rum. Cap. 2.	277
Solutio dubitationum. Ca. 3. pag.	281
An Plato de quinta calis es- sentia debeat cum Arist. conciliari. Cap. 4.	285
De calis compositione. C. 5. pag.	290
De gradibus animalium sim- plicibus corporibus re- spondentium. Cap. 6.	293
De Motu calis. Cap. 7.	295
An calis Motus sit naturalis. Cap. 8.	300
An Terra moveatur in or- bem. Cap. 9.	304
De causa requietis Terrae in medio. Cap. 10.	308
De Grauitate, & Leuitate. Cap. 11.	310
Comparatio opinionis Ari- stotelis	

INDEX.

<i>Notetis eam sententia</i>	
<i>Platonis in nuper dictis.</i>	
Cap. 12.	312
<i>De differentiis positionis</i>	
<i>Mundi. C. 13.</i>	315
<i>In quibus Plato ab Arist.</i>	
<i>reprehendatur. Cap. 14.</i>	
pag.	317

Capita Noni libri.

D E Mixtis inanimis.	
Cap. 1.	321
<i>De Plantis. Cap. 2.</i>	323
<i>De Animalibus ratione ca-</i>	
<i>rentibus. Cap. 3.</i>	327
<i>De Homine, an sit sola ani-</i>	
<i>ma vel aggregatū ex ani-</i>	
<i>ma, & corpore, opinio-</i>	
<i>nes variae. Cap. 4.</i>	330
<i>Solutio difficultatis. Cap. 5.</i>	
pag.	332
<i>Hominem esse monstrum,</i>	
<i>& ludum Deorum. C. 6.</i>	
pag.	336
<i>De præcipua Hominis pro-</i>	
<i>prietate. Cap. 7.</i>	341
<i>De gradibus in acquiren-</i>	
<i>da Scientia. Cap. 8.</i>	342
<i>Alia graduum cognitionis</i>	
<i>explicatio. Cap. 9.</i>	347

<i>Quæ mereantur nuncupa-</i>	
<i>ri Scientiæ. Cap. 10.</i>	350
<i>Quomodo in nobis de Re-</i>	
<i>bus fiat iudicium. C. 11.</i>	
pag.	353
<i>Quomodo in nobis produ-</i>	
<i>catur Scientia. C. 12.</i>	357
<i>An Scire sit reminisci. C. 13</i>	
pag.	360
<i>Quæ à Peripateticis obij-</i>	
<i>ciuntur Platonij. Cap. 14.</i>	
pag.	362

Capita Decimi libri.

D E humana felicitate.	
<i>differendum pro-</i>	
<i>ponitur. Cap. 1.</i>	367
<i>De Animi habitibus. Cap. 2.</i>	
pag.	368
<i>An Anima iuncta corpori,</i>	
<i>valeat per Ideas intelli-</i>	
<i>gere. Cap. 3.</i>	371
<i>De Hominis Felicitate. C. 4.</i>	
pag.	374
<i>Qua via ad summum bonū</i>	
<i>eleuemur. Cap. 5.</i>	376
<i>Nonnulla ad Felicitatem</i>	
<i>pertinentia. Cap. 6.</i>	379
<i>Peroratio Operis. Cap. 7.</i>	
pag.	382

FINIS.

1811





